



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>



This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.




J

96. d. 14.





Vertical line on the left side of the page.



BIBLIOTHEK

DES

LITTERARISCHEN VEREINS.

IN STUTTGART.

LVII.

STUTTGART.

GEDRUCKT AUF KOSTEN DES LITTERARISCHEN VEREINS.

1861.

96. d. 14

PROTECTOR
DES LITTERARISCHEN VEREINS IN STUTTGART:
SEINE MAJESTÄT DER KÖNIG.

*

VERWALTUNG:

Präsident:

Dr A. v. Keller, ordentlicher professor an der k. universität in Tübingen.

Kassier:

Dr Zech, ordentlicher professor an der k. universität in Tübingen.

Agent:

Fues, sortimentsbuchhändler in Tübingen.

*

GESELLSCHAFTSAUSSCHUSS:

Dr Böhmer, stadtbibliothekar in Frankfurt a. M.

G. freiherr v. Cotta, k. bayerischer kämmerer in Stuttgart.

Dr K. v. Gerber, kanzler der k. universität in Tübingen.

Hofrath dr Grimm, mitglied der k. akademie in Berlin.

Dr G. v. Karajan, vicepräsident der k. akademie in Wien.

Dr E. v. Kausler, vicedirector des k. geheimen haus- und staats-
archivs in Stuttgart.

Dr Klüpfel, bibliothekar an der k. universität in Tübingen.

Dr O. v. Klumpp, director der k. privatbibliothek in Stuttgart.

Dr Maurer, ordentlicher professor an der k. universität in München.

Dr Menzel in Stuttgart.

Dr Pauli, ordentlicher professor an der k. universität in Tübingen.

Dr Wackernagel, ordentlicher professor an der universität in Basel.

TRANSLATIONEN

VON

NICLAS VON WYLE

HERAUSGEGEBEN

DURCH

ADELBERT VON KELLER.

STUTT GART.

GEDRUCKT AUF KOSTEN DES LITTERARISCHEN VEREINS

NACH BESCHLUSS DES AUSSCHUSSES VOM FEBRUAR 1860.


1861.



DRUCK VON H. LAUPP IN TÜBINGEN.

TRANSZLATZION:

ODER TÜTSCHUNGEN DES HOCHGEACHTEN NICOLAI
VON WYLE: DEN ZYTEN STATSCHRIBER DER STAT
ESSELINGEN: ETLICHER BÜCHER ENEE SILUIJ: POGIJ
FLORENTINI: FELICIS HEMERLIN: DOCTORIS. MIT
SAMPT ANDERN SCHRYFFTEN: DERN XVIIJ. NACHEIN-
ANDER UNDERSCHYDENLICHEN MIT IREN FIGUREN
UND TITELN BEGRIFFEN SINT.



I.

[1^b] Item in der ersten translatze dises büches von Euriolo vnd lucrecia wirt funden ain grosser fremder handel ainer bülschafft vnd darinne alle eigenschaft der liebe vnd was die gebürt! besunder daz darInne allwegen entlich mer
 5 bitterkait dann süsse vnd mer laides dann fröiden funden werd vnd darumb die syg zefliechen vnd zemyden.

II.

Item in der andern translatze von gwiscardo vnd Sigismunda! wirt funden ain laidsamer truriger vsgange ainer bülschafft vnd grosser liebe zwüschen disen zwayen menschen des
 10 der vatter Tancredus ain vrsachh was daz er die selben sigismundam sin tochter zelang verhielt vnd nit usgeben wolt in elicher verhyrung.

III.

Item in der dritten translatze wirt funden ain getrüwer nutzlicher räte wie ein mensch der vf der bülschafft in vnordenlicher lieb gebunden vnd gefangen ist sich dero mug ledigen vnd die band siner gefencknusz brechen Mit mancherlay
 15 warnungen leeren vnd vnderwysungen hier zü dienende.

IV.

Item in der vierden! Als dem rychsten vnd mechtigosten der cristenhait burger Cosmo de medicis zü florentz die statt
 20 verboten wart vnd er sins rätz vnd gewaltes da selbs entsetzet etc. wirt funden ain costlicher troste von poggio florentino dem selben poggio gegeben! Vnd daz er das ains vesten gemütz tragen söll! dann was daz gelück geb! mug es ouch nemen etc.

V.

Item in der fünften translatze wirt funden ob ain wirt gest ladende, danck sagen söll sinen gessen daz sy komen syen oder billicher die gest dem wirte daz sy geladt vnd von Im wol gespysset syen.

VI.

5 [2] Item in der sechsten translatze wirt funden, ob ain alten mane geburlich syg jm ain elichs wyb zenemen vnd ob weger ain jungfröwen oder ain witwen oder ain altes wybe! vnd welches er diser dryen ains tüg! was jm dann hierjnne begegnet werd! vnd wie sich er darjnne gebürlich halten sol
10 mit vil andern leeren.

VII.

Item in der siebenden translatze findet man Als der grosz alexander die statt athenas belegert hatt vnd jm begert xxiiij. der eltsten vsz dem athenischen rät! hin vs zegeben etc. was da von den seben athenischen gerätschlaget vnd alexandro
15 wyslich geantwort wart vnd durch ire wysheit sin zorn gestillet vnd erleschet.

VIII.

Item in der achten translatze wirt funden wie sanct bernhart sinem brüder raymundo ritter vf des bitte vnderwysung geben hât wie er sin huse vnd sin husgesind wyb kinder
20 dienstknecht vnd mägt regieren erkennen vnd halten söll mit vil andern anhangen hushablicher dingen güt zewissen etc.

IX.

Item in der nünden translatze findet man von den lollharten vnd beguden vnd wem daz hailig armüsen zegeben syg vnd wem nit! vnd ob die priester daz armüsen nemen oder
25 Iren ritterlichen solde! vnd waz sy irer pfründen halb zetünd pfichtig syen! vnd besunder ob cristus daz armüsen genomen hab oder nit vnd vil vnd mancherlay ander dingen deshalb Ingezogen daz zewissen güt ist.

X.

Item in der zechenden translatze an den durlüchtigen hertzog sigmunden von österrych gestellet etc. wirt funden ain räte zu lernung der geschriften vnd was nutzes vnd frucht hiervon entsteen mugen vnd besunder fürsten vnd herren so
 5 land vnd lütte regieren sollen! vnd des gelychen [2^b] den landen selsb vud Iren vndertänen.

p. 198

XI.

Item in der ailften translatze findet man wie vnd warumb zü zyten des consilis zü Costentz Maister Jeronimus ain Jünger maisters hansen hussen verbrennt wart als ain ketzer
 10 des geloubens vnd was schöner rede Er tett vnd wie keck vnd vest er belaib bisz in sin ende.

p. 221

XII.

Item in der zwölfften translatze wird funden wie Enee siluio trömet! daz er in das ryche der künge fröw gelück komen wer vnd wie er da seche vnd erkante den stande vnd
 15 daz wesen der gantzen welte vnd was dise künigin mit Im vnd was er mit ir hinwiderumb redte des gelückes halb vnd wer wie vnd durch was man diser künigin das gelücke aller beldest möcht erwerben etc.

p. 231

XIII.

Item in der drizehenden translatze von dem guldin esel
 20 Lutziani! wie ain mensch vf der bülerye durch zouberye verkert wart in ainen Esel! vnd der selb noch dann in jm behielt menschlich vernunfte! vnd ain gantz vmbgend Järe ain esel belaib! -vnd was lydens vnd vngemachs Im in der zyt widerfür vnd doch zületscht näch vs gange des Järes widerumb zü
 25 ain menschen wart.

p. 248

XIII.

Item in der vierzechenden vindet man ain ziere kostliche red vnd wider rede von dem adel was der syg vnd woher er kom Mit anzaigung mancherlay exempeln vnd historien alter

dingen die fremd vnd lustlich sint ze hören vnd güt ze wissen.

XV.

[3] Item in der fünfzechenden translatze werden funden
zwen loblich tröste des hochgelerten mans francisci petrarcha
5 Des ersten ainem der mit vnschulde siner eeren von dem püfel
geschuldiget vnd angelogen wirt! Vnd wie in vergangen zyten
sölichs den frömsten vnd redlichosten mannen aller maist be-
gegnet syg vnd ir wenig des yemer mugen vertragen sin etc.
Vnd in dem andern ain troste ainem dem sin elich husfröwe
10 gestorben ist.

XVI.

Item in der sechszechenden schrifte vnd die kain trans-
latze ist wirt funden lobe der fröwen wie die ye wälten her
Ire man hier jnne vbertreffen haben in der haidenschaft vnd
in der Jvdischhait der alten ee vnd noch hütt by tage vnder
15 fröwn vnd mannen diser zyten.

XVI I.

Item in der sibenzechenden translatze wirt funden ain
costliche vnd zierliche red von poggio florentino getân vor
dem gantzen colleye der Cardinälen zû zyten als babst nico-
laus zû rôme wart erwellet zû babste! Vnd darInne ouch wes
20 die fürsten vnd grossen herren anzemanen sint.

XVIII.

Item in der achtzehenden vnd letsten schriften die ouch
kain translatze ist werden funden ettlich leeren vnd vnderwy-
sungen von vberschriften wie man die gebürlich tûn söl vnd
mug. ouch wie etlich gewonhaiten hierInne syen die billicher
25 miszbruhe danne gewonhait genennet wurden vnd billicher
vermitteln dann geübet etc.

[3b] Dem edeln hochgelerten vnd strengen herrn Jergen von
 absperg ritter vnd doctor der rechten minem lieben herren
 günnner fründ vnd gebieter Enbütt jch niclās von wyle, des
 hochgebornen herren herrn Vlrichs grauen zů wirtemberg vnd
 5 zů Mümpelgarte etc., mines gnedigosten herren minster cantzler
 vil hail. du häst (fürtreffender vnd wytverrümpfter mane) vor
 langem! als du des yetz genanten mines gnedigosten herren
 lanthofmaister gewesen bist! min translatze vnd tütschung
 boecy de consolacione philosophie zů meren mälen gelopt vnd
 10 mir geräten? die gedruckt, vsz zegeen lassen Vnd als jch das
 dozemäl nit tün mocht, vrsachen halb, daz das letscht büche
 nit gantz zů end gebracht was! rietest du! daz jch doch
 dann etlich ander miner translatzen vnd schriften! die jch
 in vergangen zyten vß schwerem vnd zierlichem latine nit äne
 15 arbeit zů tütsch gebracht hett! wölt lassen trucken vnd
 vsgeen! vmb daz die menschen, vil klüger dingen dar Inne
 begriffen! vnd so zewissen güt sint ouch antailhäftig werden
 möchten, vnd ir gemüt zů zyten darmit in kurtzwyle ergetzen.
 wie wol jch nu waisz dero vil sin! die dise min translaciones
 20 schelten vnd mich schumpfieren werden vnd sagen! daz die
 an vil enden wol verstentlicher möchten worden gesetzt sin,
 dann von mir beschechen syg noch dann dinem räte vnd güt
 beduncken näch (die ich acht sin oraculum appolinis) so wil
 ich sölich min translaciones yetz lassen vszgeen! bis vf boecium
 25 den jch noch etlicher vrsachen halb wil verhalten. vnd gestee
 disen maistern minen schumpfierern jrer schuldigung nechst
 gemelt danne war ist, daz jch in der ersten translatze von
 Euriolo an den anfang in der andern epistel von Enea siluio
 an marianum sozimum gestellet! dise latinischen wort (Sed
 30 inuenies ali[4]quos senes amantes, amatum nullum) Also hab

getütschet vnd transferyeret! du findest alber- etlich alt lieb-
 habend mane! aber liebgehaptten kainen. Welche wort Ich
 wol verstentlicher hett mugen setzen also. du findest aber
 etlich alt mane die fröwen liebhabent! Aber kainen alten
 5 findst du, der von fröwen werd lieb gehept. jch waiß ouch
 daz mir so wyt vßlouffe hier Inne erloupt gewesen wer näch
 dem vnd oracius flaccus in siner alten poetrye (als du waist)
 schribet! daz ain getrüwer tolmetsch vnd transferyerer! nit
 sorgfelig sin söll! ain yedes wort gegen ain andern wort
 10 zeverglychen, sunder syge gnüg! daz zû zyten ain gantzer
 sine gegen ain andern sine verglychet werd. als ich dann
 ouch oft vnd vil in disen nächfolgenden translatzen an andern
 orten getân han vnd etwenne genötiget tûn müst! von ge-
 bruch wegen tütscher worten gegen den latinischen! dero
 15 der grösser folle ist, in dem latine (als wir dann oft mit ain-
 andern von sölichen worten, etas senium senectus. vnd mens
 animus. felix beatus. vnd der gelychen hunderterlay geredt
 hant, daran vns gebruchh ist aigenlicher tütscher worten vnd
 darumbe man die vmbreden muß. daz Ich aber kom da hin
 20 ich wolt, vnd verstanden werd, warumb ich dise translaciones
 vf das genewest dem latin näch gesetzet hab! vnd nit geachtet!
 ob dem schlechten gemainen vnd vnernieten man das vnuer-
 stentlich sin werd oder nit. das ist darumb. Ich waisz du
 häst gelesen daz leonardus aretinus der gröst vnd beste redner
 25 vnd dichter, so zû vnsern zyten gelept hât in ainem tractât
 de studys literarum, schribet der hochgeborenen vnd wolgeler-
 ten fürstin baptiste de malaleste, die dann zû diser kunst
 wolredens vnd dichtens (die wir nennent oratoriam) entzündet
 waz! daz sy nit durch ützit belder vnd bas zû sölicher be-
 30 gerter kunste komen noch die [4^b] erfolgen möcht! danne
 daz sy oft vnd vil lese in geschriften güter vnd zierlicher
 gedichten vnd sich darInne emsenklich übte! vnd lesung
 grober vnd vnzierlicher gedichten vermitte vnd die fluch als
 ain dinge hieran aller grösten schaden geberende. disen räte
 35 hât ouch geben der hochgelert poet Eneas siluius dem dur-
 lüchtigen fürsten vnd herren hertzog Sigmunden von österrych
 zû zyten siner Jünglikait in ainer epistel die in disen minen
 nächfolgenden translacionen ouch funden wirt. Vnd sagent

dise bed. daz durch sölich emsig lesung güter vnd zierlicher
gedichten! dem lesenden menschen, haimlich vnd verborgenlich
näch vnd nach wachse, ain naigung geschicklichkait vnd arte!
daz der selb mensch ouch vf sölich form werd vnd müsz arten
5 zereden zescriben vnd zedichten. füro hort ich ains mals als
ich zü nüremberg rätschryber was! von dem hochgelerten wyt
verrümpften redner hern gregorien haimburg beder rechten doc-
tor! den du allain! an kunst wysheit vnd gesprechnüsz yetz
tüst verglychen von vns ersetzen (got syg jm barmhertzig) daz
10 er sagt! daz ain yetklich tütsch, daz usz gütem zierlichen vnd
wol gesatzten latine gezogen vnd recht vnd wol getranferyeret
wer! ouch güt zierlich tütsche vnd lobes wirdig, haissen vnd
sin müste, vnd nit wol verbessert werden möcht. dem allem
näch! do mir vor zyten vil wol geschickter Jüngling, erberer
15 vnd fromer lüten kinder ouch etlich baccalary von manchen
enden her zü tische in min cost wurden verdinget! die in
obgemelter kunste schribens vnd dichtens ze Instituieren ze-
lernen vnd zevnderwysen! fielent mir zü! diser dryer höchst-
gelerter mannen rät vnd lere! die mich bewagten! daz jch ye
20 versüchen wollt! etlich costlich zierlich vnd verrümpfte latinisch
gedichte von den gelertesten mannen [5] vnser zyten in diser
kunste! gemachet in tütseh zebringen vnd aller maiste die!
so disen minen jungern lustig vnd kurtzwyilig wurden zelesen!
vmb des willen daz vsz dero emsiger lesung in Inen die art
25 wüchs dar von obgemelt ist. als bald jch aber aine oder zwo
translaciones volbrächt! vnd die an den tag kament! ward ich
von etlichen fürsten fürstin herren vnd fröwen gebetten wyter
etliche andere ding zetranferyeren! welich bitte mir wären ain
gebotte vmb nichte zeuerachten. Diser beder vrsachen halb!
30 minen jungern zü güt! vnd das ich disen herren vnd fröwen
jrs willens ouch lebte, vnd also (wie daz sprüchwort ist) mit
ainem ainigen zü gelte, zwo töchtern hin geben vnd usstüren
möcht! hab ich sölicher translacionen etwa vil gemachet! dero
ich dann als vil her näch folgent yetz läsz vsgeen dinem räte
35 näch obgemelt! Nu hab ich vor etlichen Jaren die colores
rethoricales ains tails getransferyeret vnd Jn ain verstantlich
tütsche gebrächt! vnd wird yetz von vilen gebetten! darjnne
ze volfaren die vsz zemachen vnd gedruckt hin näch zegeen

lassen! so sint ander gelert die mir daz wider rätent! sa-
 gende! daz yemer schad were! daz mancher vngelerter grober
 laye! dise loblichen kunst von marco tulio cicerone vnd an-
 dern so kostlich gesetzt, erfolgen vnd vnderricht werden sölt
 5 äne arbeit! die doch vil der gelerten nit anders danne mit
 arbeit vnd grösser flysse haben erfolget vnd zû dero verstent-
 nisz vnd bruche komen sint! deshalb lieber herre vnd gebieter
 Ich hierInn hitthabe vnd nit waisz was mir zetûn gebürret,
 danne daz Ich das diner hohen vernunft haim setz vnd gib!
 10 Und was du ainiger hierInne rättest vnd vrtailtest! dem wil
 ich leben vnd folg tûn vnd niemant anderm. wo du ouch daz
 rietest so wurd jch die exempel aller farwen vnd colorn ains
 tails wysen [5^b] vnd laiten vf dise nachfolgenden translaciones.
 In welcher vnd an welchem blatte man die finden wurd. des-
 halb aber not gewesen ist! mich in disen translatzen by dem
 15 latin (so nechst ich mocht) beliben sin, vmb daz nützit der
 latinischen subtilitet durch grobe tûtschung wurd gelöscht, vnd
 wil hiermit mich gegen disen grössen maistern minen
 schumpfierern gnûgsam verantwort han. dwyle ich aber diner
 20 wyshait allain haim geben hab zeurtailen ob ich die colores
 rethoricales söll lassen ersitzen oder zû ende bringen! so kum
 ich widerumb vf den vorgeantten doctorem gregorium hain-
 burg! der zû minen zyten zû nürenberg von aim erbern rät
 daselbs minen lieben herren besöldet was! vnd uf ain mäl zû
 25 mir redt! daz er in der latinischen rethorick wenig ützt fund
 zû zierung vnd hofflichkait loblichs gedichtes dienende! daz
 nit in dem tûtsche ouch statt haben vnd zû zierung sölicher
 tûtscher gedichten als wol gebrucht werden möcht als in dem
 latine etc. daz ich nâch emsiger erfahrung diser dingen sidher
 30 getân! yetz gantz geloub vnd dir des ain mustre schick nit
 wyter danne an den gemainen figuren die wir nennen gramati-
 cales dann warumb solt ich nit wol vnd recht reden oder
 schriben? die stat costentz das hochzyt ostern der manot
 maye? daz jm latin haissent appositiones vnd warumb nit
 35 wol? jch armer schryb so du rycher rûwest? daz jm latine
 sint euocaciones. warumb nit recht? Ich vnd du louffen du
 vnd der schribent die da haissen conceptiones numeri vnd
 personarum. so ferre man zwûschen disen worten schriben

vnd schribent louffen vnd louffent vnderschaid haben wölt in
 personis als etlich tünt. Item warumb nit? Ich niclas von
 wyle vnd Ich Cristina sin elich huszfröwe Bed burger zü
 Nüremberg etc. für burger vnd burgerin. Und Jerg rat vnd
 5 dorothea von [6] wyle sint liebhaber gotes etc. für liebhaber
 vnd liehbearin daz da sin conceptiones generis. warumb nit
 wol vnd zierlich? Ich schryb wie du. du redest wie Ich oder
 der. die zü latin genennet werden zeumates oder zeume Vnd
 warumb nit zierlich vnd recht? dise louffent. der bald vnd
 10 der gemachh. vnd dise schribent. der wol? vnd der vbel. die
 da haissent prolepses. Item warumb solt nit wol vnd recht
 geredt oder geschriben sin. bescheche aber daz wir bede oder
 vnser ains todes abgienge etc. oder bescheche daz vnser ains
 oder wir bede todes abgiengent. oder bescheche, daz vnser
 15 ains todes abgieng oder wir bede etc. vsz der satzung pri-
 sciani de verbi propinquieris conformacione also vnd dem ge-
 lych mugen die colores rethoricales vnd die transumciones
 gar näch alle in tütschen gedichten wie in dem latine gebrucht
 werden! als du selbs daz bas waist danne jch dir dar von
 20 schriben könn oder mug. aber ir grössen patrone tünt üch
 nützit annemen noch beladen! so klainer dingen sunder allain
 grösser! also daz not wer (wie tulus schreibt) daz ainer ze-
 uor ainen menschen ertötet hett der sich üwer hilf wölt ge-
 bruchen. Aber anders waisz ich sin an dir, gegenm mir!
 25 des hertze du in trüwen erkennest, vnd der du waist daz
 nützit ain wärer fründe sinem fründe getün mag gütes! daz
 er jm nit schuldig syg! vnd darumb, so wil ich des warten
 diner vrteil! darInne du dich nit abfüren lassen wöllest dises
 min langes schriben, dar usz du mich nach diner wysheit
 30 merckest (waisz ich) vf wedern taile ich genaigter wer. aber ich
 wil noch danne lieber wenig geltes mangeln! danne tün!
 daz von dir vnd andern hochgelerten sölt werden gescholten.
 jch wirt ouch noch dann nützit dester minder min translatze
 boecy de consolacione gedruckt lassen usgeen. wie wol mir
 35 dar[6^b]zü schaden komen wirt! daz nechst by vier Jären ain
 andere translatze desselben boecij ouch gedruckt usgangen
 vnd Jn werdem kouffe vertriben worden ist! Vnd haben diser
 köffern vil gewändt sölich translatze syge min gewesen! näch

dem vnd vor gesagt worden was, Das die In miner schritten
 leg vnd bald vsgeen sölte! das Ist aber mir dargegen zů
 troste! daz sölicher köffern wenig sint, die da sagent daz sy
 dise translatze mercken oder versten mugen etc. Ich heb
 5 aber dich edeln hochgelerten vnd wytverrümpften ritter zelang
 vf, mit disem minem langen schriben! Vnd ja wol zelangem!
 dan so oft Ich die federn in min hande nim! dir ützt ze-
 schriben! so waisz Ich kain rechte form me schribens noch
 rechte mäsz vf hörrens! Als jch doch yetz hie (gebruchh
 10 halb der zyt) stumpf vf hören müsz vnd wil! Mit flysz bit-
 tende, daz du mir sölich vorgemelte vrtail vnd din güt be-
 duncken hierInne! fürderlich vnd so Erst gesin mug schicken
 wöllest, vnd mich gegen minen schunpfiern wo du die hören
 wurdest! usz obgemelten vrsachen getrülich verantworten!
 15 so ferre dich beduncken werd! das du sölichs vsz wärhait
 billich vnd wol tůn mugest! wil Ich das vbrig so Ich noch
 wyter dir geschriben haben wolt! In der fädern stecken läs-
 sen! der hoffung, daz gelück schier fügen werd! daz wir
 persönlich zesamen komen vnd sölichs vnd anders muntlich
 20 vsz gerichtem. mugen Geben zů stutgarten vf dem fünften tage
 des aberellen Anno domini. M. cccc. lxxvij.

[8] **D**ER durlüchtigen hochgelopten fürstin vn fröwen fröw Mechilten geborner pfaltzgreffin by ryne vnd ertzherzogin zû österrych etc. witwen, miner gnedigosten fröwen Enbüt ich niclās von wyle der zyt Statschryber zû Esselingen Min willig
5 gehorsam vnd vnderthenig dienste zeuor.

Zû zyten des consilij zû basel (gnedigoste fröw) Als kaiser sigmund do ze mäl In küniglicher wirde gen röme zoch / vmb kaiserliche krönung daselbs ze erholen / begab sich vf dem wege, daz Eugenius zû den selben zyten babste, etwas
10 vnwillens gegen Im empfangen hatt / deshalb dann der selb sigismundus etlich manot zû Senis still lag / vnd durch ladungsbriefe (die er von demselben concili vber den benannten Eugenium erlanget) so vil schüf / daz der selb babst zû lest sinen vnwillen gegen Im abstellende, Inn wol enpfieng, bas hielt,
15 vnd aller beste von jm gekrönet komen lies. . In dem begab sich zwüschen hern Caspern schlicken kaiserlichem cantzler, vnd ainer Edeln burgerin daselbs zû Senis, ain wundersame bülschaft / die dar näch vber etliche Järe der hochgelert poeta Eneas siluius do zemäl kaiserlicher secretari vnd yetz zû di-
20 ser zyte vnser bābste pius genant, In zierlichem latine tett beschriben. doch mit verkerung der namen sölicher personen die inn das argument gezogen werden / vmb daz die nit kämen In bekennung der menschen die das lesen wurden. . Dieselben latinschen beschrybung Ich yetz zû etlicher müssiger zyte (dero
25 mir doch wenig verlichen wirt) in dises tütsche hab gebrächt vnd transferyeret. vnd [8^b] zwyfeln nit danne das vil verkerer, sölich min wercke, als ain ding mer arges dann güttes lerende, schelten werden. vnd mich schunpfieren, als ainen man, der in sölichem alter vnd wesen sins standes, des billicher hett ge-
30 fyrret / besunder wyle doch das ains gelertern mans dann ich

bin, bedörfft hett. denen ich des letsten gestee (doch daz sy
 das wo ich geirret hett wöllent bessern) vnd vf das erste
 sag. daz ich bekenn disz büchlin gütēs vnd arges in jm be-
 gryffen. Es gibt aber samenthaft in ainen knopf gefasset ze-
 5 uerstee. in yetlicher bülscher liebe allwegen entlich mer bitter-
 kait vnd laides funden werden dann süssikait mütes oder
 fröiden vnd deshalb sölich liebe, billich sin zefliechen. — Dann
 sölten wir darvmb ain ding nit schriben noch lesen vmb das
 darvnder arges vnd böses wer vermischet! so müsten wir ouch
 10 die hailigen geschrift vngelesen rümen lassen darInne geschri-
 ben stett die falschait dalade In samson, die bülschait dauids
 in bersabe, vnd des selben morde In vriam Item die getät loths
 mit sinen töchtern vnd die sünd der sodamiten. Ich wil ge-
 schwigen (durch kürtzung willen) der brüderlichen todschlegen
 15 von chaim vnd salomon begangen vnd vil anderer lasterlicher
 sachen. Es ist aber kain kunst so güt, daz sy nit durch ver-
 kerung der miszbruchenden In böse übung mug gezogen wer-
 den Welche aber menschen sich disz büchlich gebruchen wöllen
 näch sitte der binen die von blümen das beste Inen tügig vnd
 20 bekomlich zü Irem wercke samelnt vnd hinweg tragent, vnd
 das arg fürgende still ligen lassen, den selben hoff ich das nit
 minder komen zü gütēm nütze danne zü ergetzlichkeit Irs
 gemütes. Zum andern aber mich äntreffende, sag ich! daz
 wir finden den vordern [9] Cathonem schriftlich hinder Im
 25 verlässen han! daz sich lobwirdigen mannen nit allein gebürr
 vernunft zegebruchen In arbeit Ir fürgenomnen wercken, sun-
 der ouch in rüw vnd müsse. Darvmb so in sölichen hochge-
 achten mannen gelopt wirt, vsz arbeit, zemachen müsse! vnd
 vsz müsz arbeit! so main ich ouch in mindern menschen vn-
 30 billich gescholten werden, ob die selben sölicher tugend näch-
 folgende! Ir müsse gebent zü übung irer vernunft, Inen selbs
 vsz rüwe erber vnd ergetzlich arbeit machende. dar vmbe ich
 mir ouch nit schantlich sin erkennen mag, ob mir etwenne In
 minem ampt wenig rüw vnd müsse durchschickung des ge-
 35 lückes geben wirt! daz Ich dann sölich zyte vertryb mit trans-
 feryerung sölicher dingen die den lesenden künftenklich etwas
 kurczwyle geben mugen. Wyle doch güt vnd garnäch Im
 leben notdurftig ist, vnd das die alten allwegen hant gelobet,

daz wir vnser gemüt mit sorgen arbeit vnd müdi belestiget, etwenne hier von berüffent vnd mit schimpflichen kurtzwyiligen dingen zû fröiden ziechent vnd bringent. Des halb ich ye acht, mir loblicher sin! Mich disz obgemeldet wercke also
5 volbrächt han, dann daz Ich mein müssig zyte geben hett fuller trägkait, oder die näch sitt etlicher menschen hett verzert mit spilen trincken oder vnnützem geschwatze vf den gassen vnder vmstenden lüten! dar von doch künftenklich niemant ützt zû kurtzwyle oder nutze möcht entspriessen . . Aber
10 wes entschuldigen Ich mich In so langen Worten vnnütze! dann hât der hochgelert man Eneas siluius obgenant, dises ding zû latin getörren machen vnd beschriben! der sidher bābst worden ist! Warvmb [9b] solt dann ich das nit getörren tutschen vnd transferyeren, der doch zû kainem höhern
15 stande (dann ich yetz han) hoff zekomen. — Wyle ich aber dise translatze näch dem latine so gnāwist ich mocht, vnd so ferre sich ouch gepürt, gemachet hab! So ist nott wer disz büchlin recht schriben lesen oder versteen wil! das der acht hab vnd merck vf die virgel puncten vnd vnderschaide die
20 also hierInne gesetzet werden etc., ,? (). danne das klain erst strichlin, betütt ain schlechte sundrung ains wortos oder ainer oratz von der andern āne volkomenhait ainches gantzen sines. Aber die virgel also stende! gibt zemercken ainen vnderschaide zwüschen den geschriften vor vnd näch gende,
25 also doch, daz die vorder geschrift dennocht ouch nit ainchen volkomen sine hât! danne daz zû des volkomenhait etwas mer hernäch folgen mūs. Aber der punct also stende. gibt zeerkennen daz daselbs ain volkomner sine beschlossen wirt. So betüttet diser punct also gesetz? daz die geschrift dar vor
30 stende In fräg wyse zemercken ist. Wo aber ain geschrift mit zwyen krummen strichlin ingezogen wirt als hie (Jhesus cristus) so wirt die gehaissen parenthesis näch dem latine oder interposicio. vnd ist ain zaichen daz das so her näch folget dienet vnd gelesen werden mag vf das, so vor der ingezogen
35 schrifte geschriben steet! glycher wyse, als ob diese ingezogen schrifte nienert alda geschriben stünd Also habe ich mich dises punctirens hier june gebrucht wiewol etlich für disen schlechten puncten der also steet. setzent peryodum also

gefiguriert; Ich schick aber vch hochgelopten fürstin disz
 büchlin also getüschet Als miner gnedigosten fröwen! vmb
 daz üwer fürstlich gnäd [10] das zû kurtzweyl lese vnd Ir hie
 durch In disen schweren kriegslöffen (die üch (waisz ich) nit
 5 klain betrüben) vnder wylen, üwer gemüte von schweren
 sorgen ziechent. Welches büchlin üwer genäd, so vil gene-
 denklicher von mir vfnemen vnd enpfächen wöll! als vil das
 wärlicher flüsset vnd geet vsser ainem willen vnd gemüt,
 üweren fürstlichen gnäden zû allem gefallen In vndertenigkait
 10 gantz ergeben. Geben zû esselingen vf Mäntag näch dem sun-
 tag Esto Michi des Jares do man zalt von Cristus gebürt
 tusent vierhundert vnd jm zwey vnd sechtzigosten Jare etc.

[10^b] **D**Em hochgeachten vnd wolgebornen ritter hern Caspurn schlicken herren der nüwenburg, kaiserlichem cantzler vnd hauptman zû Egre vnd zû den elnbogen! sinem besundern herren! Enbütt eneas siluius poet vnd kaiserlicher secretari vil hails. — Marianus Sozimus Min lantzman von Senis bürtig, ain man so gütig vnd so grosser kunst, daz Ich zwyfeln, ob Ich sins gelychen ye gesechen hab! hät mich disz tage her gebetten! daz Ich Im beschrib zwey liebhabende menschen Vnd sagt, daz nit Irte, ob ich die wärhait fürnem! oder nach sitt der poeten die ding erdechte. Dann Er waisz sich selbs ainen man sin. Vnd du wirst wunder haben, so ich dir disen menschen vsleg.. Die nature hät an Im nützit vergessen In allen sachen, dann allain an der gestalt sins lybes. Wan er ist ain mensclin, vnd solt von minem geschlechte geboren sin, Die da klain genennet werden. Er ist gesprech vnd beder rechten gaistlichs vnd werltlichs vber vs wolgelert Er waisz all historien Vnd ist der poetrye getryben, bede latinisch vnd welsch gedicht machende. Der natürlichen kunst ist er so wissend als plato. Vnd der kunst des messens als boecius. Vnd In der kunst der rechnung gelychet er sich macrobio. Kain saittenspil Ist Im vnbekant. Vnd den buw des ackerwercks, waisz er als virgilius. Vnd In wysheit weltlicher sachen, ist Im nützit verborgen. Zû zyten siner Jugend was er anderer Sitellus ain maister fechtens vnd schirmens, vnd [11] mocht mit louffen ringen springen noch mit ander geradikait von niemant werden vberwunden. Es ist vnder wylen daz die klainen ding kostlicher sint dann die grössen, als das bewyset das edel gestain. Und wer nit vnbillich von disem man zereeden, Das Stacius schribt von thideo. Grösser tugend rychnent In klainem lybe. Vnd hetten die gött Im

gegeben gebürlicher gestalt vnd vntödemlichkait! so were er
 mit Inen ouch ain got gewesen. Aber niemant töddemlicher
 hät noch alle ding erfolgt vnd vberkomen. Ich hab aber nie
 aichen menschen gesehen dem minder danne disem hab ge-
 5 brochen. Vnd das doch wenig vberkoment vnd lernen mugen!
 So mälet er glych als anderer appelles. vnd ist ouch nützit
 schönere noch vnstrafbarere danne die bücher siner hantge-
 schrifte. Er howet gestain als praxiteles Vnd ist der kunst
 der artznie ouch nit vnwissend. Vnd Ich tûn hier zû die kunst
 10 der tugenden die den menschen recht fürent vnd regierent . .
 Ich han by minen tagen vil erkennet der geschrift hochgelert,
 vnd die noch dann nützit weltlicher wysheit hatten! Ouch
 weder gemainen nutze der landen oder stetten noch Irs aigen
 huses wisten ze regieren . . Paglarensis hatt wunder vnd
 15 schuldiget sinen mayer ainer düpstale, da der jm gesagt hatt!
 daz aines schwins müter geborn hett ailf Junger ferlin vnd
 ain Eslin nit mer danne ainen esel . . Gomicius von mailand,
 Maint sich selbs schwanger sin vnd forcht lang zyt die geburt!
 vmb daz sin husfröwe ains mäls vf Im gelegen was. Vnd sint
 20 doch dise zwen man, für gröste lichter der kunst gehalten
 worden. Ane das so findest du In andern hoffart vnd [11^b]
 gytikait. Aber diser ist milt, vnd sin huse zû aller zyt foll
 erber gesten. Er ist niemant widerwertig, beschirmt die wai-
 sen, tröst die krancken, hilft den armen, behütet die witwen,
 25 vnd kainen menschen der sin bedarf ist er versagt. Sin an-
 gesicht ist glych als socratis allwegen ainer gestalt. In wider-
 wertigen sachen erzögt er ain starckes gemüt vnd tût sich In
 gelücke nützit vberheben. Alle geschide listigkait vnd bösz
 fündigkait ist Im bekant, nit vmb daz er die tryb vnd übe!
 30 Sunder daz er sich dar vor wissz zehüten. Sinen mit burgern
 ist er lieb, den fremden holtselig, niemant hessig schwer noch
 laidsam . . Wie aber oder wär vmb ain mensch so groser
 tugend. Von mir erfordere oder beger, so ains lychtfertigen
 dinges, waisz ich nit. Aber das waisz ich! daz mir nit ge-
 35 bürlich ist Im ützt zeuersagen. Danne Ich Inn zû zyten do
 ich zû Senis was! für mengklichen sunder lieb hatt. Söliche
 liebe nit gemindert ist! sunder allein durch ferre des wegs
 geschaiden . . Der selb ouch vnder andern gauben der nature

damitte er begaubet ist, sunder fürpüntlich mit der tugend
erschynet! daz er niemantz liebe gegen Im vnfruchtbar sin läs-
set. . . Disz mans bitte maint Ich nit sin zeuerachten, vnd
han beschriben ain geschichte zwayer liebhabenden menschen,
5 vnd hierInne nützit erdächt! sunder ist disz ding zü Senis
beschehen, zü zyten do kaiser Sigmund alda lag! vnd du
ouch daselbs gegenwurtig werd vnd du dich (ist wäre daz ich
mit disen minen oren gehört han) In liebe ouch ser arbeitest.
Es ist ain statt der minne vnd die so dich bekennet hant,
10 sagent daz du Innerlichen vast [12] alda in liebe brunnest vnd
niemant ain grösser hane wer dann du. darvmb sy mainent
nützit da selbs gehandelt sin treffenlichs in bültschaft vnd liebe
dir vnwissend. vmb das so bitt ich, du wöllest dise nächfol-
gend histori lesen vnd besechen! ob ich die wärhait beschri-
15 ben hab. Vnd schem dich nit zebedencken, ob dir etwenne
des gelychen widerfaren wer! dann du bist gewesen ain
mensch vnd wer nie empfunden hät des füres der liebe, der
müs sin ain staine oder ain vnuernünfftig tiere. Wyle doch
der fürin flamm der liebe ouch (als der poet schribt) durch-
20 gangen hät das marg der götten. Vale.

ENeas Siluius kaiserlicher secretari sagt vil hails ma-
riano sozimo beder rechten lerer vnd vszleger sinem mitburger.
Du bittest mich ains dings, das sich nit gebürt Minem alter
vnd ouch dem dinen ist vngezem vnd widerwertig. dann was
25 ist! das mir yetz gar näche viertzig jerigen man gebürr von
bültschaft zeschryben? oder dir fünftzigjerigen man darvon ze-
hören? Disz ist ain dinge daz da erfröwet junge gemüt vnd
erfordert hertzen Junger Jären: Aber alt lüt sint als tügig vf-
loser der bültschaft als die Jungen sint der wyszhait; vnd ist
30 ouch nützit vngestalters dann ain alter das der minne begert äne
craft vnd machte. aber doch so findst du etlich alt liebhabend
mane! aber lieb gehapten kainen. Danne das alter ist in der
ee vnd vsserthalbe Jungen fröwen hessig vnd verschmecht vnd
tüt kain fröw ainchen man liebhaben, danne den sy sicht we-
35 sen In blüyendem muglichen alter. Ob du aber anders ützt
hörst, so ligt betrugnüz darvnder verborgen. Ich bekenn
bültsche geschrift nit zü gehören mir [12_b] hören mir! der

yetz mittentagen v̄bergangen han vnd gefürt wirt zû der ves-
 per. Aber nit minder ist dir vngebürlich söllich geschrift
 zebitten vnd zefordern dann mir zescriben. Ich sol dir aber
 zû willen werden! du lûg was du bittest. Dann als vil ain
 5 mensch der Jaren elter ist! so vil ist billicher jm sich der
 satzung vnd würckung wärer fruntschaft zegebruchen. Dar-
 vmb ob din gerechtikait nit fürcht söllich satzung vnd regel
 der fruntschaft mit dinem gebieten zeübertretten! so fürcht
 min torhait nit, die, mit gehorsamkait zezerbrechen. Wyle
 10 diner gütgetäten so vil In mir sint, daz Ich diner bitte kaine
 versagen mag, ob joch wol darvnder etwas schantlichs wer
 vermischet. Dar vmb so wil Ich gohorsam sin diner bitte yetz
 wol zechen mäl an mich beschehen vnd füro dir nit me ver-
 sagen das, des du mit so vil ernsts häst begeret. Aber nit
 15 als du bittest wil Ich ützt erdencken oder mich der poeten
 sitten vnd gedichtes gebruchen! wyle ich wol das so wär ist
 sagen mag. Dann wer ist so ain schalck der liegen wölt so
 er sich mit der wärhait möcht behelfen. Du bist oft ain bü-
 ler gewesen vnd mangelst noch nit gantz des füres Dann du
 20 wilt daz Ich dir beschrib vnd machh ain histori zwayer lieb-
 habenden menschen das an dir ain boszhait ist die dich nit
 lasset alten. Ich wirt zû willen diner begirde vnd tûn rüdiger
 vnd vnrüwiger machen die grewe diner alten krancken an-
 fechtigung der minne. dann was ist In dem gantzen vmbkraisz
 25 der welte gemainers dann die liebe der minne. Welche statt?
 welchs stettlin? welcher marckt? Welchs dorf oder huse?
 mangelt exempeln? Wer ist drissiger Jären alt, der von liebe
 wegen nie [13] ainch grosz sachh hab begangen. Ich machh
 ain rechnung by mir selbs, den liebe In tusent sorge vnd
 30 angst gefüret hät. Ich danck aber hier vmb got, daz ich zû
 tusent mälen grossen vfsetzen wider mich zû gericht, bin ich
 endrunnen, seliger dann mars den vulcanus ain got des füres
 fand ligen by Venus der göttin vnd den mit ainem ysnin bande
 angestricket hin fürt vnd Inn den andern götten erzöget ze-
 uerspotten Aber Ich wil lieber sagen vnd melden von ander
 35 lüten liebe dann von miner! Vmb daz Ich nit (So ich ains
 alten füres äschen vftrechen wölt) In mir find ainen gnaiste
 noch glüynde vnd lebend .. Ich wil aber sagen ain wunder-

sam liebe vnd garnäch vngelouplich! darInne zway liebha-
 bende menschen gegen ainander wären entzündet vnd wil mich
 nit gebruchen alter exempel sunder vszlegen brünnend fackel
 vnser zyten. Vnd du wirst ouch nit troysche noch babilonische
 5 sunder vnser statt senis liebe vnd büschaft hören! wiewol die
 ain person vsser den selben liebhabenden menschen fremd vnd
 vnder dem himel artheo geborn was. Aber man mag villicht
 etwas nutzes hier von züchen vnd nemen. Dann wyle die
 fröw die In disz argument gezogen wirt (Vmb daz sy Irn
 10 bülen verlor) mit wainen Ir trurig bekumbert sele sterbend
 vfgab! Vnd der ander darnäch niemer mer rechter fröiden
 mittailhaftig wart! So ist disz ding ain warnung Jungen lü-
 ten. Vnd darymbe so hörent vnd merckent vf die Jungen
 fröwen vnd so sy diser sache vnder richtet syen! so wöllent
 15 sy fürsechen vnd sich hüten! daz sy nit näch liebe der Jun-
 gen sich gangen verderben. Dann dise histori lert vnd vnder-
 [13^b]wyset! daz die jungen sich nit verfächent noch vnder-
 windent der ritterschaft der liebe, die da allwegen entlich mer
 gallen hät dann honges! sunder daz sy die gailikait zü rugk
 20 schlachent! die da die menschen beroubet Irer vernunfte! vnd
 daz sy anhangent der lere güter tugend, die da allein gewon
 ist zeseligen jren besitzer. Wie vil aber lasters jn liebe der
 bülschaft verborgen lig ob ymant das sust nit wiste, der mag
 des hier von wissent werden. Vale Bis gesund vnd diser hi-
 25 stori (dero du mich zescriben nöttigest) wöllest sin ain ge-
 flissner vfloser vnd mercker etc.

WAs grösser eeren angelegt vnd erbotten worden syen
 kaiser sigmunden, da er des ersten zü senis Inrait (dann du
 30 vnd ich bürtig sint) ist yetz allenthalben kuntpar! vnd offen
 Im was gebuwen vnd zügericht ain palaste by sant martan
 kirchlin vf der strässe die da für vnd geet zü der port gen
 cophorum. Vnd als dem selben die eere gaistlicher ordnung vnd
 hailigkait volbracht was, vnd er da selbs hinkam! hatt er Im
 35 engegen gän vier fröwen all vermechelt vnd von adel, gestalt,
 iugend vnd geziert garnäch gelych. Niemand tett die für tö-
 demlich sunder für göttin achten vnd schetzen! vnd weren Ir
 allain dryg gewesen, so möchte man vermaint haben sy ge-

wesen sin, die fröwen die man sagt paridem durch rûw vnd
 schlâffe gesechen han. Sigismundus aber. wie wol er alt was
 der Jaren. So was er doch schnell vnd behend In lyplichen
 begirden vnd hatt zemaal grosz ergetzlichkeit In gespreche vnd
 5 anredung hüpscher redlicher vnd [14] künnender fröwen! vnd
 fröwte sich in allen wyplichen schimpfen vnd was Im ouch
 nützit süssers noch kurtzwyligers danne angesicht minnenk-
 licher fröwen. Darvmb als er dise dryg fröwen ersach! sprang
 er von dem pferd vnd ward In dero hend enpfangen. Vnd
 10 kart sich vmb gegen sinen mitkomenden dienern vnd sprach.
 Hand Ir ye der gelych fröwen gesechen? Ich zwyfeln ob es
 sient menschlich angesicht, oder engelsch. für wäre sy sint
 himelsch. Dise fröwen naigten Ire ougen gegen die erde!
 Vnd als vil sy schamiger wurden! als vil wurden sy schöner
 15 vnd hüpscher gesechen. Danne von röte zwüschen Iren wenglin
 usgespraitet! gabent sy sölich farwen, als gibt das Indisch
 helffenbain gerötet In dem blüt des ostrums. Oder als gebent
 die wyssen gilgen vermischet mit purpurfarwen rosen. Aber
 doch vnder denen lucht für die andern mit sunderm schyne
 20 Lucrecia ain Jünglingin vnder zwaintzig Jären, geborn von
 dem geschlechte der Camillorum vud vermechelt dem vber
 rychen mane Menelao! der vnwirdig was, daz Im ain sölich
 gezierd haimant in sinem huse dienen sölt. Aber wol wirdig
 den sin husfröwe betrug vnd machte (als man spricht) zû ai-
 25 nem gehörnten hirssen . . Derselben lidmässe an gerede vnd
 lenge die andern fröwen vbertraf. Ir här was dick vnd lange
 vnd von farwe glych dem golde! das sy nit näch sitte der
 jungfröwen hinden ab fliegen lies, sunder mit gold vnd edelm
 gestaine zierlich hatt geflochten vnd vf gebunden. Ir stirn was
 30 hoch vnd gebürlicher wyte, mit kainer runtzeln entschöpfet,
 Ir ougbräwen in böglin wyse gestellet! wären mit wenig vnd
 nit dickem schwarzem [14^b] häre in rechter wyte von ain an-
 dern geschaiden. Ire ögen mit sölichem schyne luctend, daz
 ys gelych wie die sunn, die gesichten der anschöwenden men-
 35 schen täten letzen vnd bekrencken. Mit welichen ougen sy
 ouch wän sy wolt mocht töten, vnd dieselben toten (so sy ge-
 lust) wider vmb bringen zû dem leben. Ir nase näch faden-
 richte gesetzt, tett die rosenfarwen wenglin mit glycher men-

sure vnd mässe vnderscheiden. Nützit was lieplichers noch
 der gesicht lustlichers wan dise wenglin. dann als oft die fröwe
 lachtet! so oft wurden darInne klaine grüblin zû beden syten
 gefellet. Niemand sach die, der sy nit von hertzen Inner-
 5 lichen begerte zeküssen. Ir mundt was zimlicher klaine vnd
 röter korallen farwe vf das allerlustsamlichest geschicket darIn
 zebysen. Ir zene klain vnd In glycher ordnung gesetzt als
 von cristallen gemacht, da durch Ir bewegbar zung löffende!
 nit allein lieplich rede, sunder ouch gesprech gelyche aller
 10 süssystem gesange lies hören vnd luttten. Was sol ich sagen
 von der gestalt Irs kins vnd von der wysse Irer kelen vnd
 halses? Nützit was an Irem lybe vnloblichs. Ir vsswendig
 forme vnd gestalt, gab zemercken geschicklichkait Innwendiger
 form vnd vernunfte. vnd tet niemant die sechen, der nit hie
 15 durch ainen yeden man wurd vynden vnd hassen. Vber das
 so wären In Irem mund vil hoflicher schimpfrede güter
 schwencken vnd was Ir sagen vnd gesprech, wie man saget
 gehept han Corneliam ain müter der gracken, oder die tochter
 ortesy. vnd was ouch nützit süssers noch lieplichers zehören,
 20 danne Ir messig wolgesetzten worte. Ir [15] erberkait erzögt
 sy nit (als vil fröwen tûnt) mit ernsthaftigem angesichte, sun-
 der mit frölichem antlit lies sy erschynen Ir tugend rych mes-
 sigkait, nit zevil blug noch fürchtende, noch zevil gehertz vnd
 türstig, Sunder mit mitelmessiger forcht vnd schame, trûg sy
 25 In wyplichem hertzen ain manlichs gemüte. Ir klaiden wären
 manigfaltig vnd was alda kain mangel noch bruchhe weder an
 hefteln an schlossen gürteln bryseln noch an anderm. Die
 zierungen des houptes wären ouch wunderbar mit vil gemechts
 vnd zûsamenfügung goldes vnd edels gestaines Inn dem crantze
 30 vnd an den fingern gesehen. Vnd Ich mag niemer gelouben
 Helenam hüpscher gewesen sin zü zyten do Menelaus lûd zû
 gaste paridem In sin huse! noch gezielter erschinnen sin an-
 dromachen do sy in der hailigen ee hectori des ersten wart
 vermechelt. Vnder den obgemelten fröwen was ouch Katherina
 35 petrussy die vber wenig tage dar nâch gestorben ist vnd den
 kaiser hatt by Irer lyhe vnd begrebnûsz. der ouch jren sune
 vor dem grabe mit ritterschaft begaubet! Wie wol er den-
 nocht ain Junges kind was. Diser katherinam wundersam ge-

zierd vnd schöne der gestalt alda ouch erschinnen doch minder
 dann lucrecie. Alle red was von lucrecia die sähen die be-
 schöwten die lopten der kaiser und die andern alle. Wahin
 sich die kart, da hin folgten jr näch die ougen aller vmbstenden
 5 menschen. Vnd glycher wyse (als man sagt) daz orpheus mit
 dem getöne siner harpfen, mit Im hinzuge wäld stain vnd fel-
 san, also fürt die ouch mit Ir gesicht die menschen wo hin sy
 wolte. Aber doch so ward Ir ainer vnder Inen [15^b] allen
 me dann gelych oder gebürlich was mit gesicht In sy gefüret,
 10 namlich euriolus ain francke, den weder gestalt noch ryctum
 machten vngeschickt zû liebe. Er was ains alters von zwayen
 vnd dryssig Jären, nit vast langes lybes, aber ainer frölichen
 vnd gütigen gestalt mit lieplichen lüchbaren ougen stetz zû
 gnåde vnd gütiger tugend gericht vnd vermercket! nit äne der
 15 anderen siner gelidern lidmäsz vnd rechte geschiklichkait, näch
 loblicher gaub der nature. Die andern hoflüte wären langes
 vmbziechens halb vnd von ferre wegen des wegs alle worden
 blossz an gelt vnd golde. Aber diser euriolus dwyle. Er
 haimant rych was vnd Im ouch von fruntschaft wegen des
 20 kaisers stetz grosz vnd vil geschenckt wart! do erschain er
 von tag zû tage der menschen angesicht kostlicher vnd ge-
 zierter, ain lange zale siner dienern näch Im fürende, Etwenne
 angetän vnd beklaidet, mit klaidern geschlagens goldes, denne
 gemusierter guldiner tücher, denne samantz vnd cremesins ge-
 25 rötet in dem blüt des schlangen tyri vnd des gelychen ander
 costlicher vnd wercklicher tücher gespunnen vnd gewebe In
 den aller vssersten vnd wytesten der werlt landen. Ouch füro
 so wären jm söliche pfert als man sagt in ainer fabel, gewe-
 sen sin die pfert menonis gen troy kommende; nützit waz jm
 30 gebruchs zû erweckung der senften süssen hitze vnd der gros-
 sen craft des gemütes, die wir nennent die liebe! dann allain
 müsse. darvmb gesigt In Im iugend mütwil vnd gailikait Ouch
 das frölich güt des gelückes, da mit die selb liebe wirt gefüret,
 Also daz Euriolus füro sin selbs nit mer mechtig waz Vnd
 35 lucreciam ansehende, die Inbrünstenklich anhüb lieb zehaben
 vnd nützit maint sich gesehen han Er seche dann [16] die,
 dero gestalt er stetz anhangt vnd die er trüg in sinem
 hertzen. Er hatt ouch die mit lieb vergebens vnd äne wider-

geltung der liebe. Es ist ain wundersam ding zesagen. Es
 wären alda vil Junger mannen hüpscher fürpüntlicher gestal-
 ten. Aber allain disen tett lucrecia. Ir selbs erwellen. So
 wären ouch da selbs vil fröwen wolgestalter formen vnd lyben!
 5 Aber allain dise tet jm euriolus erkiesen Doch so wist noch
 erkant desselben tags Ir entweders, namlich weder lucrecia
 den flammen euriols. noch hin widerumb euriol gegen jm den
 flammen lucrecie! sunder so maint ir yedes sich selbs vmb
 sust liebhaben. als aber die gaistlich eererbietung des kaisers
 10 houpte zû gericht, ain ende gehept hatt, vnd lucrecia haim
 kam! ist ir gemüt gantz gefürt in euriolum vnd euriols ge-
 müt in lucreciam. wer wil nu wundern die fabel vnd rede die
 da ist von tisbe vnd piramo! zwüschen denen doch des er-
 sten nächpurschaft tett machen bekantnusz vnd die ersten
 15 staffeln Irer liebe dann dwyle Ire hüser anainander gelegen
 wären, do wüchs durch zyt ir liebe. aber dise hatten vor ain-
 ander nie gesehen, noch durch lümden noch von hörsagen
 ainander ye erkennenet vnd waz diser ain francke vnd die ain
 welchin, so wären sy ouch sament nie zû rede komen, sunder
 20 so ist disz ding allain mit ougen gehandelt worden, das ir
 yedes dem andern ist worden gefellig. Als aber lucrecia also
 verwundt gewesen ist mit swerer sorge vnd mit blindem füre
 gefangen! vergas sy sich selbs vermechelt sin vnd hasset iren
 mane. vnd ire wunden der liebes fürende, trüg sy das angesicht
 25 euriols jngedenk vnd haftende in der brust irs hertzen, gantz
 kain rüw iren gelidern lässende, vnd redt mit ir selbs also
 vnd sprach. jch waisz nit waz Ir ret, daz jch minen man nit
 mer liebhaben mag, mich hilffet [16^b] nützit mer sin früntlich
 halsen vnd vmbfächen! nützit fröwet mich sin küssen! so ge-
 30 beren mir sine wort verdriessen. Zû aller zyt ist vor minen
 ougen die bildung vnd gestalt dises frömden menschen der
 hüt dem kaiser aller nechist gewesen ist. Aber schlach vs du
 vnselige die enpfangnen flammen vsz dinem küschen hertzen.
 Ja möcht jch. so wer ich nit siech vnd krancke als jch bin.
 35 Nüwe craft vnd macht tünt mich ziehen jn ain ander leben.
 Ain anders rätet lyplich anfechtung ain anders rätet min ge-
 müt vnd vernunfte. Ich waisz welches das besser ist, aber
 dem böser folg jch. O fürpündige edle vnd hochgelopte bur-

gerin. was ist dir mit ainem frömden gaste ze tûn? wes bren-
 nest dich In vszwendiger liebe? wes begerest du ainer schläf-
 kamer ain fremden landes? jst dir din man miszfellig, so mag
 disz ertrich dir ouch geben ainen andern den du lieb habest.
 5 Aber we mir, desselben ist nit ain sölich angesicht als des.
 wer ist den nit bewege, des form, alter, geburt, vnd tugend?
 zwâr min hertz bewege er. vnd er tue mir dann hilff so ver-
 zwyffel ich. Got schicks zumbesten. Aber pfydich. Solt ich
 miner küschen ee bruchig werden? vnd gegen ainem fremden
 10 (Ich waisz nit wem ich getruw) der so er mich gehept hett
 nâch sinem willen) darnâch hin weg schiede vnd ainer andern
 fröwen man were vnd mich verliesse. Aber dem sicht er nit
 gelych. disz gibt er nit zeversteen der adel sins gemütes noch
 die form siner gütigen gestalte, daz ich söll fürchten geuerd
 15 oder vntrûw der liebe. vnd er wirt mir vor geben vnd ver-
 haissen sin trûwe. wes fürcht ich dann daz, das sicher ist?
 verfahe ich mich disz dinges vnd schlahe zû rugk alle forchte
 dann ich bin so hüpsch, daz er nit minder haben wil mich
 dann ich Inn. Ewenklich wirt er sich mir geben! [17] wo er
 20 ainist jn min fruntschaft vnd küsse zû gelâssen wirt wie vil sù
 we vmb gand mich allenthalben wa hin jch kere? wie vil pu-
 ren wachent stetz vor minen turen? wâge jchs vnd geb hilff
 der liebe. Aint weders wirt er by mir belyben hie? oder so
 er hinweg zücht mich nemen mit Im. Darvmbe verlâsse Ich
 25 min mûter minen man vnd min haimant. Min mûter ist zû
 aller zyt ernsthaftig wunderlich vnd widerwertig minen fröi-
 den. Ich wil lieber mangeln mins mans dann den haben. alda
 ist ains yeden menschen haimant, da jnn gelust zeleben.
 Aber minen lûnden wirt jch verlieren. Was wil ich der men-
 30 schen rede, die ich nit hör. der mensch getar niemer ützt
 fürnemen noch wâgen der sich zevil flisset ze leben nâch gûtem
 lûnden. Vil ander fröwen haben disz ding ouch getân. He-
 lena wolt werden gefangen vnd paris fûrt die mit hinweg mit
 jm wider jren willen. Was sol jch melden adrianam oder me-
 35 deam? Niemand straffet den Irrenden der mit vil Irret. disz
 redt mit Ir selbs lucrecia. vnd was ouch euriolus nit minder
 gegen Ir spysen vnd fûren das fûre siner Inbrünstigen liebe
 In sinem hertzen. Lucrecia hatt ain huse zwüschent des kai-

sers hofe vnd Euriols herberg gelegen. Also daz euriol nit
 zû hofe komen mocht Er sech lucreciam in hohen fenstern
 daran sy sich Im tet erzögen. Aber allwegen, errotet die, als
 oft sy euriolum sechen wart. welches ding zû letscht den kai-
 5 ser wissend macht diser liebe. dann als der näch siner gewon-
 hait yetz hin dann her spacirende oft da selbs fürrait! ver-
 marckt er die fröwen verendert werden vsz zûkunft Euriolus
 der Im stetz anhieng wie macenates vor zyten óctauiano. Vnd
 vf ain mäle kart sich der kaiser gegen Im vnd sprach Euriole
 10 tûst du also hie den mannen Ire wiber [17^b] entrichten! die
 fröw hât dich lieb. vnd ainist glycherwyse als ob er den lieb-
 habenden vindete, do man zû dem huse lucrecie komen ist,
 bedackt der kaiser mit sinem hûte Euriolo sine ougen vnd
 sprach du gesichst hütt nit talacht das du lieb hâst Ich wil
 15 mich des an diner statt gebruchen. Darzû euriolus antwort.
 Was zaichens ist das kaiser? nützit ist mir mit ir zehandeln.
 Aber disz ist vnsicher also zetünd, danne du hier mit die
 vmbstenden lüte argwänen machen möchtest. es was. euriolo
 ain apfelgrāwes pferd ains starcken vfrüstigen halses mit
 20 dickem kambe vf die rechten syten geworffen vnd ains klainen
 houptes sich wol zömende. vnd daz dawincket mit den oren
 welchs pferd ouch hüpsch vnd sichtbar machten ain kurtzer
 buche ain faisser rugk vnd ain kecke Brust! das so man tru-
 metet nit kond an ainer statt stille steen, sunder den gesamp-
 25 noten zöme vnder sinen naslöchern stetz küwende tett be-
 wegen, vnd mit vestem horne sines füsses mit lutem gedön
 hülen das ertrich. disem pferd euriolus sich gelychet so oft
 er lucreciam sechen ward. weliche lucrecia ouch (ob sy wol
 so sy allain was ir fürsatz ir selbs den weg der liebe zebe-
 30 schliessen) noch dann so sy euriolum ersach, kain mässe we-
 der ir selbs noch dem flammen irer liebe wist zegeben! sun-
 der wie ain truckner türerer acker durch zû gelassen füre wirt
 verbrennet vnd der selb so die haissen trucken winde den durch
 bläsent höher vnd wyter wirt brinnen! also wart die vnselig
 35 lucrecia entzündet. Es ist wär als die wysen bedunckt das
 küschhait allein wonet In demütigen hütten vnd das allain
 armüt behept wirt In rechter begirde, die sich In klainem ge-
 hüse läst benügen. Dann küschhait waisz nit die kostlichkait

rycher [18] hüsern. vnd ain yetklicher der erfrowet Ist In
 gelükseligem güte, der tüt nächhengen sinem lyplichen be-
 girden, begert vngewons vnd erwellet Im lustlich gehüse vnd
 costlich gezierung siner götten. also daz allwegen vnküschhait
 5 ain wegefert ist seliges gelückes. Als aber lucrecia oft vnd
 vil Euriolum sach vnd Ir In brünstig liebe nit mocht maistern/
 gedächt sy lang In Ir selbs, wem sy sich wölt vf tûn offnen
 vnd vertrüwen. Danne. wer haimlich vnd verschwigenlich brin-
 net, der wirt so vil dester mer Innerlich gepinget do was vn-
 10 der irs mans knechten sosias ain tütcher, der Jären alt vnd
 sinem heren getrûw dem er lang frylich vnd wol hatt gedienet.
 zû dem gieng die liebhaberin! mer der geburt als ain tüt-
 schen danne jm als ain menschen vertrüwende. Vnd als der
 kaiser mit grosser schare siner edeln durch die stat gieng
 15 vnd yetz gar näch das hus lucrecie hatt fûrgangen vnd lucre-
 cia erkant euriolum da sin! sprach sy, belyb hie sosia jch
 wil dich enklain bruchen. Siche vndersich hinabe vom fen-
 ster. wo findt mann vnder allen fôlkern der gelychen lüte
 Sy haben näch alle kruses håre vnd sint mit vfgerechten
 20 achseln grades lybes, beschôw die kaiserlichen gelgefertwten
 löcke. O. was loblicher angesichten Sy haben all milchfarw
 helse. wa hin sy sich kerent was starker brüsten? das ist ain
 ander geschlecht der menschen dann vnser ertrich tû geberen.
 Es ist ain sâme der götten oder ain geschlecht gesant von
 25 himel. O. daz das glück vsser disen mir ainen man geben
 hett. wo nit mine ougen des zügen weren, so hett ich dir
 das sagenden niemer mugen gelouben wiewol sust ain gemainer
 lümde ist, die tütchen alle ander fôlcker vber treffen. Ich
 geloub das[18^b]selb lande vnderwürffig sin dem wind borree
 30 vnd daz sy vsz grosser kelte söliche wysse vberkoment. aber
 bekennest du ir etlich? als wol als mich selbs sprach sosias.
 Aber warvmb fragst du? das wil ich dir sagen sprach lucrecia.
 dann jch waisz das es von dir nit offen wirt! Dise hoffung
 gibt mir din fromkait. Vsser denen die by dem kaiser sint,
 35 ist niemant mir gefelliger dann Euriolus. In den selben ist
 bewegt min gemüt. Ich waisz nit mit was flammen ich wirt
 gebrennet. Ich mag sin nit vergessen noch mir sinthalb ge-
 ben fried noch rûwe, ich geb mich dann Im zeerkennen. gang

hin sosia (bitt ich) zů jm vnd sag daz ich jnn lieb hab. nützit
 mer noch wyters wil ich von dir. vnd du wirst ouch dise
 botschaft nit vmb sust tůn, sunder wil ich dich des wol belōnen.
 was hör ich? sprach sosias solt ich disz v̄bel frōw tůn oder
 5 gedencken? solt ich minen herren verrāten vnd yetz alt an-
 heben zetriegen das Ich Jung hab geflochen vnd vermitteln.
 E. vnd lieber wōlest du edle geburt vsz der schare diser
 statt! schlachen die schedlichen bösen flammen vsser dem ků-
 schen hertzen diner bruste vnd nit nāchhengen scharpfer an-
 10 fechtigung diner liebe. lesche das füre, danne dem ist nit schwār
 vsztriben die liebe, der den ersten anstürmen wider steet.
 wer aber daz süsz v̄bel mit lustigem nāchhengen füret! der
 gibt sich selbs in aigenschaft ains herten vngestūmen herren
 vnd mag füro nit mer (so er gern wōlt) sich sōlicher aigen-
 15 schaft entschlagen. wie ob din elicher man des Innen wurd?
 we mit was strāffe er dich wurd kestigen vnd pingen? kain
 grosse liebe ist, die lang mug belyben verschwigen. Schwig
 sprach lucrecia. Hier Inne ist kain statt der forchte. wer nit
 fürcht zesterben der fürcht nützit. das gelück gebe [19] disen
 20 dingen ain end vnd vsgange wie es wōll! so wil ichs lyden
 vnd tragen. Was redst du arme? sprach sosias! du enteerest
 vnd verlūmdest din huse, vnd wirst allain sin ain eebrecherin
 dines geschlechtes. du mainst aber es werd sin ain sichers
 dinge. Nain es. dann tusent ougen werdent dich vmbgeben
 25 din aigen mūter lāsset disz laster nit verborgen belyben. nit
 din man. nit dine gesipten, nit din mägt noch knecht werden
 schwygen. das fihe wirt reden vnd die hund vnd türen vnd
 die stainin sūlen werdent dich schuldigen vnd verklagen.
 Aber syg joch daz du disz alles, In gehaim mugest volbringen!
 30 so magst du doch disz, dem der alle ding sicht nit verbergen.
 was ist die gegenwürtig pene vnd der schrecke diner gewissne?
 vnd din gemüt voll der schulden sich selbs fürchtende? Trūw
 ist versait grossen sūnden. darvmb geschwaig vnd gestille die
 flammen der herten liebe, vnd trybe vs mit kūschem gemüt
 35 daz schützlich v̄bel, vnd fürcht nūw eebruch zeuermischen den
 schlāfkamer dines gemachels. Ich waisz sprach lucrecia daz
 es recht vnd wol getān wer, das du sagst vnd rātest. Aber
 vngestūmikait der liebe zwinget mich nāch zefolgen dem bösern

Min vernunft merckt vnd waisz was grossen tieffen fals mir
 nähert, vnd fall gesehend vnd wissend. Mich vberwindt vn-
 gestümikait vnd heerschet liebe gewaltenklich jn allem minem
 gemüte vnd steet mir nächzefolgen was der gewalt der liebe
 5 gebütet. Ich hab vil vnd vil hier wider gerungen vnd gestrit-
 ten vnd doch vmb sust. Trag hin die botschafft ist daz du
 dich min erbarmest. Sosias ersüftzet vber dise wort vnd
 sprach. durch disz min gräwes häre mines alters, vnd durch
 disz min bruste yetz müd von sorgen vnd durch min trüwen
 10 dienste, die Ich dinem vater [19^b] hab getän? beger ich bitt-
 lich? brichh ab vnd lesche sölich vngestümikait vnd hilf dir
 selbs. Es ist ain michel taile der gesunthait wöllen gesund
 werden. Vf das lucrecia redt. Es hāt noch nit alle scham
 verlassen min vernunfte. Ich wird dir zū willen sosia? vnd
 15 die liebe die mich nit wil sin ain regirerin, vberwind ich. vnd
 ist disz dings ain ainige flucht, daz ich das mit sterben tū
 fürkomen. Vnd als sosias von disen worten erschrack, redt
 er. frōw tū messigen den frefel dins vngezömpften gemütes.
 zwing vnd züch In din anfechtung, dann das leben ist edel
 20 das du vermainst wirdig sin des todes. Min vrtail ist gesetzt
 sprach lucrecia zesterben. Ain elich husfrōw tett an Irem
 halse rechen, begangen sünd mit dem schwerte Aber Ich wil
 geburlicher disz sachen fürkomen vnd sūchen mich selbs mit
 gifte zeertöten. Es gebürt sich mit stricken mit messern mit
 25 fallen mit gifte küschhait zebehalten. Diser ains wil ich für-
 nemen and volbringen Ich lyds nit sprach sosias. Darvf lu-
 crecia sagt, Ist daz Im yemant fürnimpt zesterben? der mag
 des nit werden verhütet. Dann porcia ain tochter catonis
 Als brutus Ir man gestarb, vnd man ir das messer genam,
 30 das sy ir selbs zū dem tode hatt behalten? tranck vs brinnend
 kolen Ist. sprach sosias daz so frefel vngestümikait an ligt di-
 nem gemüte? So ist zeräten ee dinem leben dann dinem lüm-
 den. Dann der lümde oft trugenlich ist vnd der dem bösen
 oft besser vnd dem gūten böser geben wirt. Darumb ver-
 35 sūchen wir disen euriolum vnd geben hilff der liebe. Dise
 arbeit wirt min sin. Vnd ich werd dann betrogen so wil Ich
 dir disz ding geben vsgericht. Mit disen worten tetter das
 gemüt vor entzündet erst wyter [20] enbrennen vnd gab hoff-

ung den zweyfelhaftigen gedencken. Aber er was nit jn willen
 zetûn das, so er geredt hatt? sunder sûcht er mit verzuge
 zevfenthalten. das wyplich gemüte vnd hier mit die vnge-
 stümikait zemindern. Als dann oft beschicht daz die zyt er-
 5 leschet die flammen vnd hinnimpt die kranckhait. Vnd maint
 sosias mit falscher fröid die fröwen also zefüren als lang bis
 der kaiser hinweg ritt, oder aber Ir gemüt jn bessers wurd
 verkeret. Vnd tett das darvmb, wo er der fröwen das abge-
 schlagen hett? daz dann nit ain ander botte gesucht wurd,
 10 oder die fröw mit jren henden an jr selbs etwas arges wurckte
 Darvmb er ofte sich gelychsnet zû euriolo zegeen vnd wider vmb
 von jm zekomen. vnd sagt dann wie sich der sere fröwte sö-
 licher der fröwen liebe vnd sûchte bekomlich steet vnd zyte
 wie sy möchten kômen sament zû rede. Etwenne sagt er,
 15 sich gebürlich nit zû jm komen mugen. Etwenne tett er flysz
 damit er vsz der statt gesandt wurd. vnd verzoch jr die fröid
 vf sin widerkunft. Also vnd sölicher mässe, fûret er etwe
 manchen tage das kranck gemüte diser fröwen. vnd vmb das
 er nit gantz luge redt er zû letscht ainist euriolum vnd sprach.
 20 O. wistest du. wie lieb du hie gehabt bist. Vnd do der frägt
 was das were? sagt er Im nit wyter. Aber euriolus mit dem
 bogen der minne gestroffen, gab kain rûwe sinen gelidern?
 sunder so tett das haimlich fûre berouben sin geäder vnd das
 marck sins gebaines gantz durch dringen. doch so bekant er
 25 sosiam nit. vnd maint ouch nit den gesandt sin von lucrecia.
 Als wir dann all minder hoffens haben in grosser begirung
 der minne. diser euriolus als der sich sach in liebe brinnen?
 wundert er sin selbs wyszhait, vnd sich oft sträffende, redt er
 in jm selbs also. [20^b] Euriole was der gewalt ist der liebe,
 30 das waist du wol? langes wainen kurtzes lachen? wenig fröid?
 vnd vil forchte vnd wer lieb hât der stirbt allwegen vnd ge-
 lyt doch niemer tode. Wes hängest dann du aber an, disen
 lügin? Als aber der sach sich selbs vnnütz vnd vmb sust hier
 wider geflissen sin. Redt er zû letst. Ich armer tûn vmb sust
 35 disen dingen widerstreben. Ist mir nit gebürlich daz sich ge-
 purt Julio, das sich gepurt alexandro vnd sich gepurt hanibali?
 was sag ich aber von disen ritterlichen vnd fechtbaren mannen?
 Sech ich an, die poeten. Virgilius an ainem saile vfgezogen

hieng lang an mitten ains turns, do er sich hof in ainer fröwen
 fruntschaft zekomen! Es möcht aber etlicher den poeten ent-
 schuldigen als ainen menschen ains verlässnen lebens. Aber
 was sollen wir sagen von den natürlichen maistern die da
 5 sint lerer güter sitten vnd vnderwyser der kunst rechts lebens.
 Vf aristotilem staig ain fröwe als vf ain rosse, vnd tett den
 zömen ryten vnd spören. Gelycher gewalt ist den götten vnd
 den kaisern vnd ist nit wär der gemain spruch des pufels,
 daz sy nit wol zûsamen gehören noch in ain stüle wonen mu-
 10 gen, dann die maiestat syge zû grosz. wer ist ain grösser bü-
 ller gewesen dann vnser kaiser? wie oft hât sich der geübt in
 liebe? Man sagt von hercule der da gewesen ist der aller
 sterckest vnd geborn von geschlecht der götten! daz der durch
 liebe willen sin harnüsch vnd geschütze, ouch das waidwerck
 15 der löwen hin laite, ain kunckel neme, edel gestain an sine
 finger stiesse, hâr flechte, vnd mit der hand die vor gepflegen
 hatt ainen kolben zetragen, mit schneller spinnel fâdem lernte
 spinnen. dise anfechtung ist natürlich. das geschlecht des ge-
 fûgels empfindt disz füres. dann ain schwartze turtur wirt [21]
 20 liebgehept von ainen grünen fogel vnd oft werden wysz tuben
 zûgefüget vnd jn lieb vermischet andern von mancherly farwen.
 Ist anders daz jch der worten recht bin In gedenck die sapho
 schribt zû pharronem siculum. was sol Ich sagen von den vier-
 füssigen tieren? der stier bewegt stryt vmb die minne sins
 25 glychen. Die zagen fürchtenden hirssen begeren kampfs vnd
 geben mit Iren lügenden stimmen zaichen Irer enpfangnen be-
 girden der minne. Die ruchen tigertiere werdent hier Inne
 gebrennet. Der hōwend eber scherpft sin zene vnd die wilden
 löwen zerryssent Ire rugken. wenn liebe übt Ir craft so wer-
 den entzündt die vnuernünftigen fische vnd die wunder des
 30 meres. Nützit ist usgeschlossen noch sicher. Nützit ist der
 liebe versagt. Aller hassz stirbt so liebe das gebüt. Sy er-
 weket die vngestümen flammen der Jungen vnd berüffet den
 müden alten herwider jr erloschen hitze vnd trift vnd wundet
 ouch mit vnerkantlichem füre die hertzen der Jungfröwen.
 35 dar vmb was widerstrebe jch dann der satzung der nature?
 liebe vberwindet alle ding. Dar vmb wychen wir der liebe.
 Als nu disz also gevestnet vnd beschlossen worden ist. sūchet

er ain kuplerin, dero Er brief geb vnd enpfelch, die der ver-
 mechelten fröwen lucrecie zebringen. Im was aber ain getrü-
 wer knecht vnd mit ryter namlich nisus diser dingen ain ge-
 schider maister, der belüd sich disz ampts vnd dinget ain
 5 fröwen dero die brief vfgeben vnd enpfolhen wurden vf dise
 mainung als hernäch folgt geschriben etc.

[21^b] Ich enbutt dir gern lucrecia in geschrift minen grüsz
 vnd vil hail! wo mir aincher volle wer des hail. aber alles
 10 haile vnd aller trost mines lebens hanget gantz an dir. Ich
 hab me lieb dich dann mich. vnd main ouch, das füre mines
 verserten hertzen dir nit sin verborgen. dann min angesicht
 mag dir des gewesen sin ain zaiger oft nasz von trechern vnd
 mine süftzen die ich dick gelassen hab so du das häst ge-
 15 sechen. Lyd senftmütenklich (bitt ich) ob ich mich gegen dir
 vftün. mich hät gefangen din geziert. vnd die edel loblich
 gnäd vnd gütikait diner schöne (damit du mengklichen vbertrifst)
 halt vnd behept mich dir verbunden. waz liebe gewesen syg
 hab ich vor nit gewisset. du häst mich dem gewält der liebe
 20 vnderworffen. Ich hab lang hier wider gestritten (bekenn ich)
 damit ich ainem frefeln vngestümen herren fluch vnd dem
 möcht endrinnen. aber die schöne diner gestalt hät vberwun-
 den sölich min flysse vnd arbeit. Mich haben vberwunden
 din schyn vnd geleste diner ougen mit denen du mechtiger
 25 bist dann die sunne. Ich bin din gefangen vnd min selbs
 füro nit mer mechtig. du häst mir hingenomen vnd enpfürt
 den bruhe des schläffens vnd der spyse. dich hab ich lieb tag
 vnd nacht. din beger ich. dir rüff ich. din wart ich. von dir
 gedenck ich. dich hoff ich. von dir ergetz ich mich. din ist
 30 min gemüt. by dir bin ich gantz. du magst allain mich im
 leben behalten vnd allain ertötten. erwelle dir dero ains. vnd
 was dir zü willen syg, schryb mir. vnd bis gegen mir nit her-
 ter mit Worten dann du gewesen bist mit ougen, da mit du
 mich häst gebunden. jch bitt nit grosses. allain beger ich den
 35 vollen mit dir zereden. das wöllent allain disz min schriften,
 daz ich offenbar vor dir wyter mug reden das, so ich yetz
 schrib [22] gibst du mir das, so leb ich, vnd leb selig versagst
 du es aber so erleschet min hertz, das lieber hät dich dann

mich! aber ich enpflich mich dir vnd diner trüw got pfleg
 din. ja din min hertzigs gemüt vnd ainiger troste vnd hilff
 mines lebens. . . Als nu die bübin disen briefe mit euriols
 edelm gestain versigelt enpfangen hatt! lüff sy schnell lucreciam
 5 sühende. vnd als sy die allain fand! redt sy zû ir. disen
 santbriefe schickt dir der aller edelst vnd mechtigost liebhaber
 der an dem kaiserlichen hofe sin mag vnd bittet dich mit
 grosser bitte daz du dich sin erbarmest. Dise fröw was in
 büberye mengklichen bekant vnd vermerckt vnd was das lu-
 10 crecie ouch nit verborgen. darvmb lucrecia laid trüg, ain sö-
 liche verlündete fröwen zû ir gesant sin vnd wüchs mit wor-
 ten an sy vnd sprach sag an du lasterliche, was gedürstikait
 hät dich gefüret in dises huse? was vnsinikait hät dir geräten
 ze komen in min gegenwürtikait? solt du in edler fröwen hü-
 15 ser geen vnd versüchen mechtig fröwen, vnd dich vndersteen
 zezerbrechen elich facheln vnd bande? Ich beheb mich kumme
 daz jch dir nit fall in din häre. Solt du mir geben briefe?
 solt du mich ansechen vnd mit mir reden? wo ich nit mer
 bedechte was mir zetûn gebürlich wer, dann was sträffens
 20 dir zûgehorte! so wölt ich hüt tûn, daz du kainen bülbrief ye-
 mer me getrüggest. machh dich bald hin weg, du vergifte vnd
 trag hin dinen briefe. Aber gib joch her mir den briefe, daz
 ich den ee zerrisz vnd verbrenne in dem füre. vnd nam dar-
 mit das papir vnd zerraisz das in manigfaltig stückli. Vnd
 25 als sy oft mit jren füssen dar vf getrat ouch die verspuwt!
 warf sy die In die äschen des füres vnd sprach. Ach daz Ich
 sölich sträff an dir begeen sölt, die wirdiger werest des füres
 dann wines. Aber gang bald hinweg [22^b] daz dich min man
 nit ergryff vnd die räche so ich dir nächgelassen han, erst an
 30 dir volbring. vnd hüt dich wol, daz du nit mer komest für
 mine ougen. Disz fröwlin hett Ir wirsz geförcht. Aber sy
 bekant die sitten sölicher fröwen. vnd redt In Ir selbs. Nu
 wil du allermaist, dwyle dich erzaigest nit wöllen. vnd sprach
 daruf Vergib mir fröw Ich wänd recht tûn vnd dir komen
 35 söllen zû gefallen. wyle es aber anders ist! so tû ablassen
 miner torhait. Wilt du daz ich nit mer kom Ich wirt dir zû
 gefallen. du lüg was liebhabers du verachttest vnd ver-
 schmachest. vnd schied also mit disen Worten von Ir ange-

sicht. vnd als sy euriolum fand, sprach sy enpfäche müt seliger
 liebhaber, die fröw hât mer lib dich, danne sy werd lieb ge-
 habt von dir. Aber yetz was ir nit müsse zeschriben. ich
 fand sy trurig, als bald ich aber dich nampt vnd ir gaub di-
 5 nen brief machet sy ain frölich angesicht. vnd tett das pa-
 pyre zû tusent mälen küssen, hab nit zweyfels sy wirt dir
 bald antwort geben. vnd schied das alt wybe hier mit abe
 vnd hût sich daz man sy füro nit mer funde, umb das sy
 nit umb wort straiche tragen wurd. lucrecia aber, do daz alt
 10 wyb hinwegkomen was, sÛcht die stÛcklin des santbriefs vnd
 legt vnd satzt zÛsamen die zerrissnen worte. Vnd do sy dar
 vs ainen leslichen briefe gemachet vnd den zû tusent mälen
 gelesen hatt? tett sy den noch dicker zû tusent mälen küssen
 vnd zÛletscht winden in ain sydin tÛchlin vnd legen vnder ir
 15 kostliche klainat? yetz das wort dann disz wort wider vmb
 sÛchend lesent vnd erwegende, da mit sy von stund zû stunde
 Ir liebe tett zÛnemen wachsen vnd meren. vnd nam ir für
 euriolo zeschriben vnd sandt Im ainen brieffe vff nâch ge-
 schriben form gestellet.

20 [23] S^Tell ab euriole zehoffen das, das sich nit gebürt
 zeerfolgen. vertrag mit botten vnd briefen mich zebekÛm-
 bern. vnd geloub mich nit sin vsz der schare der fröwen die
 sich verkouffent. jch bin nit die als du mainst, oder dero du
 schicken söllest ain verlÛmdte fröwen. SÛch ain andere ze
 25 bÛlen. mir sol kain liebe dann die from erber vnd kÛsch ist
 nâchfolgen. mit andern wÛrck vnd tÛ als dich gelust. von mir
 beger nÛtzit freuels oder vngebÛrlichs got pfleg din in gesunt-
 hait . . Diser santbrief wiewol er euriolum herter vnd scherp-
 fer sin bedÛcht, danne er nâch sage des alten wybs gehoffet
 30 hett? gab noch dann vrsache ander briefe wider vnd für ze-
 senden. Euriolus zweyfelt ouch nit zeuertruwen dem botten
 dem lucrecia hatt vertrauet. er was aber angsthâftig vmb daz
 er sich der welschen sprâche nit gnÛgsamklich verstunde
 darvmb fleisz er sich mit jnbrÛnstiger begird die zelernen
 35 vnd wan aber liebe jnn des emsig machet? wart er in kurtzer
 zyt dero so fertig, daz er selbs allein brief dichtet, dar zû er
 vor von andern hilff mÛst entlechnen. dar vmb so antwort er

lucrecie vf sölich mainung.

Sy sölt jm nit zû argem vermerken, daz er zû Ir ain
 verlündte fröwen geschicket hett? wyle jm frömden man sö-
 lichs vnwissend gewesen wer, vnd er ouch kain ander bot-
 5 schaft hett haben mügen? vnd daz grosse liebe gewesen wer
 ain vrsach diser schikung, die nützit vnerbers süchte oder
 begerte. vnd er geloubte sy wesen ain fromme schainge vnd
 aller küschiste fröwen, vnd deshalb dester grösser liebe wirdig.
 danne .er ain vnuernünftige fröwen güdig vnd vnbehüt jrer
 10 eeren? nit allain nit möcht lieb haben sunder ouch die zû
 aller zyt gröszlich tett [23^b] vinden vnd hassen. vnd wenne
 küschhait von ainer fröwen wurd verloren, so were füro nützit
 mer an Ir zeloben. Vnd daz hüpsche der gestalt ain lustsam
 güt wer, aber doch vnwirig blöd vnd hinfallend. vnd wo dero
 15 nit zucht vnd scham bywonten, daz dann sölich hüpsche kaines
 lones wert ze achten wer. wyle aber sy die zucht der eeren
 vnd fromkait zû gefüget hett der schöne jrer gestalt, vnd er
 sy wiste sin mit den beden gauben fürpüntlich begaubet. Vnd
 deshalb als ain göttin lobsam erschynen? So hette Er sy
 20 lieb gewonnen vnd tete sy eeren, nützit schantlichs von Ir
 begerende oder ütztit wunschende, daz jren lünden in dhain
 weg sölt oder möcht verletzen Sunder sich allain begeren daz
 er mit ir reden vnd sin gemüt ir offnen möcht das sust mit
 geschrift nit völklich wer zebeschechen Vnd schickt Ir mit
 25 disem brief etlich schenckin vnd gauben nit allain von materi
 sunder ouch von arbeit costlich ertig vnd loblich gemachet,
 darvf lucrecia schribende also antwort.

Ich hab enpfangen dinen briefe? vnd clag füro nit me
 von der bübin. Aber das du mich liebhäst, das acht Ich nit
 30 grosz, dann du nit der erste bist. So bist ouch nit allain
 den min gestalt hät betrogen. vil ander haben mich lieb ge-
 hept vnd noch liebhaben. Aber wie der selben arbeit vmb sust
 gewesen ist, also ist ouch die din. Mit dir wort haben mag
 ich nit, so wil ichs ouch nit. Du magst mich ainig nit finden
 35 du werdest dann ain schwalb. Hoch sint die huser vnd die
 türen vnd zügänge mit hute beschlossen. dine gauben han Ich

empfangen, dann mich ergetzet vnd fröwet Ir künstlich arbeit. Aber vmb daz des dinen nützit vmb sust by mir syg, vnd daz ouch sölichs nit by mir [24] vermerckt werd, als ain pfand der liebe! So schick Ich dir dar für ainen ringe, das der by
 5 dir syg als ain bezalung vnd lone sölicher verkoufter klainat. dann der edel staine in dem ring, ist nit minder costlich, dann syen dine gauben mit ir yetz zû gesandt. Got pfleg din vf das schraib euriolus also hin wider.

Zû grossen fröiden ist mir gewesen lucrecia din santbriefe,
 10 der da ain ende machet der clage von der bübin. aber mich betrübt daz du min liebe gegen dir so klain achttest. dann ob wol vil dich lieb habent! so ist doch ir kaines füre zeglychen dem minen. aber du geloubst das nit! dann ich mag mit dir zerede nit komen! wurd mir aber das vergöndt! du tetest
 15 mich nit also verachten vnd verschmächen. o. wölt got das ich möcht werden ain schwalb aber lieber wölt ich sin ain floch vmb daz du mir nit möchtest beschliessen dine fenster. jch hab nit laid daz du nit magst, sunder daz du nit wilt. dann was sûch ich anders dann den willen. ach min lucrecia was
 20 sprichst du dich nit wöllen! wöltest du nit (so du möchtest) mit dir reden lüssen, mich! der da bin gantz din. vnd nützit mers beger dann zetûn vnd zegefaren nâch dinen sitten vnd nâch dinem liebsten willen. vnd ob du mich hiessest geen in ain füre! ich volbrechts vnd wer dir gehorsam vor vnd ee du
 25 das möchtest gebieten. lász fallen (bitt ich) das vorgemelt wort! wirt nit geben die macht, so syge doch da der wille. vnd tû mich nit beschweren mit Worten! dwyle du mir doch das leben gibst mit ougen. Ist dir nit zûgefallen mich zebe-
 30 folg ich des vnd wirt zû willen dir. Aber verender dise din vrtail als du sprichst min arbeit gegen dir vnnütz [24^b] sin. Stell ab sölich hertikait vnd wütery vnd bis gütiger dinem liebhaber! dann beharrest du also zereden so wirst du man-
 35 schlechtig vnd tötest mich mit Worten ee, dann aincher ander mit aim swerte. Nützit ist da mitte du dich des (so ich bit) mugest entschlahen dann niemant mag dir das verbieten. sprich daz du mich lieb habest so bin ich selig. wie vnd in

welcher mässe aber mine gauben by dir sint? ist mir züge-
 fallen? dann die macheut dich etwenne miner liebe Ingedenck.
 aber sy sint gewesen klain. vnd sint noch klainer die ich dir
 yetz schick. doch so wöllest nit verschmächen das, daz ich
 5 din trüwer liebhaber dir schick vnd gibe. jch bin teglichs
 kostlicher klainat vsz miner haimant warten so die koment
 wil ich sy dir schicken. din ring kumpt niemer mer ab minem
 fingern vnd Ich wil den an diner statt nasz machen mit em-
 sigem küssen. Got pfleg din du min fröid vnd wollust Gib
 10 mir kurtzwyle die du vermagst . . Vnd als nu sölicher mäs-
 z oft vnd vil wider vnd fürgeschriben wart Schraib zü letscht
 lucrecia ainen sölichen santbriefe.

Ich wöllt gern euriole dir zü willen werden vnd dich (als
 du bittest) mitthailhaftig machen miner liebe? dann des wer
 15 wol wirdig din adel So hieschen ouch das wol dine sitten,
 daz du nit vmb sust lieb hettest. ich wil geswygen wie wol
 mir gefelt din gestalt vnd din angesicht voll aller gütigen tu-
 gend Aber mir ist nit zü nutze daz ich liebhab. jch erkenne
 mich selbs. ist daz ich anheb lieb zehaben? so halt ich weder
 20 mäs z noch regel. du magst hie nit lang sin? so möcht ich
 din (wenn ich in das spil kem) nit mangeln noch enberen. du
 wöltest mich mit dir nit hin weg füren? so wölt ich nit bely-
 ben Mich tünt warnen manigfaltig exempel der fröwen die
 von [25] fremden liebhabern sint worden verlässen vnd be-
 25 trogen, daz ich nit nächfolge diner liebe. yason betroug me-
 deam durch dero rät vnd hilff er den wachenden dracken
 ertott vnd von dannen, brächt den guldin schepper. Theseus
 was zegeben zü ainer spyse dem grünenlichen tiere minothauro.
 do aber der sich räts gebrucht, adriane? ward er des erlöset
 30 noch dann verlies er die in dem ellend ainer jnsel. was tett
 die vnselig dido? die den flüchtigen eneam enpfieng vnd nam
 in ir huse? was nit ir sölich fremde liebe ain vrsach des to-
 des? jch waisz wie sorgfeltig ist vszwendig fremde liebe zü
 zelassen? vnd darumb gib ich mich nit in so vil sorg vnd
 35 angste. ir mane sint ains vestern gemütes vnd mugen dise
 vngestümen anfechtung bas gestillen dann wir fröwen. Ain
 fröwe wenne die in liebe angehept zewüten? so mag sy allain

das end sölicher liebe mit tode erfolgen. danne fröwen nit
 allain lieb habent, sunder sint sy in liebe vnsinnenklichen
 wüten! vnd es syge dann daz sy rechte bezalung vnd wider-
 geltung haben irer liebe! so ist nützit vngestümers dann ain
 5 liebhabende fröwe wir achten weder red lümden noch das le-
 ben! allain ist vnser rüw vnd artznie wenn vns wirt der volle
 des liebgehaptten menschen. dann als vil wir hier an mer
 mangels haben, als vil sint wir mer vnd mer begeren, vnd
 fürchten kain vbel, So nun gnüg beschicht vnsern lyplichen
 10 begirden. Darvmb so ist mir vermechelten edeln vnd rychen
 fröwen geräten! daz ich mir beschliesz den weg der liebe!
 vnd besunder gegen dir, der nit hie belyplich sin magst! vmb
 daz ich nit genennet werd rodopeia phillis oder andere sapho.
 Darumb so wil ich dich yetz sin gebetten daz du fürohin nit
 15 mer begerest miner liebe! vnd die dinen ouch näch vnd näch
 in ziehest vnd löschest! wyle [25^b] das den mannen vast lych-
 ter ist danne den fröwen. Wan häst du mich lieb (als du
 sprichst) so solt du an mir nit süchen noch des begeren das
 mir zum tode raichen wurd. für dine gaube schick jch dir
 20 hier by ain guldin Crütze mit berlin gezieret, vnd wie wol das
 klain ist, so mangelt es doch nit kostlichkait. Got pflege din
 euriol. . . Als der disen brief enpfieng. schwaig er nit, Sun-
 der als er mit nüwer geschrift was entzündet, nam er ain fe-
 dern vnd dichtet ainen santbriefe vf sölich form lutende.

25 **G**ot grüeze dich min ainig gemüte lucrecia. die mich
 tüst machen selig mit dinen briefen ob du joch wol etwas
 gallen darvnder häst vermischet. jch hoff aber wenne ich werd
 verhöret! du stellest das abe, vnd geloubest minen worten.
 In min hand ist komen din santbrief beschlossen vnd mit di-
 30 nem edeln staine versigelt, den hab ich oft gelesen vnd offer
 geküset. Aber er rätet anders dann din gemüt gewesen sin
 werd vermercket. du bittest mich daz ich vfhöre dich lieb ze-
 haben! danne dir nit gebürr nächzefolgen die flammen fremder
 liebe! vnd legst des exempel etlicher fröwen die betrogen
 35 worden sint! vnd schribst das so schon so hoflich vnd so
 zierlich! daz ich hie durch mer wundern vnd liebhaben müs
 din vernunfte, dann daz Ich dero soll oder mög In dhain weg

vergessen. dann wer ist der? der dann vfhör lieb zehaben!
 wenne er vermerckt sinen bñlen vernünftiger vnd wyser sin,
 danne er vermaint hett? wöltest du min liebe haben gemindert!
 so söltest nit din kunst vnd lere also han erzöget. danne das
 5 ist nit ain angezündes füre erleschen! sunder usz ainem klai-
 ner gēnaiste ain allergröstes füre enblāsen. do ich din geschrift
 las! ward [26] Ich mer vnd mer entzündet, do ich sach diner
 lobrychen gestalt vnd erberkait söllich kunst vnd wyszhait sin
 zū gefüget. Darvmb so sint es vnnütze wort da mit du bittest,
 10 daz ich vfhör dich liebzehaben. Bit das alle berg zū tälern
 komen in ain ebne vnd alle bächh vnd wasser vbersich flissent
 in Ire vrspringlich brunnen. Als wol mag ich dich nit lieb-
 haben als wol die sunne verlassen mag Iren vmb louff. Ist das
 das sitisch gebirg mangeln mag des schnewes vnd das mere
 15 der viscschen vnd die weld der tieren, so mag ouch Euriol
 din vergessen Es ist nit klain vnd lycht den mannen (als du
 mainst lucrecia) die flammen der liebe zeleschen, dann das,
 daz du vnserm geschlecht zū gibst, das gebent vil dem üwern.
 Aber ich wil yetz nit ingeen disen kampf vnd stryete! sunder
 20 müs ich antworten zū dem das du wider mich geredt häst
 Du schribst daz du darumb gegen mir in liebe nit wöllest
 komen, dann fremder mannen liebe manig fröwen hab be-
 trogen vnd legst des exempel. aber des gelychen möcht ich
 ouch vil man nennen die von fröwen vngbürlich sint verlassen.
 25 Crisis betroug (als du waist) troilum ainen sune priami. helena
 gab hin vnd verriet deiphebum. Circe verkart Ire liebhaber
 durch ir kunst in schwyn vnd in ander gestalt wilder tieren.
 Es ist aber vnrecht vsz gewonhait etlicher (dero wenig sint)
 zeschetzen vnd zerichten ain gantze commune vnd gemainde
 30 des folckes. dann beharren wir vf dem, daz du von zwayer
 oder dryer oder joch von zechner mannen wegen all ander
 mannen schuldigen wilt vnd die schüchen! so gebürt mir ouch
 von so vil fröwen wegen all ander fröwen zehassen. Aber
 nemen wir ee vnd billicher ander exempel der liebe! Als
 35 gewesen ist die liebe anthony [26^b] anthony vnd cleopatre vnd
 vil ander, die die kürtze disz santbriefs nit verhengt zesagen.
 häst du gelesen ouidium so häst du funden daz nāch der zer-
 störten troy vil der anthinochen vf ir widerfart behept sindt

durch fremder fröwen liebe vnd niemer me kome jn jr haimant! sunder anhangten Iren liebhaberin vnd ee mangeln wolten vnd verlässen Ir landt Ir güt ouch Ir fründ vnd anders (die doch ainem yeden aller süssest vnd gefelligost sint in
 5 siner haimant) danne daz sy verlässen wölten Ire bülen. Disz wöllest du (bit jch min lucrecia) bedencken, vnd nit die ding die da vnser liebe syen widerwertig vnd das wenig getän hant. Ich folg dir näch vnd bin des gemütes daz ich ewenklich lieb hab dich, vnd syg ouch ewig din. du solt mich ouch nit nen-
 10 nen fremd! wyle ich wärlicher hie ain burger bin, danne der so hie geborn ist. danne den selben machet zeburger schikung des gelückfals, mich aber frye erwelung. vnd mir wirt niemer sin kain ander haimant danne alda da du bist. vnd wie wol villicht beschehen möcht mich etwenn von hinnan schaiden,
 15 so wirt doch schnell sin min widerkunft. So wirt ich ouch nit mer in tütsche land kome, dann min dinge zü zerichten daz jch by dir belyb als lang jch mug. Man findt lichtenklich ain vrsach by dir zebelyben. Es sint vil des kaisers gescheft in disen landen zehandeln, da jch acht daz mir die werden en-
 20 pfolhen. yetz wird jch gesant jn botschaft. dann übe jch disz dann das. der kaiser müsz haben ainen vicarien in welschen landen! dises ampte wil ich mir selbs erwerben. darumb habe nit zwyfels min lucrecia min wollust min hertz min hoffung ist daz ich leben mag än hertz, so mag jch öch dich verlässen.
 25 ä wolan. erbarm dich doch zü letscht dines liebhabers, der von dir waichet als der schnee von der sunnen [27] betracht min arbeit! vnd setze zületscht ain mässe miner materye. wes pingest du mich so lang? Ich wundern mich selbs wie jch so vil pine hab mugen lyden, vnd so vil necht vngeschlaffen
 30 belyben vnd mit so vil vastens vngeessen beharren. Siche wie mager vnd blaich ich syg. es ist ain klain ding das noch die sele vnd minen lybe züsamem hept. hett ich dir dine vatter vnd müter oder dine kind ertötet! so hettest du doch nit mögen grösser straffe vnd pingung dann dise an mir mugen
 35 volbringen. Sträfst du mich also dar vmb daz ich dich liebhab! was tettetst dann dem der dir böses oder schaden züfügte? ach min lucrecia min fröw min haile vnd züflücht, enpfäche mich in gnäde. schrib mir doch zü letscht daz ich dir

lieb syg. nützit grössers beger ich lasz mir gezimmen wärlich
 zereden daz ich lucrecie diener ,syg. dwyle doch künig vnd
 kaiser liebhaben Ire diener so sy die trüw sin erkennen vnd
 die gött ouch nit verschmächent lieb zehaben die, so sy wi-
 5 derumb liebhabent. got pfleg din min hoffung vnd min forcht
 vnd min turn der junwendig gebrochen ist vnd vszwendig
 schynt vest vnd nit zegewinnen vnd der doch (so sich ain
 wider dar an stiesz) schnelle wurd zerfallen . . Lucrecia ist
 10 sy gefliszenhait des liebhabenden aigenlich erkant. da offnet
 ouch sy gegen Im Ir liebe, die sy lang verborgen getragen
 vnd dem nit gelych getân hatt, vnd tett sich vf mit sölichen
 schriften.

Ich mag dir nit mer versagen noch widerwertig sin eu-
 15 rirole, noch dich füro mer miner liebe vszschlachen. Du häst
 gesigen vnd ich bin yetz din. Ach mich arme, daz ich dine
 brief ye hab [27^b] empfangen. jch bin zû vil sorgen nu mer
 vnderwürffig Es syg dann daz din trüw vnd wysheit mir tüg
 helfen. lüg daz du haltest daz du mir geschriben häst. jch
 20 kum yetz in din liebe! ist daz du mich verlässest, so bist du
 ain wütrych vnd verreter vnd ain aller böster aller menschen.
 Es ist lycht ain fröwen zebetriegen, Aber als vil es lychter
 ist, als vil ist es schantlicher dem betrieger. Disz ding ist
 noch gantz vnd vnuerhönt, mainst du mich zeverlassen so
 25 sags vor vnd ee die liebe mer werd brinnen vnd tû, daz wir
 nit anfahent das, daz vns darnäch angehept gerüwen werd.
 In allen dingen ist anzesehen das ende. Ich als ain fröw
 verstee wenig. Du bist aber ain man vnd müst für dich vnd
 mich tragen die sorge. Ich gib mich yetz dir vnd folg näch
 30 diner trüw, Vnd heb ouch nit an din zesin, Dann daz ich
 ewenklich din syg. Got pfleg din min hilff vnd fürer mins
 lebens etc. Darnäch sint vil santbriefe wider vnd für gesant
 worden. Vnd schraib Euriol nit so brinnend. Lucrecia tett
 Im so brinnend antworten. Vnd was irer beder yetz ain ge-
 35 lyche begird, wie sy zûsamen komen möchten. Aber das was
 schwer vnd gar näch vngelouplich zegeschehen! wyle aller
 menschen ougen vff sy acht hatten. Vnd ouch lucrecia niemer

allain vsgieng, noch güter hûte zû aincher zyte mangelt Dann
 argus tett nit so geflyssen verhüten den ochsen Junonis, Als
 menelaus hiesz verhüten sin lucreciam. Disz laster hât gar
 wyt alle walchen vmb fangen! daz ir yetlicher sin husfröwen
 5 wie ainen schatze beschlisset, Vnd doch nach minem beduncken
 vmb sust Vnd. ãn nütze. Dann die fröwen sint gar nâch alle
 des sins, daz sy aller liebste des begeren das Inen aller maist
 [28] wirt versait vnd verbotten. die selben wo du wilt da
 wöllen sy nit, vnd wo du nit wilt da wöllent aber sy! vnd
 10 begerent des vngebetten. wo ouch dise fröwen haben jren fryen
 willen, so tûnt sy nun dester minder des argen. Es ist ouch
 so lycht ain fröwen wider Iren willen zeuerhüten, Als in haisz-
 stehender sunnen ain gemain hert vnd schare der schauffen
 by ainandern zebeheben. vnd es syg dann daz ain fröw von Ir
 15 selbs aigens willens recht tüge vnd küsch belyben wölle! so ist
 Ir eeman vmb sust geflissen sy mit beschlusz ze uerhüten. Aber
 er geb ir joch verhüter wie vil er wölle! Sag bitt ich wer
 verhütt die selben verhüter, daz sy nit sicher mit den selben
 anheb? Ain fröw ist ain vngezämpptes tiere! mit kainen zö-
 20 men zebeheben. Lucrecia hatt ainen brüder was ain basthart,
 dem sy vor Ire brief euriolo zebringen hatt enpfolhen! vnd
 Inn sölicher liebe mit wissend gemacht. darumb so ward der
 selb bestellet, daz er euriolum haimlich In siner herberg an-
 kem. diser basthart wonet by siner stiefmüter, die da ain ee-
 25 liche müter lucrecie was! vnd die lucrecia oft sücht vnd noch
 offer von Ir haimant ward gesüchet vnd besechen, dann ouch
 Ire hüser beder syt nit wyt von ainandern gelegen wâren.
 Dar vmb so was Inen ain sölicher anschlage. So euriol in
 ainer kamer verschlossen leg vnd die müter zû der kirchen
 30 gangen wer! daz dann lucrecia komen sölt als ir müter
 süchende vnd so sy die nit fund! daz sy dann Irer zûkunft
 alda wartete vnd dar zwüschen wer by euriol. des wart fürge-
 nomen vnd gesetzt ain zile zwayer tagen! da dise zwen tage
 den liebhabenden menschen ains gantzen jares lang gesehen
 35 worden sint. Als dann ist! das die stunden allwegen den
 wolhoffenden lang sint [28^b] vnd den fürchtenden des bösen
 kurcz. Aber das gelück was nit lachen den begirden der selben
 liebhabenden menschen! dan die müter vermarckt sölich vf-

secz. vnd als es zû dem tage kam! gieng sy vsser irem huse
 vnd beschlos daz vor irem stiefsunen, der das bald euriolo
 brächt ain trurig botschaft. Welcher euriol des nit minder
 dann lucrecia ward belaidet. Als aber lucrecia vermarckt ir
 5 vffsetz vnd anschlege enteckt sin Sprach sy es hât sich nit
 gelücket disen wege, darumb gangen wir ainen andern. dan
 min mûter niemer mächtig sin mag zehindern vnd zefürkomen
 mine lyplich begirde. Es was ainer pandalus genant irs mans
 schwager Dem lucrecia geoffnet hatt ir haimlichkait diser din-
 10 gen. dan ir fürin gemüt nit rûwen mocht dar vmb enbot sy
 euriolo das er den selben anredte danne er verswigen vnd trûw
 wär, vnd wol zaigen möcht ainen wäge wie sy zû samem ko-
 men möchten. Aber euriolum bedücht nit sicher sin! sich in
 vertruwen ze geben dem den er allwegen sach anhangen mene-
 15 lao, vnd forcht betrugnusz dar vnder verborgen ligen. In dem
 vnd sy sich also beder syt bedächten! ist euriolo enpfolhen
 worden gen rome zeryten vnd mit dem babst zereden von we-
 gen der kayserlichen krönung. welches ding euriolo vnd sinem
 bûlen kam zû grosser belaidung Aber sich geburt des kaisers
 20 gebot willenklick zetragen. vnd zevolenden. Darumb rait man
 vnd wäret das vsz belyben zwen monat In der zyt belaib lu-
 crecia haimant in irem huse. beschlos ire fenster. legt an
 trurige klaider. gieng nienert vs. yedermann hat des wunder
 vnd mocht niemant des vrsach erkennen. die stat senis wart
 25 gesehen als ain wituw vnd glycher wyse als die sunn er-
 löschen wer bedücht yederman sich selbs die [29] zyt wonen
 in ainer vinstre. das husgesind, daz sy oft sach an aim bette
 ligen vnd kainist frölich! vermarckt vnd gab das zû Irs lybs
 kranckhait, vnd sûchet des (als vil es mocht) artznye zebringen.
 30 Aber sy erlachtet nie vnd gieng ouch kainist vsser ir schlauf-
 kamer als lang bis sy hort vnd marckt euriolum widerkomen
 vnd den kaiser jm engegen geritten sin. alda gelycher wyse
 als ob sy kranck vsser aim schlauf erwecket wer! legt sy hin
 ir laidsame klaider vnd angetân mit vorigen gezierden schlos
 35 sy vf die venster des komenden in fröiden wartende. vnd als
 der kaiser die ersach. sprach er. Euriole nu mer ist es kain
 verborgen dinge dann in dinem abwesen hât niemant lucreciam
 sechen mugen. Aber wyle du yetz wider komen bist! so

sechen wir widerumb die morgenröte. Was mäszt mag bywonen
 rechter liebe? kaine. dann niemant die, noch den hūsten mag
 bedecken noch verbergen. darzū euriolus redt. du schimpfest
 kaiser (als du gewon bist) mit mir! vnd wild mich füren in
 5 gelechter. daz darvon du redst waiszt ich nit! der bracht diner
 mitrytern vnd der pferten wicheln haben villicht die erwecket.
 vnd do er daz also geredt do blickt er haimlich vnd verstolenlich
 lucreciam an vnd warf ougen in ougen. das was näch siner
 widerkunft jr beder erste trostung vnd ergetzung. vber wenig
 10 tag darnäch als nisus ain truer diener euriols angstig vnd
 geflissen was in diser sache hilf zetūn fand er ain tafern hinder
 menelaus huse gelegen die hinden zū, ain gesicht hatt in die
 camer lucrecie. darumbe machet er jm zū fründe den win-
 schencken der selben tafern! vnd als er die gelegenhait da selbs
 15 aigenlich besach! fūrt er dahin euriolum vnd sprach. vsser
 disem venster magst du anreden lucreciam. es was zwūschen be-
 den hūsern ain enges gesslin dar jn die priueten vnd haimlichen
 gemahe [29b] gelaitet waren! vnd da hin wöder mensch noch
 sunne selten ye mer komen mochten. da selb tätt vnderscheiden
 20 das venster lucrecie dryer elnbogen ferr von der taferne. Alda
 sas der liebhaber lang wärtende, ob aincher des gelückes fale
 lucreciam wölt erzögen! des er auch nit betrogen wart dan
 zū letste kam da selbs hin lucrecia. vnd als die hin vnd her
 sach. Redt euriolus. was tūst du regiererin mins lebens?
 25 wo hin kerst du dine augen? du du min hercze. Ich bin hie
 mich mich siche, hie bin ich? Bist du aber hie? sprach lu-
 crecia. O du min euriole. bist du hie? vnd mag ich yetz mit
 dir reden? O. wölt got das ich dich ouch möcht vmbfahen.
 das wil ich bald (sprach euriolus) zū wegen brächt han vnd
 30 ain laiter hie an lainen. du schlūsz vf din schlāfkamer! wir
 haben vil zelang die fröid vnser liebe verzogen Dar vor hūte
 antwort lucrecia min euriole! ist das du mich jn sälikait vnd
 by eeren wilt belyben. es ist hie zū der rechten hand ain
 fenster vnd ain aller böster nachgebur So ist ouch dem win-
 35 schencken nit ze getruwen der vmb wenig geltes willen dich
 vnd mich tätt geben in den tode Aber dise gesicht sprach
 euriolus ist mir auch zum tode es wer dann daz ich dich ouch
 möcht halsen vnd mit minen armen vmbfāhen vil vnd lange

wort haben sich an der statt begeben vnd sint ir ouch durch
 ain rore etlich gauben geben worden Aber euriolus was jn
 sölichen gauben nit milter dan lucrecia. Sosias vermarckt jr
 beder fürnemen vnd redt in im selbs. vmb sust tust du wider-
 5 stand dem willen vnd fürsätze diser liebhabenden menschen
 es syg dann daz ich disz ding mit list vnd geschidekait für
 kom vnd fürsäch, so wirt min fröw dar vmb sterben vnd min
 herr komen zû rûf vnd geschraye ains vnerlichen lümdens.
 vsser disen zwain bösen dingen, ist bösser vnd weger daz ain
 10 ab zestellen Min fröw hab lieb. es schaft nützit wanne [30]
 es nun haimlich beschicht. Sy ist von liebe blind vnd be-
 kennet nit gnüg was sy tût oder handelt. Mag nit behüt
 werden ir küschhait! so ist gnüg zefürkomen den rûfe vnd
 daz geschreye da mit ir geschlecht nit in vneeren werd ver-
 15 lümdet noch deshalb todschlage begangen. darumb gange ich
 hinzû vnd taile mit min hilffe. jch han vor disen dingen wider
 standen als vil jch mocht umb des willen daz kain übel vol-
 brächt wurd. So aber das nit hât wöllen verfahren! so gebürt
 sich mir numer zeachten, was üfels vnd args beschech! daz
 20 das jngheim belyb verborgen. dann es ist nit vil vnderschaids,
 sölichs nit zetûn oder zetûn, so es nun niemant waisz noch
 vernimpt. dann vnküschhait ain gemain sünd ist. vnd ist ouch
 kain mensch der diser kranckheit nie hab empfunden sunder
 wirt der für küscher gehalten! wer das sichrer vnd verhüter
 25 in gehaime handelt. do er das also geredt! sicht er lucreciam
 geen vsser ir schlaufkamer, zû der er gieng vnd sprach wie
 ist jm daz du mich diner liebe nützit wissen läst. euriolus
 ist dir nützit dester minder lieb! wie wol du mir sölich liebe
 verbirgest. lüg wem du vertrauest. der erst staffel rechter
 30 wyshait ist, nit liebhaben. Vnd der ander daz du also lieb
 habest das es nit werd offen. Du magst daz allain äne hilff
 etlicher mit wissender menschen nit volbringen. Was getru-
 wens vnd geloubens aber du zû mir haben mugest! hâst du
 yetz lang zyt her wol erlernet. wilt du mir ütztit enpfelhen,
 35 das gebüt! so ist mir oberste sorg! daz sölich liebe nit werd
 entecket vnd du nit strâffe lydest, noch din man aller men-
 schen nächrede tragen müsz. Darzû lucrecia antwort. Es ist
 also wie du sagst sosia vnd ich hab zû dir grosses vertrauen.

aber du bist (Ich waisz nit wie) bisher allwegen sümig gewesen
 vnd widerwertig minen begirden. dwyle du dich aber yetz selbs
 aigens [30^b] willens erbüttest! so wil ich mich gebruchen diner
 diensten vnd fürcht ouch nit von dir betrogen zewerden. du
 5 waist wie seer vnd grosz ich brinn. ich mag den flammen lang
 nit lyden. hilff mir daz wir by ainander sin mugen. euriolus
 ist kranck von liebe vnd jch stirb. es ist nützit schädlichers
 danne zewiderstreben vnsern lyblichen begirden. wo wir ainist
 zûsammen kämen, so wurden wir mässiger liebhaben vnd be-
 10 lib vnser liebe dester ee bedecket. darumb gang hin vnd sag
 euriolo ainen ainigen wege da mit er zû mir komen mug. jst
 daz er vber vier tage so die geburen vns korn bringent sich
 antüg vnd verwandle in ain gestalt ains karchers vnd sich
 bedeck mit ainen sacke vnd das korn ain laitern vftrag in
 15 die kornsthütte! so waist du min schläfkamer gegen der
 laitern die ersten türe haben alda wil ich sin desselben
 tags warten! vnd so es zyt wirt allain jn der kamer sin!
 vnd so er ouch allain daselbs syg, so klopfe an die türe
 vnd gang zû mir. sosia (wie wol disz ain swär grosz sach
 20 was) forch noch grössers vñbels vnd belüd sich diser enpfel-
 chnusz. vnd als er euriolum fand, sagt er jm disz alles orden-
 lich wie es jm was enpfolhen. Das euriolus alles lichte schatz
 vnd frölich vnd gern vmbfieng zevolbringen. Vnd berait vnd-
 richt sich hier zû vnd clagt nützit anders dann zelanges baiten.
 25 o. verstentliche brust des liebhabenden menschen. o. blinde
 bekanntnusz. o. türstigs gemüte vnd vnerschrockens hertze.
 waz ist so grosz daz dich nit bedunekt klain? was so schwär
 vnd krumb! daz du nit schetzest lycht vnd schlecht? was so
 beschlossen daz dir nit syg offen? Du tûst alle sorgueltikait
 30 verachten. Du mainst nützit sin zeswere. Vmb sust ist an
 dir alles verhüten dines eemans. Kain satzung rechts lebens
 noch kain forchte tûnt dich beheben. Kainer scham bist du
 [31] gebunden. alle arbeit ist dir ain schimpfe vnd kurtzwil.
 dich jrret nützit allenthalben. o. liebe. o. zämerin vnd zwinge-
 35 rin aller dingen. du tûst ainen aller fürpüntlichsten dem
 kaiser allerliebsten von gûte den rychnen, der zyt den ernie-
 testen, der geschrift wolgelerten vnd mit wyszhait den verrümp-
 tisten man! dar zûbringen! daz er von Ime wirft sin sidin

purpur klaide vnd an sich lait ainen sacke vnd sin antlit be-
 deckt vnd verwelhet mit trugenlichen fröwen vnd daz vsser
 ainem hern wirt ain knecht vnd daz der so gefüret vnd erzo-
 gen ist in allen wollusten sine achseln tût fügen vnd schicken
 5 zû sweren burdin vnd sich selbs umb lones willen gibt für
 ainen offen secktrager ze erkennen. o. wundersams dinge vnd
 gar näch vngelouplichs daz man sechen sol ainen man (sust in
 rätgebung aller treffenlichost) vnder den scharen der secktrager
 vnd gemeinschaft haben mit den karchern. wer wil grösser
 10 verkerung sûchen? das ist das so ouidius in dem bûch metha-
 morphoseos wil! da er schribt vsz menschen werden vnuernünfftige
 tiere stain oder krüter. das hât ouch gemaint der fürnemest
 poet maro, da er geschriben hât daz circe etliche jre bûlen
 hab verkert in gestalten vnd formen vnuernünfftiger tieren. Vnd
 15 es ist ouch also. daz vsser dem flammen der liebe des men-
 schen gemüt also wirt geendert! daz wenig vnderschaids ist!
 zwûschen dem selben gemüt vnd ainem vnuernünfftigen tiere. Als
 aber dar näch, die morgenröte erschain, vnd der schlaufkamer
 Euriols brächt den begerten tag vnd die sunn zû disen din-
 20 gen gab Iren schyne! erkiket sy den baiten den euriolum, der
 sich selbs selig vnd geluckhaftig sin vermaint da er vermischet
 was schnöden knechten vnd sach vnd marckt daz Inn niemant
 was bekennen. Darvmbे volfür er vnd lûd sich mit korn vnd
 gieng In lucrecie [31^b] huse. vnd als er sich des korns vf
 25 der schütte hatt entladen! was er under den abstygenden der
 aller letste. vnd als er des vor vnderrichtet was, klopft er an
 die türe der vermechelten kamer, die gegen dem mittel der
 laiter gesechen wart! vnd ylt bald hin jn. vnd als er die tür
 beschlos fand er lucreciam allain sitzen ob sydiner arbeit. vnd
 30 do er necher hinzû gieng sprach er. got grûsze dich hertz
 blût mins. got grûsze dich ainige hilff vnd hoffung alles mines
 lebens. hab ich dich yetz ainig funden? mag jch dich yetz in
 mengklichs abwesen (des jch allwegen begert hab) vmbfahen
 vnd halsen? yetz ist kain wand, kain ferre noch wyte zû
 35 jrrung minem küssen. lucrecia wie wol die disen anschlag
 hatt gemacht! noch dann erschrack sy des ersten zûgangs
 vnd maint sich selbs nit euriolum sunder ainen gaiste sechen
 (als ain fröw die nit gemaint hett ainen sölichen treffenlichen

man sich sölicher grossen sorgueltikait vnderwunden han. Als
 aber sy zwüschen halsen vnd küssen iren euriolum recht er-
 kant. redt sy du min armes mänlin. bist du nit? bist du nit
 hie min aller liebster euriole? vnd mit röte gegossen durch Ire
 5 wenglin vmb fieng sy den menschen vester vnd kust jnn en
 mitten an sine stirnen vnd bald widerumb sölich red meldende/
 sprach sy. we was grosser sorgen bist du jngegangen? was
 sol man wyter sagen? yetz waisz jch, daz ich dir die aller
 liebste bin yetz hab ich dich versücht vnd wärlich diner lieb
 10 gegen mir empfunden. aber niemer solt du mich gegen dir
 anders finden. die gött wöllen dise geschicht zum besten fügen
 vnd vnser liebe geben ainen gelücklichen winde. dann die wyle
 diser gaist regiert mine gelider, so wirt niemer kain mensch
 äne du, gewaltig lucrecie ouch nit min eeman. der mir wider
 15 minen willen gegeben ist vnd In den min [32] gemüt nie hät
 vergünstet. Aber wol an min wollust min fröid vnd kurtzwyle.
 wirf von dir dinen sacke vnd tû dich mir (als du bist) erzögen.
 züch ab die gestalt ains karchers. lasz fallen dise sailer. vnd
 verheng daz ich sech minen euriolum. vnd als der nu den vn-
 20 lust der klaidern abgezogen hatt! - Schain er darnäch von
 sament cremesin vnd golde glych ainem fürsten. vnd ylt dar
 vf schnell zegeen in das ampt vnd in würckung der liebe. do
 kam sosias an die türe klopfend. vnd sprach hütent vch ir lieb-
 habenden menschen. Ich waisz nit was menelaus sücht er
 25 kumpt dort her yllend. verkaltent vnd verbergent üwer diep-
 stal vnd betriegent den mane mit üwern listen. Nützit ist des
 ir vch mugen getrösten hervs zekomen. Da sprach lucrecia
 es ist ain haimlich behaltnusz euriole vnder disem bette, da-
 selbs sint costliche klainat. du waist was jch dir vor geschriben
 30 han were daz min man (so du by mir wärest) komen wurd!
 Gang herjn, da wirst du sicher sin an der vinstre. aber hüt
 dich daz du dich nit bewegest rüsplest noch hüstest. euriolus
 was zwyfelhaftig was er tûn wölt! aber doch gieng er jn, der
 fröwen gebott. vnd als sy die türen vfgetett! gieng sy wider
 35 zû jrem wercke der syden. zû hand wären hie menelaus vnd
 mit jm ainer genant bertus, etlich brief zû der statt gemainem
 nutz süchende. vnd als sölich brief zû in kainen schrynen
 truchen noch kisten funden wurden! sagt menelaus Sy sint

villicht lucrecia. jn vnser haimlichem behaltnüsz vnder dem
 bette. Darvmb bring her ain liechte, daselbs jnne ist ze süchen.
 Euriolus erschrack des vnd ward kranck vnd entsetzet aller
 siner kreften vnd hüb yetz an lucreciam zehassen vnd redt In
 5 Im selbs vnd sprach. We mir toren vnd rarren. wer hät
 mich gezwungen her zekomen [32^b] anders dann min lychtikait?
 nu bin ich ergriffen. nu kum jch vmb min eere. Nu verlür
 Ich des kaisers gnäde. Aber was clag ich des kaisers gnäde?
 wölt got daz mir das leben vorgestünde. wer wölt oder möcht
 10 mich lebend hier von erlösen? es ist gewisz zesterben. o mich
 vppigen vnd aller grösten narren aller narren. in dises jamer
 bin ich selbs willig gefallen. was sint die fröiden diser liebe?
 die so hoch vnd türe gekouft werden. disz ist ain kurtze wol-
 lust, vnd ain aller lengstes schmerzten. o belüden wir vns des
 15 von wegen des himelrychs. zewundern ist der menschen vn-
 wissenhait. wir wöllen nit lyden kurtze arbeit vmb lengste
 fröid. Aber von liebe wegen! dero fröid ainem rouch ze glychen
 ist! machen wir uns selbs vnderwürfig tusentfaltigen sorgen
 vnd angsten. Nim war mich selbs, yetz wirt ich sin ain ex-
 20 empel ain fabel vnd rüfe aller menschen. vnd waisz nit was
 ends vnd vsgangs mir bescheret wirt. Ist aber daz der göten
 hilff mich hier von erlöset! kain liebe tüt mich yemer mer
 widerumb also instricken vnd fähen. o got erlöse mich vertrag
 miner jugend vnd tû mir nit messen min vnwissenhait sunder
 25 friste min leben daz ich bycht vnd büsz würck miner sünden.
 lucrecia hät mich nit lieb gehept, sunder als ainen hirssen In
 ainem netze wöllen fähen. Nim war es ist komen min tage.
 niemand mag mir gehelffen dann allain du min got. Ich hab
 oft gehört von betrugnüsz der wyben! vnd doch mich hie vor
 30 nit können hüten. kum ich aber yetz hier von, so betrügt mich
 niemer mer aincher fröwen geuerd noch liste. Aber lucrecia
 was nit minder mit kumberlichem angste beladen! die nit allain
 hailes halb Ir selbs, sunder ouch von wegen Irs liebhabers
 euriols stünd In grossen nöten. Aber als in grossen sorgfel-
 35 tigen [33] sachen die gech vnd schnell züfallent! der fröwen
 vernunft behender ist danne der mannen! do erdächt vnd fand
 lucrecia ain hilff vnd artznie vnd sprach. lieber man. Es ist
 ain ledlin da ob dem venster! bin ich jngedenck dich etlich

brief vor zyten daselbs han behalten. Lügen wir ob sy alda
 yenert ligen beschlossen. vnd luf hier mit bald hin zû glycher
 wyse als ob sy daz ledlin vfschlissen wölt, vnd stiesz das haim-
 lich vber ab an die gassen recht als ob es von geschicht wider
 5 iren willen wer beschehen. vnd sprach. owe min lieber man. louff
 daz wir nit. schadens enpfâhen. das ledlin ist zum venster
 vszgefallen. Ile bald, daz wir vnser klainat vnd briefe nit ver-
 lieren louffent louffent bed vnd yllend bald. wes stând ir? ich
 wils die wile in minen ougen haben, daz niemant darvon ützt
 10 stelen mug. sich vnd merck mariane die türstikait vnd ge-
 schide der fröwen vnd geloub-jnen. niemant ist zû sin selbs
 behûtnûsz so wol geögt! daz er durch fröwen nit mug werden
 betrogen. vnd der allain ist nit betrogen worden, den sin
 gemachel, nie hât versücht noch vnderstanden zebetriegen
 15 darumb derselb mer selig ist von gelück dann von aigner
 vernunfte. Aber menelaus vnd mit jm bertus wurden vsz diser
 geschicht bewegt vnd luffent bald hin ab in die gassen. das
 huse was aber höher danne nâch sitt der welschen büwen die
 huser gewonlich syen! deshalb vil staffel wâren hin abzekomen!
 20 dar von euriolo zyt vnd wyle geben worden ist, sin statt ze-
 endern! der durch vnderwysung lucrecie in ain nûwe behalt-
 nûsz sich tett verbergen. Als aber die sôlich brief vnd klainat
 vfgelesen hatten, vnd doch alda nit funden die schriften dero
 man notdürftig gewesen wer! giengen sy zû der behaltnûsz
 25 darjnn euriolus vor gelegen was. vnd als sy daselbs gefunden
 hatten! wes [33b] sy begerten! genâdetent sy lucrecie vnd
 giengent hinwege. als aber lucrecia der türe den rigel fürge-
 stößen hatt, redt sy. gang herfür min euriol. gang herfür min
 hertzigs gemüt. kum her du höchster aller miner fröiden.
 30 kum herfür du vfwale miner wollusten du hungwabe aller kûrtz-
 wilung. kum du min süsse, nichte zegelychen. yetz sint sicher
 alle ding. yetz ist vnserm reden offen ain fryes felde. yetz ist
 vnserm vmbfâhen ain sicher statt. das gelücke wolt vnsern
 begirden widerwertig gewesen sin. aber die gött sehent vnser
 35 liebe vnd haben nit wöllen sôlich truw liebhaber verlâssen.
 kum yetz in mine arm. nützit ist das du füro bedörfest fürch-
 ten. du min gilge vnd vfgehufte huffe der rosen. wes steest du?
 hie bin jch din lucrecia. wes bedenckst dich? halse vnd umb-

fähe din lucreciam. Euriolus entledigot sich doch zûletscht kum diser forcht vnd gieng herfür, die fröwen vmbfachende vnd sprach. Ainch sölich grosz forcht vnd schrecken ist mir nie me begegnet. aber du bist wirdig von dero wegen sölichs
 5 gelitten werd. Es wer ouch nit billich daz yemant sölich süsz küssen vnd halsen vmb sust zû steen sollen. Vnd daz Ich der wärhait vergech! so hab ich noch nit so ain kostlichs grösses gûte gnûg türe gekouffet. dann wenne ich nâch dem-tode wider vmb lebend werden vnd mich din gebruchen möcht! so wölt
 10 ich zû tuſent mälen sterben, so ferre ich hier mit din liebe vnd früntlich halsen möcht erkouffen. o min gelück. o min seligkait. weder sich ich ain gespenst oder ist es an jm selbs? weder hab ich dich, oder wirt ich betrogen jm tröme? aber zwâr du bists. zwar ich hab dich. lucrecia was beklaidet mit
 15 ainem tûnnen hemde, das äne runtzel vnd felde anlag dem lybe vnd nit loug weder die brüst, den hindern noch die schame, sunder yetliche gelider wie die an Inen selbs wâren gab warlich zeerkennen. [34] Der schyn ihrer köle was schnee wysz. das liecht jrer ougen glych dem glast der sunnen. Ir angesicht
 20 frölich. Ir antlit mûtig. Ir bäcklin als gilgen mit purperfarwen rosen vermischet. das gelächter jn irem munde süsz lieplich vnd mässig. Ir brust gûter wite! tätt zû beder syt brüstlin wol öpfel gross erheben. die ouch den angryffern begirlichen lust erwackten Euriolus mocht nit lenger sin anfächtung be-
 25 heben noch verhalten! sunder aller vorigen forcht vergessende warf er von jm mässigait, vnd graif an die fröwen vnd sprach yetz näment wir sament die frucht der liebe, vnd vnderstünd sich dar by dise wort zekreftigen mit den werken. die fröw widerstünd jm vnd sprach. das sich ir geburte sorg vnd behûtnusz ze
 30 haben jrer eeren vnd lümdens vnd daz jr liebe nützit anders begerte dann früntlich reden vnd küssen. dar zû Euriolus schmollet vnd redt. Aintweders so ist wissenlich mich här komen sin, oder vnwissenlich. Ist es wissenlich so so ist niemant der daz übrig argwâne vnd nit für gewisz haben wöll. vnd ist torlich äne werck
 35 bösen lümden jn zegeen. Ist es aber vnwissenlich, so tût disz ouch niemant wissen noch vernâmen. Disz ist ain pfand der liebe, vnd ich wölt ee sterben ee jch daz wölt mangeln. Auch sprach lucrecia es ist sünde. es ist sünd sprach euriolus sich des gûten nit

gebruchen so man daz wol tûn mag. Sölt ich sölich bequem-
 lich zyt vnd statt die mir yetz geben sint vnd die ich gesücht
 vnd dero so lang begert han, verlieren vnd mich dero nit
 gebruchen? Vnd hûb vf der fröwen klaider vnd tät die wider-
 5 stritende fröwen (die doch nit wolt gesigen) åne arbeit über-
 winden Dise minne gebar jnen nit satung als amoni die minn
 thamar! sunder tätt grossern durst der liebe jn inen beden
 er wecken. Aber euriolus was Ingedenck der sorgenn vnnd des
 schreckens jm zû gestanden. Dar vmb [34^b] vmb do der diser
 10 spyse enwenig gnûg genomen hatte! schied er abe wider lu-
 crecie willen. Also daz niemant ützt böses oder anders ge-
 argwånet hât dann daz er ainer vsser den korntågern gewesen
 wer. vnd als euriolus vf der strasse haim gieng, wundert er
 sich selbs, vnd redt in jm. o. daz mir yetz der kaiser bekem
 15 vnd mich wurd erkennen was argwåns wurd jm diser habit
 vnd sölich endrung diser klaider machen? wie wurd er min
 spotten? Ich wurd yederman zû ainer fabel vnd jm zû schimpf
 vnd spotte. Er horte niemer vf alz lang bis er wiste, was jm
 disz geburen klaid wölte. Aber ich sagte vnd erdächte mich
 20 by ainer andern fröwen gewesen sin, nit by diser. danne er
 die selbs ouch lieb hât. darumb mir nit zû nutze wer jm min
 liebe zeoffnen vnd die zeverrauten, die mich enpfangen vnd by
 leben hât behalten. do er also mit jm selbs redt. So sicht er
 nysum achatem vnd palmurum sine diener, die er fürgieng
 25 vnd von jnen vor nit bekennet worden ist, ee er haim in sin
 herberg kam. da selbs als er sich vs gezogen hatt, vnd sine
 klaider widerumb an gelegt! ofnet er diser dingen geschicht
 vnd handel. vnd do er jngedencklichen sagt was forcht vnd
 was fröid jfallende sich begeben hatten! ward er glych yetz
 30 ainem fürchtenden dann ain fröhlichen. aber vnder den forcht-
 samen dingen redt er. we mir toren Mins houptes hab jch
 vertraut ainer fröwen, das hât mich min vater nit vnderwissen
 do er mich lert, daz Ich mich an kainer fröwen trüw sölt ver-
 lassen. vnd da er sprach ain fröwen sin ain tiere vngezåmpt,
 35 wild, vntrüw, beweglich vnstett, grim vnd grülich vnd tusent-
 faltiger zûfällen Irs gemütes vnderworffen. jch hab vätterlicher
 vnderwissung vergessen gehept vnd min leben gegeben vnd
 vertrauet ainer fröwen. wie were jm gewesen? ob mich yemant

[35] mit korn geladen, het erkennet! was schand? was rede?
 vnd was vneere? mir vnd minen nächkomen dar von were
 entstanden! Der kayser hett mich vrlobt vnd mich von im
 getän als ainen lichtfertigen mane. Er het aber joch daz ver-
 5 achtet. wie wer jm aber gewesen hett mich der man funden
 jn dem schryne ligen verborgen? hert ist das recht vnd die
 gesatz julia genant den Eebrechern. Aber der schmerz ains
 eemans gebirt vnd bringt grösser pene vnd straffe dan je anich
 gesaczte verlichen hab. diser töt mit dem swert. Dise tünt
 10 mit blüt rünsigen straichen straffen vnd ettlich eebrecher jn
 banden getürnt füren. Aber scheczen wir joch das der man
 mich by leben hät lassen belyben! het er aber nit mich zü
 schwärer gefengknusz gebracht. oder mich als ainen übelteti-
 gen verlümdten mane dem kayser geantwort! sprechen wir
 15 ouch daz jch jm möcht sin endrunnen, wile er kain waffen
 hett! vnd mir ain güt messer hangte an miner syten! aber
 diser man hatt by jm gesellschaft. So hangten ouch mancher-
 lay waffen an der wande, die lichtenklich wären ze ergriffen!
 so was jm huse ain lange zal der knechten vnd wären bald
 20 worden geschraye vnd die türen beschlossen! vnd von mir
 genomen räch vnd straffe. woffa wie gar vnsinnig bin ich ge-
 wesen. kain wiszhait hät vsz diser sorg mich erlöset, dann
 allain der fale dez gelückes. was sag jch aber von gelück?
 ja vnd behende vernunft lucrecie O. trüwe fröw. O. wyse
 25 liebaborin. o. fürpündige alleredelste e liebo. warumb solt ich
 mich dir nit geben? warumb solt ich dir nit vertrauwen? vnd
 wären mir tusedt höpter so wölt ich doch dir die alle enpfel-
 chen. Dann du bist truwe du bist sicher, du bist fürsichtig,
 du kanst lieb haben vnnd denn liebhaber behüten vnd beschir-
 30 men. wer ist der so bald ainen wäge erdächt haben möcht! Da
 durch er die so mich [35^b] süchten abgewisen hett! als du
 getän häst. du häst mir disz min leben behalten! das selb
 leben jch dir ouch verhaisz vnd gibe. es ist nit min was ich
 me leb! sunder din. mir wirt nit zeswer zeverlieren vmb dich,
 35 das ich hab durch dich. du häst mins lebens macht vnd mines
 sterbens gewalt. o. wyse Brust. o. süsse zung. o. liepliche ougen.
 o. behende vernunft. o. marmore vnd gewolne gelider. Wenn
 sol ich üch mer sechen? wenn sol ich wider vmb die koral-

lenfarwen leftzen byssen? wenn sol ich me diner bewegbaren
 zungen in minen munde enpfinden? Sol ich kainest me dine
 brüstlin handeln? Es ist klain achates daz du an diser fröwen
 häst gesechen, als vil sy necher ist, als vil ist sy hüpscher.
 5 wölt got daz du by mir gewesen werest. Candeles des künigs lidie
 elich husfröwe ist nit so hüpsch gewesen als die ist. Ich hab
 nit wunder daz der selb künig sinen gemachel nackent wolt ge-
 zögt haben sinen gesellen vmb daz er dester volkomner fröid
 enpfinge. dann ich tete des gelychen ouch wo ich möcht vnd
 10 liesse dich lucreciam nackent sechen. dann ich sust nit kan
 noch mag dir gnüg gesagen wie grosz vnd vil ir hüpsche syg.
 So magst du ouch nit gnüg merchen wie volkomen min
 fröid syg gewesen. Aber fröwe dich mit mir, daz min fröid
 vnd wollust grösser gewesen ist, danne mit worten vsgeleit
 15 werden mug. Also redt euriolus mit achate sinem diener. Nit
 minder ouch redt lucrecia mit ir selbs. doch so was ir fröid
 so vil minder als vil sy verschwigner sin müst vnd niemant
 mocht vertrauen, dem sy disz sagte. dann sy vor schame die
 ding ouch nit gar sagen torst. In dem begab sich daz bac-
 20 carus ain banonischer raisiger von edelm geschlecht geboren
 anhüb lucreciam lieb zehaben. vnd wyle er hüpsch was, da
 maint er ouch von ir widervmb liebgehapt [36] werden vnd
 allain der fröwen scham hier an wider steen. Aber die (als
 dann ain gewonhait ist vnsern fröwen) tett alle man mit göti-
 25 gem angesicht lieplich ansechen. Es ist ain kunst (oder wär-
 licher zesagen) ain betrugnusz. vmb das wäre liebe nit werd
 geoffnet. baccarus was von wegen grosser liebe beroubet siner
 sinnen! vnd mocht kainen trost enpfachen, er hette dann das
 gemüt lucrecie erfahren. die fröwen zü senis sint gewon das
 30 kirchlin der hochgelopten Jungfröwen marie betlahem genant
 zum ersten stain gelegen oft zesuchen. daselbs hin gieng lu-
 crecia mit zwain jungfröwen vnd ainem alten wybe. baccarus
 folgt ir nach in siner hand ainen violblumen mit vergülten
 blettern tragende jn des stile er ainen bülbriefe vf megten
 35 perment geschriben hatt verborgen. Vnd du solt des nit wun-
 der han! dann cicero schribet das gantz gedicht jlliadam so
 subtilklich jm erzögt sin daz das jn ainer nuszschalen wurd
 beschlossen. baccarus bod den viol lucrecie vnd tett sich ir

flyssig enpfelhen. Lucrecia wolt aber des nit enpfachen. Dar-
 vf bacarus sy mit grosser bitte bat den von jm zenemen.
 darzü daz alt wyb redt! Nim hin fröw den gebnen blümen.
 wes fürchst du dir da kain forcht ist? es ist klain damit du
 5 disen ritter magst machen benüigig. lucrecia volgt dem alten
 wybeschen rate vnd enpfeng den viol. vnd als die enklain
 fürbas giengen gab sy den viol der ainen jungfröwen, vnd nit
 lang darnach, sind jnen vf dem wege bekommen zwen studenten,
 die nit mit grosser bitte die jungfröwen erbaten daz sy jnen
 10 gab den blümen. die selben den stile vfbrachent vnd den bül-
 briefe fundent. Dises folck der studenten was vor vast lieb
 vnd enpfengklich vnsern fröwen! Als bald aber des kaisers
 hofe gen senis kam! da hüb das selb folck an zessin verspotet
 verschmecht [36^b] vnd verhasset. danne den selben fröwen ge-
 15 felliger vnd zü grössrer kürtzwyle was das gerüsch des har-
 nüschs, danne die hoffichkait der geschrift. hier von grosser
 nyde vnd merklich zwitrechtikait entstanden ist. die langen
 mentell vnd grossen kappen süchten allwege da durch sy
 schadten den raisigen kurtzen klaidern. darumb als der list
 20 vnd die behendikait des viols offen ward! geet man bald zü
 menelaus vnd bit den daz er den brief les. der darnäch trurig
 haim gieng vnd sin hosfröwen sträffende, das gantz huse mit
 geschray tett erfüllen. die husfröw lounet sich des schuld haben
 vnd erzalt die ergangnen ding vnd legt daz alt wyb des zü
 25 gezügnüsz. man geet zum kaiser alda beschicht ain clage.
 (saccarus wirt berüft. der selb vergicht des handels vnd gnäd
 begerende! vestnet er mit sinem aide, daz er füro hin niemer
 mer lucreciam in bülschaft wöll süchen anreden oder bekum-
 bern. Aber yedoch wist er den obersten gote jupiter nit er-
 30 zürnt werden sunder mer lachen vmb mainaide der liebhaben-
 den menschen. Vnd als er vil mer verboten was als vil flyssiger
 vnd mer hangt er näch dem vnfruchtbaren flammen der liebe.
 Es kam der winter der die warmen wind vsschlissende, allain
 den kalten boream vnd nortwinde zü liesz. vom himel vallet
 35 schnee. Die gantz statt wird vnd kumpt des züschimpfe vnd
 fröiden. die fröwen werffent den schnee an die gassen vnd
 hin widerumb die Jüngling den schnee in die fenster. hievon
 baccarus jm ain vrsach vnd geschicklichkait nemende, ainen

andern bülbrief jn wachs beschlos vnd das selb dar näch mit
 schnee vmbgeben offentlich jn das venster lucrecie tett werffen.
 wer wil nit sagen vnd bekennen alle ding vnder des gelückes
 gunst vnd vngunste geregiert werden? wer ist der? der nit
 5 desselben gelücks seligen zûfale tü begeren [37] Es ist nützer
 des gunst zebehoben dann daz ich ain brief veneris enpfelhen
 tett marti. es sprechen etlich, daz das gelücke nützit vermag
 in den wysen, des gestee jch jnen in den wysen die sich allain
 fröwent jrer tugend vnd die arm vnd kranck vnd weltlicher
 10 eeren verschalten, noch dann sich selbs geloubent besitzen
 ain seligs leben. dero ich noch kainen ye gesehen han noch
 ainchen ye schetz gewesen sin. das gemain leben der menschen
 bedarf des gelückes gunste. dann dasselb welich es wil. tüt
 erheben vnd welich es wil trucken vf die erden. wer hât bac-
 15 caro in disen dingen geschadt dann daz gelücke? were das
 nit gewesen ains wysen rätës. In ainer schneeballen beschlos-
 sen han ainen bülbriefe vnd den durch hilff des schnees an
 ain begerte statt zebringen? nu möcht etlicher sprechen, daz
 das wol sicherer hett mugen beschehen sin. ich sag aber
 20 hier zû. wo das gelück in diser sach hehuffen hett? So were
 bacarus hie durch für sicher vnd wyse geschetzt vnd gehalten
 worden. aber daz widerstrebend gelücke tett die schneeballen
 vsser den henden lucrecie enpfallen, füren zû aim füre vnd
 den briefe (als der schnee von hitz wegen zerschmoltzen was)
 25 zaigen vnd offnen. Welchen briefe do etliche alte wyber die
 sich alda warmpten vnd ouch menelaus (der ouch zû gegen
 was) läsent? dadurch sich nûw krieg erhûben. die selben
 krieg baccarus nit mit verantworten sunder mit flucht tett
 vermyden. dise liebe baccari kam euriolo zû nutze. dann do
 30 menelaus vf die weg vnd übung desselben baccari geflissen
 was acht zehaben? gab er hie durch statt euriols vfsetzen.
 Vnd sint bede wår (als man redt) daz nit lichtenlich zebehü-
 ten ist? was von vil wirt lieb gehapt oder daz vil wirt ange-
 fochten. dise liebhabende menschen euriol vnd lucrecia, baite-
 35 tent näch irem ersten brutlouf [37b] der andern hochzty
 byzeligen. es was ain gesslin zwüschen lucrecie vnd irs näch-
 puren huse vast enge, da durch (wenne man sich mit den
 füssen in bed wende speren tett) lichtenklich mit stygen in

ain venster lucrecie was zekomen. aber dahin zestygen geburt
 sich allain nachtes. Menelao was zeryten in ain göwe vnd
 daselbs vber nacht vsz zebelyben. dises tags wart von den
 liebhabenden als kumm erbaitet als die tag der saturnälen man
 5 rait hin. Euriolus macht sich in verenderten blaidern bald
 in das geszlin. daselbs hatt menelaus ainen stale, darjnne eu-
 riol durch vnderwysung sosie gegangen ist, vnd baitet alda
 der nachte vnder dem höw verborgen ligende. do kam dromo
 ain ander knecht menelai der den rossen zû gegeben was vnd
 10 wolt füllen die krüpfen vnd nam höw mit ainer gabel von eu-
 riols syten, vnd hette ouch noch mer genomen vnd mit der
 gabel euriolum getroffen, wo das durch sosiam nit wer worden
 fürkomen. der selb sosia (als er dise sorgfeltikait vermarckt)
 luf bald hin zû. vnd sprach. gibe her lieber brüder mir dises
 15 werck zevolbringen. jch wil geben den rossen daz füter. da
 lüg dar zwüschen daz vns das nacht essen syg züberait. vns
 gebürt ainen güten müt zehaben wile vnser herre vsz ist!
 vns ist bas by der fröwen dann by jm. die ist frölich vnd milt.
 aber diser zornig vil geschrayes gytig vnd ernsthaftig. zu kainer
 20 zyt vns wol ist! so er hie ist. merckst du nit wie gar mit
 klainem vnd kargem mese er vnser büche ychet vnd fûret, der
 da allwegen selbs hunger lydt vmb daz er vns mit hunger pinge
 vnd verderbe. vnd der nit verhengt die schimlichen stuk des
 kirninbrots geessen werden, vnd die klainen vischlin mit zwibel
 25 in ain Brü gemachet ainen gantzen monat behalt vnd vmb
 zücht. Ouch die hürling vnd gesaltzen äle ains nacht essens,
 ersparet! [38] vnd behaltet in ain ander nacht mäle. vnd die
 fädem des louches zellet vnd zaichnet vmb daz wir die nit
 berürent. Vnselig ist der, der durch sölich kestigung süchet
 30 rychtum. dann was ist torechtters. dann arm zeleben vmb daz
 du rych sterbest? wie gar vil besser ist min fröwe, die nit
 benüigig ist vns zefüren mit kalbfleisch vnd Jungen kitzin,
 sunder ouch vns gibt hennen vnd kranat fogel vnd den follen
 des besten wines. dromo acht daz vns ain faissz kuche syg vnd
 35 daz wir wollebent. das, sprach dromo) wil ich tûn vnd orden-
 lich fürsechen vnd lieber den tische strigeln dann die rose.
 Ich hab minen herren hüt in das göw geführt (das es jm joch
 niemer gelücke) nie kain wort redt er mit mir, dann spät zû

vesper zyt do er mich haim zû den rossen schickt, hies er mich
 miner fröwen sagen, daz er diser nacht nit komen wölt sosia
 ich lob dich. daz du doch zû letscht, häst angehept ze hassen
 die wys vnd sitten mines herren. jch wer langest von jm ko-
 5 men vnd hett ander dienst gesücht, wo nit min fröwe mich
 mit iren morgensüplin hett behalten. o. gefiele es dir daz
 wir disz nacht nützit schlieffent sunder trunckent essent vnd
 vertetten bis es tag wurd. Min herre gewunn ains gantzen
 manotz nit so vil! als vil wir ainer nacht wölten verzerren.
 10 Euriolus hort das gern (ob er wol vor wist die sitten der
 knechten) vnd zwyfelt nit, dann daz jm desglychen dahaimant
 in sinem abwesen von sinen knechten ouch beschech. Als aber
 dromo hinweg kam! stünd Euriolus vf vnd sprach O. sosia
 wie wirt Ich so ain selig güt nacht haben, durch din hilff
 15 vnd güt getät! der mich häst gefürt vnd daz Ich nit funden
 wurd so fromklich versorget vnd behütet. Du bist ain güter
 man. Vnd ich hab dich billich lieb! vnd wil dir ouch, des
 niemer, vndanckbar [38^b] funden wereen. Die verzilet stund
 was komen. Darumb wie wol Euriolus In zwayen grossen
 20 sorgen gewesen was! noch dann staig er die muren frölich vf.
 Vnd durch vf getānes venster, fand er Lucreciam by der für-
 statt allaine sitzen. Vnd mit beraiter güter spyse sin daselbs
 wartendt. Vnd als die Iren liebhaber erkant! stünd sy vf
 vnd tett den am mitten vmbfāhen. da beschāchen früntliche
 25 wort. Man gab küsz vnd gieng in die minne mit vfgeregten
 segeln. vnd die vnderlybung sölicher schiffung ward gelifert
 mit essen vnd mit trincken. aber nim wār. wie kurtz sint die
 wollusten vnd wie lang die angstbarkait. Euriolus hatt kumm
 ain fröliche stund gehabt da kam sosia, die widerkunft Menelai
 30 verkündende vnd betrübt alle fröid. Euriolus erschrack vnd
 flaisz sich wie er mit flucht möcht endrinnen. Lucrecia aber
 als die den tische verbarg! gieng sy irem mane menelao en-
 gegen vnd grüst den wider komenden vnd sprach O. min
 lieber man wie bist du so wol vnd recht komen. Dann ich
 35 forcht du werest gefangen. aber was tūst du so lang in dem
 göw? lüg daz mir nit etwas vor syg. warumb belybst du nit
 hie haimant? wes flyssest dich mich zebetrüben mit dinem
 abwesen? allwegen wenne du vsz bist, so fürcht ich daz du

ain andere liehabest (alsdann tůnt die vngetrůwen man Iren
 husfrůwen) darumb wilt du mich sůlicher forchten entledigen,
 so schlůff niemer vsz. dann ane dich ist mir kain nacht zů
 frůiden. aber issz hie zenacht, dar nůch gangen wir schlauffen.
 5 disz was in dem sale, darInne das husgesind pflag zeessen.
 alda flaisz sich lucrecia den man zebeheben als lang bis eu-
 riolus die wyle haben můcht hinwege zekomen. dann jm ouch
 etlicher zyt vnd wyl hier zů [39] nottůftig was. menelaus hat
 aber da vssen in dem gůw zenacht geessen vnd ylt in die
 10 schlůfkamer zegeen. darzů lucrecia redt. jch merck du hůst
 mich wenig lieb. warumh hůst du nit liber hie haimant by
 mir das nachtmůle genomen? Darumb daz du vsz gewesen
 bist hab ich hůt disz tags nůtzit geessen noch getruncken.
 es kůmen aber die mayer von vosalia, die etwas (ich waisz
 15 nit was wins) gebrůcht haben. doch sagten sy es were vast
 gůter trebianer. ich mocht aber von laides wegen den nit ver-
 sůchen. Nu aber wyle du komen bist! so gangen wir (ob es
 dir gefall) jn den kerr hin in! vnd versůchent den wine, ob
 er als sůsz syg als sy gesagt hant. Vnd als sy das geredt.
 20 Nam sy ain laternen in die gerechten hand vnd jren mane mit
 Ir lincken hand vnd gieng in die jnnersten taile des kelrs,
 vnd versůcht vnd tranck so lang, dann vsz disem vasse dann
 vsz dem vasse, bis sy maint euriolum hin weg komen sin.
 Und gieng also zůletscht mit jrem man zů vnwilliger elicher
 25 beschlauffung. Euriolus kam vmb mit nacht haim. des andern
 tags (ob es sich also von wegen der kamer geburt oder ob
 es von argwůne beschach) verschoppet vnd vermachtet mene-
 laus das venster. Ich geloubt (als dann vnser burger behend
 sint in vermerkung sůlicher dingen vnd voll argwůns) daz
 30 menelaus gemerckt hett die bequemlichkait desselbens ven-
 sters, vnd daz er hie durch siner husfrůwen etwas mindern
 wůlt geschicklichkait zů disen sachen. dann ob jm wol nůtzit
 aigenlichs wissend waz! so was jm doch nit verborgen sin
 husfrůwen in bůlschaft oft vnd vil angeredt, vnd versůcht wor-
 35 den sin. Und bekant dar by die vnstetikait wyplichs gemůtes,
 des so manifoldig willen sint, als vil der bletern vf den bůmen.
 dann wyplichs geschlecht [39^b] allwegen girig ist der nůwekait
 vnd selten lieb hůt den man des ir ist gantzer volle. Darumb

folgt er näch dem gemainen weg der emannen die da mainent vngelück mit güter hûte zefürkomen. Hie durch ist euriolo vnd lucrecie genomen vnd entwert worden di nacht irs zûsamenkomens vnd daz sy ouch nit mer haben mugen brief
 5 ainandern wie vor geben noch schicken dann die amptlüt der statt, den winschencken hinder lucrecie hus gesessen durch râte menelai ouch getriben hatten vsser der taferne! dar vs dann euriolus gewon was lucreciam anzereden vnd ir durch rore gauben zeschicken. Allain was jnen vor handen gesicht
 10 der ougen. da mit sy sich mit wincken vnd zaichen gebung möchten getrosten, wie wol sy sich noch dann desselben vssersten staffels der gesichte nit gnûg mit fûge konden gebruchen. Es was ir yetwederem grosser schmerz vnd pingung glych dem tode. dann sy ir liebe nit mochten vergessen noch darjnne
 15 ouch nit beharren, vnd do also euriolus angstig was vnd in jm gedächt was räts vnd trostes er hierjnne enpfachen möcht! fiel jm jnn sine die angebung lucrecie Als sy jm geschriben hatt von pandalo menelaus swester sune! vnd folget näch dem wysen ernieten artzat. die ain sölich gewonhait haben in gros-
 20 sen siechtungen! daz sy ain zwyfelhaftig artznie dem krancken gebent! vnd lieber wöllent erfahren würckung sölicher artznie durch wagung des lebens! danne den siechen ân artznie verlassen. Vnd nam jm für pandalum an zereden vnd die artznie vnd hilf zenemen, die er vor hatt vsgeschlagen vnd verachtet.
 25 vnd als er nu den besandt vnd in das aller jinnerst gemahe berüffet hatt! Sprach er sitz nider fründt. Ich will dir sagen vnd zeerkennen geben ain vast grosse sachh die da bedarf der dingen [40] die Ich waisz in dir sin, daz ist trüw, flysz vnd geschwigklichkait. jch hab in willen gehabt dir disz vor
 30 langer zyt zesagen! du werd mir aber do zemål dennoch nit gar bekant Aber yetz bekenn ich dich. vnd dwyle du from vnd trüw bist so hab ich dich lieb, vnd bin flyssig dich mir in liebe zebehalten. vnd wiste ich sust das nit anders von dir, so ist gnûg daz alle din mit burger dich lobent. So haben
 35 ouch mine diener mit denen du in früntschaft komen bist mich des aigenlich vnderichtet. von den solben ich ouch vermerckt han dich mines günstigen willens begeren! des ich dich yetz mittailhaftig machen wil. danne du nit minder des

wirdig bist, danne ich des dinen. nu waz ich wöll (wyle dises ding zwüschen fründen ist) wil ich dir mit kurtzen Worten vslegen . . Du waist wie sneel vnd genaigt ist, menschlich geschlecht in die liebe der minne. vnd es syg dann ain werck
5 der tugend, oder ain werck des lasters! so ist doch disz lyden ain gemain dinge vnd ist kain hertz (wo es anders flaischin ist) daz nit etwenn der liebe anfechtung hab empfunden. Du waist daz diser siechtung, nit den aller hailigosten dauid, nit den aller wysosten salamon noch nit den allerstercksten
10 samson hât lâssen sicher hinkomen. âne das so ist disz ain eigenschaft vnd nature des entzûnten hertzen in wârer jnbrünstiger liebe! als vil der liebhabend mensch, mer geirret wirt an siner liebe, als vil wirt er darjnne mer brinnen vnd wirt diser siechtum mit kainem ding bas gearznet noch gehailt!
15 dann mit dem vollen des liebgehaptten menschen. es sint gewesen vil man vnd fröwen (das bede zû vnser vnd vnser alt fordern zyten noch in dechnûsz ist) denen verbotten vnd irrung irer liebe, gewesen ist! ain vrsach ains aller hertsten todes. hin wider vmb so haben wir vil ercknet, die nâch zûgelâssner liplicher
20 erkennung [40^b] vnd nâch früntlichem hâlsen! nâch vnd nâch, jr inbrünstig wüten der liebe verliessent. Vnd ist nützit gerâtners, dann so die liebe dem marge Inwendigs gebains anhanget! daz man dann sôlicher vngestümikait entwyche vnd dero verheng iren gange. dann wer wides vngestümikait des
25 windes faret vnd schiffet, der mûs oft schiffbruchs note lyden. aber wer entwychet den wellen der kumpt hin vnd tût die vngestümikait vberwinden! disz hab ich dir hier vmb gesagt, daz ich wil dich min liebe wissen vnd was du vmb minen willen tûn werdest vnd volbringen! was dir ouch nutzes hier
30 von entsteen werd, wil ich dir ouch nit verhalten. dann ich dich yetz schetz sin ainen andern taile mines hertzen. ich bin hold worden lucrecie vnd hab die jnnerlichen lieb. vnd ist das (min lieber pandale) nit beschechen miner schuld halb. sunder durch schickung des gelückes in des hand vnd gewalt steet
35 die gantz welt, die wir dann eerent. Mir sint nit bekannt gewesen üwer wyse vnd sitten noch die gewonhait üwer statt. Ich wând üwer fröwen in dem hertzen tragen, das sy mit ouch geben zeerkennen. aber die selben üwer fröwen lüdernt vnd

raitzent die menschen vnd habend doch die nützit lieb, da
 durch ich betrogen worden bin. dann ich maint mich lieb ge-
 hapt sin lucrecie, do sy mich ansach lieplich mit wolgefelligen
 ougen. vnd hûb an sy widerumb liebzehaben! vnd mainet sich
 5 nit gebürren, das ain sölich wirdig hüpsche fröwe lieb haben
 sölt äne wider geltung der liebe. zû den selben zyten hab jch
 weder dich noch din geschlecht bekennet! vnd hatt lieb, mai-
 nende lieb gehapt sin. dann wer ist so stainin oder so ysnin
 der liebgehapt nit widerumb ouch lieb hab? aber nâch mâls
 10 vnd ich sölich betruagnûsz erkant vnd ich mich mit geuerden
 marckt verspottet sin! daz dann min lieb nit vmb sust vnd
 vnfruchtbar [41] wer! so hab jch mich geflissen mit allen
 minen künsten! die selben fröwen jn liebe gegen mir zeent-
 zünden vmb des willen daz glychs vmb glychs geben wurd.
 15 dann jn liebe brinnen das was ain scham vnd kumber des
 gemütes die mich tag vnd nacht wundervast bekranckten vnd
 ich was jnwendig so vast verirret! daz ich kainen weg vsz
 mir selbs hin vs wist zekomen. darvmb ist beschechen do ich
 also disz ding mit flyssiger übung beharret! daz vnser beder
 20 liebe gegen ainander glych worden ist. Sy ist entzündt. Ich
 brinn. wir sterbend bede vnd sechent nit aincherlay artznie
 vnser leben ze erlengern. es syge dann daz du nûn gût behüt
 vnd brüder vns komest zû hilffe. der wachend dracke behüt
 nit so wol des guldin scheppers, noch cerberus den zûgange
 25 sines gartens. als wol die ingeschlossen ist vnd behütet. jch
 hab erkennt üwer geschlechte. vnd waisz daz ir edel sint vnd
 vsser den vordersten diser statt, rych mechtig vnd lieb gehapt.
 wölt got daz ich dise fröwen nie hett erkennet. aber wer ist
 der, der widersteen mug des gelückes schickung? jch hab mir
 30 die nit erwellet sunder hât des gelückes fale mir die gegeben
 lieb ze haben. vnd hât disz ding ain sölich gestalt. vnser liebe
 ist noch in gehaim vnd verborgen. vnd es syge dann daz die
 selb liebe wol geregieret werd! so gebirt sy (wo die gött das
 nit fürkoment) ain grosses übel. ich möcht villich mir selbs
 35 abbrechen ob ich von hinnan ritt! wie wol mir daz allerschwe-
 rest wer, noch dann tett ich das von üwers geschlechtes we-
 gen, wenne ich erkannte üch das zû nutze komen. jch erkenn
 aber die inbrünstig vngestümikait lucrecie. aint weders sy lüff

mir näch. oder sy genött zebelyben, tett sich selbs ertötten,
 das zû ewiger schande sin wurd üwerm huse. darumb daz ich
 dich berüft hab ist üwer sachen halb, daz wir [41^b] begegnet
 disem v̄bel. vnd ist kain anderwege! dann daz du dich vns
 5 gebest zû ainem fürman vnser liebe, vnd achttest daz vnser
 verborgen füre nit werd geoffnet. jch enpfilch, gib, vnd verhaisz
 mich dir. wird zû dienste vnd willen der vngestümikait vnser
 liebe. daz nit (so man vns widerstreb) vnser liebe mer vnd
 grösser werd entzündet. schaff daz wir ainist mugen zû samen
 10 komen. wenn daz beschicht! so wirt schnell gedemütiget vnser
 brunst vnd littenlicher gemachet vnser liebe. du waist die
 geng in das huse. du waist wenn der man vsz ist. du waist
 wie du mich magst hin in füren. vf des mans brüder mûs
 man acht haben! der da ist zû disen dingen ain aller gröste
 15 Irrtung. danne der halt lucreciam an sins brüders statt vnd
 verhütet die mit grossem flysze. vnd merckt eben vff alle Ir
 geberde, wort süfftzen rüspeln hūsten vnd lachen. derselb ist
 näch minem beduncken zelaichen vnd zebetriegen, das aber
 āne dich nit beschechen mag. Darvmb so bis anhaimsch, vnd
 20 so der man vsz syg! so vnderwyse mich wartenden vnd stell
 abe den brüder, daz er nit syg ain angehefter hūter lucrecie,
 oder daz er nit ir ander hūter zû schybe, sunder dir getrūw
 vnd dir villicht (das got wöll) sölich ampt enpfelhe. beladest
 du dich dann des vnd mir hilffest als ich hoff! so ist alles
 25 ding richtig vnd in sicherhait gesetzt. dann du magst mich
 haimlich (so die andern schlāfent) jnlāssen vnd vnser wūten-
 den liebe miltern. wie vil nutzbarkait hier von entstee! main
 ich dich näch diner wysheit wol schinbarlich mercken vnd er-
 kennen. dann des ersten so behaltest du die eere dines ge-
 30 schlechtes. Du bedeckest vnd behaltest in gehaim die liebe,
 die nit āne üwer schande möcht werden offen. din geschwygen
 behepst du bim leben vnd behūtest menelao sin wibe. Dem
 selben menelao nit so vil [42] zû schaden komen mag ain
 nachte die mir gegöndt wirt vnd so niemant das waisz als
 35 sölt er die mit wissen des folckes verlieren so sy mir näch-
 lūff. ain frōw die vermechelt was ainem rōmschen sonatori!
 lūf hin vnd folget näch pyaludum zû pharone vnd an den
 nylum vnd in die lobwirdigen statt lagi. wie wer jm ob lucrecia

ir fürsatzte nächzefolgen mir, der da haimant bin edel rych
 vnd mechtig? was schand? was lasters? üwers geschlechtes?
 was gespöts des folkes? was red vnd böses lümdens? nit al-
 lain üwer, sunder ouch der gantzen statt, hier von entsteen
 5 wurd? nu möcht ainer sprechen! daz besser wer, die fröwen
 vor vnd ee mit wäffen zeertöten oder ir mit gifte ze verge-
 ben! dann daz sy ainchs sölichs tûn sölt. aber wee dem der
 sich mit menschlichem blût vermäsget, vnd mit grösser sünde
 ain minder sünde tât fürkomen. Böse ding sint nit ze meren
 10 sunder zemindern. so sint wir ouch nit hie vsser zwayen gü-
 ten dingen das besser zeerwellen, oder vsser ain bösen vnd
 vsser ain güten das, daz güt syg zeerkiesen! sunder so sint
 wir hie vsser zwain bösen zenemen das, das minder schadens
 mug geben. Allwege sint hier jnn voll der sorgfeltigkait.
 15 aber diser wege wenne Ich dir den erzög, hät sölicher sorgen
 am minsten! da durch du nit allain dinem blûte vnd geschlechte
 zû râte, sunder ouch mir zû nutze kumpst, der näch gantz
 vnsinnig bin! so ich sich vnd merck von minen wegen lucre-
 ciam werden gepinget, dero ich lieber sin wölt zû hasz dann
 20 dich also bitten. aber dise ding sint hier zû vnd so wyt ko-
 men, Es syg dann daz das schiff mit dinen künsten mit diner
 sorg mit diner vernunft vnd mit diner gefissenhait werd ge-
 regieret! so ist kain hoffung aincherlay hailes. darumb so hilf
 vnd tû sy vnd mich vnd din geschlecht vor vneeren behüten.
 25 [42^b] vnd wöllest nit mainen noch gelouben daz ich dir des
 vndanckbar sin werd. danne du waist wie grosz ich by dem
 kaiser geacht bin. wes du begerest das wil ich dir schaffen
 vsgericht vnd erworben. vnd vor allen dingen so verhaisz ich
 dir vnd gib dir des min trüw, daz du ain Comes palatin ge-
 30 machet werden solt! vnd alle dine nächkomen mit sölichem
 titel werden begaubet erfröwet vnd erhebet. jch enpfilch dir
 lucreciam, ouch mich vnd vnser liebe vnd darzû vnser eere
 vnd lümden vnd das lob vnd die gezierd dines geschlechtes,
 vnd gibe das alles in din trüw. du bist des gewaltig vnd mechtig
 35 vnd ist alles in dir gesetzt. lûg was du würckest vnd tûgest
 danne du magst das behalten vnd verderben. . als pandalus disz
 gehört schmollet Er enwenig. vnd vber ain klain wyle dar
 näch! Redt er. Ich hab dise ding (euriolle) langest gemercket

vnd verstanden. Vnd wölt got daz sy nit beschechen weren.
 daz ding ist aber (als du selbs bekennt häst) hier zû komen!
 daz die notdurft haischet mich das zetûn vnd zevolbringen
 daz du begerest. Es syge dann daz ich vnser geschlecht wöll
 5 werden gescholten vnd grosz schand vnd laster begere zeer-
 wachsen dise fröw (als du ouch geredt häst) brinnet in liebe,
 vnd ist jr selbs vnmechtig. vnd ich kom ir dann zehilff so
 ertött sy sich mit ainem messer oder mit fallen oder springen
 vsser aim venster. dann ir ist nit me ainch acht weder Irer
 10 eeren noch irs lebens. Sy hät mir Ir liebe geoffnet. Ich han
 widerstand getân sy gestraffet vnd mich geflissen zeverhüten
 vnsern lümden. Vnd doch nützit geschaffet. Dann alle ding
 bis an dich schetzet sy klain vnd nützit! besunder allain dich
 acht sy grosz Du bist zû aller zyt in Irem gemüt. din begert
 15 sy. nâch dir belanget sy. din allain gedenckt sy. oft hat sy
 mir [43] gerüft vnd gesprochen Euriolus los (bitt ich) also ist
 die fröw durch liebe verwandelt! daz sy nit die ist, die sy
 vor gewesen ist. Ach wyplich gütikait ach grosser schmerz.
 jst diser gantzen statt ist vor kain fröw kûscher noch wyser
 20 gewesen dann lucrecia. Es ist ain wundersam ding, daz die
 natur so vil rechts vnd gewaltz geben hät der liebe in mensch-
 lichts gemüte. Es gebürt sich aber zehelffen sölicher krank-
 hait. Vnd ist ouch des kain ander artznie, danne die so du
 gezögt häst. Ich wil mich disz wercks verfâhen vnd so es
 25 zyt wirdt dich vnderrichten. Vnd Ich sûch des nit gnâd noch
 danck von dir Danne es ist ainem fromen gûten man nit ge-
 bürlich gnâd vnd danck zebegeren sachen halb da er nützit
 verdient! dann ich wil das des du begerst tûn vnd volbringen
 vmb daz ich vermyd vneerlichen lümden vnser geschlechtes!
 30 ist daz dir das kumpt zû nutze! darvmb bin ich dir nit vil
 liebzehaben. Darvf euriolus redt. Dem syg dann wie Im wöll
 So hab ich dir des dancke vnd wil achten daz du (als Ich
 gesagt han) zû ainem comitpalatin werdest gemachet vnd er-
 hebet. Du wöllest sölich wirdigkait nit verachten noch ver-
 schmähen. Ich verschmähe die nit sprach Pandalus. Ich wil
 35 aber nit, daz die hier von entstanden syg! Ist daz mir etwas
 entsteen vnd komen sol! das kom frylich. Ich wil hier jnne
 nützit bedingts haben. dann möcht beschechen sin daz durch

min hilff vnd dir vnwissend, du zû Lucrecia komen werest!
 Ich wölte dasselb lieber dann also mit dinem wissen getân
 haben. Aber aldey got dehütt dich. Got behütt dich wol
 antwort Euriolus. Vnd dwyle du mir gûten troste geben häst!
 5 so tû, erdenck, sûch, find vnd volbring [43^b] daz wir zûsamen
 komen. ä loblich sprach Pandalus wil Ich das volbringen. Vnd
 schied dar mit frölich abe! Ains tails darvmb! daz er ains
 sölichen treffenlichen mans gnäd funden hatt! Zum andern
 darvmb daz Er sich yetz hoffet sin ainen comit polatinum,
 10 wecher würdigkait er so vil giriger was, als vil er sich minder
 erzougt dero zebegeren. Dann es sint ettlich lüte glych als
 die fröwen! die (so sy sich sagen aller maist ains dings nit
 wöllen! desselben dings aller maist begeren. . Diser pandalus
 hât mit würckung vnd belönung ainer büberye vnd riffianätz
 15 erfolgt vnd vberkomen ainen adel ains palatinäts. vnd sine
 nächkomen werden des erzögen brief vnd sigel irs adels . .
 lieber mariane in dem adel sint vil staffel. Vnd für wâr
 wenne du aines yeden vrsprung sûchest, so findst du näch
 minem beduncken, kainen adel oder aber wenig, die nit ainen
 20 süntlichen lasterlichen anfang vnd vrsprunge gehept haben.
 danne dwyle wir sechen daz. die. Edel gehaissen vnd genennet
 werden. die da in grossen richtungen ir leben füren vnd her-
 brächt haben. vnd aber rychtum selten ain mit gesell ist der
 tugend! Wer ist dann? der nit seche den vrsprung des adels
 25 haben ainen vnadelichen grunde. Etlich hât rych gemachet
 wücher Etlich roube! Etlich verräterye. der ist rych worden
 mit giftlicher vergebung. Der mit glychsnen vnd liebkoserye.
 Dem gebirt eebrechung lön zytliches gûtes dem ist zû nutze
 sin liegen. Etlich machent gewin vsser Iren elichen husfröwen,
 30 etlich vsser Iren töchtern Ir vil hilft erschlachung der men-
 schen. Seltzen ist der, der rechtlich vnd än sünde grossen
 rychtum hab gesampnet. Niemand machet ain grosse burde
 dann [44] dann der da mäyet vnd abschnydt alle krüter. Die
 menschen samelnt vil zytliches güttes vnd frägent nit waher
 35 das kom sunder nun das vil kom. Mengklichem gefalt der
 spruch. waher du das habest, frägt niemant! sunder so müs
 man haben vnd wenne also kisten vnd tröge voll sint So be-
 gert man dann des adels, der also erfolget nützit anders ist,

Danne ain belönung der boszhait. Mine alt fordern sint edel
 gehalten worden Ich wil aber mir selbs nit lieblosen Ich main
 nit besser gewesen min vränin vnd min abänin, dann ander
 die allain entschuldiget das alter darvmb daz ir laster nit ist
 5 in gedechnüsz der menschen. Hiervmb näch miner vrtail
 niemand edel ist dann die liebhaber der tugend. Ich wundern
 nit guldine klaiden, pfert, hunde, vile der dienern genügsam-
 kait des tisches marmorstainin hüser, zinsz, gült, dörfer, äcker,
 garten, wisam, matten, wäld, wyger, vischetzen gerichtzzwang,
 10 vnd anders der gelychen! danne disz alles ain narr vnd ain
 tore vberkomen mag vnd ob yemant den dar vmb edel haisset!
 der selb hie durch selbs billich ain tore genennet wirt. Vnser
 pandalus ist alhie mit vppigem werck der büberye worden ge-
 edelt. . Nit vber vil tage darnäch, ist vf dem göw zwüschen
 15 meneläs geburen ain gehäder vnd zwayung entstanden, Vnd
 sint ir etlich darvnder vom leben zum tode gebrächt worden,
 die me dann gnüg getruncken hatten, vnd hiesch die notdurft
 daz menelaus hinvsz kem die ding hinzelegen vnd zerichten;
 Do sprach lucrecia Min man du bist ain schwärer mensche
 20 vnd blöd dines lybes vnd trabent dine pfert hart. Warvmb
 entlechnest du nit etwa ainen zelter? Vnd als er dar vf frägt
 wo man ainen funde. [44^b] antwort pandalus. Ich Irre dann
 so hät Euriolus ainen vast güten den er dir gern lychet. Wilt
 du so wil Ich Inn dar vmb bitten? Bitt jnn sprach Menelaus.
 25 Euriolus aber gebetten, hiesz jnn den zelter bald haim füren,
 vnd nam jm dar zü ainem zaichen künftiger fröiden. Vnd
 redt in jm selbs haimlich. Du stigest vf min pfert menelae.
 So wirt ich dar zwüschen ryten din husfröwen. Der anschlag
 wart gemachet, daz der selben nacht zü der fünften stunde eu-
 30 riolus in der gassen sin solt vnd haben ain güt hoffen, were
 daz er pandalum wurd hören singen. Menelaus was hin weg
 vnd hatten yetz der nacht finsternüsz den himel vberzogen.
 Die fröw wartet der zyt in der schläfkamer vnd was Eurilus
 vor der türe in der gassen vnd baittet des zaichens, vnd hort
 35 doch weder gesang noch rüspeln. Die stund was yetz ver-
 ruckt, vnd riet achates euriolo, daz er hin weg haim gieng,
 vnd sprach sy weren betrogen Es was aber hart vnd schwer
 dem liebhaber von dannen abzegeen vnd sücht yetz disz sachh

dann die sachh zebelyben Pandalus sang nit! dann menelaus
 brüder was jm hus belyben vnd er sūcht alle des huses winckel
 vnd jngeng, vmb das nützit vntrüws beschechen möchte! vnd
 blaid also vngeschläffen, zū dem pandalus sprach. wöllen wir
 5 diser nacht nit schläffen geen? es ist yetz wyt vber mitte
 nacht vnd truket mich schwerer schlauffe. mich hāt wunder
 wyle du Jung bist, daz du hāt ain nature vnd aigenschaft
 der alten denen Ir truckne hin nimpt den schläffe vnd niemer
 schläffent dann en wenig gegen tage, so sich der herwage
 10 keret gegen dem taile des himels septentrio genant vnd so es
 yetz zyt were vf zesteen . . Gangen wir doch [45] zū letscht
 nu mer schlaffen. Was wil jm dises wachen? So gangen wir
 sprach Agamenon dwyle es dich bedunckt gūt sin. Doch so
 gebürt sich vor die türen des huses zebesechen, Ob sy recht
 15 vnd gnüg beschlossen vnd versorget vnd nit den dieben ze-
 offnen syen. Vnd als er kam zū der hustüre, tett er yetz
 disz dann das schlos hin zū vnd den rigel für. Es was alda
 ain vast grosses ysen, daz kumm zwen mochten erheben da
 mit man vnder wylen die tür beschlos Vnd als Agamenon
 20 das nit erlupfen mocht, Sprach er. hilf mir Pandale, daz wir
 dises ysen ouch zū der türe bringent! Dar näch so mugen
 wir zū beden oren rüwig schlauffen. Euriolus hort dise wort
 vnd redt haimlich jn jm selbs. Nu ist es vsgericht vnd be-
 schechen vmb mich, ist daz diser ysin rigel fürgestossen wirt.
 25 Aber pandalus redt. Was trybst du agamenon? vnd tūst
 glycher wyse als obman das huse beligen wöll) die türen ver-
 machen. Sint wir nit sicher in der statt? hie ist fryung vnd
 rûw yderman glych So sint vns vnser vinde die florentiner,
 mit denen wir krieg haben ferr vnd wyte. jst daz du fürchtest
 30 die diebe, so ist es gnüg beschlossen. Fürchst du aber die
 vind in der statt? so ist nützit daz dich jn disem huse mug
 beschirmen Ich wil mich diser nacht der burde nit beladen,
 dann mir tūnt die achseln wee vnd bin vnden gebrochen vnd
 nit tūgig zū schweren burdin zetragen. darvmb so hebe vnd
 35 lupf das selbs oder lasz es vnderwegen. Aldei mit gūter nacht
 sprach Agamenon vnd gieng hin zeschlaffen. Euriolus als er
 disz hort redt zū Im selbs Ich wil noch belybet ain stunde
 ob yemant villicht vf tūn wölle. Achatem verdros des wartens

vnd belybens vnd flüchet haimlich euriolo [45^b] daz er Inn
 so lang vf hielt vngeschlauffen. Sy sint aber dar näch nit lang
 beliben! da lucrecia durch ain schrunde gesehen ward en
 wenig liechtes In Ir hand tragende. Gegen dero euriolus gieng,
 5 vnd sprach. Got grüsz dich min hertzigs gemüt lucrecia.
 Aber sy erschrack vnd wolt des ersten geflochen sin. dar näch
 bedauht sy sich vnd sprach wer bist du? Din Euriolus bin
 Ich sprach euriolus. Tû vf min kurtzwyl vnd wolluste. Ich
 hab din yetz dise halbe nacht gewartet. lucrecia bekannt die
 10 stimm. aber doch wyle sy forcht begtrügnisz sölicher stimme
 da hât sy nit getörren vf tûn vor vnd ee. sy ain haimlich
 wârzaichen vor jm verstünde. Dar näch tett sy mit grosser
 arbeit die schlosz von dannen. aber wyle vil ysnin rigel
 die türen verhüben, die wyplich hend nit mochten er-
 15 heben, do mocht sy die türe allain ains halben schüchs
 wyte vf bringen. Das sol nit Irren sprach euriolus.
 Vnd sinen lyb vsziehende, schaib er die rechten syten
 vor vnd trang sich zû ir In das huse vnd tett die frö-
 wen enmitten vmb fâhen. Achates belaib hie vssen vff der
 20 wacht vnd hûte Euriolum zeverwaren. Aber lucrecia (es be-
 schech dann von forcht oder von fröiden) hûb an zwüschen
 euriols armen änmechtig ze werden vnd zeerblaichen vnd mit
 verlierung Irer rede vnd mit beschlossenen ougen, ward sy In
 allweg aim toten menschen gelyche. dann allain daz die hitz
 25 vnd die pulsz an Ir belibent. Euriolus erschrack. vnd wist
 vsz sölicher schneller geschicht nit was er tûn oder lassen
 solte vnd gedächt In Im selbs. Geest du hinweg so bist du
 schuldig Irs todes, vmb daz du ain fröwen In sölichen nöten
 verlässen hâst. Belyb Ich aber! So wirt komen agamenon
 30 oder ain anderer des husgesindes [46] vnd wirt Ich darvmb
 sterben. Ach wee du vnselige liebe. Wie hâst du so gar vil
 me der gallen danne des honges? Nu ist doch nützit rässers
 noch biterers danne du bist. Wie vil vnd manchen sorgen
 vnd angsten hâst du mich bis vndergeworffen? Wie vil vnd
 35 manchen töden hâst du min houpt verhaissen? yetz so kumpt
 vnd belypt vor handen daz du dise fröwen In minen armen
 ertöttest. Warvmb hâst du nit lieber mich getött? Warvmb
 hâst du mich nit fûrgeworffen den löwen? wee wee. Wie

were mir so gar vil begirlicher gewesen zesterben In Irer
schöse dann sy In der minen also hin schaiden. Grosse liebe
über wand den man daz er die sorg aigens hailt zu rugk
schlachende belaub by der fröwen. Vnd hüb höher vf den
5 vngesprechen stummen lybe vnd kuste den von Im gantz nasz
gemachet mit sinen trechen vnd sprach wee lucrecia. Wo bist
du in diser gantzen werlte? wo sint dine oren? Warumb gibst
du mir nit antwort? warumb hörest du mich nit? Tû vf dine
ougen (bitt Ich) vnd sich mich an. Lachh mir als du gewon
10 bist. Ich bin hie din Euriol. Dich vmbfacht din euriol
hertzblüt mins. Warumb küssest du nit mich hin widerumb?
Mich wundert ob du tod syest oder ob du schläffest! wo such
Ich dich! woltest du sterben. Warvmb häst du mich dann
nit vor gewarnet. Daz ich mich mit dir ertote. Es syge
15 dann daz du mich hörest (nim war) so sol yetz ain schwert
vf tûn min syten, vnd dir vnd mir sin ain gelycher vsgange
des todes. Ach min leben min süsse, min kurtzwyle min wol-
lust, ainige hoffung vnd gantze rûwe! sol ich dich lucrecia
also verlieren? ä tû vf dine ougen vnd heb vf din houpte.
20 Ich siche [46^b] doch daz du nit gantz tod bist. danne du noch
warm bist vnd züchest den äten. Warvmb redst du mir dann
nit? Enpfächst du mich also vnd berüfst du mich zu sölichen
fröiden vnd gibst du mir ain sölich nachte? Stand vf (bitt
ich) min rûwe vnd siche din Euriolum. Ich bin hie din eu-
25 riol. Vnd do er also redt, flos ain grosser bache der trecher
vf der fröwen stirnen vnd schlaufäder! dadurch sy als durch
röswasser erkiket! glycher wyse als vsser ain schweren tröme
vfstünd vnd Iren liebhaber ansehende sprach. Wee mir eu-
riole. wo bin ich gewesen? Wårumb häst du mich nit lieber
30 lassen sterben? jch were doch seligklich gestorben In dinen
henden. Wölt got daz Ich also sturb vor vnd ee. du von
diser statt schiedest. Vnd do sy also mit ainander geredten,
giengent sy sament In die schlaufkamer, da sy ain sölich
nachte hatten, als wir geloubent gewesen sin zwüschent zwayen
35 liebhabenden menschen. zu den zyten do paris In hohen schif-
fen die geroubten Helenam hinfürt. Die nacht was ouch so
süsz, daz sy bede abred wåren, so ain gûtes leben zwüschen
dem gotte mars vnd der göttin venus gewesen sin. Du bist

min ganimedes, du bist min yppolitus vnd bist min dyomedes
 sprach lucrecia. Du bist min pollixena sagst Euriolus vnd
 bist min emilia vnd venus. Vnd kust yetz den mund dann
 die begklin danne die ougen vnd hūb vnderwylen vf die decke
 5 vnd beschōwet die haimlichhait die er vor nit hatt gesechen.
 Vnd sprach. Ich find mer dann Ich gemaint hett, das ist
 dyanam. Wie antheon die sache weschen ob ainem brunnen.
 Was ist wyssers hūpschers vnd lustlichers danne dise. Yetz
 ist erlöset vnd bezalt alle [47] min sorg vnd angste. Vnd
 10 was ist? daz durch dinen willen nit sōlt werden gelitten. O.
 schöner zierlicher lybe. O. handelbare brüstli. Gryff Ich vch?
 Hab Ich ūch nit? Sint ir nit komen in mine hend? O. sin-
 wile gelider. O. wol geschmacker lybe. hab ich ūch nit yetz
 in besesse? yetz were lycht zesterben, so diese frōid so nūw
 15 frisch vnd grosz ist vnd kain ander vngemach die belaidet.
 hertz blūt mins. Hab ich dich oder trōmpt es mir? weder
 ist dise wollust an ir selbs wār? oder tūn ich miner sinnen
 entsetzet, das also schetzen vnd wānnen? Aber für wār ich
 schlauff nit. disz ist ain wārs dinge. o. süssen küsse. o. liep-
 20 lichts halsen. o. hungsüssen bisse. Niemand lebt gelücklicher
 dann ich noch niemand seliger. Aber wee. was kurtzer vnd
 schneller stunden. Du hessige nacht, warumb flūchst du also?
 belyb vsz appollo ain got der sunnen. belyb lang vnder dem
 ertrich in der vinstre Wār vmb setzest du als dald die pfert
 25 ros in den wagen? verheng daz sy noch mer grasses essent
 Gib mir ain nacht als du geben hāst alcomene. du morgenrōte
 warumb verläst so bald vnd schnell die schlāffkamer dines
 titanis? werest du dem als günstig als mir lucrecia Er liesse
 dich nit so frū vf steen. mich hāt nie kain nacht kurtzer be-
 30 dūcht dann dise. wie wol ich in britania vnd tennmarch ge-
 wesen bin. also redt euriolus. nit minder redt lucrecia. vnd
 gieng nit für aincher kusse noch āinch worte vmb sust oder
 vnuergolten. yetz facht er dann facht sy. Vnd lägen ouch
 nāch volbrächter minne nit müde noch stille Sunder glycher
 35 wyse als antheus vsser dem ertrich stercker vferstūnd also
 wurden ouch die nāch volbrächtem stryete frōlicher vnd stercker.
 Do aber die [47^b] nacht vergieng vnd die morgenrōte Ir hāre
 vsz dem oceanischen mere hatt vfgehept! ist man abgeschaiden

Darnäch vber etwa vil zyts! ist kain füge gewesen, daz sy widerumb zûsamen komen möchten von hûte wegen die sich teglichs tett meren. Aber liebe vberwand alle ding vnd fand zû letscht ainem wege Irs zûsamen komens, des
 5 sy sich darnäch gebruchten. In dem ward der kaiser mit dem babst Eugenio gericht vnd geainiget vnd yllet hin gen rome. Das marckt lucrecia bald. Dann was merckt liebe nit? oder wer möcht ainen liebhabenden menschen laichen oder betriegen. Darvmb sy Euriolo schraib ainen
 10 briefe vf sôlich form von wort zû wort als her nâch folget lutende.

Möcht min sel vnd gemüt Euriole gegen dir erzürnt werden! so zürnte Ich für wâr dir nit klain. Dar vmb, daz du mir verhalten vnd der gelychen nie getân hâst, daz du
 15 hinweg wöllest. aber min gaist hât lieber dich, dann mich. Vnd mag von kainer sache wegen wider dich bewegt werden. Ach vnd wee min hertzigs hertz. was ist es? daz du mir nit gesagt hâst, daz der kaiser hinweg schaiden will? er rüst sich zû der hinfart. So belibst du nit hie (waisz ich) was sol tûn
 20 ich arme? wo belyb ich? wo rûw ich? jst daz du mich verlässest! so belyb ich nit lebend zwen tage Ich mach disen briefe nasz mit minen trechen. Ich bitt dich durch dine rechte hand vnd durch dine gegebne trûw! hab ich vmb dich ye ützt verdient! Oder syg dir ye ützt liebs süsjes oder gûtes
 25 von mir beschechen. So erbarm dich vber mich arme vnselige liebhaberin. Ich bitt nit daz du belybest! Sunder nim mich dir. Ich wil [48] Ich wil der glychen tûn. als ob ich zû vesper zyt gen bethleem geen wöll vnd ain ainigs altes wyb mit mir nemen. Dasselbs syen zwen oder dry diner dienern die
 30 mich nement vnd hin wege fürent. Es ist kain schwer sach hinzefüren ain frôwen des willig. So schetze ouch dir das nit komen zû ainchen vneeren dann ain sune priami, machet Im selbs ouch ainen gemachel mit hinführung ainer sôlichen nome vnd roubes. Du tûst hier mit minem mane kain vnrecht.
 35 Danne er sust gentzlich mich verlieren müst. Danne wo du mich nit hinfürest! so nimt mich Im der tode. Aber nit wöllest sin ain wütrich vnd mich sterbend verlassen! die all-

wegen grösser hab gemachet dich dann mich. Hier vf euriolus wider vmb also schraib.

Ich hab verschwigen min lucrecia bis yetz min hinschaidung! vmb daz du dich nit zevil wurdest kestigen, vor vnd
 5 ee die zyt kem sölicher miner hinschaidung. Ich waisz din wyse vnd sitten vnd bekant daz du dich zû vil wurdest pingen. So schaidet ouch der kaiser nit also yetz hinweg, daz er nit mer her wider kom. danne wenn wirt wider vmb von rome schaiden, so komen wir ouch widerumb her. angesehen
 10 daz disz vnser rechter vnd nechster wege ist in vnser haimant, vnd ob der kaiser woll ainen andern wege ryten wölt! so solt du doch mich sechen jnn her füren vnd die gött wöllen mich niemer mer lassen haim komen (bitt ich) vnd mich wegs Irre machen glych als vlixem! Syg das ich nit widervmb her kom.
 15 darumb enpfächen müt, du min hertzigs gemüt vnd min craft, vnd höre vf dich selbs also zekestigen vnd zepingen, sunder so leb frölich vnd mütig. Als du [48^b] du aber schribst vnd begerst dich vfzefächen vnd hin weg zefüren etc. das wer mir zügefallen vnd grösten fröiden. vnd möcht mir ouch nit grösser
 20 wollust züsteen, danne daz ich dich allwegen by mir haben vnd mich din näch minem willen sölt vnd möcht gebruchen. Es gebürt sich aber bas zeräten dinen eeren, danne minen lyplichen begirden Dann din trüwe da mit du mich häst vmbfangen, die erfordert vnd haischet, daz ich dir geb ainen getrüwen räte, der dir kom zû nutze. Du waist selbs dich edel
 25 sin vnd ainem edeln geschlecht vermechelt. Du häst ainen namen ainer aller hüpschisten frömsten vnd küschisten fröwen. Vnd din gûter lümde ist nit allain in welschen landen beschlossen! sunder so bekennen ouch all tütsch panonier vnd
 30 behem vnd alle fölcker der gegne gen mitternacht werts gelegen dinen namen. Darumb sölte jch dich röblich hinweg füren! so tett ich ain sach die mir zû vneeren raichen wurd. das ich von dinen wegen ring schatzte. Aber zû was vneeren tettetst du bringen dine gesipten fründe? Mit was schmerzen
 35 pingotest du din müter? was wurd man von dir reden? was rumörs vnd geschrayes wurd vsgeen in alle lande? Man wurd sagen nemen war! lucrecia die küscher gewesen ist, dann

der gemachel bruti, vnd die besser vnd frömer genennet was
 dann menelopis! volgt yetz näch ainem eebrecher vnInge-
 denck irs huses irs vatters vnd irer mütter irs geschlechtes
 vnd irer haimant. Sy ist nit me lucrecia, sunder yppia oder
 5 medea die da nächfolget Jaſoni. we was grossen kumbers mir
 das geberen wurd! so ich vermarckte sölchs von dir gesagt
 werden. Nu ist vnser liebe noch in gehaim. niemand ist, der
 dich nit lob. diser nome betrübte alle ding, vnd [49] bist nie
 so verrümpft gewesen, als vil du hie durch gescholten wurdest.
 10 aber lassen wir joch den lümden vnd der welt rede fallen!
 So möchten wir vns doch nit, vnser liebe mit ainandern sament
 gebruchen. jch dien dem kaiser, der hät mich gemachet zü
 ainem mane, mechtig gewaltig vnd ryehe vnd Ich möcht ouch
 nit von Im komen, äne zerstörung vnd niderfale mines standes.
 15 Verliesz jch dann Inn! so möcht Ich dich nit zimlich vnd als
 sich näch dinen eeren geburte haben vnd halten. Volgte Ich
 aber näch dem hofe! So wer weder dir noch mir aincherlay
 rüwe. dan alle tag verwandeln wir vnser geleger vnd belyp-
 nüşz vnd ist dem kaiser noch nie an ainchem ende, So ain
 20 lang belyplichkait vnd wonung gewesen, Als Im in Senis ge-
 wesen ist, das hät notdurft der kriegs löffen gesachet. Vnd
 sölt Ich dich also vmbefüren Vnnd als ain offen fröwen In söli-
 chem heere haben. Sich zü. was vneeren dir vnd mir hier von
 wurd entspriessen! Hier vmb so bitt ich dich min Lucrecia!
 25 daz du dich dises dinen gemütes vsziechest vnd entledigest,
 vernunft für kerest vnd das beste mit rät handelst. Vnd mer
 verhengest vnd näch lässest diner vngestümen anfechtung danne
 dir selbs. Ain anderer liebhaber riete villicht anders, vnd be-
 te dich von Im selbs, daz du mit jm hinweg fluchest. Vmb daz
 30 er dich so lengest er möcht, niessen vnd bruchen könd, nützit
 des künftigen betrachtende So ferr er nun gegenwürtiger kranck-
 hait möcht gnüg tün. Aber der were nit ain rechter liebhaber,
 der me lyplicher begirde riet danne den eeren. min lucrecia
 ich warnen vnd räte das, das nütz vnd güt ist. ich bitt dich
 35 belyb hie vnd hab nit zwyfels, danne daz ich her wider kom.
 [49^b] was sich begibt in disen welschen landen dem kaiser
 zehandeln wil ich schaffen mir enpfolhen werden, vnd flysz
 tün daz ich dich haben vnd niessen mug äne dine schäden

vnd vngemach. got behüt dich. leb vnd hab lieb vnd geloub
 niemer minder sin min füre dann daz din, sunder mich aller
 vngernist schaiden von hinnan. Aber behütt dich got du min
 süsse vnd spys miner sele. die fröwe rüwet vf disz geschrift
 5 vnd schraib jm widervmb, daz sy sölichen sinen gebotten vnd
 vnderwysungen nächkomen wölt Also vber wenig tage darnäch
 rait euriolus mit dem kaiser gen röme. alda er nit lang be-
 lyben ist! da in das feber tett entzünden gantz vnseelig dwyle
 so der von liebe bran er dar zü ouch erst mit füre des febers
 10 anhüb zeenbrinnen. Vnd als nu die liebe yetz des craft ver-
 zert hatt vnd durch die weetage sins siechtums wenig macht
 vberbelyben was, vnd sin gaist vnd leben mer enthalten
 wurden durch hilff der artzat dann durch natürlich belybung!
 kam der kaiser teglichs zü jm vnd trost jnn als sinen sune
 15 vnd hies vnd gebot jm all pfleg vnd artznie appollinis zebe-
 wysen. Im was aber kain krefftiger artznie dann die geschriften
 lucrecie! da durch er die vernam sin in leben vnd gesuntheit,
 welches ding etlicher mäszt das feber mindert vnd Euriolum
 tett vfkomen vf sine füsse, der ouch der kaiserlichen Crönung
 20 by was vnd alda sin ritterschaft enpfieng! Vnd ainen guldin
 sporen. Dar näch als der kaiser gen parus rait! belaib Euriolus
 zü rome dennocht nit gantz genesen vnd kam dar näch
 gen senis! wie wol er dennocht kranck was vnd sin angesicht
 türre vnd verzeret. Er mocht lucreciam sechen. Aber die an-
 25 reden mocht er nit. Vil brief sind beder syt gesant worden
 vnd aber zü letscht von schaiden geschriben vnd ge[49]-
 handelt. Dryg tag belaib alda euriolus vnd zü letscht als er
 sach Im all zügang genomen vnd abgestellet sin do verkundt er
 der liebhaberin sin hinschaiden. Es ist nie so vil süssikait
 30 fröid vnd kurtzwyle gewesen in irer beder früntlichen by-
 wonung, Als vil in dem schaiden gewesen ist laids kumbers
 trurens not vnd angste. lucrecia was Inn venstern. Euriolus
 rait yetz durch die statt vnd durch Ire gassen vnd warf ir
 yedes in des andern sine nassen ougen. Es waint ir ains vnd
 35 waint das ander. Vnd wurden bede mit vnseglichem grossem
 schmerzen gepinget Als die, die da empfunden ihre hertzen
 freuenlich vsser ir statt werden verrucket; were yemant der
 nit wiste was grossen schmerzen wer in dem tode, der merck

vnd betracht zwayer liebhabender menschen schaidung. wie
 wol sölichem schaiden grösser angst not vnd schmerz by ist.
 Danne In sterben, so lydt das Inwendig gemüte vmb daz es
 verlassen sol sinen liebgehaptten lybe. aber derselb liebgehabt
 5 lybe so der gaist enpfremdet ist, hât weder schmerzen noch
 empfindung. Wenne aber zway gemüt durch liebe sint zûsam-
 men gefüget vnd verainet! so ist so vil pinlicher ir schaidung
 als vil enpfündlicher ist Irer yetweders liebe. Vnd für war.
 hie sint yetz nit gewesen zwain gaiste sunder (als aristophanus
 10 maint sin vnder den fründen) so sint ainer sele worden zwen
 libe. Vnd also schied nit gemüt von gemüte noch sel von
 sele! sunder wart geainte liebe in zway geschnitten vnd ge-
 taillet, vnd wart das hertze zertailt In taile. Also daz ain tail
 gieng vnd der ander taile belaib vnd all sinne mit ainandern
 15 vnder Inen selbs getailt wurden vnd entrichtet! Vnd wainten
 sich selbs von ain andern müssen schaiden vnd belaib nit [50^b]
 nit in der liebhabenden angesicht ain tropf des blütes, Es
 weren dann gewesen trecher oder süftzen die den toten aller
 glychest gesechen wurden. Wer möcht schriben sagen oder
 20 gedencken sölich lyden vnd schmerzen dann der des gelychen
 ouch etwenn vnsinnig gewesen ist vnd diser dingen hât en-
 pfunden. Ladonia (als pertheselaus jr man hin für zû den
 hailigen stryten yly) fiel von laide in änmacht als tot dar
 nider. Vnd als die selb darnäch vernam desselben irs mans
 25 tode begert sy füro nit mer zeleben. Dido venissa tett nâch
 abschaidung enee sich selbs von laids wegen ertöten. So wolt
 ouch porcia nâch dem tode bruti füro mer in leben nit be-
 lyben. Aber-dise vnser fröwe Als Euriolus kam vsser ir ge-
 sicht, ist gefallen vf das ertrich vnd in ir schlâfkamer getragen
 30 worden, bis sy Iren gaist widerumb gehalten möcht. Vnd als
 die widerumb zû ir selbs kam beschlos sy ire guldin vnd pur-
 pursche klaiden vnd aller der fröiden gezierde vnd gebrucht
 sich füro allain wulliner klaiden. Vnd ist öch darnäch niemer
 mer gehört worden singen noch gesechen lachen vnd mocht
 35 ouch mit kainen fröiden noch mit kainem schimpfen widerumb
 zû fröiden gebracht werden vnd als sy in sölichem stante etwa
 lang beharret! fiel sy in kranckhait. Vnd wile ir hertz nit
 by ir, sunder von ir was vnd kainem irem gemüte trostung

geben werden mocht! hăt sy zwüschē vnd vf den armen irer
 mütter die vil wainet vnd vmb sust sich trostlicher wort ge-
 brucht ir trurig sele vf geben. Euriolus aber als der kam
 vsser iren ougen die Inn niemer mer gesechen solten hăt er
 5 vf dem wege niemant nie ützt zů geredt! [51] dann daz er
 allain lucreciam trůg in sinem gemüte! vnd gedächt ob er
 yemer mer zů ir widervmb komen möcht Vnd kam zů letscht
 zů dem kaiser, sin zů parus wartende, dem er dar năch, nach-
 folgt gen ferrer gen mantōw gen trient gen costentz vnd gen
 10 basel vnd zů letst in hungern vnd behem. Aber wie er dem
 kaiser năch folgt, Also folgt Im năch lucrecia in den trōmen
 vnd lies Im kain nacht mit rūwe. Vnd als der war liebhaber
 vernam vnd erkant lucreciam gestorben sin! ist er mit grossem
 schmerzen betrůbt worden vnd nam an sich wainbare laid-
 15 same klaiden. Vnd enpfing ouch des von niemant aincherlay
 trostung als lang bis jm der kaiser ain hüpsche Jungfrōwen
 vsz hertzigostem blůte geborn hüpsch küsch vnd wyse. In der
 ee tett vermecheln.. Du hăt min lieber Mariane ain ge-
 schicht end vnd vsz gange, nit ainer erdăchten sunder ainer
 20 wăren vnseligen liebe. Welche da disz lesen werden, die wōl-
 len sich lernen warnen vnd hüten by ander lüten schaden daz
 Inen das kom zů nutze! vnd nit sich flyssen zetrinken das
 getranck der liebe, das ferr vnd wyt mer aloes vnd bitterkait
 in im hăt dann honges oder süsse datum wienne quinto nona
 25 July Anno.m. cccc. .xliij.

[51^b] **D**Em durchlüchtigen fürsten vnd herren hernn karlin Marggrauen zû Baden etc. Vnd grauen zû spanheim. Minem gnedigosten hernn. Enbütt Ich niclās von wyle Stat-schriber zû Esselingen min gehorsam vnd schuldig dienste mit
 5 willen in aller vnderthenikait berait zeuor. Vsz dem bûch bochacy daz in welcher zungen vil hüpscher historien von schönem gedicht vnd hohen sinnen begryffet! hât vor vil Jären der hochgelert man Franciscus petrarcha die history von griselde lutend vsser dem welchen zû latin verkert, wie
 10 dann üwer gnåde die selben history nächmäls aber von dem latin zû tütsche gebräch von mir hât gehöret. Sidher ist durch den hochgelerten man leonardum aretinum vsser dem obgemelten bûch die histori von sigismunda sagende. vnd aber von aim andern gelerten die histori von marina lutend ouch zû
 15 latin gebrächt worden. vnd wann die selben hochgelerten man bedücht hât, sölich historien der arbeit wert sin, daz sy zû latinischer zungen gesetz wurden! so hab ich gemaint sich wol gebüren daz die von dem latin zû tütsche ouch gemacht wurden. vmb das ob ützt darjnne kurtzwyligs hoffichs oder
 20 gütes wer daz die tütschen des vnberoubet ouch anteilhaftig werden möchten. dwyle aber als Aristotiles spricht, lust vnd liebe ainem yetklichen menschen der arbetet, behaltent in sinem wercke! so hab ich mir fürgenomen die obgemelten history von sigismunda lutend in tütsch zebringen vnd sölichs
 25 üwern gnäden zû gefallen, des ersten zû zeschicken. Vmb daz min vndertheniger wille zû üwern fürstlichen gnaden, dester [52] ee mich in lust fürte zû volbringung disz mines fürgenommen wercklis, das klain ist! vnd jch üwern genäden näch sitt der kouffüten die verkouffen wöllen zû ainer mustre allain
 30 darumb schick ob ich versteen wurd, sölichs üwern gnäden

gefellig sin! daz ich mich dann hienäch in grösserm! grösser
 arbeit gebruchte! zü kurtzweyl lust vnd gefallen üwern fürst-
 lichen gnäden darjn jch mich tûn vndertenig enpfelhen etc.

5 **T**Ancredus was ain fürst von salern, gütig vnd ainer
 senftmütigen nature. Wo er allain in dem alter sine hend nit
 vermässiget hett mit blût vergiessen zwayer liebhabenden men-
 schen. Der selb hatt all sin lebtage kain kind ye gehept!
 dann ain ainige tochter, da Im ouch vast besser gewesen wer,
 10 daz er dero nit gehept hett. Vnd als die selb tochter ain
 ainig kind was! also hett er ouch. sy ainig lieb, gegen Ir so
 Innerlichen in vätterlicher liebe entzündet! Wie wol vil Ir zü
 der ee begerten, ye doch wyle er die vngern von Im schaiden
 lies! tett Er sy vber die gebürlichen järe by jm haimant be-
 heben. doch zü letscht als die des hertzen sune von Cam-
 15 pania vermechelt ward, ist sy darnäch bald als der selb ir man
 gestarb widerumb haim zü Irem vatter komen. Dise was die
 gemaitescht non lybe vnd die schönst von angesicht vnd voll
 aller natürlicher hüpschkait vnd besunder ouch von vernunft
 grösser dann villicht fröwen gebürlich ist. Als die nu also by
 20 Irem gütigem vatter wonet, glych ainer grossen fröwen mit
 vil wollusten vmbgeben! gedaucht sy ains mals in Irem ge-
 müt! wie gar wenig oder nützit ir vatter geflissen wer, sy
 anderwerb zeuermecheln! Vnd ir zü schame sin wurd? sölich
 von Ime [52^b] ze begeren. vnd satzt jr für, wo das mit füge
 25 gesin möcht das sy dann ir haimlich ainen bülen ains adel-
 lichen gemütz süchen wölt. Nu was irs vatters huse voll edler
 vnd vnedler In mässen dann an der grossen fürsten höfen ge-
 won ist. Vnd als sy dero aller sitten leben vnd gestalt aigen-
 lich erspecht vermarckt vnd erwag! do warf sy zü letst Ir
 30 gemüt vf ainen Jüngling mit namen gwiscardum von nidern
 geschlecht geborn, Aber von loblichen sitten vber all ander
 wol edel. Den selben sy emsenklich ansehend von tag zü tag
 mer vnd mer bewarende, Inbrünstenklichen anhüb lieb zehaben.
 Als aber der von vernunft nit trege, der fröwen gemüt ver-
 35 marckt! ward er In dero liebe so entzündet! daz er all ander
 sachen zü rukg schlachende, nützit anders tett Dann tag vnd
 nacht allain näch jr gedencken. In dem nu vnd sölich ir liebe

beder sytt gegen ainander erwachsen was, vnd die fröw, nützit
 mers begert, dann wie sy zûsamen kämen vnd doch niemand
 anders ir gemüt In disen sachen offnen wolt, Do erdächt sy
 zû letst ainen sölichen wege, Vnd schraib dem Jüngling
 5 vnd vnderichtet den in geschrift was sy von jm beschechen
 wölt vnd verschlos die geschrift in ainen liederlichen vnd
 achtbaren stecken von rore, vnd gab dasselb rore schimpfflich
 dem Jungling sprechende! daz er das geben sölt siner dienst
 magt zû ainem stecken das füre zeschüren. als bald aber
 10 gwiscardus das rore genam gedächt er wol jm das nit äne
 sach gegeben sin vnd tett haimant das rore vf vnd fand die
 geschrift. vnd do er die gelas, gantz vnderichtet waz die
 fröw wolt von jm beschechen! ward er mit vngebürlicher fröide
 durch gossen vnd hüb schnell an flysz [53] zetûn, da mit er
 15 zûr Ir in massen sy jnn vnderricht hatt komen möcht. Nu
 was by des fürsten huse ain alte dol oder hüle vnd dar ob
 ain loch, das durch den berge gehöwen der hüle licht gab.
 Vnd wann aber zû langer zyt sich niemand derselben dolen
 vnd hülin hatt gebruchet! was die voll dornen vnd gestüdes
 20 gewachsen. Vsser der selben hülin was ain haimlicher zûgang
 zû der schlafkamer darjnn die fröw zû den selben zyten ir
 wonung hatt. wie wol die türe mit grossen starcken tiln ver-
 machet vnd verrigelt was. Vnd dwyle aber dise hüle gantz
 in vnübung stünd! do hatt niemand mer des zûgangs gedecht-
 25 nusz Aber liebe dero ougen nützit ist verborgen, fûrt den
 selben zûgang widerumb in das gemüt der liebhabenden frö-
 wann! die da mit Irem aigen wysen räte! vmb daz sie nie-
 met diser dingen mitwissend machte! durch sich selbs die
 kunst fand, wie wol das langsam vnd mit grossem flysz zû-
 30 gieng, wie man die türe vfbringen möcht. vnd gieng dar nach
 selbs allain in die hülin vnd besach das loch den tag jnfürend,
 da durch gwiscardus zû ir komen solt. vnd nam alda die men-
 sure vnd höche! damit er durch gemachte instrument hinab
 komen möcht. darumb als gwiscardus des alles durch der
 35 fröwen brief vnderichtet was! machet er zû diser dingen
 volbringung schnell ain saile mit knöpfen vnd halftern damit
 er vf vnd ab komen möcht. Vnd in leder angetân vnd be-
 klaidet daz er dester sicherer vor den törnen wer, gieng er

der andern nacht gantz allain vnd sust mengklichem vnwissend
 zû dem loch vnd band das sail an ainem ort oben an ainen
 böme der da in dem ingang des lochs gewachsen waz! vnd
 lies sich daran hin abe vnd belaib alda begirlich der fröwen
 5 wartende. Aber die fröw do es tag worden [53b] worden was
 (Dann sy vor nit zû Im komen mocht) tett dem glych! Wie
 sy rüw vnd schläffens notdürftig wer! vnd als die dienst vnd
 Jungfröwen sy deshalb verliessent vnd abgiengen! tett sy
 Innwendig allain die türe vf vnd nam alda den Jungling In
 10 der hüle funden begirlich In Ire vmbfächenden arme, vnd
 giengent sament in die schläfkamer vnd pflagen da mit ain-
 andern sölicher fröiden vnd wollusten die mit worten nit sint
 zesagen. Vnd als sy darnäch ainer listigen form ains wurden
 wie Ir liebe In künftig zyt, bestentlich vnd Ingeheim belyben
 15 möcht! schied gwiscardus wider vmb abe von Ir In die hüle
 vnd vermachet die fröw die türen vnd gieng ouch wider hin
 zû iren Jungfröwen vnd diensten. Vnd do es nacht ward!
 staig Gwiscardus das saile vf, Vnd kam vsser dem loch wie
 er dar In komen was! haim in sin huse, daz sin niemant ge-
 20 war noch Innen wart. Vnd als er im den wege gelernt!
 Kam Er emsenklichen widervmb daselbs hin, mit der liebha-
 benden fröwen (die er nit minder lieb hatt) die werck der
 liebe zevolbringen. Aber das gelücke das allwegen langer
 wollust vind vnd widerwertig ist! verkart zû letst mit truriger
 25 geschicht die fröid derselben liebhabenden menschen In bitter
 wainen vnd schmerzen. Dann Tancredus was gewon vnder-
 wylen allain äne all diener ze geen In die schläfkamer siner
 tochter vnd alda mit etlichen reden Im fürgenomen by Ir ain
 wyle zebelyben. Vnd dann darnäch widervmb von ir abzegeen.
 30 Vnd do tancredus vsser diser gewonhait ains tags von ge-
 schichte näch mittem tage gieng in die schläfkamer siner [54]
 tochter, vnd alda niemant fand! darumb daz Sigismunda (dann
 also was die tochter gehaissen) mit Iren Jungfröwen in aim
 garten was! wölt er sy von Iren fröiden vnd kurtzwylen nit
 35 abfordern. Vnd als die venster der schläfkamer beschlossen
 wären vnd des bettes vmbhange nider gelassen! satzt er sich
 by dem bette am letsten taile vf ainen pfulwen vnd lainte
 sin houpt vf das bette vnd zoch den vmbhang für sich vnd

hüb an ze schlauffen. Vnd als er nu also schlief, vnd sich
 zû vngelück begeben hatt, daz Sigismunda desselben tags
 gwiscardum zû ir hatt haissen komen! verliesz sy die Jung-
 fröwen Im garten vnd schlaich gemachhe in Ir, kamer. Vnd
 5 als sy die beschlos vnd den vatter nit sach! tett sy die türen
 der hülin vf, Vnd do gwiscardus hin In kam, machten sy sich
 vf das bette als Ir gewonhait was, daselbs schimpfs vnd fröi-
 den pflegende. Da durch Tancredus erwecket, also wachende
 alle ding die alda beschächent sach vnd hort. Vnd mit gros-
 10 sem schmerzen schnell vmbgeben! wolt er des ersten ge-
 schrüwen han! dann daz in bald darnäch bedücht hât, weger
 mit swygen verborgen zeligen, vmb das er dester sicherer vnd
 mit merer bedeckung sins lasters, der dingen räch vnd sträff
 volbringen möcht, die er Im dann yetz in sin gemüt fûrge-
 15 nomen hatt. Aber dise zway liebhabenden menschen, die da
 kains v̄bels wissend wären vnd gantz sicher zesin vermainten!
 als die gnûg lang Ir wollusten sament gepflegen hatten! Stün-
 den sy zûletst vf, Vnd gieng gwiscardus in die hüle, vnd Sigis-
 munda darnäch, als sy die tür nach jm beschlossen hatt,
 20 widerumb zû jren jungfröwen in den garten. Tancredus [54^b]
 aber mit vngelouplichem schmerzen betrübt, schied ab allain
 (Als er ouch allain komen was) vsser der tochter kamer in
 sin aigen gemache Vnd schickt do Ir etlich, die das loch, da
 durch gwiscardus her vf komen müst die nacht verhüten, vnd
 25 tett den vfstygenden hie mit also fächen. vnd do man den
 zû Im also gebracht Im leder als er was angetân. Redt tan-
 credus wainende zû Im also. Min gütikait gwiscarde, dero ich
 mich gegen dir gebrucht han! hât in kain weg verschuldet
 sölich vnrecht schmäch vnd schand, mir in minen dingen von
 30 dir beschechen, als ich mit disen minen ougen han gesehen..
 Hier zû gwiscardus nützit anders antwort dann also. Fürst
 sprach er. Der gewalt der liebe, ist vil grösser dann der ge-
 walt din oder min. Vf das gebot tancredus daz man jnn
 haimlich In gefencknüs wol verhüte. Mornends bald als Si-
 35 gismunda diser dingen gantz vnwissend was! Vnd tancredus
 vil vnd mancherlay hier von gewegen vnd gedächt hatt! Gieng
 er näch dem jmbis, als sin gewonhait was! in der tochter
 camer. Vnd als mengklich von jnen abgeschaiden ward vnd

sy allain by ainander wären! hûb tancredus zû ir wainend
 an also zereden. die wyle mich bedûcht hât sigismunda, din
 zucht erberkait vnd tugend mir gnûgsam gesechen vnd erkant
 sin! so hette mir zû kainer zyt nie yemant mit worten so
 5 vil mugen sagen oder min gemüte zeglouben des vnderrichten!
 daz du nit allain mit willen verhenget sunder ouch ye gedächt
 hettest! din scham vnd küschhait ainchem fremden man vn-
 derwürffig zemachen die zeuerletzen! wo ich disz selbs mit
 minen aigen ougen nit gesechen hett. darumb so wird ich disz
 10 kurtz zile des lebens, das noch minem alter vorhanden ist,
 fürohin allwegen schlyssen vnd ver[55]zeren In wainen vnd
 truren! so oft Ich in minem gemüt bedenck des lasters vnd
 v̄bels von dir begangen. Dann die wyle du dich ye zû sölicher
 sünde naigen vnd geben woltest, So möchtest doch dir vsser-
 15 wellet haben ainen sölichen, der dinem adel gezimpt hett.
 Aber vsser ainer sölichen menge dero, so sich vnsers hofs
 gebruchent! hâst du dir erwelt gwiscardum von niderm vnd
 gebürschem geschlechte geborn! vnd vmb armût willen siner
 vatters vnd mûter von vns vsz barmhertzikait von Jugend
 20 vf erzogen darumb wahin ich mich keer! oder was räts ich
 nem? waisz ich nit. dann so vil. daz ich von gwiscardo, der
 diser nacht durch min haissen gefangen by mir verhütet ligt!
 min vrtail vnd mainung gesetzt hab, was mit jm ze tûn syge.
 aber von dinen wegen, bin ich noch ains vngewissen räts vnd
 25 hab noch nie mögen setzen was ich tûn söll. wyle vf ainer
 syt, die liebe (so ich gegen dir grösser dann ye kain vatter
 gehept hab) mich hinder sich zücht! vnd aber vf der andern
 syten billicher zorn vmb din schuld vnd v̄bel mich für sich
 tribet, dero ains daz ich ablasz vnd vergeb! vnd das ander,
 30 daz ich zürn vnd strâff, mich ermanet. Vnd als er das geredt!
 sanckt er sin angesicht vnder sich wainend glych aim kinde
 das geschlagen ist. do aber sigismunda verstünd vnd marckt
 gwiscardum gefangen sin vnd ir liebe geofnet! ist sy mit vn-
 gelouplichem schmertzen vmbgeben worden! Vnd hât sich selbs
 35 kumm vor wypllichem wainen vnd schryen beheben mugen.
 Doch grösse irs gemüts die tet v̄berwinden wypllich blödikait
 vnd antwort mit vfgehepter stirnen vnd vestem angesicht.
 Vnd satzt Ir für ze sterben wöllen wann doch ir gwiscardus

yetz tod wer oder aber gewissz sterben müst! vnd hierumb
 so vnderstünd [55^b] sy sich nit weder genäd zebegeren noch
 des vatters zorn zemilttern. Sunder mit starckem vnd vnüber-
 wundnem gemüt das leben verachtende. redt sy vf sölich form!
 5 Tancrede Ich wil nützit weder loughnen noch bitten. dwyle das
 ain nütz sin mag. Vnd Ich nit wil, daz das ander nütz syg.
 Darvmb so han ich mir fürgenomen In diser dingen kainen
 dinen willen zegütigen oder din senftmütikait mir genaigter
 zemachen! Sunder der geschicht luter zevergechen vnd mit
 10 treffenlichen wären vrsachen minen lümden des ersten ze-
 schirmen vnd dar näch In glycher groszmütikait mit Worten
 erzögen, disz geschichten nit so grosz zevnbillichten! Sunder
 in vernunft wol zegütigen sin. Darvmb so vergich vnd bekenn
 ich mich gwiscardum lieb gehept haben. Vnd wil ouch als
 15 lang mir disz leben ist (das noch kurtz sin wirdt) den lieb
 zehaben niemer vfhören. Vnd ist ouch daz näch dem tode
 ützit der sinnen vberbelypt! so wil ich jnn als dann ouch lieb
 haben. aber in sin liebe hät mich nit so vil genött vnd ge-
 triben wyplich begirlichkait! als vil din smuseli. dann du
 20 soltest fürwår Tancrede, billich gedächt haben, dwyle du von
 flaische geborn bist! dich ouch ain tochter von flaische ge-
 born haben vnd nit ain stainin noch ain ysnin. du söltest
 ouch bedächt han. wie wol du alt bist wie frefel vnd vnge-
 stüm in der jugend ist, die anfechtung Inbrünstiger nature.
 25 Vnd wiewol du zü muglichen Jären den meren taile dins
 lebens In ritterschaft verschlissen häst! so soltest docht nützit
 dester minder betrachtet han wie grosz vnd vil, nit allain in
 Jungen, sunder ouch In alten menschen vermugent müsz vnd
 wolluste. Danne Ich bin ye ain fröw als von dir geborn vnd
 30 der [56] Jären Jung vnd beder sachen halb voll wyplicher
 begirden. Den selben begirden vber das alles, wundersam flam-
 men zü gegeben hät, wylant Innenbrächte wolluste! (zü zyten
 da ich vermechelt was) mit den wercken empfunden. Darumb
 do Ich disen anfechtungen die mich tag vnd nacht also brau-
 35 tent nicht mocht widersteen! Bin Ich zü letscht vberwunden
 worden vnd strytes nider gelegen vnd tett doch hier Inne nit
 dester minder flysse, als vil mit menschlicher vernunfte be-
 schechen mocht, daz dise ding weder dir noch mir schand

oder argen lümden zufüren sölten. Sölicher miner begird nu
 die süsz liebe vnd das gelück verhengt haben vnd mir ainen
 haimlichen wege gezaiget! durch den ich verborgenlich vnd
 in gehaim sust mengklichem vnwissend zû begerter wollust
 5 komen möcht! Aber wo her dir das gezaiget 'syg, Oder wan-
 nen du das vernomen häst! so lounen jch doch der wärhait
 niemer! danne daz ich, nit von schickung des gelückes (als
 vil fröwen gewon sint) sunder mit wolbedächtem sinn vnd
 müte, mir gwiscardum erwellet han liebzehaben, vnd den
 10 durch wysen räte jngefürt, vnd mit vester beharrung von jm
 die frucht wärer liebe lang zyt, mit höchster fröide empfangen.
 Aber das so mir sines vnadels halb wirt fürgeworfen, glycher
 wyse als ob es mir minder sünd were! wo ich mir ainen
 edeln hier zû fürgenomen hett etc. Indem folgest du nach
 15 dem falschen wäne des püfels vnd gemainen folches! vnd be-
 denkst nit, daz du nit schuldigest gwiscardum, sunder das
 gelücke! daz da gewonlich die vnwürdigen erhept in die höche
 vnd die würdigen niderdruckt vnd füsset vf die [56^b] erden.
 Aber daz wird des geschwygent vnd diser dingen wäen an-
 20 fange beschöwent! so ist gewissz vnd vnzwyfelich vns alle von
 ainem menschen ainen vrsprunge gehept haben, vnd das allain
 die tugend die ist! so vns gelych geborn, vnderschaidet! vnd
 die lobsam vnd edel machet! dero tugend ryche werck für
 ander erschnent vnd vbertreffent. Vnd wie wol der wäne
 25 des püfels vnd geminem folckes diser dingen vnwissend vnd
 vngelert! villicht anders maint! so mag doch die wärhait in
 kain wege vsser Irer statt verruckt werden. vnd also so ist
 der wärlich edel zeschetzen, des würckung, tugendrych werden
 gesehen. vnd wer den anders nennet! der schilt denselben
 30 nit den er nennet, sunder mer tüt er sich selbs der torhait
 vnd vnwissenhait verdampnen. Darumb tancrede so besiche
 din edeln vnd betracht vnd erfare Ir yetkliches leben vnd
 sitten. desglychen vf der andern sitten, so bedenck vnd erwig
 die sitten vnd das leben gwiscardi! für wär. Wilt du dann
 35 recht vrtailen! so zwyfeln ich nit, danne daz du Inn ver-
 gehen müsest sin, dem aller edelsten! vnd hin wider vmb
 die andern din edeln ferre von rechtem adel. So hab ich ouch
 von der tugend vnd fürnemikait gwiscardi, kains andern sa-

gungen vnd rede mer geloubt, danne den dinen. dann wer ist
 von dir so vil ye gelopt worden, als er! in allen vnd yetkli-
 chen wercken, so zû übung der tugenden gehörig sint! Vnd für
 wär nit vnbillich. Dann es werd dann min erkennung betrogen
 5 so ist Im nie ainch lob zûgelegt worden, das er nit vil wun-
 dersamlicher (ouch dann es von dir gesagt syg) erfolget vnd
 verdienet hab. Solt du darumb sprechen? mich, mir selbs
 ainen vnedeln menschen vserkoren haben? für[57]wär, du
 redest das nit ist? sprechest du aber ainen armen, des wölt
 10 ich dir gesteen! doch mit diner schande! daz du ainen söli-
 chen fürpüntlichen mane, dinen diener vnd hofgesinde, nie häst
 bedächt mit aincherlay gnäden, rechts lones zebelonen. Aber
 doch so nimpt armüt den adel nit hin! Wie wol sölich armüt,
 etwenn die werck der tugend hindert vnd Irret. Ir vil die
 15 von anfang dünne vnd arm geborn sint. Sint darnäch küng
 vnd fürsten worden. So wurden ir vil nu me arm, mit Iren
 aigen henden pürsche werck übende oder der hirtery pflegende!
 wo nit vberflüssiger ryctum von fremden tugenden gesamelt
 Inen verlassen worden wer. Das du aber an der letsten statt
 20 gesprochen häst, die vrtail von minen wegen dir zwyfelhaftig
 sin, Vnd dich biszher noch nit haben setzen mugen was mit
 mir zetûn syg etc. Ich bitt leg hin den zwyfel. Ist das du
 dir häst fürgenomen ze wütern In Gwiscardum, so kere din
 wüterye vnd grimikait In mich, die gewesen bin ain vrsach
 25 des so verschuldet ist. Dann ich bitt nit die pene, so fürcht
 Ich ouch die nit. Ich setz ouch das hin zû. Was von dir
 in Gwiscardum geschechen wirt vnd du dasselb in mir nit tûst!
 so sollen doch mine hend das würcken vnd an mir volbringen.
 Gang nu hin näch wibischen sitten vnd gûsz vsz dine. trechen
 30 vnd mit ainem gelychen straiche tû Inn vnd mich (Ob dich
 bedunck vns sölichs verdient han) ertötten. Tancredus ver-
 marckt die groszmütikait der vernunft in siner tochter enbört
 sin! ye doch so maint er nit, daz sy tûn wurd in mässen die
 letsten wort gelut hatten. vnd als er von ir kam vnd jm
 35 selbs fürsatz in kain weg in die tochter [57^b] ze wütern
 sunder mit fremdem blûte das für der liebe in Ir zemindern!
 gebot er den dienern die gwiscardum verhüten! daz sy haimlich
 derselben nacht an all geschraye den Jüngling erwurgten vnd sin

hertze vsgeschnitten Im bringen teten. Vnd als die sölichs getä-
 ten! Hies Tancredus dasselb hertz In ainem guldin becher der
 tochter bringen Mit den worten. Din vatter schickt dir das zû
 ainer gaube vnd schencke, daz es dich tröste von dem ding
 5 daz du vast lieb häst, glycherwyse als du Inn von dem ding
 das er vast liebgehept hät getröstet häst. Aber sigismunda
 als die in vestem fürsätze was zesterben! hatt sy nach des
 vaters abschaid giftige krüter vnd wurtzen gebrennet vnd di-
 stillieret vnd das wasser darvon behalten. Zû dem wege des
 10 todes. Ob anders sölichs an Gwiscardo bescheche, das sy dann
 forcht. Vnd als der becher geantwort worden ist! vnd die
 wort dar zû gesprochen! Enpfieng Sigismunda mit vner-
 schrockner angesicht die gaub vnd schencke! vnd tett den
 becher vf, vnd sach das hertz Vnd als sy die gesprochnen
 15 wort damit bedächt! erkant sy bald vnzwifellich das hertz sin
 Gwiscardi vnd kart sich gegen dem diener der die gaube ge-
 antwort hatt vnd sprach. Fürwar kain ander grabe danne
 ain guldins hat gezimpt aim sölichen hertzen. Vnd in dem
 ainigen dinge, ist gebürlichs von minem vatter gehandelt wor-
 20 den. Vnd do sy das geredt! satzt sy das hertz an iren mund
 vnd kust das vnd red darnach also. Zû allen zyten vnd in
 allen dingen bis vf disen letsten tage mines lebens, hab ich
 allwegen die liebe mins vatters gegen mir lind vnd gütig fun-
 den! vnd doch yetz vil mer dann vor ye. Darumbe [58] den
 25 letsten dancke den Ich Im vmb ain sölich gaube schuldig bin
 den solt du Im niemer von minen wegen sagen, Nách dem
 kart sy sich zû dem becher den sy hatt. mit Iren henden he-
 bend was. Vnd das hertz ansehende, Redt sy also. O. aller
 frölichoste herberg miner wollusten. Verderben müsz des wü-
 30 terye vnd grimmikait, Der da tût daz Ich dich mit lyplichen
 ougen ansich. dann es wer gnüg gewesen dich In Inwendigen
 gemüt zesechen. Du häst volbrächt dinen louff vnd genossen
 vnd erfolgt das ende das dir das gelücke geben hät. vnd von
 dinem vinde, häst du gehept das grabe, das verdient hät din
 35 fürpüntlichkait aller wollusten. diner lyche hät nützit gebrochen
 dann der trechern dero, die du so jnbrünstenklich die wyle
 du lebtest lieb gehept häst. da aber got, vmb daz du das
 ouch erfolgtest minem vater jn sinen sine geben hät, daz er

dich zů mir gesandt hāt. daz ich dir derselben trächern ouch
 bezalung tůg. wie wol ich mir fürgesetzt hatt mit trucknen
 ougen zesterben. Vnd wenn ich dir die bezalt hab. So wil
 ich sachhen, daz min sele der dinen zůgefüget werd. dann mit
 5 was weggeferten möcht mir sin ain frōlicher oder sicherer wege
 dann mit diner sele, die ich main hie zů gegen sin, vmbflie-
 gend vnd beschōwend die statt jrer gehapten wollusten. Dwyle
 sy noch in miner liebe ist, min wartet vnd baitet vnd āne
 mich nit von hinnan schaiden wil. vnd als sy disz geredt!
 10 naigt sy sich vf den becher vnd mit kainem geschraye, als
 sust die frōwen gewon sint, sunder schwygend vnd nit anders
 dann ob ain brunn vsz jren ougen wūle! v̄bergos sy do das
 hertze gwiscardi mit grossem flusze der trechern! vnd tett
 ōch darby das tot hertze vnzalbarlichen küssen. die jungfrō-
 15 [58^b]wen die alda zů gegen wāren! wisten nit was hertzens
 das was oder was dise wort Inen wolten Aber doch vsz barm-
 hertzigkeit bewegt waiten sy all. Frāgende die vrsach so
 ains schnellen vnd grossen schmerzen vnd trosten ouch sy
 all aine nāch der andern als vil sy mochten. Aber Sigismunda
 20 da die bedūcht gnůg gewainet sin! hūb sy ir angesicht vf,
 vnd mit gedrūckneten ougen, sprach sy. O. du aller liebstes
 min hertz. Ich hab dir nu bezalt, das ich dir gebūrllichkeit
 halb schuldig gewesen bin! Nu ist zyt vnd nūtzit mer vor-
 handen dann daz Ich dir nāch folg vnd du an mir ainen weg-
 25 gesellen habest! Darnāch nam sy das vergift tōtlichtrancke
 vnd tett das vnerschrockenlich vsz trincken vnd gieng hin
 vnd satz sich vf das bette, den becher mit dem hertzen in
 Iren henden habende vnd des liebhabenden hertze an Ir Brust
 truckende vnd baitet also da mit schwygend des todes. aber
 30 die frōwen vnd jungfrōwen so vmb sy stūdent wie wol sy
 nit wistent welcherlay trancks das gewesen was so sy ge-
 truncken hatt! yedoch vsz diser winbaren geschicht argwenig!
 brachten sy die sachen bald an tancredum den vatter. vnd
 als der selbs forcht daz die tochter ir selbs etwas zehertes
 35 an tūn möcht! ylt er bald hin abe zů ir in ir schlāfkamer.
 aber ze spät was er geflissen hilff vnd trost der bekūmberten
 dochter zemittailen. vnd als er verstūnd vnd marckt notdurft
 des todes! tett er erbermlich vnd ellenklich sich selbs vnd

die tochter wainen. Zû dem sigismunda also redt. Behalt
 tancrede dir dine trächer zû den geschichten vnd sachhen die
 von dir nit begert sint vnd gib mir dero nützit. Dan ich
 dero weder beger noch wil. Vnd wer ist ye gewesen bis an
 5 dich? der da [59] gewäinet hab das? des er zebeschehen
 begert hât Aber doch ist nützit noch überbeliben der liebe,
 so du zû mir gehept hât So bitt vnd beger ich von dir, di-
 ser letsten gaube vnd schencke? daz min lyb mit dem lyb
 gwiscardi. In ain grab sament gelegt werden. Vmbe das. die
 10 wyle du nit woltest, das ich haimlich vnd verborgenlich mit
 im löbte, daz du mich dann tot offenlich zû im wahin du ioch
 inn werffen werdest ouch legest. die grösse des schmerczens
 vnd wainens beschlosz den mund tancredi, das er nit antworten
 mocht. Sigismunda aber, als die enpfand daz ende jrs lebens
 15 hie sin druckt sy zû ir das hertz gwiscardi vnd mit zû ge-
 tanen ougen yederman gnädende? gab sy vf iren gaiste disz
 biter ende hatt die liebe gwiscardi vnd sigismunde Aber tan-
 credus näch vil grössem vnd ellendem wainen vnd vsser spä-
 tem rüwen bewegt? tet er mit offenlichen vnd schynbarer lyhe
 20 aller von salern, sy bede sament in ain grab vergraben.

[59^b] **D**Er durlüchtigen fürstin vnd fröwen fröw Mech-
 ilten pfaltzgräuin by ryne vnd Ertzhertzogin zû österrych etc.
 miner gnedigosten fröwen Enbüt ich niclās von wyle der zyt
 statschriber zû Esselingen Min vndertenig willig dienst zeuor.
 5 Wo ich nit förcht. gnedigoste fröw! jn liebkoserye vermerckt
 zewerden! die Ich all min tage hab geflochen vnd gehasset.
 So müste ich für wår, nit klain loben üwer fürtreffend mensch-
 lichkait aller gebürlicher sitten vnd lobwürdiger tugend die
 ich bisher oft hab hören rümen vnd yetz selbs gesechen vnd
 10 so aigenlich vermercket daz ich nu mer des, so ich vor kumm
 gewesen bin ain gelouber! füro hin sin wil ain züge vszrüffer
 vnd verkünder. Vnd nit vnbillich gnedigosteste fröw. dann
 wyle ich all min tage geschetzt hab wåren rychtum mer sin
 in gûten fründen! dann in besitzung des goldes vnd nützit
 15 mer vnd bas zû menschlicher seligkait in diser zyt dienen!
 dann sin vnd belyben in tugendrycher hochgeachter menschen
 erkantnusz vnd von denselben werden lieb gehapt gefürdert
 vnd geert! was möcht dann gnedigoste fröw mir bessers zû-
 gestanden sin? dann das ain söliche fürstin, die da ist ain
 20 eere vnd ain sunder zierung vnser landen! nechst mir armen
 hât lassen erschynen sölich gnåd vnd günstigen willen vsz
 aigner tugend, Minenthalb vnuerdient, dar von ich mich nu
 mer, so vil rycher, seliger, gefürdeter vnd geerter achten vnd
 schetzen mag, als vil üwer fürstlich genåd hochgeachter ist
 25 vnd für ander mer vnd billicher wirt geeeret. So Ich mich
 aber tûn [60] Erfaren! wo mit Ich üwern gnåden vmb sölich
 gnåd zucht vnd eere an mich gelegt! etlicher mæssze danckbar
 sin möcht! So ist nützit, daz ich find mir verlichen sin, zû
 bezalung des aller minsten tails dienende, dann allain minen
 30 lutern vndertenigen gûten willen zû üwern fürstlichen gnåden.

Dann was mag ain mensch arm von güt, klainer vernunft vnd
 minderer kunst, getün ald würcken lobsams vnd gefelligs!
 ainer sölichen fürstin, die sich mit aigner vernunft vnd wysz-
 5 hait, ouch mit liebe zü kunst, vnd mit verstänntüsz aller hüpsch-
 kait gelychet den alt gelopten fröwen. dero tugend ryche werck,
 wir mer müssen wundern danne wir die mit ainchem lob nâch
 billichkait gnüg mugen erheben. Dwyle man aber von vns
 nit mer noch wyters sol begeren! Danne als vil wir mit
 10 willen vnd wercken vermugen! Vnd mir nu des ainen nam-
 lich mit den wercken gebriecht! So hab Ich das ander, das
 ist min danckbar willig gemüt, üwern fürstlichen gnâden wöllen
 öffnen, vnd wârlicher zereden gantz wöllen ergeben! vmbe
 dâz ich jn dem laster der vndanckbarkait (das ich all min
 tage hab gevindet) von üwern gnâden nit wurd vermercket.
 15 ob aber dieselb üwer gnâd dehainist beduncken wölt! ainch
 dienste miner arbeit vch zü gefallen ouch komen mögen! So
 wil ich des von üch vnderichtet in sölichen diensten gehor-
 sam funden werden! gelych vwers hofgesinds gehorsamsten
 dienern jn allem mir vermuglichem, nâch liebstem gefallen
 20 vwer fürstlichen gnâden. Dar In ich mich vnderthenig enpfleñ
 vnd bitt, daz got der almechtig die gesund vnd früsç mit
 seligkait aller eeren vnd gûtes langfristen vnd be[60^b]waren
 wöll, In ainem stande vnd wesen üwern hochgelopten gnâden
 wol zimend vnd gefellig Geben vf sanct Matheus aubent Als
 25 man nâch crists geburt zalt tusent vierhundert vnd jm ains
 vnd sechtzigosten Järe etc.

DER durlüchtigen fürstin vnd fröwen fröw. Mechilten
 geborner pfaltzgrëfin by Ryne vnd Ertzhertzogin zü österrych
 30 etc. witwan miner gnedigosten fröwen enbüt ich niclâs von
 wyle der zyt statschriber zü Esselingen min vnderthenig willig
 dienst zeuor. Vnd als üwer fürstlich gnâd vf min erbieten
 vch nechst schriftlich getân, yetz durch üwer gnâden Camrer,
 maister Jörgen rat, an mich begert hât ob ich ützt loblichs
 35 oder kurtzwylligs von dem latine zü tütsch gebrâcht hett oder
 noch bringen wurd! vch das zemittailen, nützt möcht von
 mir beschechen gefelligers üwern gnâden etc. hab ich yetz nechst
 vom latin zü tütsch gebrâcht! wie yetz vnser allerhailigoster

vater vnd herre herrn pius babst der ander vor etlichen Jären,
do er in niderer wurde gesessen vnd eneas genennet was, ai-
nem siner gûten frûnden riet vnd hailsam leer vnd vn-
derwysung gab! wie er sich der jochs der herten aigen-
5 schaft der liebe! damit er belestiget was, môcht ledigen vnd
dar von fryg vnd sicher entrûnnen. das Ich üwern gnâden
so vil vngerner schick! als vil mer scheltens wyplicher bil-
dung vnd grobkait etlicher Worten darjnn werden vermercket.
aber üwer fûrtreffend hoch vernunft versteet vnd merckt sô-
10 lichs zû erfolung des, darumb sôlich leere geben wirt sich
notdürftenklich gebûren. dann wer gelerter oder vernünftiger
zwyfelt hieran! daz man nit, als vil wâres grunds, als vil wis-
senlicher exempel vnd als vil geloupwirdiger [61] sprûchen
vnd genûgsamkait der Worten finde vnd habe zû lob wyplichs
15 geschlechtes dienende Als zû scheltung. aber lose üwer fûrst-
lich gnâd enklain hier von vnd merck was etlich schelck wider
wyplich bildung vff die ban bringen tûgen. Sy sagen jn den
hailigen geschriften vil gezûgnûsz sin vnd funden werden den
frôwen widerwertig! vnd wider sy schryen Augustinum Am-
20 brosium Jeronimum vnd Gregorium vnd vil ander lerer ouch
wider sy hert vnd scharpf sin Virgilium Juueenalem vnd die
gantzen schare der poeten Item so melde ouch Cato der aller
ernstlichest vnd wysest vnd sprech, daz frôwen gütig syen
vnstett vnd zornig. Vnd sagent vnd bringent des exempel
25 der bösten frôwen vnd offnent wie vil übels vnd arges von
den selben syge entstanden. Darnâch berüffent sy her für die
natürlichen maister! Vnd sagent wenne man dero râts ye
gepflegen hab von wyber zenemen! so haben sy allwegen das
widerrâten, oder aber nit wöllen râten, von wegen mancherlay
30 trûbseligkait dar Inne verborgen. Aber disz ist alles nâch
minem beduncken lichtenklich zeverantworten. Zum ersten
das, so In der hailigen geschrift gesetzt wirt, das ist zever-
steen von etlichen verkerten bösen frôwen. vnd ist niemant
zwyfels danne daz vnder den frôwen ouch boszhait funden
35 werd. aber in sôlichen sprûchen vnd schriften, wirdt nützit
also gantz gemain vnd gar durchgende genomen oder ver-
merckt! daz nit etwer des geÿssert syge. danne sust müsten
ouch alle mane bösz sin. dann find man in der geschrift von

der fröwen daz vnder tusent kumm aine güt funden werd so
 lesen wir ouch des gelychen von den mannen in dem psalter!
 daz niemant syg der güts tüg, niemant bis [61^b] an ainenn.
 Aber wenne die hailigen leerer die fröwen schelten. So schel-
 5 tent vnd verdampnent sy mit recht etlich bös oder aber sy
 besprechen hier mit die man die küschhait gelobt hant vnd
 verhaissen! daz die selben hie durch fröwen tügen fliechen
 vnd vermyden. Desz gelychen sy ouch hin widerumb den
 10 Jungfröwen in den clöstern args vnd böses sagent von den
 mannen. Daz aber die poeten wider die fröwen schribent, ist
 nit zewundern! angesechen, daz die selben poeten den mannen
 ouch nützit vertragen. Item Catoni dem wysen wirt gnüg
 geantwort, durch lucium valerium Als liuius schribt, Der da
 das recht opiam genant wider die fröwen gesetzt! behüb ab-
 15 gestellet werden. Von vile der sünden vnd lastern? Ist nit
 not zedisputieren dwyle dieselben sünd vnd laster vil grösser
 vnd merer sint vnd funden werden in vnserm geschlecht, dann
 in den fröwen. Vnd mich bewegent nützit der bösen exempel
 oder die alten bösen geschichten durch fröwen menschlichem
 20 geschlecht zügestanden. Dann wenne wir bede der fröwen
 vnd der mannen schantlich geschichten herfür ziehen, vnd
 von dem ersten vbertretter Adam bis vf den aller sündigosten
 Judam. Vnd von Im bis vf disen hüttigen tage arg getäten
 beder geschlechten an ain summ summarum legen wöllen!
 25 So findet ain yetklicher die fröwen gegen den mannen als vn-
 schuldig vermerckt werden. aber Ich kum nu vff die natür-
 lichen maister, dero als Lactancius schribt nie kainer gelebt
 hät als er geschriben hät Vnd ist war daz man manchen man
 findt hochgelert vnd für from gehalten der hundert guldin
 30 nimpt zepredigen vnd nit zwayhundert nem das so er prediget
 mit [62] den wercken zevolbringen. Socrates den appollo schatz
 den aller wysosten, hät oft andern mannen die ee. als sorg-
 ueltig vnd voll laids widerräten! der noch dann sich selbs
 zwurent elichen husfröwen tett vermecheln. Aber disz min
 35 schriben ist villicht gnedigoste fröw zü vil wyt vsgeluffen vnd
 üwern gnäden verdrüssig. darumb berüffe ich mich vnd lende
 wider zü stade, dannen ich vsgefahren bin, hier von nit me
 sagende dann daz ich mich, mit disem wyten vszlouffe, gegen

allen das künftenklich lesenden fröwen, entschuldiget haben
 wil! vnd denselben geben zeuersteen! mich disz wercks nit
 verfangen han als ain genaigter züscheltung vnd abzuge wyp-
 licher eeren vnd wirdden, die ich giriger bin mit lobe allzyt
 5 zeeerheben! sunder als ainer, der des gebetten worden ist, von
 ainer persone, dero mir nit geburt ützt zeversagen. aber vf
 üwer begerung obgemelt, durlüchtige fürstin! schick ich üwer
 gnäden dise min translatze vnd tütschung näch dem latin vf
 das genewst gesetzt! vnd wölt daz die üwern gnäden kem zü
 10 gefallen! das were mir so vil mer zü fröden, als vil ich lieber
 zü aller zyt würcken wölt! da durch üwer gnäden günstiger
 wille sich gegen mir üwerm willigem vnd vnderthenigem diener
 tett wachsen vnd meren datum sexta post mathei. Anno
 M.cccc.lxj.

15 **E**Neas Siluius poet Enbüt nieläsen wartemberger vil
 hails. Du häst dich der vorigen nachte beclagt wie du in
 liebe ainer bülschaft arbeit habest, Vnd hier Inne din inge-
 fürtes gebunden gemüt nit mugest ledigen noch enpinden.
 Vnd sagtest darby dich liebhaben, weder ain Jungfröwen noch
 20 ain vermechelte noch ain witwe! sunder ain fröwen wie wol
 sy hüpsch wer, yedoch sich selbs vmb lones [62^b] willen, ainem
 yetklichen vnderwürffig machende Vnd redtest dir sölichs laid
 sin vnd gern wöllen die liebe zü rugk schlachen! vnd dich
 doch nit wissen weg vnd mäsz dadurch du frye, Vnd sölicher
 25 liebe entlediget werden möchtest. Danne ob du wol vil prie-
 ster deshalb räts gepflegen hettest! So hette dir doch ir kainer
 sölich artznie gegeben, Die dich hier zü bedüchten gnüg tref-
 fenlich sin vnd tett darumb mit grosser bitte mich ersüchen!
 daz ich diner kranckhait etlich artznie geben wölt, vnd dir
 30 zaigen ainen wege, durch den du dem flammen brinnender
 liebe möchtest entrinnen. Ich wirt zü willen diner begird,
 vnd gib dir hailsam artznie! wo du anders die enpfahen in-
 nemen vnd du dich dero recht gebruchen wilt. Vnd fürcht
 mir nit ainen namen oder ainch sträffe ains bösen artzats ge-
 35 geben oder zü gelegt werden! wo du anders an dich nemen
 wilt ain person ains gefölgagen krancken. Wie wol Ich main
 daz die priester dero rätes du gepflegen häst, dir gnüg getän

hetten, wo du ir lere die sy dir gaubent hettest gehalten.
 aber die selben lere bedüchten dich villicht schwer sin. Dann
 so sy sprachent flüch die selben fröwen. rede nützit mit ir.
 vnd hör ouch nützit von jr. diz hät dich bedücht sin ain her-
 5 tes wort desgelychen ouch ain krancker das feber habende
 vngern hört jm kalt tranck versagt werden. Aber doch wil
 er gesund werden so haltet er mit flysz das so Im der artzat
 gebütet. Darymb min niclās wilt du diser liebe entrinnen
 vnd fryg werden, so berait vnd schick dich hier zû, was ich
 10 dir gebiet, daz du das haltest vnd volbringest. vnd erkenn
 dich siech sin, vnd mit ainer allergrösten kranckhait begriffen
 vnd von gesunthait wegen sich [63] dir gebürren vil scharpfer
 vnd herter dingen Inzegeen Danne min niclās siech vnd
 kranck ist ain yetklicher der da lieb hat, vnd nit allain siech
 15 vnd kranck, sunder ouch mit aigenschaft gefangen vnd toub
 vnd siner sinnen entsetzet. Ich red von vngbürlicher liebe.
 Dann got lieb haben ouch vatter müter wyb vnd kinder, ist
 ain werck der tugend vnd nit des lasters vnd ain werck der
 gesunthait vnd nit der kranckhait. Aber du hengest nâch vn-
 20 gebürlicher liebe. Was mainst du sin sölich vngbürlich liebe
 dar von wir yetz reden? die alten hant gesetzt die sin geborn
 von der göttin der mine Venus genant, Vnd von vulcano ai-
 nem gote des füres vnd daz sy sige ain blindes kinde geflü-
 gelt, vnd in sinen henden ainen bogen vnd geschütz habende,
 25 Da mit es man vnd wyb treffende, brunst der liebe ingüsset
 vnd entzünden. Vnd Seneca spricht In tragedys. Liebe ist
 nützit anders dann etlich grosse craft vnd macht Innwendiger
 sinnen vnd senfte lustsami hitz des gemütes! die, so sy an-
 gefangen ist! geborn wirt vnd zû nimpt mit mûsse vnd gai-
 30 likait, Vnd gefüret vnd behalten! zwüschen der frölichen güt-
 hait des gelückes. Dann liebe gern wonet In den höfen der
 rychen vnd selten sich lasset herhergen. In den hütten vnd
 vnder den tächern der armen. Dise liebe nimpt hin des
 menschen sinn, verkert alle erkantnûsz. Verstopft vnd töbt
 35 die vernunft vnd erleschet alles gemüte. Danne so du ain
 fröwen lieb häst, so lebst du nit in dir sunder allain in ir.
 Was ist aber böser? danne ainen lebenden menschen nit leben!
 ainen vernünftigen menschen nützit mercken noch versteen!

vnd ainen menschen ougen habende nit gesehen. Dann [63^b]
 wer lieb hât der wirt verkert in ainen andern menschen, daz
 er weder redt noch tût das, so er vor getân hât. Darumb
 so redt parmeno Interencio. lieber got. spricht er. Was siech-
 5 tums ist das, daz die lût also verendert werden von liebe
 wegen, daz du sy nit bekantest sin die vorigen. Da mit Te-
 rentius maint liebe sin ain siechtum, vnd maint ouch nit vn-
 recht dann als Macrobius schribt, So spricht yppocras daz
 vnküschhait, die da ist ain mûter oder ain tochter der liebe,
 10 syge ain tail ains aller bösten siechtums. Diser siechtum oft
 ankumt die Jungen ouch die alten vnderwylen nit für geet
 sunder seer tût bekrencken vnd so vil sorgfeltiger ist vnd
 mer zeuerspotten! als vil die person die dar mit bekrencket
 ist? treffenlicher vnd fürnemer von alter oder kunst wegen!
 15 wirt geschetzet vnd gehalten. Darumb niclaus so du also ge-
 fangen bist! vnd der liebe dienest! so wisz dich siech vnd
 kranck sin. bist du dann siech? so flisz dich des siechtums
 ledig zewerden. dann wer ist der! der da lydet sichtum vnd
 des nit wölt werden entlediget? Aber als vil der siechtum
 20 schwärer vnd grösser ist biterer vnd sorgfeltiger! So vil
 mûsz grösser sin die sorg vnd artznie des siechen. Nu ist
 din kranckhait grosz! Darumb syg ouch grosz der flysz di-
 ner widerbringung. bedenck min niclās in was stāts vnd
 wesens du syest. du schetzest dich selbs nützit vnd was dir
 25 zûfalt vnd begegnet bedunckt dich licht sin. allain bist du ge-
 flissen vnd sorgueltig vber dinen bûlen. du achtest nit grosz
 din vater din mûter din fründ vnd gütteeder, allain ist din
 gemüt in dem selben dinem bûlen, die hâst du lieb. die lobst.
 die fürderst von dero trömpst dir. von dero gedenckst du. von
 30 dero redst [64] du. von dero suftzest du. Vnd tûst noch
 wûrckest nützit, du syest ir jngedenck. Nin war was torhait
 was vnsinnikait was grosser kranckhait das syg? Ist nit hie
 zebegeren artznie? dann wer wölt nit gesund werden von ain
 sôlichen siechtum? aber füro niclās, so sint dise nachge-
 35 schribne ding notdürftig zû dinem haile. tûst du die so wirst
 du gesund. versumpst du sy aber, so wirst du vergraben in
 diner kranckhait vnd mag dir niemant komen zû hilffe. Item
 des ersten so betracht wie gar ferre du von den gebotten

gotes gewichen syest! so du soltest got dinen schöpfer von
 gantzem hertzen liebhaben, vnd du lieber gehept häst ain
 geschöpfte creatur vnd in dero gelegt all din kurtzwyle vnd
 wollust, da durch du worden bist ain eerer vnd vber der
 5 abgötterye. dann wer ain creatur fürsetzet got dem allmech-
 tigen der ist ain eerer vnd vber der abgötterye. du lougnest
 aber villicht dich ainen sölichen sin. gelycherwyse als ob du
 nit fürsetzest ainch creatur in dinem schöpfer. Aber wilt du
 der wårheit verJechen so müst du bekennen, daz du mer lieb-
 10 häst dinen bûlen dann gote. dann was got gebütet das ver-
 sumpst verachtetst vnd vberferst du. was aber din bûl wil das-
 selb achtest du mit oberstem flysse zevolfüren. vnd das ist für
 wår ain fröwen fürzesetzen got dinem schöpfer. Aber laider
 was grossen sorgueltigen vnd schützlichen vbels ist es, ain
 15 geschöpfte creatur also lieb zehaben daz du hierjnne gotz
 minder achttest. got do du nützit werd, hät dich getån etwas
 sin, daz du möchtest wissen die götlichen sacrament vnd den
 wege den man geet in die himel. Der selb gotte ouch do du
 vnd ander menschen vmb die schuld des ersten vatters ade,
 20 das paradys verloren hatten! für dich wolt werden geborn
 ain mensch, wolt werden gefangen [64^b] gescholten geschlagen,
 gecrützigot. ouch wolt sterben vnd dich mit sinem costbaren
 blûte erlösen. Nym war was grosser vndanckbarkait grobkait
 vnmenschlikait vnd boshait ist das, den der so vil von dinen
 25 wegen hät getan, zeuerlassen von ainer schnöden fröwen we-
 gen. Das sol dich vnd ander cristan lüt bewegen von vn-
 zimlicher liebe zelassen vnd got allain zedienen. Aber gedenck
 füro niclaus was du tügest. Bedunckt dich din bûl hüpsch
 sin? geloubst du nit daz sy allwegen also hüpsch belyb? oder
 30 waist du nit Als trageuius schribt! daz hüpsche der gestalt
 ain fliechend dinge ist? ain fröwe hüt hüpsch wirdt morn ent-
 schöpft vnd vngestalt. Warvmbe verwechselst dann du das
 gûte so ewig vnd vnwandelbar ist, vmb die ding die da vn-
 belyplich hinfallent? Sig Joch daz din bûl ainer schönen
 35 hüpschen vnd lustigen form vnd gestalt syge (als du mainst)
 So ist doch sölichs ain lycht vnstets gûte. dann ainer fröwen
 gestalt vnd hüpsche nützit ist. sölichs hupsche werd dann
 behulffen mit tugentlichen sitten vnd wercken. kûschait ist die

so ain fröwen lobsam machet vnd nit die form irer gestalt.
 du hengest aber nit näch der küschait! Sunder häst allain
 lieb die gestalt die selb gestalt aber hin felt glych dem blü-
 men des ackers vnd als ain rose die frû schynet vnd rotet,
 5 vnd spät siechet vnd dorret. Nützit ist hüpschers dann die
 tugent vnnnd fromkait. Wenne. du die ainist sechest vnd be-
 schöwtest so bedüchte sy dich vil hüpscher sin dann din bûle.
 Wyle weder der morgenstern noch der Aubent stern so schön
 vnnnd wolgezieret sin mag, als die angesicht derselben fromkait
 10 vnnnd erberkait. Wer die verlasset von wegen ainer fröwen/
 schetz selbs (bit ich) wie gar der syg ain [65] tore vnd narre
 vnd äne sinn vnd vernunfte. Fûro nieläs daz Ich mich mit
 dir nit vil worten gebruch. Dise fröw. Die du lieb häst, ist
 nit allain din, Sunder haben vil dieselben. So hät sy ouch
 15 nit allain dich lieb, sunder so liebt sy ouch ander. Was wilt
 du dann tûn in ainer sölichen schare? Betracht dich yetz
 komen sin vber mittage zû der vesper, Vnd aller nechst we-
 sen der verdienung dines lones. Wilt du mit den Jungen
 gesellen stryten? Vnd mit den starcken fechten? was sûchst
 20 du in aim stryt! In dem so du gesigen häst! nider gelegen
 bist? Es ist ain grosz ding ainen alten man von jungen ge-
 sellen ain fröwen ryssen vnd jnen die abgewinnen Ich setz
 aber, daz du des mechtig syest vnd sy von jnen mit gewalt
 vnd perfort bringen mugest. was häst du dann gewonnen oder
 25 wes bist du obgelegen! wyle diser stryt, also ist, daz der ob-
 ligend vnder geligt. Ich bitt dich sag, was ist ain fröw anders
 dann ain zerstörerin der Jugend, ain roub der mannen, ain
 tod der alten, ain vertügerin erbes, ain schad der eere, ain
 spys des tûfels, ain port des todes, vnd ain erfüllung der helle.
 30 Gedenck niclaus wie vil v̄bels durch fröwen syg beschechen.
 wyle salomon holofernes wyle sampson vnd vil ander, durch
 fröwen sint worden betrogen. Geloub dich selbs nit so starck
 sin! daz du nit vmbgeführt vnd schimpflich werdest verspotet!
 sunder als vil du blöder vnbehûtsamer vnd vnwyser bist, dann
 35 die vorgesagten manne, so vil mer zûch dich von der statt
 darInne du magst werden angeführt vnd betrogen. die liebe
 ainer fröwen ist nützit die da beschicht mit sünde! Dann in
 ir ist kain stetikait! sunder welche dich hüt lieb hät! wirt

morn ainen andern lieb haben. wie achtest du die liebe, die
 in vil getaillet ist. [65_b] Kain fröw hât ainchen man so vest
 lieb, die nit zû zyten so ain nûwer bûler kumpt! Durch nûw
 bitt vnd gauben jr liebe tûg verkeren. Dann ain fröw ist ain
 5 mensch mangerlay siechtungen vnd zûfellen vnderwürffig, ane
 truw! ane forcht, ane stetikait ân miltikait. Ich red von den
 fröwen, die da schantlich liebe zûlâssent! zû kainer zyt sint
 die selben stete. dann als sy ainist ab dem rechten wege sint
 getretten, also mainent sy sich dann darnâch fryg sin! daz
 10 sy vmbschwafften vnd beginnen sollen was sy wöllen vnd
 habent ouch füro weder forcht Irer frunden noch Irer mannen.
 Ich geloub für wâr dise wollust der minne, nu mer dir, der
 von alter ab nimpst wenig me zû gefallen sin. Dann was mag
 dise schamliche wollust ützt gûtes bringen! nit allain dir alten
 15 vnd durren manne! sunder ouch Jungen muglichen menschen!
 dero doch schnell nâch folgt ain rûwe. Ist sôlich ermanung
 vnd endrung nit ain grosz mercklich ding? die nâch der be-
 gangen sünde von stund an, schnell des menschen gemüt tût
 mit rûwe strâffen vnd betrûben. wie bösz ist der mensch der
 20 so dick ermant nit fürret? vnd so oft gestrâffet sich nit bes-
 sert? was tût sôlich lyplich übung anders würcken dann die
 sel ertöten. dann wenne zway menschen man vnd fröwe sa-
 ment die werck der vnküschhait pflegent! daz bedunckt mich
 sin gelicher wyse als zway gleser die an ainander so lang ge-
 25 riben werden bis sy zerbrechent vnd zû nichte gebrâcht wer-
 den. aber du fröwest dich villich nit in dem werck sôlicher
 vnküschhait! sunder allain hâst du lust vnd ergetzung in der
 gesicht vnd in dem gespreche der fröwen. Ich bitt dich sag
 was ist so hüpsch in der gesicht daz du nit finden mugest
 30 [66] hüpschers? die hüpsche die wir sollen sûchen, ist in dem
 himel, dero kain zytlich noch irdisch ding mag gelychet wer-
 den. in der selben hüpsche ist alle volkomenhait. Die zyt-
 lichen dinge haben allwegen gebrechen. dise sint ewig. die
 hinfallend. dise stet vnd belyplich. die fliessend vnd zergengk-
 35 lich. Die schöne vnd hüpschkait der gestalt dins bûlen die
 du yetz verwunderst, nimpst lichtenklich hin klainer siechtum
 des febers. vnd ob der siechtum vszbelypt! so verspâtet noch
 verhindert sich doch nit das alter, daz da das schön vollgedrungen

vnd gewollen angesicht machet dürr krumb vnd runtzelecht!
 Also daz die gelider so du yetz wunderst! durch klaine lenge
 der zyt werden dürr, schwartz, Wüst, voll gestancks vnd vn-
 lustes. Die ougen beheben nit Iren schyn, der mund wirt
 5 schmecken, der hals gekrümpt Vnd der lyb allenthalben glych
 ainem durren trucknen bloche. Disz bedenck vnd kere von
 disen dingen din hoffung! vnd flüch die! vor vnd ee du dero
 beroubet werdest. dann es ist vil besser dise ding zeuerschma-
 hen vnd selbs zeuerlassen, dann die zeuerlieren. Aber von
 10 wegen Ir süssen wolgefelligen rede! da durch du dich sprichst
 ergetzet ze werden etc. Hab ich grösses wunder! Danne
 was hät söliche rede in ir ützt süsset? Was sagt dir din
 bül? Fürwär, aint weders sy beclagt sich oder wainet oder
 tröwt. Oder sagt dir torrechte merlin vnd was sy by Ir näch-
 15 pürin getän hab. Was ir getrömpft vnd wie vil ayer ir henne
 gelegt hab. Vnd mit was blümen ain krentzlin zemachen syg
 Also das alle der fröwen rede nützit ist! dann von lichtfer-
 tigen dingen! darjnne (ob sich yemant fröwt vnd ergetzet)
 zemerken ist vnd sin mûs! den selben [66^b] menschen. ouch
 20 sin ring vnd lychte. Sy sagt dir vnder wylen wie vnd welcher
 mäsz sy vor by ainem andern syg gelegen, vnd wie sy mit
 dem gelebt, vnd was gauben sy von Im empfangen vnd wie
 grosz wollust sy mit essen trincken vnd anderm gehept hab.
 welche rede dir nit fröid, sunder pingung bringen tût. aber
 25 du nemest vnd enplachest fröid wie vil du wöllest in der rede
 dines bülen Sag bist du nit so gar än sinne vnd diner ver-
 nunfte so gar entsetzet! daz du nit vil mer dich fröwest jn
 den worten vnd reden ains vernünftigen hochgelerten mannes?
 Mach ain summ summarum vnd rechne zû sament Alle fröid
 30 vnd alles laid, so in der liebe ist vnd sin mag! so findst du
 des vil sin vnd disz wenig vnd wirst sprechen wär sin, des
 poeten spruch! der da sagt liebe sin gesencket in wenig hongts
 vnd vil gallen. darvmb lieber niclās. Wyle die gantz liebe,
 dar von wir reden vppig ist, scharpf bitter vnd schedlich vnd
 35 die den menschen mit aller schweristem siechtum tût binden!
 so ist dir zeachten, daz du dar von werdest entlediget. die
 artznie aber hier zû ist die, daz du in dinem gemüt dir das
 fürsetzest vnd halttest! sölich liebe obgemelt bös sin. Dar

näch wych vnd züch dich von der red dines bülen. Fluch
 müsse. vnd bis allwegen vnd stets in arbeit. folg näch gütten
 fromen lüten! die dich vnderwisent. Bis kainem schimpf kai-
 ner wolluste noch kainen gailen fröiden gegenwürtig. Habe
 5 din bül dir ützt geben das wirss von dir. läsz nützt by dir
 sin, das ir gewesen syg. Vnd schetz die sin ainen botten des
 tufels der dich wolt verdampnen. In diner gedechtnüsz syent
 die güthait cristi, die er dir getän hät. Gedenck wie vil lones
 berait syg den woltünden in den himmeln. vnd wie vil pin-
 10 gung den vbeltetigen [67] in den hellen. Bedenck dine tag
 allwegen kürtzer werden, vnd nächen den letsten. Bedenck
 daz er zü gespötte ist, der lieb hät vnd sunderlich ain man
 lang gelepter Jären. bedenck der fröwen vnstetz gemüte. be-
 denck verlierung der zyte dero nützt costlichers ist. bedenck
 15 zergenglichkait dines güttes bedenck wie kurtz ist das leben
 das wir lebent in diser welt! wie wol es der wollust geben
 wirdt vnd daz in der andern welte die wir süchen, kain ende
 ist. Ist daz du disz emsenklich betrachttest, vnd du dise leer
 vnd gebot haltest! so tüst du dich in kurtzer zyt der liebe
 20 mit dero du beladen bist, entledigen vnd gibst dich sin ainen
 man got genem vnd wirdig der himeln Vale etc.

[67^b] **D**Em durlüchtigen fürsten vnd herren hernn Karlin Marggrauen zû Baden etc. Vnd grauen zû Spanhaim minem gnedigosten herren Enbüt Ich niclās von wyle Statschriber zû Esselingen Min gehorsam schuldig dienste mit willen In aller
 5 vndertenigkait berait zû uor . . als Cosmas de medicis wylant, sines gewaltes entsetzet! von der statt florentz nit āne betrüpnüsz sins gemütes! vsgetriben vnd verboten ward! Sandt Im der hochgelert man Pogius florentinus zû troste, ain latini-
 10 sisch geschrifte die nāch minem beduncken, andern menschen, sōlichs mit flysz lesend vnd merckende! Ouch billich nit klainen trost in sōlichen Iren beschwerden geben sōlt Dwyle mir aber diser vergangner vasnacht, fyrrung halb vnsers rātes vnd gerichtes, etlich klain zyt der müsse verlichen gewesen ist! So maint ich besser vnd loblich er getān sin! sōlich zyt
 15 zeuertyben mit erber arbeit! Danne mit springen vnd tantzen! da mit ich doch nu mer kainen hanen gewinnen möcht. Vnd hab darumb die selben geschrift, die von treffenlichen hohen sinnen vnd mit loblicher zierung der worten gesetzt ist! in disz nāchfolgend tütsch gebrācht! zû lieb vnd nutz allen!
 20 die sōlicher trestung künftenklich bedōrfen möchten. Ouch vmb daz ich erfahren wolt. Wie zierlich vnd sament verstentlich das tütsche nāch sōlichem latine vf das gnewis gesetzet luten wurd. Das ich vwer durlüchtikait hier mit schick, nit darumb, daz üwer genāde des bedōrffe die wir allwegen ains
 25 gelychen gemütes, weder in gelück erhept, noch in vngelück verzagt, gesehen haben. Sunder darumb daz ich hoff vnd main, daz [68] sōlichs von treffenliche wegen des sinnes, mit sampt der schonhait des gedichtes, so ain hoch verrümpften mans pogy! sōll komen zû gefallen vvern fürstlichen gnāden
 30 das für ander merckend vnd verstende, dero jch mich dann

erkenn pflichtig sin zemittailen in gûtem alles min vermugen
Geben vf dem sunntag als man jn der kirchen singet Esto
michi Anno domini Millesimo quadringentesimo sexagesimo
primo.

5 **W**ie wol diser din swärer vnd laidsamer zû fale villicht
grösser ist, danne der getröst oder gelychtert werden mug von
worten, besunder ains schlechten vngelerten menschen! so er-
fordert doch min sunderliche liebe zû dir! ob ich wol gebre-
chen halb min selbs nit erfolgen mag an dir, das, so ich beger!
10 daz jch noch dann lieber wil geschulten werden die klaine
miner vernunft! danne daz jch vermyden vnd vnderwegen
lassen sölt, das! so ich fruntschaft halb dir zetûn pflichtig
bin. Dann dwyle jch oft gehört hab, etlich trostung vnder-
wylen In schwären sachen vil gehulffen han! So hab ich das
15 getruwen jn minem gemüt! ob das so von mir vsgeet, dich
dines laids nit gantz enthebt! daz es doch dir (so du das
lisest (ettlicher mäsztrostung bringen söll. du häst enpfun-
den des gelückes laidsamen fale vnd des boshait vnd wider-
wertikait. welcher fale geschulten werden sol, mit der wysz-
20 hait vnd tugend des gemütes, mit dem wir dich allwegen ge-
sehen haben begaubend sin! also daz die ding! so die andern
mit vngedult für schwer trügen, dich durch sunder grösse
dins gemütes, lycht sin bedücht hant. doch so fürcht jch daz
du vsser ainer sölichen grossen vnd schnellen diser dingen
25 endrung, näch sitt der menschen, mit etlicher trübseli [68^b]
dins gemütes bewegt werdest. Ist aber daz du dich vns gibst
vnd büttest mit hochem vnd vestem gemüt, die schos vnd
pfyle des gelückes verschmachende vnd verachtende, Vnd du
dir fürsetzest, mer stercke sin in hilffe der tugend danne in
30 zytlichem gûte! Vnd du dise ding, nit grösser schetzest, danne
als grosz sy von den wysen zeschetzen sint! So fröwe ich
mich seer mit dir! daz du sölicher aigner wyshait halb, fremder
trostung nit bedarft. Ist aber (wyle die natur dich ainen men-
schen geborn hât) daz dise schnelle endrung vnd vngestümikait
35 des gelückes (dar vnder ouch etwenne die aller gelertisten dar
nider gelegen sint) dich etwas zû vil vnd vber gebürlichs be-
trüben! So ist dir zeffiechen in die höche diner vernunft Vnd

des ersten ze betrachten, dir nützit genomen noch entpfürt
 sin des dinen, oder daz din sin genennet werden möcht. dann
 wirdigkait eere gewalt rychtum gesunthait vnd anders des
 gelychen sint also gestalt! daz in Inen die craft des gelück-
 5 fals vnd der vinden sturm vnd an rennen vil vermugen. Aber
 wyszhait grösse des gemüts, vestikait, fromkait, trüw vnd
 tugend! wyle die rechtlich vnser aigen sint, vnd vns nit von
 fremder hilff noch gaube geben werden! so enpfahent sy kai-
 ner vszwendiger dingen vnd rechten gewalt vnd mugent ouch
 10 durch kain craft des gelückes gefellet noch vsser ir statt ver-
 rucket werden. darumb wyle du dir die selben zügericht vnd
 beraitet häst alz veste vnd aller sichroste hilff wider all wi-
 derwertig züfell des gelückes! so gebürt sich dir mer zefrö-
 wen dins aigen gütes! dann laid zetragen, vmb vsswendiger
 15 fremder dingen, gewalt abzug vnd beroubung. Wir haben dich
 ouch nie bekennt sin, von der zale dero! daz du gantz an-
 hangtest der güthait [69] des gelückes. Das (wie wol es grosz
 vnd vil dir durch sin gaube verlichen hät, vnd me villicht dann
 ainchem man vnser landen den ich wissz! Noch dann so sint
 20 vil grösser vnd wyter zeachten vnd zeschetzen, die ding die
 du mit edler fürtreffender tugend dins gemütes häst vber-
 komen. In denen der frefel vnd mütwill des gelückes jm kain
 recht noch gewalt yemer gewinnen mag In den sachen des
 gemainen nutzes bist du mit wyszhait Innwendiger sinnen vnd
 25 geflissenhait vszwendiger vbung so in dir züsamem gefüget
 sint, für ander, ains sölichen redlichen vnd vf rechten lebens,
 ains sölichen geloubens vnd sölicher trüw gewesen! daz du
 hie durch, nützit danne lob vnd eere, dinem hus vnd geschlechte
 häst erfolget. Wo das die andern all tetten! so wurd der
 30 gemain nutz vnser. statt in rüwigerm stande vnd wesen be-
 halten. Du häst erzöget senftmütikait dem lande, Miltikait
 den fründen, güthait in yetklich, vnd günstigen willen in alle.
 Du bist gewesen der armen hilff, der beschwerten züflucht,
 vnd der gelerten gönner vnd vfenthalter. Du häst dich der
 35 gauben des gelückes, mit sölicher beschaidenhait mässe vnd
 menschlikait gebrucht daz die nit von yemands anders wür-
 ckung oder güthait, dann allain vmb din tugend vnd aigen
 verdienen dir geben sin, erkennenet werden. Vber das häst du

mit lernung der kunst, dero du von angender jugend gegeben
 bist, grosz lob vnd zierung zûgefûret allen gelerten menschen.
 Vnd so du treffenlicher gescheften halb, dir von räts oder ge-
 maines nutztes wegen vfgelegt! nit allwegen emssiger lesung
 5 der geschrift anhangen möchtest! so wurden doch dine oren,
 mit den stimmen vnd [69^b] Worten! der aller gelertesten man-
 nen, mit denen din huse stätz gezieret vnd erfüllet was em-
 senklichen ergetzet! Vnd horten alda lere vnd satzung der
 wysen! denen du dann haimant vnd vsserhalb näch gefolget
 10 häst Es ist gewon daz jn widerwertigen schweren dingen ain
 güt gewissne vnd conscienz recht getäner dingen bede der
 Worten vnd der wercken, vast ain grosser trost ist vnd vftent-
 halt. Danne wol verstanden han. Offenlich vnd sunderlich er-
 berkait gehalten han. Zû gemainem nutze vnd vsz des gemach-
 15 same geräten han, In des dienst vnd ampte, Wäre trüw vnd
 gütikait gehept han. Fründen räts bedörfenden mit güt ge-
 hulfen han vnd niemand geschadt han! tûnt nit vnbillich ainem
 menschen also vnuerschuldt belestiget, zû füren grosse hilf
 zetragen menssenklich die fälle des gelückes. Danne sy sint
 20 gewon ain starckes vnüberwintlichs gemüt zegeben! hin ze-
 nemen trurikait vnd trost in widerwertigkait zemachen. Die
 beschliessent in jnen wäre vnd bestentliche wirdigkait. Die
 habent dich gemacht ainen fürnemen man vnd obersten burger.
 Die habent dir zû gebracht grosses lobe vnd vntödemliche
 25 glori vnd eere. Die (wa hin du geest) sind dir nächfolgend,
 fürnemer vnd höher zeschetzen, danne die gauben des ge-
 luckes vnd aller gunst des püfels vnd gemainen folckes. Vnd
 wyle aber besitzung diser dingen also din aigen gûte ist! daz
 dir das weder lebend noch tott genomen werden mag! so solt
 30 du sin ains hohen vfrechten gemütes, benüig ainer sölichen
 wyten vnd wolgezierten wollust. Danne was ist anders dar
 Inne wir vns wärlich fröwen mugen, dann in den dingen, die
 wir [70] vns selbs mit flysz vnd übung der tugenden haben
 überkomen. Danne die sint vnser., mit vnser arbeit sorg vnd
 35 wachte gewonnen die da lerent den widerwertigen frefeln
 ansturme des gelückes näch louffe messig vnd lichtenklich
 tragen. Darvmb siddemäle du häst ainen gewissen sitze, das
 ist das grösz werlich schlos diner tugend vnd conscienz, dar-

Inne din gemüt sicher sin vnd belyben mag! so wil ich daz
 du dasselb din gemüte richtest vnd setzest vf die ding, die
 du mit dir häst hingefürt, vnd hinweg gebrächt, das ist fry-
 hait, wysheit, achtbarkait, rechte erkantnusz, erber rätgebung
 5 ain name ains besten burgers, vnd liebe des lands diner ge-
 burte, welchem lande, ob du wol mit rät vnd getät zü aller
 zyt hilfflich gewesen bist! ye doch aller maist häst in schweren
 trübseligen geschichten. fürpündig vbertreffend gûthait gegen
 dem wesentlich vnd entpfintlich bewisen. was sol ich sagen
 10 von dinem studieren, Der kunst menschlicher gebürlichkait?
 die aller maist gewon ist, zesin ain hilf zü lychtrung betrübtes
 gemütes vnd zü sterkung Innwendiger sinnen, bede mit ex-
 empeln vnd mit wol gegrünten sprüchen der allerwysosten
 vnd gelertosten mannen. Dann du waist von denselben gedis-
 15 putieret werden, das gemüt des wysen menschen, gantz sin
 vsserhalb alles gelückfals! sunder wyle sölich gemüt fryg
 syg! daz dann kain vsswendig craft, darjn komen mug vnd
 daz die tugend syg das best vnd oberst gûte! vnd sust alles
 ander gûte also sin vnd dafür gehalten werden sollen! als
 20 des gemüte ist, der das besitzt vnd bruchet. aber ich wil dich
 nit sin vsser der zale, der wyse, die noch nie oder selten
 funden worden sint! sunder so beger ich, daz du dich vns
 gebest vnd [70^b] erzögest ainen vsser denen, Die näch ge-
 mainem leben der menschen für wys gehalten werden, Vnd
 25 betrachttest an dem ersten, daz das glück sin fürpündig gû-
 thait in dir hät gewürcket! Dann allain vsgenomen trübselig-
 kait dines gemütes, wenne du dich dann aigenlich erfahren
 wilt, was das selb gelück dir hingenomen oder noch belyben
 lassen hab! So wirdest du finden dir das wenig geschadt han,
 30 Sunder mer nutz gewesen sin. Es hät dir genomen bruhe
 vnd Inwonung des landes diner haimant vnd geburte, das du
 oft selbs aigens willens häst gelassen. Aber hin widerumb
 hät es dir geben, fryhait, dero du dich nit gebruchtest zü
 zyten, do du für den aller fryesten wurd gesechen vnd ge-
 35 halten. Es hät dir genomen ainen vppigen schyne der tugend
 vnd torechten wâne des püfels vnd gemainen folkes daz zü
 aller zyt ainen yetklichen aller seligosten menschen, schetz
 vnd haltet für den aller vnseligosten. Aber hin wider vmb

hāt es dir gelassen wyb, kind, rychtum, gesunthait vnd ainen
 lieben wolbegirlichen brüder, die dir dancknemer sin sollen,
 dann die ding, die es dir bitter genomen hāt. Es hat dir
 entwert, ich waisz nit was vppigen burgerlichen gewaltes vnd
 5 standes, voll laides, arbeit, nyds, hasses, wachens, vnd teglicher
 sorgen, die vil der wysen verachtet habent vnd verschmachtet.
 Darumb diser dingen verlierung, denen schwär gesechen wer-
 den sol, denen sy zū gūt koment vnd die hie durch nutz zyt-
 liches gūtes geflissen sint ze erfolgen. Aber dir, dem sy dinet-
 10 halb vnbegert vnd vmb diner arbeit willen zū gefüget vnd zū
 schaden vnd Irrtung gewesen sint! sol aller minst laid sin!
 beroubung der dingen, die du mit kainer gytikait, noch vmb
 zytlicher [71] eeren willen ye hāt besessen. Danne dise offen
 gauben sint mer von dir empfangen worden zū hilff vnd ent-
 15 haltung des lands diner haimant, danne erenhalb oder vmb
 hoffung aincherly gemachs darvon zeerfolgen. Merck. Vnd tū
 hier zū. Daz das gelücke dich in wāre fryhait hāt gesetzt.
 wyle du vor beladen werd, mit swärer vnd vnseliger burde
 der aigenschaft! da durch dir zūgefüget was, nit schlāfen, nit
 20 wachen, nit essen, nit wandeln, nit aignem nutze dienen, noch
 den fründen dich nit dines willens gebruchen, noch dir selbs
 rūwe vnder wylen machen mugen. Dir was zeleben nāch an-
 der lüten gefallen, zemercken was ain yeder redte oder ver-
 stünde vnd manchem sin verschuldung nāchzelassen wider dinen
 25 willen. Ich wil geschwigen wider die billichkait. Oft geburt
 sich dir zegelychsnen liebs für laid, Vnd laids für lieb. Dar-
 vmb so hāt dise endrung des gelückes, dich gezogen In sölich
 wāre fryhait, daz jch nit waisz, ob joch du dero nit selbs
 söltest begert han. des ersten darumb, daz du dich dines aigen
 30 fryen willens möchtest gebrucht haben. darnāch vmb daz du
 etlicher diner fründen trūw (oder gebürlicher zereden vntrūw)
 Innen brächt werden möchtest. da du nu yetz durch die gūt-
 hait sölichs gelückfals wol erkennest! wie vil vnd grosz denen
 nu mer ist zegelouben oder zeuertruwen. Vnd aber aller maist
 35 darvmb, daz erschynen wurd, die tugend dins gemütes! die
 zū māl vil vnd wol in widerwertigen sachen bewärt vnd ge-
 sechen werden mag. Danne mengklich hāt gesechen, mit was
 menschlichkait, süssikait, gütikait, gebürlichkait vnd messikait

du getragen häst des selig gelücksam gelücke. In dem oft vnd
 dick die wysern [71^b] gefallen vnd dar nider gelegen sint,
 sich des vberhebende. Sy haben ouch gesechen dich darumb
 nützit dester hochfertiger, oder gewaltigerer worden sin!
 5 sunder belyben, glyche den nidersten vnd minsten, vnd mit
 denen in glychem rechten gelebt han. Vnd darumb so ist dir
 zegeben ain statt ains kampfs, In dem die grösse vnd stercke
 dins gemütes erschyne vnd du dich erzögest durch des ge-
 lückes widerwertig wetter vnd vngestümen wöllen, In ain sicher
 10 rüwig port vnd stade ouch komen mügen. Ir vil haben den
 gelükseligen stande Irs lebens, mit güter vnd loblicher mes-
 sigkait getragen! Die aber darnäch, So sich der winde ver-
 kart, In Irem gemüt bekrencket, gantz entricht vnd zü nichte
 worden sint. Etlich ander sint in widerwertigen dingen starck
 15 vnd lobsam endrunnen, die in gelücklichen sachen darnäch
 sich erhebende, mer dann die vernunft erfordert sich mit hoch-
 fart, des gelückes gunst liessen hinfüren. Aber dich haben
 wir nie gesechen, weder in gelücklichen dingen erhept oder
 gehochfertiget! noch in widerwertigen, entricht abgeworffen
 20 oder verzaget! sunder allwegen ains glychen angesichts vnd
 gemütes, yetwedern fale söliches gelückes, gebürlich tragende.
 doch so mag dich hier jnne zvestnen) allermaist craft haben,
 wenne du bedenkst dich weder den ersten noch den hinder-
 sten burger sin der vmb wol dienens willen, sins vätterlichen
 25 landes vertriben vnd verbotten worden ist. Du häst der
 historien bücher voll exempel, von denen die fürnem vber-
 treffend wys lüt gewesen sint! Vnd doch vmb Ir gemain
 nützlich dienste boszlich gesträffet vnd belestiget worden sint!
 so sy vmb sölich Ir [72] loblich getät, billicher obersten lone
 30 hetten verdienet. Dann Es beschicht, daz sölich die den glantze
 fremder tugend nit lyden mügen, ouch den nit sechen wöllent.
 Wann nyd ist allwegen ain weg gefert des lobs vnd der eeren!
 der da zü aller zyt tüt trucken die, So zü sölicher höche der
 eeren nit komen mügen. Also welche sy mit aigner tugend
 35 nit können nächfolgen, daz sy die selben mit bösem willen nyds
 vnd hasses tüt belaidigen. Dar von kumpt daz wenig für-
 nemer menschen so an gewalt gemaines nutzes gewesen sint!
 ye endrunnen syen der vngestümikait burgerlicher nydung. Ich

wil mich nit gebruchen hüslicher nächer exempeln vmb das
 min red niemant tū erzürnen. Ye doch wer die vergangen
 zyte flyssig erfahren wil! der findet vil treffenlicher fürpündiger
 mannen, mer durch burgerlich krieg nyd vnd hasse, vsser ir
 5 statt getrieben sin! Danne vmb ir aigen verschuldung. Aber
 dises schantlich laster, ist nit allain gewesen vnser statt!
 Sunder ouch andern, dero lobryche werck wir sust vbermässen
 wundernt! Die statt röm (daz ich der kriechen vnd barbari-
 schen geschwyge) zū zyten ouch, do sy in allen tugenden in
 10 irem hochsten blümen was (als die bücher irer Jerlichen hi-
 storien das beschribent! ist ouch mit sölicher kranckhait der
 vndanckbarkait siech gewesen. welcher historien Ich wenig
 vnd nit vil melden wil! vmb daz min red flieche die lenge..
 Zū den zyten fury camilli hāt weder an tugend fromkait noch
 15 allen loblichen getäten, Inn niemant ye vbertroffen! derselb
 noch dann von boszhait der obern des gemainen folckes! vsz
 getriben wart hinweg in das ellend, Vnd besunder [72^b] zū
 der zyt do das lande siner haimant sin aller notdürftigost
 gewesen wer.. Was getän vnd geschaffet hab, der vorig Affri-
 20 canus In dem lant siner haimant das da vsser dem rachhen
 vnd schlunde hanibals was zeerretten! Mit was mässe sines
 gemütes mit was küschhait Mit was gūten achtbaren sitten
 er lebte ist dir nit verborgen. Den selben noch dann die
 vngestüm grobkait der obern des pūfels tett zwingen zekomen
 25 In das elend.. Publius Rutilius was ain vfrechter aller haili-
 goster mane. Aber wyle der frömer vnd rechter sin vermercket
 wart Danne des pūfels wāne vnd oppinion gedulden möcht
 do tribent sy Inn vsz der statt. Desselben tugend fürpüntlich
 In dem erschain. Als Im darnäch durch den sillanischen sige
 30 wider vmb erlobet was haim zekomen! daz er Im do erwalt
 das ewig ellend vnd abschlūg widervmb zekomen In die statt
 In dero mer vnd höher geachtet wurden wāffen vnd gewalte
 danne die rechte.. Die boszhait Clody traib vs, des vätterli-
 chen lands schirmer vnd enthalter Marcum Tulium Ciceronem,
 35 den wir verstanden hant sich darnäch, sich des oft gefröwet
 vnd erhebt haben daz er wider vmb vf den achseln der römern
 In sin haimant vnd vatterland getragen worden wer. Noch
 gar vil historien än dise yetz gemelten! sageut daz die aller

obersten vnd verrümpften mane, öch gelych sölich entlich
 vszgang gehept haben. jch hab aber allain disz vier sachen
 gemeldet darvmb, daz dich din fale dester minder wundre!
 wyle du doch sichst so vil vätterliches landes trüw hanthaber
 5 vnd behüter, glych dir sölichen lone Irs verdienens [73] en-
 pfangen han. Welchen ob du wol nit glych bist! weder von
 lümde der lüten noch von glori gehandelter dingen! Yedoch
 wyle du den selben fale der vndanckbarkait mit Inen glych
 gelitten! So häst du ain glychs lobe in dem dinge dir vnd
 10 dinen nächkomen geborn vnd erfolget. Aber das schetze ich
 diner verdienung zü ewiger der menschen gedechtnüsz sin
 zusetzen vnd zescriben! So du vor wol empfunt vnd marck-
 test was man wider dich satzt vnd fürnam! daz du noch
 dann maintest besser vnd weger sin, dich gefölgig vnd vnder-
 15 würffig zemachen vnd zegeben, dem gebott diner oberkait,
 danne widerstande zetün, oder in ainch wege die regierung
 des gemainen nutzes zebetrüben. Danne so du wol (Als vil
 sagent) Gemöcht hettest, durch wäffen oder durch gunst des
 folckes, sölichen gewalte dir zügericht, hindersich geschlagen
 20 han! So häst du geschetzt rechter getän sin! das vnrecht ze
 empfachen vnd zelyden, Danne das vszetryben. Vnd wyle die
 burgerlichen eere in kain weg sölich vszgang erfolgent als
 etlich Inen fürsetzent. So häst du näch sitt vnd gewonhait
 der vorigen die Ich dir genempt hab, Zü rüwe des lands vnd
 25 ainikait der burgern rätende, mit wysem räte lieber wöllen
 lyden dise schnellen wällen vber dich vnd die dinen louffen!
 Danne daz du ainche vfrüre oder vngestümen murmel des
 folckes wöltest erwecken, dadurch die statt in grösser sorg
 vnd nott gefallen sin möcht! Mit welcher ainiger getäte! du
 30 nit allain der vnsern, sunder ouch der alten lobwirdigen man-
 nen glori vnd eere züsamem häst gelychet Danne was ist lob-
 licher vnd was menschlichem haile [73^b] haile nutzlicher, dann
 wöllen sich selbs allain grösser sorgueltikait jngeen! vmb daz
 die andern vor grössern sorgen beschirmt werden vnd be-
 35 halten, Das selb ist allain ain tugend die all ander tugend
 vbertrift ze räte zü gemainem fride zü gemainer rüw vnd
 müsse! ist ain ampt vnd gebürlichkait aines güten mans vnd
 ains treffenlichen fürnemen burgers Gemainen nutze fürze-

setzen aignem vnd den höher achten, dann sundern! das ist
 ain aller genemiste hilff, vnd beschirmung. Aber sich selbs
 allain lieber wöllen sterben vmb hails willen vätterliches lan-
 des! dann ander vil verderben, das ist ain tugend (wie wol
 5 vil ander tugend zû den zyten wüchsend durch die der gemain
 nutz der statt röm aller maist vfgangen ist vnd besessen hât
 die grossen macht jrer landen. Darvmb sich dir, der also mit
 den aller lobsamisten tugenden vmbgeben bist! nit gebürt ze-
 zürnen, sunder danck zesagen sölicher endrung des gelückes
 10 vmb daz es dich zû derselben tugenden übung hât erwecket
 vnd in ainen andern stryete gefüret. Dar Inne du erlangen
 wirst ewig glori lob vnd eere. Darvmb dwyle dieselben ding
 gûten mannen aller maist sint zebegeren (dann sy sint löne der
 tugend) So nûsz vnd gebruch dich dins gûten mit rüwigem
 15 vnd stillem gemüt lebende. vnd wo du yemer din wonung
 haben werdest da wöllest schetzen sin din haimant din vätter-
 lich lande din wirdigkait vnd dinen gemainen nutze vnd die
 so vil besser sin, als vil sy langwiriger sint vester vnd stetter
 Vale etc.

[74] **D**Em fürnemen wysen vnd milten mane herrn johansen fünfer des hochgebornen mines gnedigen herrn graue vrichs zû wirtemberg etc. cantzler minem besundern gûten gûnner vnd frûnde. Enbütt ich niclås von wyle der zyt stat-
 5 schariber zû Esselingen Min gar früntlich willig dienst zeuor. wile grosz vnmûsz dises vergangnen herpstes by vns rât vnd gerichte abgestellet hatt! vnd deshalb mir (der kainen wint-
 garten hab) etlich rûw vnd mûsse verlichen wâren! die ich lieber lesung der geschrift, danne fuler trâgkait geben wolt!
 10 Ist vnder anderm in min hende komen ain gedicht wylant von dem hochgelerten wysen man poggio florentino in kostlichem vnd wolgeziertem latine gesetzt! Ob ain huswirt gest zû tisch ladende! billicher danck sagen sôll sinen gesten vmb daz sy zû gastung komen sint oder die geste Im vmb daz er
 15 sy gespysset hât etc. Welich gedicht der selb poggius ouch zû müssiger zyte, mer zû kurtzwyle vnd übung siner vernunfte beschriben hât! dann von wegen grossen nutztes yemant hier von entstende Als er das selbs meldet in ainer missiue dem cardinâle von der süll deshalb zûgesandt So aber ich hier von
 20 nit allain ergetzlichkaitt mins gemütes entpfangen! Sunder ouch wunder genomen han, Disen man Poggium der kunst wol redens vnd schribens (die wir zû latin nennent Oratoriam) So voll gewesen sin geübt vnd getriben das Er ain sôlich klain schimpflich dinge So hât können mit gebürlichen worten
 25 sinnen vnd Argumenten zieren wytern vnd erstrecken! Daz ain yeder das [74^b] das lesende oder hörend! schetzen vnd mainen mûs, sôlichs zû sampt der kurtzwilligen ergetzlichkait nit klain vernunft vnd wysheit vf Im haben. Vnd ich ouch waisz din hus oft vnd vil mit erbern gesten sin gezieret. Vnd
 30 des gelychen widerumbe, dich ouch etwenne ander lüten hûser

jn gasts wyse lobsam machen! so hab ich dasselb gedicht zû
 obgemelter müssiger zyte, getütschet. vnd das nit wöllen ver-
 halten, dir als ainem liebhaber aller hüpschkait vnd künsten
 vnd des gût getät jn mir so grosz sint! daz jch jn danckbar-
 5 kait schuldig bin dir mit zetailen, was ich waisz komen dir
 zügefallen. Darvmb ich dir das schick. daz du hier von etwas
 kurtzweyl enpfähest vnd ouch din vrtail hier vf setzest. ob dine
 gest dir vmb Ir empfangen spyse, bis her schuldiger gewesen
 syen zedancken, dir, oder du jnen. Ich geloub aber, daz du
 10 wie jch, dine wirtschaften bisher nit habest gehept vmb ge-
 wins willen vnd anders danne als sölich wirtschaften von gûter
 frûntschafft wegen sint vfgesetzt vnd vsz miltikait tugend vnd
 loblicher naigung der nature billich gehalten werden sollen!
 Vnd dar von man dich billich mercken vnd erkennen mug,
 15 nâch sitt der alten lobwürdigen mannen, dero ainen sin! die
 frûntschafft gûter menschen, fûrgesetzt hant, allem andern zyt-
 lichem gûte. DarInne du ouch beharren vnd mich fûro als
 bis her achten vnd haben wöllest als ainen wâren frûnde. dir
 vsz aigner tugend entsprossen vnd vsz gelyche der sitten ver-
 20 ainet vnd ob got wil lang jn gelûck vnd seligkait belybende.
 Vale got syg mit dir. Geben vf Montag nâch sant gallen
 tage etc. Anno domini. M.cccc.lxij.

[75] Zû zyten als babst nicolaus der funft in sinem er-
 sten Jâre von rôm gen fabien floch den sterbend. Vnd ich
 25 pogius florentinus der sachenhalb ouch mit minem husgesind
 haim in min vâtterlich lande die wyle gezogen was. kam dar-
 nâch daselbs hin vnd von mir gebetten karolus aretinus ain
 fûrpündiger man alles lobs vnd aller künsten! der da ryten
 wolt von râts wegen siner statt gen florentze vnd zû mir
 30 etwas ab wege wenig geritten was der selb vnd vil ander (vn-
 der denen wâren die aller gelertisten man, benedictus beder
 rechten ain doctor vnd nicolaus fulginas ain fûrnemer vnd
 verrûmpter maister der natürlichen kunste vnd ouch der artznie)
 ryten wolten gen aretium, ouch den sterben der pestilentz ze-
 35 fliechen. Vnd begab sich also daz vf den tage nicolaus von
 arecio berûft ainen siechen zeartzen vnd benedictus yetzge-
 melt haim rytende, all drygsament zû mir kament. deshalb

grosz fröid vnd wollust mins gemütes mich täten vmbefächen.
 Do ich sach dryg sölich aller lobwirdigoster mannen vnd mir
 mit sunderm günstigem willen gewandt, äne geuerde vnd von
 schickung des gelückes also an ain statt zû mir komen sin.
 5 Vnd als die all. Durch min bitt vnd begerung, mit mir in
 minem garten zû nacht geessen hatten, vnd man näch vil vnd
 mangerlay rede alda gehapt, den tisch vf gehüb! vnd die zyt
 hie was abgeschaiden! redt benedictus Karole sage danck di-
 sem vnserm wirte (als sitt ist vnd gewonlich) der vns so frö-
 10 lich wol vnd menschlich hât empfangen vnd gehalten, Dann
 du waist [75^b] daz die menschen gewon sint näch dem tische
 so sy geessen hant zedancken denen, die sy zû sölicher wirt-
 schaft hand geladet. Ist aber daz yemant danck zesagen ist!
 So ist diser (vnd sach mich an) für wâr der, durch des flysz
 15 vnd zû tûn vnser nacht mäle nit allain von essen vnd trincken,
 Sunder ouch mit manigfaltiger süsser rede, gût vnd frölich
 gewesen ist. Vnd dir wirt ouch sölichs zetûn nit schwer sin
 wyle er an wenig wörten benüigig steet vnd du an kunst der
 gesprechnüsz vnd wol redens vns andern vbertrifst.. Darzû
 20 Karolus antwort. Den sitten benedictes hab Ich nie gelobt,
 wie wol er von vil menschen gehalten wirt. Vnd bedunckt
 mich dise gewonhait vnder gelerten lüten nit allain zeuernich-
 ten vnd vsz zeschlachen sin sunder gantz zeuerspotten. Dwyle
 billicher der wirte vnd maister sölicher gastung vnd wirtschaft,
 25 sinen gerten die komen sint schuldig ist zedancken Danne die
 gest dem, der sy hât berüfft vnd geladet, dann das mertail
 der menschen, oder gar näch all, die beraitent sölich wirtschaft
 vnd gastung aintweders darvmb, daz sy hiedurch komen wöllen
 in gnåde vnd günstigen willen der menschen, dero hilf sy
 30 bedörffent, oder aber daz sy die menschen lüdernt vnd baitzent
 die sy jnen hoffent künftenklich gût sin vnd zû nutz komen
 werden, von wegen eere zeerfolgen vnd die zemerer vsz wir-
 digkait der gerten, Oder aber daz sy ainen lümden vnd rüme
 des gemainen folckes vnd püfels dadurch mainen zevberkomen
 35 Vmb daz sy hie durch milt vnd lobsam werden geachtet. Sö-
 licher gerten yetklichen main Ich nit mer schuldig sin ze-
 dancken dem wirte der sölich gastung [76] vnd wirtschaft hât
 zû gericht, Danne die trumeter vnd pfyffer lutanisten vnd

singer die man zû wirtschafte berüft von fröiden vnd wollust
 wegen zemachen. Die selben spillüt yetzgemelt nit allain, nit
 danck sagent vmb ir empfangen spyse, Sunder ouch lones be-
 gerent vmb Ir kunste. Darumb ob yemant nit von wegen ains
 5 andern, Sunder sin selbs lüt berüft vnd ladt zû gastung!
 Was dancks sol man dem haben? Ich main von vnserm wirte
 danck zesagen sin vns, durch dero gegenwürtigkait dise her-
 berg hie, vil edler gemacht wirt, Danne sy vor gewesen ist.
 Dann mainst du, daz disem vnserm wirte wenig eeren zû ge-
 10 standen syg! So disz huse durch ain schare sölicher mannen
 vil edler lobsamer vnd zierlicher gemacht wirt vnd dann mit
 aincherlay zierung silbers goldes klaiden oder kostlicher ge-
 würckter tücher. Geloubent mir (Wil Ich) diser vnser wirt
 schetzet vns Im nit klain gezierd in sin huse gebrächt haben
 15 Wyle er waisz vnd erkennet zierung der tugend loblicher vnd
 schinbarer sin danne ainche andere zierung. Dann wyle man
 die hüser der rychen pfligt zû zerichten zeberaiten vnd ze-
 zieren mit tepichen sergen stüllachen vmbhengen vnd kost-
 lichen tischen. Vnd darvf mit vil silber geschirres! Vnd sö-
 20 lichts, Sunderlich gehalten wirt gehören, zû zierung vnd
 wytrung des lobes. Wie vil vnd hoche zierung ist dann ze-
 schetzen die zierung, die die menschen bringent die mit wys-
 hait vnd tugend begaubet sint, vnd dero lob vnd wirdigkait
 alles tûch vnd golde wyt übertrift? Näch miner vrtail ist
 25 zesprechen, daz ain hüse so vil hüpscher vnd zierlicher syg!
 Daz von fürnemen [76^b] verrümpften mannen an gûten künsten
 vnd tugenden gezieret ist! Als vil ain ding die sel habend
 vbertrift, ain ding der sel mangelnde vnd ain wäres wesentlich
 dinge vber trift ain vnwesenlichs vnd ain lebend ain töttes.
 30 Vnd also so man zû gastung ladet die, durch dero angesicht
 der wirte vnd ouch die herberg gezieret werden In denen
 fromkait ist, wirdigkait vnd geloube, vnd die da nit von gau-
 ben des gelückes sunder von aigner tugend schynent! So
 main Ich daz den selben zedancken syg daz sy gebetten vnd
 35 geladt komen sint vnd sölich wirtschaft haben gehulffen laisten
 vnd volbringen. darvmb so loben ich seer den natürlichen
 maister demetrium der stoyschen secte, Den seneca schribt
 oft gesprochen han, sich nie zû ainches menschen tische

geladt ye komen sin! man hette dann Im des dancke. Dann
 für wår ain vast grosse zierung ist, die mit vil gelts were ze-
 kouffen, ain man wirdig zebeschöwen vnd zeloben, der so oft
 er In ain hus geet, dasselb huse erberer lobsamer vnd schin-
 5 barer machen tüt. . . Dann ist das ain måler so der ainen sale
 mit mancherlay figuren zieret, lone verdient vnd hintrait!
 Wie vil mer lones oder danckes verdienet dann ain man für-
 nem von tugend, der da das huse ziert treffenlicher allem ge-
 melde. Darvmb zû danck vnd gûter getât geachtet werden
 10 sol! die geladten komen zû wirtschafft, So sy die sint die mit
 lobe gelebt haben vnd nit koment von wegen Ir büchen die
 zefüllen sunder vmb daz sy den wirte tügen eeren vnd zieren.
 — Do sprach Nicolaus vast wol hât karolus dise red angehept
 vnd vns ain matery fûrgeworffen [77] sament wyter zereden.
 15 Dann mich bedunckt rechter vnd weger getân sin, die zyt
 (als vil vns dero noch disz tages vor handen ist) zeuertryben
 mit sölichen hüpschen reden! danne mit aincherlay schimpfs
 goles oder ander lüten gesanges oder stimmen. Danne minen
 oren vil lieplicher vnd süsser lutent wort ains gelerten wol-
 20 redenden mannes danne ainches saiten spils oder der musick
 jnstrument oder getöne. Dann sölich Instrumente sint tügig
 vnd zûgehörig dem gemainen vnd groben vnkünnenden folcke.
 Welche so sy zereden nit gewon sint, danne von aller lichte-
 sten dingen (als menschen die Irem buche vnd der vnwissen-
 25 hait geben sint) so begerent sy gesangs vnd ander lüten stim-
 men, die für sy redent. Darvmb So machet xefon recht In
 sinem Yconomico! Socratem reden vnd sagt aller minst not
 sin, der sengerin psaltria oder aincher anderlay saitenpils
 an den enden da die sint zeergesellen, die da können schon
 30 vnd wol reden vnd Ir wirtschafften mit künstlichem gespreche
 laisten vnd tryben. . . Danne gelerter lüten stimmen sint alle
 schimpf vnd sengisch getöne vbertreffen Vnd ist wenig yemant,
 der mit Im selbs oder mit andern lüten wol schon vnd kunst-
 lich reden vnd dichten kan oder mag, Daz er vil fordre oder
 35 begere der kunst der gouglern sprechern oder sengern zû
 kurtzweyl vnd ergetzlichkeit siner oren. Aber zû dem daz du
 yetz mit wenig vnd kurtzen Worten geredt häst! wil ich ouch
 mit wenig vnd kurtzen Worten antworten. Mich bedunckt

gantz ain anders Karole dann din mainung [77^b] gewesen ist.
 Dann ist das die vrsache ainer wirtschafft etwas güttes oder
 erbers vf ir hât! Oder begryffet! oder das die entspringet
 flüsset oder geet vsz ainchem anfangе der tugent; Oder daz
 5 die ainches lones oder danckes wirdig ist! für wåre da selb
 (Es syg dann wie es wöll) sitzt vnd belybet by dem wirte
 vnd anheber sölicher wirtschafft. Ich rede nit von denen die
 du mainst süchen gewine vnd nutze in der spyse die man
 gibt! Dann all güt künst mögen gezogen werden in böс
 10 übung durch verkerung der miszbruchenden menschen! Sun-
 der rede ich von denen die wirtschafften halten sölicher vr-
 sachen halb, Als die selben wirtschafften sint vfgesetzt vnd billich
 gehalten werden sollen Das ist von wegen güter früntschafft
 vnd günstiges willens, Vmb das wir mit denen lebent die vns
 15 sint mit handel vnd wandel mit gunst sipschafft vnd früntlicher
 dienstbarkait verainet! So ist disz ain zaichen der liebe, die
 da vsgeet von dem, Der die andern berüft vnd geladen hât.
 Da mit offen vnd kuntlich ist! wo wir den anfang ains dings
 das lob vnd rüme verdienet sechen vnd merckent! alda vnd
 20 darInne ist ouch vil des danckes beschlossen. Darumb ouch
 dann dem selben als ainem anfangе danck zesagen ist. Aber
 die geladten so sy sechen sich zü eeren sin berüft fürgenomen
 vnd gebrucht vnd für wirdig zü andern mit gестen geschetzt
 werden! Ane zwyfel so sint sy dancks schuldig denen, Die
 25 sy zü sölichen eeren haben geladen. Das ainem yetklichen
 darby wol zemercken ist! daz wir gar näch all! zü argem
 willen vfnemen vnd entpfächen! So wir mercken vnd ver-
 stend vns zü wirtschafften güter fründen [78] fürgegangen
 vnd nit geladt worden sin, vnd mainent sölichs beschechen zü
 30 verschmechung oder verachtung vnser, als ob wir nit wirdig
 geschetzt werden! daz wir der zale sölicher gестen zügefüget
 werden sollen. Das wir dann vns zü schande sin achten vnd
 vermainen. Darvmb glycher wyse wie wir also schetzent vns
 zü schand vnd schmache sin nit genomen werden zü sölicher
 35 wirtschafft der andern! Also wirt ouch geschetzt hin wider-
 vmb erber vnd eerlich sin, hier zü werden berüffet! Vmb das
 so nim ich es dafür, daz die gest mit sölichen eeren fürge-
 nomen vnd geeret, dancks schuldig syen, dem maister

sölicher wirtschafft. Dann es were ain spotte sölt der wirt vber
 sinen costen den er mit vns zespysen gelitten hät vnd vber
 die müge vnd arbeit, die er jn züberaitung sölicher wirtschafft
 hät gehebt (wyle doch das gantz husgesind oft darjnne ist be-
 5 kümbert) erst darzû vns vmb sölichen costen vnd vmb sin
 aigen güte zedancken pflichtig sin. äne das so wissent Ir. vns
 etwas schuldig sin dem! der jn vns etwas gütes hät gewürcket,
 dem selben vns dann nit allain gebürt danck zesagen mit wor-
 ten! Sunder ouch (Vmb daz wir nit vndanckbar vermerckt
 10 werden) mit schinbaren wercken danckbarkait zebewysen. Vnd
 für wäre. es ist für ain mercklich güt getät zehaben! von
 fründen vnd erkanten gütwilligen lüten berüft werden zû ga-
 stung in wirtschaffe, darinne allwegen sint gewon zesin, die
 wolgemainten die man am vordersten vnd für ander hier zû
 15 erwellet! vsz welchem dinge wir dann mainent vns werden
 liebgehapt gefürdert vnd geeret. So ist ouch nit karole als
 du mainst. daz sölich all vmb gewins willen vnd aigens nutzes
 halb, sölich wirtschafften tügen halten [78^b] vnd laisten. Danne
 es sint vil die da pflegent sölich wirtschafften zemachen allain
 20 vsz menschlicher tugend, vsz liebe vnd gütikait bewegt! Vmb
 daz sy ainen taile irs zytlichen gütes, bewendent In milten
 bruhe vnd gern sin wöllen by den menschen von denen sy
 fruntschafft trüw vnd günstigen willen haben entpfunden, ouch
 gern sin wöllen by fürnemen mannen, Vnd lust haben vnd
 25 kurtzwyle in bywonung gelerter vnd wolredender lüten vnd
 dero worten vnd disputierung gern vfloent vnd mainant das
 sin ain gepürlichkait vnd wolstend dinge ains güten mans.
 Vnd wie ouch lieber karole? daz sölich wirtschafften gesehen
 werden sin ain aller gröste erkickung vnd fürung der frünt-
 30 schafft vnd gütes willens zwüschen fründen zebewahren. Welche
 fürung dann aller mainst entsteet vnd kumpt vsz emssiger
 übung güter gemeinsamkait, danne by ainander sin, sament
 reden, essen, trincken, Vnd von mangerlay dingen arguwieren
 ouch schimpflich vnd ernstlich allerlay sagen, wirt geschetzt
 35 sin, ain sunder fürpündig bande der liebe. Solt du dar vmb
 sprechen sich den wirten sölicher gastung (Daz ich Joch des
 costens geswyge) vsz diser menschlikait vsz diser erzögun-
 gütes willens vsz diser so grosser nutzbarkeit! Nit gebürren

danck zesagen? Für wäre mich bedüchte das sin ain zaichen
 ainer groben grossen vndanckbarkait! daz Ich sprechen sölt,
 ainen menschen mir schuldig sin, dem Ich von rechts wegen
 schuldig wer! Aber anders dann du mainst vnd vrtailest, hât
 5 disz ding Karole ain gestalt. Danne die natur. Die gar vil
 vermag! tût vns raitzen vnd naigig machen [79] daz wir oft
 wirtschaften beraiten den menschen von denen wir das zû
 dancksagung vor haben vermercket vnd zû denen wir, Vnd
 sy widerumb zû vns, haben gûten glouben vnd früntlichs ver-
 10 truwen.. Die engellender sint etwas menschlicher In disen
 dingen dann du. Wann die selben näch dem zechenden tage
 als oft sy zû dem koment, Der sy gespysset hât! vmb das
 empfangen mäle danck sagent Vmb daz sy nit gesehen werden
 vnIngedenck der an gelaiten eere. Vnd Ich main ouch den
 15 spruch Aristotilis des mit mir gehelen, da er spricht die eere
 sin des, der die ere tût vnd erbüt. Dar vmb not ist! by
 welchem menschen die eere belypt! daz ouch daselbs der
 danck beheb sinen sitze. — Darvf karolus redt. Wenne allain
 dancksagung gnûg were! so wurd ich nit sere beschwert mich
 20 diser bezalung oft zegebruchen! ob man mich joch zû der
 fründen essen vnd tische gar oft vnd vil berûfte. Aber ich
 besteen vnd belyb by miner vorigen vrtaile! vnd main disen
 vnsern wirte poggium vns zedancken schuldig sin, dem oberste
 eere vsser disem nächt mäle zûgestanden ist; Aber daz jch
 25 mit wenig worten die mainung miner vrtail vsleg! So main
 ich so wyt sin zwüschent ainem maister der die wirtschaft
 beraitet vnd denen so hier zû berüft werden! als wyte ist
 zwüschent dem der ain ding anhept, vnd dem der das vol-
 bringet. Daz ist als wyt zwüschent aim ende, vnd den dingen
 30 die da dienen vnd gehörent zû dem ende Der maister beraitet
 vnd ordnet die wirtschaft, die geste machent aber sölich wirt-
 schaft gerecht vnd volkomen. dann es were kain wirtschaft,
 es kement dann [79^b] dar vber die geladten, die das ding von
 ainem andern angehept volbrechten. Darumb so ist danck
 35 zesagen denen, durch dero hilff vnd zûtûn sölich volbrächt
 worden ist, als ainem ende! ee dann dem der die wirtschaft
 hât angehept Doch so waisz ich nit, ob benedictus der da
 sagt in kaiserlichen vnd weltlichen rechten all sachen begriffen

werden! etwas von diser disputatz in sinen büchern vnd com-
 menten geschribens gelesen hät. Es ist nit hie notdürftig
 sprach benedictus aincher Auctoritet der rechten! sunder allain
 ainer verstentlichen entschaidung ains wysen mans. Vnd Ich
 5 halt das also. Ob yemant der an wirdigkait an eeren an güte
 an adel, an lobe, an lümden an kunst lere vnd tugend höher
 vnd vber mich ist, mich zü wirtschaft vnd tische ledt vnd
 bittet! daz Ich dem danck zehaben schuldig syg, daz er mich
 sinem tische vnd ainer gesellschaft sölicher treffenlicher für-
 10 nemer mannen (als dann an sölichen enden gcwonlich sint)
 hät geschetzt güt tügig vnd wirdig sin. Vnd ich main daz
 ich sölichs reden mug vnd mir des mengklich gesteen söll.
 Dann mir entsteet hier von nit wenig eere so ich berüft wirt
 zü ainer wirtschaft des, der da ist vil wirdiger vnd geerter
 15 dann ich Vnd für wär Es were zü grosser torhait zeachten
 sölt Ich ainen Cardinale herzogen Fürsten oder ainchen an-
 dern in hochem stande der eeren sitzende der mich zü sinem
 tische berüft hette! Erst mainen mir dancks schuldig sin,
 Vmb daz Ich zü sölichem tische komen wer. Ob aber yemant
 20 niderer, ainen wirdigern vnd höhern man zü tische lüd. Wyle
 der wol nit oberste eere von des zükunft erfolget vnd doch
 der gaste Im vnd sinem huse gnüg der zierung [80] hiedurch
 zübringet! So sag ich daz der wirt dem dancks schuldig
 syg! der jnn zezieren zü jm komen ist. dann sölich lüt pflegen
 25 Imbis vnd nächt mäle ze geben den obern edlern vnd mech-
 tigern vmb daz sy dero gunst vnd güten willen vberkoment
 Ist da daz du sagst die selben sölichs costens jngeen von ge-
 wins vnd wüchers wegen So gestee ich dir karole, dwyle
 etlicher gewine der selben ende ist! Aber vmb das wir dryg
 30 nit etwas schulde vf vns ladent! So folgen wir (rät Ich) der
 vrtail karoli, daz poggius vmb vnser empfangen spyse vnd vmb
 daz wir Inn vnd sin huse also gezieret vnd ge eeret hant, vns
 danck sagen söll. Dar zü Ich poggius redt vnd sprach Ich
 hab vnd sage vch danck lieben fründ vmb dise üwer frünt-
 35 schaft vnd menschlichkait daz Ir by mir geessen vnd mich
 vnd min huse also ge eeret vnd gezieret hant. Vnd ich wil
 ouch das haben an statt ainer grössen güt getät. doch so
 wölte jch mich der güthait von vch nit gern oft gebruchen!

vmb daz ich üch nit zû vil schuldig wurd. Vnd als wir des
all gelachten, schieden wir abe etc.

[80^b] **D**Em ersamen vnd wysen hainrichen Efinger burger vnd des rātes zū zürich minem lieben vetter Enbüt ich nielās von wyle der zyt statschriber zū esselingen vil hails. betrübt ist din gemüt vnd mit tieffer wunden verwundet, vnd nit vn-
 5 billich lieber vetter. danne dir ist (alz ich vernim) todes ab-
 gangen din elich husfröwe! die ich hab erkennet sin vnder
 küschen fröwen die küschest vnder wysen die wysest vnd
 vnder demütigen die demütigost. In ir sint gewesen wollust
 nutz vnd erberkait. mit ir ist dir gewesen ain tische ain seckel
 10 ain bette. was dir gefiel was ir zū hertzen. vsz dinem ange-
 sicht nam sy lachen vnd wainen. darumb ich für ander waisz
 was laids dir vsz irem tode ist entstanden. vnd näch dem ich
 dir gewandt bin, so mag ich nit, mit dir nit truren. So ich
 mich aber füro me vnd me disz laids erfar! so find ich des
 15 micheln troste, den ich dir vnd mir sament mittailen wil.
 vmb sust, lieber vetter, tūnt wir wainen das, so verloren, füro
 nit mer widerbrächt werden mag. der tode, der ye komen sol,
 vnd mūs, wirt vmb sust gefürchtet, dann es ist ain gewisse
 sätzung der nature, gantz vnuermydenlich, daz alles das ster-
 20 ben mūs! was ye geborn, das leben hät enpfangen. din gema-
 chel möcht villicht lenger gelept han, wo die nature Irem
 leben lenger hilff getān haben wölt. aber noch dann was sy
 tödemlich vnd geburt ir villicht nit wyter zeleben Dann got
 sicht vsz höch der himeln her ab, daz leben vnd wesen der
 25 menschen! Vnd nit das, So zū fröiden sunder das zū nutze
 ist! tāt er ainem yeden zū fügen vnd geben. Vnd torecht
 sint wir tödemlichen menschen! [81] das wir ain dinge teg-
 lichs abfallent, vnd verderbend, glych als ewig mainent zebe-
 sitzen. Der was wyse (als Im siner lieben tochter tode ver-
 30 kündet wart) nie kainen trächen verrart, Sunder sprach. Ich

hab gewist mich geborn han ain tödemliche tochter. Ain
 anderer, do jm der tode sinen aller liebsten gemachel enpfürt
 hatt, sprach. Mit dem geding hab ich sy genomen, daz jch
 sy verlieren müst. In manchen weg, mag ain elich husfröwe
 5 verloren werden! aber kains wegs bas, danne durch tode.
 Etwenne beschicht das langer siechtage, aims mans husfröwen
 also entschöpfet daz irs tods ee dänn irs leben wer zebegeren.
 Vnderwylen tût vnainikait zwüschen vermechanelten menschen
 entstende, sich so ferre wytern vnd meren! daz ir ains sich
 10 von dem andern vnd wider desselben willen sündert vnd
 schaidet. So tût etlichem ain ebrecher sin husfröwen enpfüren.
 Ain andern wirt sin gemachel freuenlich mit gewalt genomen
 vnd hingefürt in das ellend. Vnd desgelychen vil! also daz
 niemand die manigfaltigen züfell des gelückes, zellen mag, da-
 15 mit es spilende, menschlich geschlechte kestiget vnd pinget.
 o. seligen menschen, dem sin gemachel nit mit vntrüw vnd
 nit mit gewalt aines menschen, dann allain durch die wür-
 ckung gottes wirt genomen. Aber noch seliger ist der, dem
 ain züchtig küsche fruchtbare vnd gefellige husfröw bywonet
 20 vnd belypt bis in sin alter. Das ain besunder gaube gottes
 ist. Aber dir ist, lieber vetter, gütes gnüg beschehen. dann
 ob du wol nit bist der seligost! so mugen wir dich doch
 nennen selig! dwyle dir vermechanelt gewesen ist ain fromme
 husfröw von gütem namhaften geschlechte geborn! hüpsch vnd
 25 ainen [81^b] vor vsz aller erberkait an Ir habende vnd allwe-
 gen dinem willen gefölgig! Die dir kind bederlay geschlechtes
 knaben vnd töchtern geborn hât, vnd so vil Järe gelebt vnd
 dir bygewondt! daz kumm vnder tusent menschen, ainer! So
 vil erleben tût. Aber du sprichst villicht, Sy ist mir zehen
 30 oder zwaintzig Jaren zefrü vnd vor der zyt die sy noch wol
 gelept haben möcht, todes abgangen etc. Syg also. noch danne
 so was Ir zesterben, Vnd möchten vil laidsamer sachen inge-
 rissen sin, die Iren tod gemachet hetten dir girlich. Me
 möchtest du sprechen. Ich hab min husfröwen verloren. Nain
 35 vetter du hâst sy nit verloren, sunder fürgeschickt, vnd wirst Ir
 nächfaren, so die zyt komen wirt.. Dryerlay stette sind vsge-
 zaichnet vnd geben allen menschen. Die ain ist die statt vnser
 haimant. Die ander der bilgerschaft Vnd die dritt des ellends.

Vnser haimant ist der himel, die bilgerschaft üben wir hie vf erden. Das ellend wyle das zwifalt ist, zytlich vnd ewig! so ist das ain das fegfüre vnd das ander die helle. darumb ain torhait ist, hie vf erden ain belyplich statt zesüchen. dann wöllen wir

5 paulo gelouben vnd cristo vnserm behalter! so süchen wir vnser haimant in dem himel. denne disz leben den menschen kurtz ist vnd gelych aim fliechenden tröme. kainem menschen ist der mornig tage gewissz, dann was sint wir anders dann ain schatt vnd winde? wo sint nu die hochgelopten künge? Süch

10 yetz priamum, süch pompeium, süch agamenonem, süch Julium vnd ander So findest sy villicht in der helle vergraben. Aber din allerliebste husfröw (Wyle die nit vf ertrich da die dieb stelen mugen, sunder in dem himel, da weder schab [82] noch roste schaden mag Iren schatz gesetzt hät) yetz ir bilgerschaft

15 volbracht, vnd ellends vnuerdampnet ist sy mit himelscher haimant begaubet! daselbs sy schöner vnd hüpscher danne sy ye gewesen ist, din wartett. Vnd mit vntödemlicher wäte beklaidet, mit sampt andern seligen gaisten, bywonet der glory des ewigen schöpfers! vnd sagt yetz got lobe vnd dancke!

20 daz er sy nit lenger hät sölich bilgerschaft hie vf erden lassen üben. Vnd was mainst du lieber vetter? were es nit ain grösse genäd? wo aim menschen wer vfgelegt ain bilgerschaft. hundert Jaren, vnd derselb zü halb vergangner zyte widerumb haim berüft wurd. Also ist beschechen mit diner husfröwen.

25 Dann wyle die in menschlicher wäte fürt ain engelsch leben! so ist sy dahin berüffet! da ir gemüt stetz gestanden ist. daselbs ir folget vnd gedychet wes sy begert vnd was sy wunschet das ist ir gegenwürtig bereit. Aber du bist betrübt vnd laidig, vmb daz du ir mangeln solt. Du häst des vnrecht

30 vetter! vnd sölttest dich des mit ir fröwen! daz sy nu me hät was sy wil. ir seligkait vnd fröide tüst allain du ir mindern, angesehen! daz sy zü dero volkomenhait allain din mangelt, vnd wirt doch din nit allwegen mangeln! sunder so bittet sy tag vnd nacht got den höchsten, daz er dine werck

35 vnd wege also richt vnd schick, daz du schier berüft in den himel mit ir ewig seligkait werdest niessen. Vnd fürwär das ist vind sin vnd nit liebhaben! wo du din husfröwen lieber hie vf erden wölttest leben, dann dort in den himeln herschen

vnd richsnen. Ist aber das du dinen aigen nutze trurest, darumb daz du irer hilff kurtzweyl vnd wollust bist beroubet vnd dich deshalb din laide fürt in wainen! so lüg daz du [82^b] nit zû vil vndanckbar vnd vnrechtlich dinen nutzen vnd din
 5 gemache, fürsetzest dem nutze vnd gemach der selben diner husfröwen. dann rechte vnd wære liebe sol werden gelaitet vf die vrsachen des den wir lieb haben vnd nit vf die vrsachen vnser selbs, dann ist daz ir alter nu mer mit schwären Jären jnfallend, vnd jr lob mit vil tugenden erfolget vnd die vnstetikait des beweglichen gelückes, sölich haischent! daz sich ze-
 10 fröwen ist, din husfröwen gelendet han vnd glich als vsz ainer langen sorgfeltigen schiffung komen sin an ain sicher rüwig stade vnd porte! so läsz vns lieber vetter (bitt ich) nit laid haben noch vmb ir rüwe gemach vnd fröde wainen. Danne
 15 näch dem sy hie in zyt dich lieb gehept hât! so waisz ich, daz sy selbs nit wil dich in sölichem laide beharren! sunder gebütet, daz du sölichs abstellest, dero du toten als ob sy lebend wer gehorsam sin solt vnd ir din laid vnd truren ergeben vnd das (als vil die natur verhenget) messenklich
 20 tragen. disen troste obgeschriben hab ich nit von mir selbs, sunder des meren tails in geschriften etlicher hochgelerten mannen funden! welchen troste ich dir als minem lieben vetter nit wolt verhalten. wyle man find von den alten sölichs vor zyten ouch also beschechen sin, vnd fründs troste zû fründen
 25 gesandt, oft wol erschossen han. vnd in dem ewangelio lesen wir, daz vil der Juden von Jherusalem kament gen bethania, daselbs martam vnd Mariam magdalenam von wegen des tods Lasari zetrösten Was aber nu fürohin lieber vetter dir zetûn syg? dich in witwelichem stande zebelyben, oder dich ander
 30 werb zeuermecheln? das waisz ich nit. aber das waisz ich daz bisher vil dins gelychen kind habende, vmb daz sy den selben Ir gût sparten vnd des Inen nutzit [83] enpfürten, lieber woltent witwer vnd bülend in sünden leben, danne den eeren näch sich ander werb verhüren! Welchen du nit näch-
 35 folgen wöllest (bitt ich) Erwig vnd missz dich selbs! wer vnd wie du syest. Vnd was du mugest Vnd mugest oder wöllest du nit äne früntschafft wyplicher liebe belypen! so lasse dich mindrung des erbs, dinen kinden gehörig an gebürlicher ver-

mechelschaft vmb nichte abfüren zû sünden. vnd gedenck daz
 du den letsten tage dines endes wol beschliessest. danne was
 hulff dich wys gewesen sin, vnd alle gaistliche vnd weltliche
 recht ouch die löffe der himeln vnd die vrsachen des tonners
 5 des regens der winden vnd vil ander dingen aigenschaft
 gewist han? du köndest dann ouch dar by sterben. Disz ist
 die letst würckung aller menschen vnd wer sust. Alle ander
 dinge bis daselbs hin wol vnd recht getân hât vnd an dem
 end gebricht vnd alda nit recht beschlisset der hât vmb sust
 10 alhie gearbaitet. Ob aber dir alten numer zû sechtzig jären
 komen gebürr zenemen ain eewyb vnd ob ain Jungfröwen oder
 ain witwen, oder ob ain alte glych dinen jären. oder ob dir
 bas in sölichem alter gebürr diser dingen zefyrren? ouch wie
 ain Junges eewybe von ain alten man gezogen vnd vnder-
 15 wysen werden mug, vnd was liebe, gemachs vnd nutzes vsz
 der ee entspriesse vnd was laids vnd vngemachs ouch vnder-
 wylen darvon erwachse vnd vil ander hoche sinnen von dem
 lobsamen hochgelerten man poggio florentino in costlichem
 latine vf form ainer rede vnd widerrede gesetzt, Vnd von
 20 mir vmb diner liebe willen getütschet? Des schick ich dir
 hie by dise nächfolgende translatze vnd geschrifte, vmb daz
 du das lesend erweldest? was dir in sölichem nechst obgemelt
 zetün syg [83^b] oder zelassen. ob du aber dehainist erwellen
 wurdest dich ander werb zeuermecheln? so wöllest (bit ich)
 25 nit fürgeen mich zû diner hochzyt zeberüffen? vmb daz ich
 der ain mitgesell gewesen bin dins laides? ouch sin werd ain
 mitgesell diner fröiden vnd eeren, die dir got der allmechtig
 wöll meren vnd doch dich darjnne also laiten vnd bewaren
 daz du hiedurch entlich erfolgest vnser aller haimant obgemelt
 30 das rych der himeln etc. geben zû Esselingen vf sant lutzien
 tage. anno domini Millesimo quadringentesimo sexagesimo
 tercio etc.

Poggius enbüt vil hailts dem fürnemen man cosmo von
 medicis. die red vnd widerrede langest zwüschen dem hochge-
 35 lerten mannen vnserm niclausen vnd karolum arentinum gehept.
 ob ainem alten man zim vnd gebürr ain eewyb zenemen, der
 selben rede jch dozemäle etlich punckten. enpfalch miner ge-

dechnüsz! bin ich ietz (wyle ich müssig bin) zû räte worden, in geschrift zsetzen Des ersten von wirdigkait wegen derselben mannen. zum andern ouch darumb! danne die wort karols mine sine vnd mainung vf jnen trügent danne es sint
 5 etlich diser dingen vnwissend, die da mainent v̄bel getân sin, ainem mane zû alten jären komen ain ewyb zenemen. wie wol kunst vnd wishait des hushablichen dinges zeregieren, den selben Jären aller maiste bywonet! darzû dann hilf ainer husfröwen gar nâch notdürftig ist. wie wol aber die sach des
 10 alters mit mer worten vnd sinnen von karolo verantwort vnd beschirmpt worden ist! danne von mir hie gesetzt werd! so main ich doch daz ich mit disen wenigen worten, dero ich noch bin jngedenck vnd die mir zûfallent, etlicher mäs z gnûg getân hab wider die mainung nielâsen Ich schick aber dir
 15 wysen vnd hochgelerten mane dise ir kriegschen rede! vmb daz ich (so du die v̄ber lesen habest) [84] versteen mug vnd erwellen, weders sinne vnd mainung du mer lobest vnd bewerest da du (ob jchs vnzierlicher vnd vnuolkomenlicher vsleg danne nielâsen kunst vnd karols gespreche getân hat! schul-
 20 digen wöllest die klaine miner vernunft, die nit wyter raichen tût, dann als vil ich vermag. noch dann wolt ich lieber dise ding (als vil ich vermocht) mit schrifte vmbfachen danne vnderwegen lassen vnd vermyden, vmb daz die wort söllicher hochgelerter mannen besunder die zewissen notdürftig sint nit hin-
 25 schlichent in vergesnûsz.

— Do die hoch glerten manne, mine allerliebsten fründe nicolaus nicolai vnd karolus eretinus mit mir (als ich ain ee wyb genomen hat (vnd als dann vnder fründen gewon ist) den den Imbis namen kamen wir vnder dem essen vf die rede!
 30 ob ainem alten man (darjnne ich gemaint wart) zimpte vnd geburte ain ewyb zenemen etc. vnd als vil vf bed weg geredt wart, vnd sich min aigen sach beschirmpt vnd verantwort! sprach jch. wenne wir geessen haben, main ich daz dann hiervon wyter sy zereden. dann erfülte schinbain (als man spricht)
 35 bas tönnet dann vngefült! vnd als der tisch ward vfgehept, vnd wir widerumb vf die vorigen rede fielent vnd nicolaus gelych die rede vor jm hatt wie vor. redt ich sag an nicolae was sachh bringst du vf die bann, darumb so mainst daz ain

alter man beroubet sin sölt, des gemachs ainer elichen hus-
fröwen.. darvf er enklain spötlich lachet (als er dann zû
aller hoffichkait behend waz) vnd sprach werlich ir beduncken
mich nit allain toren sunder mer vnsinnig sin, also daz grosser
5 arbeit notdürftig wer die gemüt der menschen mit sölicher
vnsinnikait beladt zewiderbringen. dann waz torhait ist das?
so du bis vf din alter ain eewyb zenemen gehasset, Vnd ge-
flochen häst! gantz fryg vnd nach aignem willen lebende!
dich darnach erst willenklich vnderwürffig zemachen der aigen-
10 schaft vnd zesüchen ain sach nüwer belaidung vnd beschwe-
rung [84^b] die du weder wol gelyden noch in dhainem wege
me ab dir gewerffen magst. Aber der (vnd maint mich) hât
nâch minem beduncken ain hert spile vfgenommen der ainer
nüwen kunst zelernen ingegangen ist! zû sölicher zyte, die
15 Inn müssiget darvon zelâssen vnd dero ze fyrren. Dann disz
ist ain ding, das aller maist der Jugend zû gehört vnd den
alten vor vsz ist zefliechen. Lobend ander wybnemen was sy
wöllent! So ist doch min sine allwegen also gestanden. daz
das zû yetlichen Jâren ain schwere sachh sy vnd besunder
20 vast widerwertig vnd vngezem dem alter. Dann wyle sich das
mit etlicher hilffe geburte zevfenthalten! so ist torlich sölichs
mit der burde ains ewybs nider zetrucken. Dann sölich alter
dwyle es weder Im selbs noch den gauben der ee gnûg tûn
mag! So sölt es mer sûchen rûwe dann nüwekait der arbeit.
25 es ist sust v̄bels gnûg in dem alter âne anderer vsswendiger
dingen belaidung.

— Darvf ich redt. du richtest villicht ander menschen
nâch diner nature, der allwegen geschücht vnd geflochen häst
den namen ains ewybs glycher wyse als den staine Sisiffi,
30 vnwissend was gemachs vnd wollusts in ainem eewybe ist!
die ob sy yemant gemachsam vnd zûfröiden ist! den alten
aller frölichest ist. dann mich bis vf disen hüttigen tage, nie
kain verdriesz satung noch rûwe mines ewybs vmbfangen hât!
dann daz ich mer in Ir getröst wirt vnd mich von tag zû
35 tage mer vnd mer also erfröwen! daz ich ainen yetklichen
mane der ân ain eewyb lebt, schetz sin ainen toren, vnd richt
den, der ains eewybs mangelt! mangeln des grösten gûtes alles
gûten.. dar gegen nicolaus antwort es ist villicht vom gelück

dir also geräten! daz du vberkōmen häst, ain [85] Junge
 Jungfrōwen von gūten sitten vnd tugenden gezogen dinen
 sitten mithellende vnd dir gefellig. DarInne du mer liebhaben
 vnd loben solt das gelücke danne den rāt diner wyshait, Ob
 5 es dir in sōlichem alter zetūn wer. Aber wyle es ain seltzner
 vogel ist vf erden So magst du wol reden dir grosz gelück
 zūgestanden sin. Was dir aber in sōlichem alter zetūn ge-
 bürret, hab! das ist hie min frāge. Aber din getāt (siddem
 māl die nāch dinem sine vnd willen beschechen ist, lob Ich.
 10 doch also vnd sōlicher mässe! Als du vor ainest lechterlich
 gesagt häst, daz ainer lobte die getāt sines frūdes. Dann
 ich bin Ingedenck dich vf ain māl gesagt han. Wie ainer in
 engelland sins frūnds rāt hett! ob er ain frōwen (die er vor
 haimlich genomen hatt) zū der ee nemen sōlt! darvf des ant-
 15 wort stūnd. Es were ain frōw von wenig scham, vnd er sōlt
 es vnderwegen lassen vnd die vermyden. Vnd als er Im dar
 nāch bekant, daz er sy genomen hett! verwandelt der frūnd
 bald sine wort, glycherwyse, als ob er an den namen diser
 frōwen hett gelrret! Vnd riet füro die ee sprechend er hette
 20 wol vnrecht getān etc. Also lob ich ouch din getāt. Vnd
 dwyle es dir nāch dinem willen gefallen vnd geräten ist! so
 schetz ich dich sin gelückhaftig vnd selig. doch für wār so
 bedunckt mich der sin klainer vernunft! der in dem fünf vnd
 fünfzigosten Jāre (dero du wol alt bist) sūchet ain eewyb
 25 mit aigem willen die instenden schwēren Jāre mit ainer burde
 noch schwerer beladende. Wie wer Im aber? Ob ain ewyb
 dinen sitten widerwertige vnd verkert in dinem huse wer?
 die dich haimkomenden mit vnwirtschem angesicht enpfinge,
 dir vsgenden nachkriegte, vnd dich [85^b] haimant mit worten
 30 fress pingote vnd vntertruckte. Sag an. was sorg? was angsts?
 was pingung dins gemüts dich also kestigen wurden? Wie ob
 sy truncken wer? nerrisch verschlāffen das alles wol gefallen
 mag. Es were besser sterben dann by ainer sōlichen das
 leben schlyssen. Ich setz hier zū. Das sy ain jungfrōwe oder
 35 ain witwe Jung oder alt syg. Ain jungfrōw wyle vnglych sint
 der Jungen vnd der alten sitten vnd vnglych begirden vnd
 gantz ain ander nature. So mag sy sich kumm wol ainen mit
 Irem man vnd gemachel dann vngelyche der sitten gebirt vn-

gelyche des lebens also daz sy nit wol ainen sine vnd willen
 haben mügen. Sy hât wollust in schimpfen vnd lachen. Er
 aber in wysheit vnd ernsthaftigen dingen. Sy ist ainer mug-
 lichen natur vnd begirde zû essen. Aber er ains blöden ma-
 5 gens. Sy haischen den man sachen halb haim zesind, So er
 sûcht zegeen an den marckte. Also gebirt vngelyche der be-
 girden des ersten vnainikait vnd darnâch hassz vnd vint-
 schaft. daz mich ye beduncken wil ainen yetklichen alten man
 dem ain Jungfröw vermechelt ist haben ain ellends schlipfends
 10 lebens. Ain witwe aber die Jung ist! vnd vor ainen Jungen
 man versûcht hât! hât laide daz sy dem alter vermischet ist
 vnd claget mindrung vnd abbruchh Jrer spyse vor gehapt, all-
 wegen Irs vorigen mans Ingedenck vnd des süssen vorgefürten
 lebens. Sy lydet mit vnwillen das alter! stetz sufftzend vnd
 15 Ir gemüt richtende zû dem vorgehabten leben Also daz man
 sy merket (ob sy joch das nit sagte) sölichs beschechen von
 begird wegen irs verlornen mannes. Nimpst du aber ain altes
 wybe zû der ee gelych dinen Jären [86] so geberent Ir nit
 kind vnd koment zway krancke zûsamen vnd wirt Ir ains
 20 vnder des andern burde nider gedruckt. Dann wyle Ir ains
 kranckhait zû füret ain burde grösserer kranckhait! So wirt
 sy mit noch grösserer des lydens gepynget. Darumb so fallent
 des tags sechs hundert vnuerwandte laide zû! die nit allain
 die alten, Sunder ouch die Jungen fürent in rûwe Irer ge-
 25 nommen husfröwen. Vnd ich red von den husfröwen die from
 küsch vnd erber sint. Danne die vntrüwen Iren mannen, sint
 in kain weg wirdig, husfröwen genennet zewerden. Ist aber
 daz argwâne oder laster der vnküschhait diner husfröwen dich
 vmbfâchet! So mag dir nit grösser pingung noch vnseligkait
 30 zûsteen. Darumbe so Ich dise schwere in minem müte also
 bedenck! So bedunckt mich besser vnd weger sin in sicherhait
 zewonen vnd ferre von sölichen sorgen! dann versüchnüsz
 zetûn, des dinges, das vil der wysen vnd gelerten als argwânig
 vnd sorgueltig verschmâchet haben vnd vermitten. Es sint
 35 aber vil zû alten Jären komen, ain wyb sûchend als ain rûwe
 irs alters. O. was toechter vnernieter lüten! die in müde
 rûw begerende, sich selbs vmb rûwe willen werffent in ain
 bette erfüllet mit stechenden tornen. Aber die bedunckent

mich noch mer hier Inne Irren, denen by ist, ain fürgenomner
 wege der lere, dem sy erberlich anhangent! Vmb daz sy Ir
 sele vnd vernunft mit gûten künsten vnderrichtent vnd zierent.
 Angesechen daz ain yetklicher man sins aigen willens vil
 5 fryer vnd geschickter ist zû lernung der geschrift vnd kunste
 danne der, so mit wyplicher Irrtung ist verwickelt. Ich setz
 hier zû, daz kinde den alten zû sôlicher zyte werden! daz
 sy die weder tugenden [86^b] vnderwysen noch Inen dehainen
 gewissen wege rechter wûrckung geben mugen! Sunder vor
 10 mit tode fürkomen werden, ee die zyt kom die begriffenlicher
 vernunfte ist verlichen. Alsdanne sint sy pflegern vnd für-
 mündern ze enpfelhen. die oft mer sûchent aigen nutze dann
 gûtikait der vâttern verdienet habe. Hie durch weder so du
 lebst gewisser trost enpfangen wirt von den kinden die du
 15 dennoch nit erkennest wie sy gerâten wôllen! noch in dinem
 tode gewisse hoffung geben wirt der künftigen dingen da durch
 des sterbenden gemût rûwen mug Danne ist wâr, daz du von
 diner husfrôwen gesagt hâst! so siche vnd richt jch dich selig
 sin vnd entlediget der burden, die vil der menschen belesti-
 20 gent vnd nider truckent, Doch so spricht man daz der sicherer
 râte dem zwyfelhaften syg für zsetzen vnd ainen für den
 zeerwellen. Hie als Ich enwenig anhûb zelachen, enbôrt vnd
 girig zeverantworten die schuldigung vnd rede niclausen, Sprach
 Carolus. Günd daz ich für dich vnd ander alt mane antwort
 25 geb Niclausen! danne die sache der alten gebûrlicher wirt
 beschirmt vnd verantwort durch den der Jung ist vnd den
 kain aigen begird noch sache dann allain die wârhait bewegt
 zereden. Ich siche vnsern niclausen die satzung loben vnd
 bewerren, die Er Im selbs langest hât vfgesetzt vssz kainer
 30 redlichen vrsache, Sunder von vnnotdürftiger sorg wegen!
 Welche satzung die gemain gewonhait des lebens vssert schücht
 vnd verschmachtet! Dann wie wôllen wir verwerffen vnd ver-
 nichten die gewonhait zeleben, da durch (wo wir dem all nâch
 kemen) menschlich geschlecht gantz abgeen müste vnd [87]
 35 verderben. Dann die natur hât gesetzt vnd geordent die zû-
 samenfügung des mans vnd des wybes, zû notdürftiger vfent-
 haltung der welte, nit allain vnder den menschen, Sunder
 ouch in anderm daz das leben hât. Also main Ich aller rech-

test getân sin lieber wöllen leben ains gemainen lebens vnd
 sich zegeben zû ainem burgerlichen leben vnd kind begeren
 zû wytrung der welte vnd erfüllung der stetten! Dann ainen
 menschen ainig wonen vnfruchtbar wyt vnd ferre von gewon-
 5 hait der andern, beroubt wärer vnd rechter fruntschaft vnd
 teglicher gûthait die allermaist In der ee funden wirt. Danne
 siddenmäle, der mensch ain tiere ist gesellig vnd geborn zû
 geben. So ist schantlich vnd wider die natur vnd vernunfte
 die vns geben ist, zeuerschmachen die werck der geberung
 10 vnd zeuerachten die, gesellschaft vnd vermischung die da ist
 die best vnd süssest allerdingen. Die andern tiere, die der
 vernunft mangelnt! nötiget die craft vnd machte der natur
 zû vermischung der geberung sins gelychen, vmb, das ains
 yeden gestalt vnd geschlecht nit abgang sunder in wesen vnd
 15 belyplichkait werd behalten. Was sol dann tûn der mensch?
 der sich vernunft gebruchet vnd des fruchtbarkeit vnd geberung
 nützer ist danne der andern tieren. Sage sol er böser
 sin dann die andern tiere? Vnd (das zû vertilligung mensch-
 lichts geschlechtes dienen wurd) sich nit gebruchen? der gaube
 20 vnd gûthait die himelsch geben worden ist zû geberung sins
 gelychen? Siche lieber niclās, daz du nit Irrest! daz du ouch
 ainem wysen man räten wölltest das! das nit allain zû erles-
 chung [87^b] erleschung der stetten vnd der scharen der
 menschen sunder ouch der vmbkraissen der welte dienen möcht.
 25 Wie wol er nit mer wyse genennet wurd der da wider strepte
 der ordnung der nature, darvon die wysen allen anefang rechts
 lebens hant gezogen. So zücht ouch die ee dieselben wysen
 nit von lernung der künsten vnd geschriften. Danne den hoch-
 gelerten mannen Socrati Platoni Aristoteli vnd vsser den vn-
 30 sern Catoni dem vordern Marco Tulio, Varroni Senece vnd
 andern hochgelerten Ire eelich husfröwen nit so vil wären zû
 Irtung! daz sy dester mindern an allen künsten vnd tugenden
 ander die eewyber vermitten hant, vbertreffent. Danne ain
 yetklicher der äne ain ewyb lebt, gerätet zû ainem bûler,
 35 ebrecher, oder wirt andern vnmenschlichen sünden Inuerwickelt.
 Vnd du bedarft mir nit fürheben, küschhait des lebens. Danne
 dero zû mäl wenig sint, Die die selben tugend vmbfächent.
 Dar zû so ist dem sicherer vnd erberer leben anezhangen

das ist der gaube ains ewybs. Vnd hiervmb vnd von dero
 vrsachen wegen (Ob Joch die andern gûthaiten nit da weren)
 So riete Ich ainem yetklichen alter, das tûgig wer zû gebe-
 rung! zegryffen zû der ee. Vnd förcht nit (Ich waisz nit was)
 5 torenchen namens der aigenschaft, die du mainst in der ee
 begryffen sin. Danne die oberst fryhait ist leben wie ainer
 wil, Das aller maist die ee verlychen tût! DarInne du nit
 dienst, Sunder gebütest, so du fryg bist von den sünden die
 sust allenthalben die vnuermechelten vmbfliessent. du gebüttest
 10 diner husfröwen, die sich flysset vnd lernet mit gûtemwillen
 dir zedienen [88] vnd gehorsam zesind näch dinem gefallen.
 Vnd Ich schetz den alten mannen (daz du vor vernicht hâst)
 die ee aller nutzest sin, So sy zû den zyten ewyber sûchent
 so Ir alter der gailikait vnwissenhait lichtikait vnd grobkait
 15 ab ist vnd der dingen so zehandeln sint tûgig! mit râte er-
 folgen mag die obersten vnd allerbesten frucht vsz der ee
 komende. Danne der alt erkent allain was zebegeren ist vnd
 was zeffichen. Die vnwissenhait sins gemachels regiirt er mit
 sinem râte vnd die bösen begird messiget er mit siner wys-
 20 hait. Er enthalt die schlipfenden vnd Ir grob vnkünnend leben
 verwandelt er in sine bekomlichen sitten. Hie als nicolaus an-
 hûb zelachen, sprach er. Du lobst die alten alle glycher wyse,
 als ob Joch nit Ir etlich funden werden erger vnd torenchter
 dann kinder. Darvf karolus antwort ain yetklich alter dem
 25 jungen als dem alten ist laidsam, ob es torencht ist. wir reden
 aber nit von disem noch von dem alten, sunder von ainer
 gemainen sache der alten. Darumbe so ich fürnim vnd be-
 tracht die vernunft, die da ist ain fürerin rechtz lebens! so
 lob ich die ee des alten vnd main Im rechter vnd gebürlicher
 30 elich vermechelt werden ain Junge jungfröwen danne ainem
 jüngling. Wan des ersten so siche jch kain satzung noch ge-
 wonhait, die eewyber den alten verbietent Sunder glycher
 wyse als wir sechent die rûder der schiffen bas enpfolhen
 werden den alten! Also ist er ouch In den husz hablichen
 35 dingen geschickter! der lenger gelebt hât Angesehen daz In
 aim Jüngling selten aincherlay rechte wysheit wol sin mag.
 Vnd glycherwyse als die Jungen zwy vnd schosse niderfallend
 vnd nit vfrecht [88^b] belyben mugent! Sy hangen danne an

jren pfe[n] vnd stöcken mit den banden angeheft. Also schlipft
 ouch die Jugend der jungfröwen vnd wirffet oft vnd dick sich
 selbs darnider Es syge dann daz sy geregieret werd mit ver-
 nunft vnd wyszhait der alten. Danne die Jüngling sint nit
 5 allain vnwissend ander lüt sunder ouch sich selbs zeregieren
 vnd sint vnerniet der dingen vnd vngebrucht Irer vernunft.
 Also daz vnder andern vngemachsamen dingen, Oft beschicht daz
 das wybe sin müsz für den mane. Danne das alter der jünglingen
 ist das, das nie sin selbs versüchnüsz getän hät vngewissz mit
 10 was sitten mit was wyszhait mit welcherlay übung vnd mit was
 vnderschaids vnd vernunfte er sin leben schlyssen wöll. Dar-
 umb zwayer vnwissenhait zü samem gefüget in jungen Jären
 tügig zü lastern, oft vil vngemachs in dem leben bringen tüt.
 Ir ains stosset das ander in irtung, so sy nächhengend jren
 15 liplichen begirden, denen sy in kranckem gemüt jrer jugend,
 mit kainerlay ernietung mit kainerlay wyszhait zewidersteen
 gelernet haben. Ir vil (daz ich des andern geschwyg) vertünt
 grosz güte jnen von vatter vnd müter verlaussen! Also daz
 sy darnäch mangelnde mit Iren kinden ain arms leben füren
 20 müssen. Dar von notdurft manig fröwen erger zewerden ge-
 zwungen hät. Ouch ir etlich die vppikait vnd torhait Irer
 mannen zü fale gemüssiget. Also daz wenig sicher ist, yemant
 sin tochter zegeben sölichen jungen lüten. Aber in dem alten
 ist alles leben vor gewürckt, erkannt vnderwegen worden.
 25 Inen sint bereit vnd gehörig güt sitte, forcht des [89] gelückes,
 gewin wyszhait gesunthait vnd anders zü laster oder tugend
 dienende! Darusz Inen nit schwer entsteet das zetün oder
 das zelassen. Danne das alter des alten, Steet In sinem wesen
 mit wyszhait vnd räte, Also daz es nit lichtenklich in Irrung
 30 schlipfen mag. Er regiirt sin husfröwen vnd sin habe (Ob
 wol die klain ist) mit güter ordnung! Vnd mitt früntlicher
 huslicher satzung vnd vnderwysung, stillet vnd geschwaigt er
 die wilden gemüte. Das so Im das gelück beschert hät, tüt
 er nit allain beheben sunder so meret er das In sinen vnd
 35 siner kinden nutz vnd bruhe mit den gebotten rechts lebens.
 Er fürsicht die künstigen zyte, Nützit würckende des er dar-
 näch werd gefürt in rüwen. Dann gelycherwyse als ain zyti-
 gung ist der öpfeln also ist ouch ain zytigung vnser Jären, die

da ist die nutzlichost frucht des alters. Vnd du bedarft mir
 nit fürheben etlich alt mane, In die aberwitz gende, schwer,
 treg vnmüglich. Vnd etwenne toechter dann die kinder.
 Danne ain yetklich alter wie Jung das ist, vnsinnikait vf jm
 5 habend! ist zeschelten. Aber vnwissenhait des wären was
 güt oder arg syg, vnd vnerietung der regierung husz hab-
 liches dinges, tüt das alter der Jungen noch vnsinniger
 machen. Darvmb die wyle das alter der alten mit ernietung
 erfahrung tugenden wysheit vnd räte vbertrift! ouch in hus-
 10 hablichen dingen geflissner vnd sorgueltiger zesin gewon ist!
 So main ich von wegen gemaines nutzes, vnd von wegen der
 gesellung gemaines lebens vnd ouch von wegen hilf vnd
 schirms irs aigen lebens mit Iren husfröwen, ainem alten man
 wol zenemen sin, ain elich husfröwen ob Joch [89^b] hierInne
 15 kain hoffung wer geberung der kinden. Vnd nit allain ain
 husfröwen von alten Jären sunder ouch von jungen jären vnd
 blüyender jugend. Danne des ersten, so tüt der selben jungen
 fröwen rainer vnuerserter ätem, das alter des mans erkicken
 vnd in wirikait enthalten. Darnäch ist sy in sölichen jungen
 20 jären glych waichem wachse, das schnell des mans sitten vnd
 gewonhait mit in truckung vnd vnderwysung enpfangen hât.
 Also daz sy mit lichter lere gewonet des mans begirden ze-
 folgen, daz zebegeren vnd das zefliechen das sy vermerckt
 jrem man gefellig sin. Dann glycher wyse als die jungen
 25 zway vnd rüten mer dann die eltern näch dinem willen wie
 du wilt mugen gebogen werden! also magst du ouch bas vnd
 lichtenklicher ain jungfröwen bringen in gewonhait diner sit-
 ten! danne die, so das alter oder ains andern mans bruhe
 vnd vbung geschider hât gemacht. du machest dir die gefölgig
 30 vnd naigig zü dinem willen vnd gefallen. du wennest die ouch
 (wyle sy nit ander böser sitten vor vnderwisen ist) gantz
 aller diner sitten dir zedienen din alter ze eeren vnd zeer-
 kennen was dem lobe vnd was der scheltung zegeben syg!
 darnäch sy sich dann durch emsig anmanung vnd übung jrs
 35 lebens haltet vnd regieret. Wir sechen daz die kind in die
 clöster getän! Und denen ir wille vnd gewalt vsz zelouffen
 vnd vmb zeschwaiffen abgestellt wirdt durch sölich entwonung,
 den willen irs schimpfs vnd gailigkait verlässent vnd füro mit

kainer begird vsswendiger dingen bewegt werden. Wie wol
 die Jugend vnd nature sust dar wider raitzent. So vil [90]
 vermugen widerstrebende übung vnd gewonhait. Des glychen
 wirt ouch gesechen von den Jungfröwen daz dieselben kain
 5 sorg sölicher vszwendiger dingen bewegt So sy vor der men-
 schen zû gengen verschlossen, sust wol vnd recht gezogen
 werden. Darvmb was wunders ist das? Ob Jungfröwen alten
 mannen vermechelt vnd durch rät vnd lere der selben Irer
 mannen vnder wysen! vil lasters zytlicher gailigkait vnd wol-
 10 lusten die sy vor nit erkennt haben fliechent vnd die als
 schedlich mydent, sunder dienen der begird Irer alten man-
 nen! daz allain für gût vnd recht schetzende! das sy ze tûn
 durch vernunft vnd wysheit gelernet haben vnd das für das
 allerbest haltende, das sy vermercken dienen zû Irer mannen
 15 gesunthait vnd vfenthalt Sunder ouch achtent derselben Irer
 mannen gesunthait, für aller ander dingen schnelle hinfallende
 liebe, vnd fröwent sich vermechelt sin denen mannen, die da
 können vnd mugen geben vnderwysung rechts lebens vnd wis-
 send ze vberkomen zytlich gûte zû desselben lebens hinbrin-
 20 gung narung vnd vfenthalt! Das da ist die grösz frucht in
 der ee. Vnd also näch minem beduncken So wirt bas ain
 Jungfröw vermechelt ainem alten mane dann ainem Jüngling.
 Danne wie wole näch altem sprüchwort, gelychs mit glychem
 sich lichtenglich in fruntschaft verainet so ist doch wyslicher
 25 anzehangen dem alter (dem wyt von ist argwäne der armût
 vnd in dem ist tugend vnd wysheit gûtes regiments! darvon
 geben werden mag lere vnd vernunft recht zeleben) Danne
 der jugend, darjnne stetz forcht sin mûs, mangel zehaben ouch
 beweglich vnd vnstett ist mit kainer übung kainer [90^b] wysz-
 30 hait noch mit kainer ordnung des lebens vnderstützet vnd be-
 sunder gantz vnwissend zû ziehung der kinden; Danne so ir
 ains torhait gnûg ist, zû zerstörung des huslichen gûtes! was
 beschicht dann so zway vnerniete torechte menschen in schlip-
 fender Jugend zû samen koment! Was grosser zergengklich-
 35 kait vnd schadens wirt sin desselben huses? Danne es ist so
 kündig vnd offenbar kain wysheit kain ernietung noch erfahrung
 gebürlichs lebens sin in den jünglingen! Daz das nit wyter
 bewysung noch zügnûsz bedörfvend. Als du aber gesprochen

häst, alt vätter vnd müter beroubet sin vnd vnd mangel haben
 der wollust vnd fröiden jrer kinden, darumb daz Inen vorze-
 sterben syg vor vnd ee jre kinder aincher tugend mögen wer-
 den vnderwisen? etc. Siche ich nit warumb die Jüngling bil-
 5 licher vnd ee dann die alten fröid jrer kinden haben mugen.
 * Dwyle doch kain gewisser leben noch alter verhaissen wirt
 den jungen dann den eltern. Sunder sicht man daz die
 schickung gottes vnd der louffe der nature, gewonlich vesters
 gewissers vnd lengers leben gedychten lässent den selben, die
 10 da komen sint zû füntzig jären in gestandnem vermuglichen
 alter. Danne den vast jungen Danne wyle sy vor in ir ju-
 gend gelitten hant vil arbeit vnd mangerlay zû falle des lebens?
 so werden sy gesechen etlicher mässe ir natur gevestnet han
 wider des lybs siechtum vnd kranckhait vnd sich ouch mit
 15 langer sorg gesterckt han arbeit zelyden vnd zetragen. Danne
 siechtum tûnt vil menschen in Jungen Jären zû tode bringen
 die in gesterckten Jären belibent in leben angesechen daz sö-
 lich siechtum vnd kranckhait lichtenklicher [91] In der Jugend
 werden empfangen, so die natur glych aim wachs von dem
 20 warmen verserten luft wirt gewaichet. Aber all vnser zyt ist
 zwyfelhaftig vngewisz vnd manigfaltigen siechtumen vnder-
 würffig. Doch zwyfelhafter vnd grösser vnd merer sorgfel-
 tigkeit ist vnderwürffig die zyt der Jungen, Danne der alten.
 Ains tails dar vmb. Danne die nature ist von Ir selbs wandel-
 25 bar vnd fellig? Vnd das selb alter der Jungen Jären ouch
 blöd vnd nit starck. Vnd aber zum andern darvmb daz die
 Jugend nit waisz mäs zehalten noch sich zehüten vor wollu-
 sten vnd girlichkait des lybes. Welche ding mercklich vr-
 sachen sint grosser kranckhait vnd siechtumen. Aber die alten
 30 gesterckt In den Jären jrs alters vnd vester von übung vnd
 wyser durch erfahrung empfaen mit sterckerm widerstand den
 ansturme des siechtums vnd tûnt ouch sicherlicher sich dar
 von naigen vnd sich des entledigen Hiervmb der alten leben
 gewisser vnd lenger wirt gesechen. vber das so ist nit zeuer-
 35 werffen vnd vsz zeschlachen ain sölich alter dem man noch
 zû geben mag zwaintzig oder drissig Järe, Vnd dero gnüg
 vnd mer dann gnüg ist, zû ziehung vnd vnderwysung der kin-
 den etc. Welche kinde, so die zû jren tagen volkomner ver-

nunfte komen sint! Söliche ire vernunfte fruchtbarlicher
 mугen bruchen wyslicher räten versteen vnd mercken! so sy
 also von gelerten alten vnd wysen vättern des ersten haben
 empfangen jren grund vnd von den selbes gezogen vnd vnder-
 5 wysen worden sint. danne wir grossen nutze sechen komen von
 lere vnd vnderwysung der alten vnd allwegen dero kinde vnd
 [91^b] Junger, besser, messiger, vnd sinnrycher werden! danne
 ob sy von jungen vättern weren gezogen. Die jren kinden
 kain lere wysheit noch gewissen wege irs lebens geben mугen!
 10 Dwyle sy des selbs vnwissend sint;

Aber syge joch das des alten leben kurtzer syg, Nement
 sy noch dann nit grosz vnmessig wollust? so sy zů den zyten
 jre kind fürent! so die durch vätterlich vnderwysung gelernt
 haben vatter vnd müter zefürchten ze eeren jnen gehorsam ze-
 15 sin vnd jren willen zebehalten? Da mit kain vrsach aincher
 trurikait sölichen vättern vnd mütern entspringen mag. Aber
 elter Järe gebärent vnd machent widerspenigere kinder. Also
 daz sy die zöme irer vättern vnd mütern vszschlachten dero
 willen verachtent vnd jre gebott verschmächent vnd vngehor-
 20 sam vnd widerspänig năch ir selbs aignen sitten leben wöllen.
 Welches dinge dann gar oft mit grossem schmerzen sölich
 vätter vnd müter tůt pingen vnd belaiden. Deshalb die so
 ains kůrtzers lebens sint, von Iren kinden allain nement kurtz-
 wyl vnd wollust mit kainer trůbseligkait vermischet! Darumb
 25 Nicolae was vrsach trybt dich hierzů! daz du den alten die
 ee woltest wider räten? Sag sint sy nit tůgig zů geberung
 der kinden? Sint sy nit wissend zů regierung hushebliches
 dinges? Sint sy nit geschickt vnd kůnnend zů ziehung jrer
 kinden? oder sint sy blöder an vernunft vnd wysheit danne
 30 die Jungen? Dann daz ich der eltern marci catonis des vo-
 rigen vnd Marci Tuly Ciceronis vnd āne die vil andern aller
 gelertesten mannen geschwyge (die da năch volbrăchter jugend
 vnd schier in verzertem alter! jung jungfrōwen zů der ee ge-
 nomen haben) so hăt [92] aller nechst hie vor by vnsern zy-
 35 ten Galeotus malatesta (des nam loplicher sachen halb, bede
 in fride vnd in kriege begangen in welschen landen wyt vnd
 brait erkant ist) ain junge jungfrōwen jm zů der ee ver-
 mechelt, zů zyten, do er vier vnd sibentzig jăren alt was!

Vnd by dero geborn vier süne die dar näch für die aller ver-
 rümpftisten manne aller welschen landen gehept worden sint.
 Der selben wir ainen gesechen haben, namlich Karolum erlücht
 von kunst der geschrifte! Vnd der ouch darby zü vnsern
 5 zyten ain aller treffenlichoster hauptman vnd fürer stryts krie-
 gens vnd ritterlicher dingen gewesen ist. Dise vier hât ge-
 hulffen ir nature zü tugend genaigt vnd darzû vätterliche
 vnderwysung vnd tugend vnd geloubwirdig achtbarkait des
 selben irs vatters. Danne ich in züchung der kinden, main
 10 vnd schetz vast nütz sin vnd grössen gelouben vnd vil treffen-
 lichs vf Im haben, lere enpfelchnüsz gezwang vnd nötung ains
 alten vatters voll der wyszhait vnd geloubwirdiger achtbarkait.
 Vnd ob sölich wyszhait geloub vnd achtbarkait wol etwenne
 in Jungen vättern ouch erschynent! So werden noch dann
 15 die in den selben gesechen vnd vermerckt, nit so vil schwere
 vnd treffenliches geloubens vf Inen haben! Wyle dem alter
 sölicher jugend allwegen geschetzt wirt wyszhait fremd vnd
 ferr von sin. Wir geloubent aber Vnd maintent in den alten
 sin ernsthaftikait güt treffenlich sitten wyszhait räte ernie-
 20 tung vnd erfahrung. Das selb ding dann in Inen gebirdt vnd
 machet etwas geloubwirdigkait. Also daz die mer vnd höher
 [92^b] Dann ander geschetzt werden versteent fürsechen wissen
 vnd können. Das hilfzet vnd erschüset dann vil vnd wol zü
 maisterschaft vnd zü gezwengknüsz gailer vnd schlipfender
 25 Jugend der kinden die den füzstapfen Irer vättern nächfol-
 gende, Sich selbs schickent näch den sitten vnd näch dem
 leben dero, mit denen sy Ir leben also gefürt hant! der selben
 gebotten sy dann gefölgig sint vnd Iren willen behaltent!
 Ouch kainen wüsten schantlichen noch groben schimpfe hai-
 30 mant in Irem huse lernent! Sunder erberkait küschhait mä-
 sikait ernst güt sitten wys vnd geberde, dero sy von angender
 jugend vnderwisen sint (ob sy joch wol nächmäls vätterlicher
 hilffe beroubet werden noch dann durch empfangen lere voriger
 Jären die wyle sy lebet in allem irem alter) tünt beheben
 35 vnd nit vergessen Vnd hie durch vnd mit sölichem gar oft
 gerätent vnd werdent zü treffenlichen mannen vber ander für-
 nem vnd lobwirdig Vnd also sage Ich aber als vil ich mich
 verstee! daz von gemains nutzes wegen (Ob wol des sust kain

aigner wer) sich alten mannen wol gebürt eewyber zenemen
 vnd zehaben Ja vnd Jünglingin. Danne das zû gemainem nutz
 grosz vnd vast dient vnd gût ist In stetten sin fromm gût
 mann treffenlich vnd wyse, Die mit ir wysheit der andern tor-
 5 hait vfenthaltent vnd fürkoment. Du setz vnd tû hier zû!
 daz es ain grosz hilff ist vnsers lebens, zehaben ainer men-
 schen dem du dins lebens recht vnd wol vertrauwen, dine ge-
 denck offnen, mit dem du rât nemen, fröide mittailen. Kum-
 ber lichten, vnd den du andern dich (daz allain in wärer
 10 fruntschaft ist) wärlich nennen magst [93] vnd ist für wär nit
 zefürchten daz ain sölich ewybe dich nit liebhaben werd, so
 sy enpfindet sich von dir werden lieb gehabt als man dann
 ain elich husfröwen liebhaben sol) vnd so sy versteet dich ir
 küsche trüw halten vnd sich sin den andern taile dines lybes
 15 vnd nit als ain dienstmagt von dir gehandelt vnd gehalten
 werden Das die alten alles lichtenklich wol tûn mugen. Vnd
 sage. Wie vil findt man der Jungen mannen? die elich trüwe
 nit brechent? Danne daz sy sich stätz durch Inbrünstig an-
 fechtigung der minne Wyter danne sich gebürt gänd gailen
 20 vnd selten sich tûnt beheben Innert halb den rechten staffeln
 vnd gebotten huszhäblicher wirtschaft! Danne daz darneben
 ouch ain gût dirne gehept wirt an statt ains eewybs, da hin
 er sūchet (als man spricht) zetragen der kernen vnd haimant
 zelassen die sprüwer. Dar von dann entsteet vnd wachset
 25 das der ee allerminste zûgehört! krieg, nyd, hasse, Vnd schel-
 ten! Ouch begird sölich vbel vnd vntrüwe ze rechen. Aber
 der alten mannen messiger vnd wol geordenter wille, trüwe
 der ee, gantz vnuerletzte begird zû Irem gemachel vnd sunder
 stetikait des gemütes! stellent ab anfechtigung vnd begird
 30 fremder dingen vnd tûnt früntlicher wille beder vermechelten
 vnd Ir hailig trüw, bringen vnd geben sölich wollust, daz vn-
 der allen menschen kain grössere sin mag. vnd wirt ouch das
 alter vil mütiger vnd frölicher vsser vermechelschaft ainer
 Jungern danne ainer eltern. danne daz du die alten geschulten
 35 häst, alz nit wol vnd vil mugend der minne. das ist ain obersts
 aller gröstes lobe vnd ain sundere tugend des alters. An ge-
 sehen! daz wir so vil verhängen vnd geben sollen [93^b] vn-
 sern lyplichen begirden minne (wo wir anders menschen vnd

nit vnuernünftige tier sin wöllen) als vil gnüg ist zû begerung
 der kinden! als dann der sachen halb, die selben tiere ouch
 tünt der minne begeren. Danne was wyters begerd wirt! das
 ist mer zû gehörig sölichen tieren danne den menschen sich
 5 vernunft gebruchende. Vnd ist billich vnd recht! Sich so
 vil in sölichen lyplichen begirden zeüben als vil vernunft
 satzung vnd beschaidenhait der ee das erfordert. Danne die
 wysen sagent vnd wöllent vnküschhait nit allain lasterlich sin
 in den alten sunder ouch in den Jungen Darvmb des alten
 10 messigkait aller maist hierInne lobs wirdig ist, daz sy der
 vernunft (die da ist ain wyse fürerin) näch folget! Vnd das
 so notdürftig nütz vnd güt ist, vfnimpt! Vnd das so vber-
 flüssig arg vnd vnnütz ist vsz schlecht vnd verwirffett. Vnd
 so er In siner husfröwen, etlich grösse begird mercket (als
 15 etwenn In den siechen beschicht, die In zû gefallner kranck-
 hait vil schedlichs vnd doch dem mund lustlichs, begeren) daz
 er dann mit wysheit vnd vernunft sölich ir begird messiget
 vnd sy vnderwyset, das allain nutzbringen das der natur vnd
 erberkait zegehört vnd notdürftig ist. Das du aber gemaint
 20 häst weder ain Jungfröwen Witwen noch ain Ewybe alt der
 Jären aim alten mane zenemen sin etc. Sag Ich mit vrlob
 hier zû Nicolae. Daz du mich bedunckst ze vil Irren an
 rechter vrtaile vnd dich gunst geben vnd reden näch dinem
 sitten. Dann ain alter man mag nemen ain Junge Jungfröwen
 25 vnd so vil mer vnd billicher! daz er die selben! die also
 Junger Jären von [94] niemantz anders, dann allain mit hus-
 hablicher gewonhait vatters vnd müter gezogen ist! bas bie-
 gen mag wa hin er wil. Er wendet sy näch siner lere. Machet
 sy geschickt sinen sitten. Regieret sy mit wysem räte Vnd
 30 vnderwyset sy das sin das allerbeste, daz da ist loblich vnd
 erber Er zöget ir wie grosz syge die tugend der küschhait,
 Vnd wie wyte die erbern küschen fröwen vnd schamigen! vn-
 derschaiden syen von den vppigen vnd vnküschen Er sagt Ir
 wie vil lyplichen begirden zehengen syg, vnd wie vil Inen ze-
 35 widersteen. Sölichen worten sy denne (wo sy anders nit ain
 vnuernunftig tiere ist) folget! Also daz was die zyt irer Jun-
 gen Jären etwenne haischet vnd erfordert, das das Ir vernunft
 messiget vnd stillet vnd maint das aller billochest zetün sin!

Das Ir elicher man geräten hăt; Aber ain witwe, so die vor
 ainen Jungen man versücht hăt, Ist Ingedenck sich etwenn
 von Im verschmecht gewesen sin vnd Inn ain ander fröwen
 vnd gůte dirnen gesücht han! die er dann lieber vnd bas dann
 5 sy gehalten hăt! dar von ir danne krieg oder straiich entstan-
 den sint. Ir fallent in gedechtnisz ire klaider, die er ir et-
 wenne hăt verkouffet oder die sinem kebswybe gegeben. Ir
 kumpt ouch zů troste vnd hilffe, die lichtfertigkeit irs vorigen
 Jungen mans sine arge grobe sitten vnd sin vnstete trüwe der.
 10 ee. Also so sy ainem alten mane yetz vermechelt ist! daz
 disz ding alles ain ende hăt, daz sy dann maint sich komen
 sin, vsz ainem vngestümen wütenden mere, an ain sicher rü-
 wig stad vnd porte. So ist ouch ainem alten man nit ze-
 schüchen vile der Jären ains ewybs Sunder äne hoffung der
 15 kinden begert er Ime ze[94^b]vermecheln ain altes wybe vmb
 gesellschaft willen der nature vnd von hilffe wegen gemains
 lebens. Vnd vmbe das zwayer kranckhait mit jren gemainen
 creften dester muglicher werd. Dann glycherwyse als etwenn
 ain aller sterckster man nit getün mag, daz mit zůgefűgter
 20 hilffe gar ains krancken menschen volbrächt wirt! Also ist
 ouch hie, wäs ain ainig blöd mensch allain nit mag volbringen!
 daz ains andern hilff (ob die wol klain ist) hier zů dienet vnd
 das tůt vollenden. Ain ainige hande ist vnnůtz etlich werck
 zevolbringen. Aber zwo hend da aine durch zů tůn der an-
 25 dern behulffen wirt machent vnd volbringent das selb werck
 gantz vnd gerechte. Vnd also beschicht was ir ainem gebricht
 daz das durch hilff des andern wirt erfollet Du hăt ouch ge-
 sagt das leben der alten kůrtzer sin etc. Ich mag nit loughen
 noch abrede sin, dann daz das zile dar zů vnd dahin wir alle
 30 gend, Dem alten necher syg năch louffe der natur dann dem
 Jungen. Aber der alten leben ist das gerechter vnd volkom-
 ner! vnd wirt ouch mit grosserm lobe geűbet vnd geschlissen!
 vnd ist weger vnd besser kurtz gelebt mit tugend, Danne mit
 grobkait vnd laster fűren ain langes leben der hirssen, torecht
 35 vnd gantz voll der vnwissenhait vnd grösser Irrung vnd das
 so vil ee schlipfet vnd fallet als vil es krencker ist vnd be-
 giriger zů lastern. Aber das alter ains alten (vnd Ich nenne
 die alt die söllichen mannen tragen mugen) wie wenig des vber

vnd vorhanden ist! So ist es gerecht, vnd ist dar Inne müt
 craft vnd macht, sinn, vernunft, vnd räte, die da sint ain be-
 husung der tugend vnd ain frucht des vorigen lebens Also
 daz notdürftig [95] Ist wo hin du dich kerest, daz du mir
 5 gestandest vnd mit hellest das alter des alten nütz sin zû
 der. ee. vnd zû übung vnd schlyssung des lebens aller ge-
 schicktest. Also daz vns des zebegeren ist (wo wir anders
 ordenlich vnd recht vnd mit tugend leben wöllen Vnd do er
 disz also geredt sprach Nicolaus. Warumb häst dann du ka-
 10 role nit gebaitet vnd erwartet des alters Innemung ainer elichen
 husfröwen. Dwyle du das alter der alten so vil lobest vnd
 bewerest! Daruf karolus antwort ich schlach nit abe die ee.
 In Jungen Jären, wenne die recht vnd geschicklich zûgeet
 beschicht vnd gehalten wirt. Sunder so erzög ich allain hie,
 15 daz das alter der alten nit fremd noch vntüigig syg zû sölicher
 gaube der ee. Wyle sölich alter das gewisser, sicherer, Vnd
 gerechter sin gesehen wirt . . Darzû nicolaus redt yetklicher
 vnder vns folge näch siner begird vnd sinem sine, dann ainem
 yeden menschen ist sin aigen vnd besunder vrtaile Im gefellig
 20 vnd ich main dise dine wort von dir darumb geredt worden
 sin, daz du hiermit disem vnserm wirt poggio gnûg tûgest.
 Vnd wilt (als mich bedunckt) Vmb spyse gûte wort geben
 vmb daz du Im nützit schuldig werdest! Aber wir haben
 yetz gnûg sament geredt ich wil das fürsehen vnd fürkomen
 25 das ander lüten vnsinnikait mir nit kom zû schaden. Vnd do
 disz also geredt wart, stunden wir vf vom tische vnd giengen
 von dannen etc.

[95^b] **D**Em ersamen vnd wysen maister Jergen rat der hochgebornen vnd durlüchtigen fürstin vnd fröwen fröw mechilten geborner pfaltzgreuin by ryne vnd ertzherzogin zû österrÿche etc. miner gnedigosten fröwen camrer Enbüt Ich
 5 niclās von wyle der zyt statschriber zû Esselingen vil hailt. Vor alten zyten lieber maister Jerg, do der grösz alexander dennoch Jung anhüb die welt vnder sich zebringen! vnd, er anfangs ainen grossen strytt vnd sige wider die thebanos be-
 hept hatt! vnd die vberbelibnen sins siges, flüchtig gen athe-
 10 nas kämen zû der wirdigen statt vnd daselbs bittende jngelassen wurden etc. legert sich der gemelt Alexander für die selben statt! vnd gefragt wes er begerte! antwort er vnd be-
 gert! daz man jm vssz dem athenischen räte vier vnd zwaintzig der eltsten hin vs geben sölt. Vnd als die athenischen dar
 15 vf vnder jnen selbs rätschlagende, was hier jne zetûn oder zelassen wer, des ersten frägten die eltsten vnd die wysesten irs rātes namlich eschinem dematem vnd demostenem! gaubent dise ersten zwen Eschines vnd demas yetzgenant Ire rātt ain ander gantz widerwertig. dero ainem aber demostenes
 20 folget, vnd den selben rāte mit sinen worten also billichtet! daz Im von den andern des meren tails allen wart verfolget! Vnd er hin vs gesandt ain rede mit Alexandro zetûnde. Welche rāt vnd rede yetz gemelt Ich von Irer schöne vnd zierlichkait wegen von dem latine hab gebrācht zû tûtsch vnd die Ich
 25 dir als ainem liebhaber aller künsten vnd hüpschkait vnd als minem [96] liebsten vnd besten fründe hier byschick! Vmbe daz du sölichs lesende din gemüt ergetzest vnd ouch sechest nit fremd sin, ob Joch etwenne die allerwysosten manne vnglych vnd widerwertig rett vnd vrtail gebent ouch mit gūter
 30 gewissne. Dann ob wol du vnd Ich gelych wyse gelert vnd

erfahren weren! So mag doch die nature, die da ist ain vicarin gottes, dich villicht geschaffet han gütig vnd mich zornig, dich milt, vnd mich karge, dich hert vnd grim. Mich lind vnd barmhertzig, dich gehertz vnd türstig, mich zag vnd forcht-
 5 sam vnd des gelychen hunderterlaye! Darvon oft kumpt daz gelyche kunst vnd wyshait der menschen durch Ingegossen naigung der nature vnglych vnd ain ander gantz widerwertig rätt vnd vrtailen gebent! Vnd doch ain yeder hoft vnd mainet das best, ende zeerfolgen vnd die gerechtest vrtail zetreffen, Vnd hier zû sin vernunft spitzet, vnd sin kunst vf die
 10 bane zû der weere vf das best gewäppnet bringen tût. Aber wes gebruch Ich mich diser langen Worten gegen dir. Das vnd anders bas dann ich wissende. Allain wil ich vsz diser miner vorrede, daz du wissest, Wâr vf die rätt vnd rede diser
 15 dryer mannen ob geschriben gangen syen vnd du die selben hie durch dester bas mugest versteen. Ich schick dir ouch hier by ain lere hushabliches dinges von sant Bernharten gesetzt vnd von mir getütschet, Des die durlüchtig fürstin vnser beder genedigoste fröw obgemelt nechst von mir begert hât! Das
 20 wöllest Iren genâden geben von mir als Irem aigen menschen willigen vnd vnderthenigen In aller gebürlichkait [96^b] zû allem vnd yedem iren fürstlichen genâden gefallen. Geben vf dem mayaubent Anno. lx. quinto.

Eschynes

25 Ich bin Ingedenck lieben athenienses Alexandrum in diser vnser statt vnderwisen sin der sibben fryen künsten vnd erzogen! vnder Aristotelis zucht vnd maisterschaft vnd darmit ouch vnser sitten vernunft vnd handel by vns gelernet haben. Hiedurch Im die kunst zeherschen vnd zeregieren geben worden ist! So haben wir bekennt die vestikait vnd grösse sins
 30 gemütes Vnd dar by sin miltikait vnd güte zû gnâden genaiget! Dar vmb so bedunckt mich, daz er von vns syge zegütigen mit diensten vnd früntlicher erbietung vnd nit zeuerachten noch zegrimigen mit widerspennikait vnd hochmütigen
 35 Worten. Tûnt wir das vnd er vns findet erbietlich bittende! So main ich daz er sölich vngenâd sins gemütes, die er jm

hät fürgenomen vnd sich hier mit wider vns gewäppet lichtenklich In gnåde vnd günstigen güten willen werd verkeren.

Demas

Mit wunder tün Ich vber sere wundern ir athenienses!
 5 welcher mässe Eschines vch forcht machende, süchh vnd warne,
 daz wir komen in ergebung vnd gewalte ains Kindes. Vnd
 wes vnd warumb er vns räte zefyrren der kunst kriegens vnd
 strytens! darmitte wir doch allwegen fürpündig vnd lobsam
 gewesen sint. besunder so er doch vorzyten geräten hät (vnd
 10 nit vnbillich) zestryten wider die persischen. wie tünt Ir
 starcken kecken vnd vnüberwintbaren athenischen [97] manne
 fürchten den stryt Alexanders! So Ir doch vormäls erschlagen
 hant die megaros, vberwunden die Corintischen vnd mit uwer
 tugend vnd machte strytens, So vil tusent man kungs xersis
 15 von uuern anstossenden landen vsgetriben, vnd verJöcket!
 daz Inen nit gnüg was das mere zû schiffung, noch des por-
 ten gnüg zû lendung, noch das ertrich zû wandlung. Ja sprich
 Ich Ir die ouch die berg gebrächt hant zû ebne vnd die den
 tälern gelychet, vnd über die mere gebrugget. Welchen ouch
 20 kum wyt gnüg was das gantz krieichisch lande sy zebegryffen,
 vnd das ertrich uwer cörpel zefassen vnd der lufte uwer
 schossz vnd pfyle zeenpfächen. O. spotlichs vnd schimpfbares
 dinge! ist daz wir disem Jungen vnernieten kinde, nit getören
 begegnen vnd widersteen! die doch mit so vil stryten vnd sigen
 25 allenthalben loblich sint erschinnen. Für wäre mit subtylem
 vnd geschydem räte, begert er Im zegeben vnser höptlüt vnd
 die wysen vnser rātes! Vmb das! So vnser statt Irer hū-
 tern were beroubet daz er dann darnāch dieselben vnser statt
 also an rāte wyszhait vnd machte erleret, dester lichtenklicher
 30 möcht gewinnen vnd vnder sich in aigenschafte bringen.

Demostenes

— Ich siche vor vns in frāge sin. Ob vns gebürr für-
 zenemen die wāffen vnd weere wider Alexandrum. oder ob si-
 nen gebotten vnd gedingen syge nachzekomon! über dise frāge,
 35 ist die vrtail Eschinis nāch minem beduncken zeloben! Aber

nit die vrtail dematis! Sunder so ist die selb năch gelegen-
 hait disz dinges zewiderreden [97^b] vnd zeuerwerffen. Danne
 ob wol an stercke crafft vnd macht vns nit gebruchh wer, wo
 die notdurft hiesch zestryten! So sint doch nutz vnd
 5 gemache gegenwürtigs friedes (der ain end sol sin alles krie-
 gens) nit zeuersunnen. Demas tût vns manen durch exempel
 alter sigen! krieg vnd stryt für zenemen. Aber Ich bitt Er
 hebe vns für sôlich houpt lût (als kuntbar ist vns zû den
 selben zyten gewesen sin. Es ist nit mer hie. Canon der da
 10 mit rouben vnd grossem gûte der persischen vnser statt rych
 gemachet hât. Es ist nit mer hie Milciades, der darium mit
 sechs măln hundert tusent mannen in dem felde Marachonio
 vberwunden, schamlich flüchtig machet. Es ist nit mer hie
 temistodes der da xersem mit zechen măln hundert tusent
 15 mannen raisiger erhept vnd vsgezogen vnd mit zale vier tu-
 sent vnd zwayer hundert schiffen grüsenlich erschinende! tett
 nôten vnd zwingen in ainem klainen schifflin haimlich zefliechen
 vnd hin zekomen. Aber nu ist ain ander zyt. Vnd ist ye
 năch gelegenhait der zyte ain anderer râte in zegeen; Lûgent
 20 so wir sûchen wôllen fryhait! daz wir nit hie durch komen
 in aigenschaft. Lûgent so wir nit wôllen etlich hin vs geben!
 daz wir hie durch vns alle hingeben. Fûro so ist. Wer in
 stritte gelücklichen seligen sige wil erfolgen! dem ist notdürftig
 daz er den strytte vor beraite vnd die ritter vnd stryttenden
 25 zûricht vnd vnderwyse. Aber ain grôszmütiger vngestümer
 vinde ligt an vnsern thoren mit ainem heere vnd gezüge nit
 erschrocken forchtsam noch krancke sunder keck türstig frai-
 dig vnd starcke. Vnd hât vns funden vnberait nützit zûge-
 richt noch berätenlich vnder[98]wisen. Darumb so rât ich
 30 daz wir Inn nit bewegen noch berûffen von den persischen.
 Lassen wir jnn yetz abziehen villicht nit mer wider komend!
 Vmb daz er nit sinen frefel vnd zorne, den er yetz langest
 gegen den selben persischen empfangen hât! genötet werd in
 vns zekeren. Vnd hüten wir vns zereden! daz wir nit dienen
 35 wôllen Alexandro! dwyle wir doch gedienet haben philippo
 sinem vatter. Vmb daz wir nit durch fale des gelückes ge-
 sehen werden glyche dem thebanischen folcke.

Demostenes

Nützit häst du Alexander von dinem gelück grössers
 dann daz du magst noch von diner nature bessers dann daz
 du wilt begnäden vnd behalten vil menschen. Vnd ist vnder
 5 allen dinen tugenden (wie wol dero vil vnd die grossz sint)
 kaine edler dann barmhertzikait vnd kaine wunderbarer. dann
 gütikait! vnd du magst dich ouch den götten nit necher
 glychen dann das du haile bewysest den menschen, aintweders
 mit geben so sy des bedörfent, oder mit vertragen so sy es
 10 verschulent, oder mit vergeben vnd ablassen so sy bittent.
 Danne so wir von den götten sust in allen wercken vnd gau-
 ben werden vbertroffen. So ist allein barmhertzig gütikait die,
 so vns den selben aller maiste mug gelychen. Darumb hab
 fröide vnd gebrauch dich so ainer vber grössen gūthait dir an-
 15 geborn, ouch der eere vnd glori dins gelückes, vnd der für-
 püntlichkait diner tugentlichen gütikait, die du erschnen laus-
 sen [98^b] solt in all! vnd aller maist in die by denen du bist
 erzogen vnd von denen du das liecht der kunst häst empfan-
 gen vnd den anfang vnd die form diser diner höche genomen.
 20 Vnd es ist niemant diser dingen so ain vnrechter richter, der
 da zwyfel habe was willens wider dich zesünden gewesen syge
 der athenischen. In dem, daz sy vfgelaussen hant vnd entpfan-
 gen die thebanen. Wyle wir doch als balde so wir des diner
 durlichtikait vnwillen vermerckt haben! zū dir komen bittende.
 25 Dann wer sin begangen sünde rüwet! für wår der gibt zeuer-
 steen sich wöllen lieber nit gesündet haben danne rüwen.
 Aber ob wir wol in etlicher schulde vermercket werden möch-
 ten! So sint wir doch an getäte wärer sünde vnschuldig.
 Wir haben die thebanen als arme ellend vnd erbermlich lüte
 30 in vnser statt empfangen, nit als dine vinde, sunder als ain
 vber belybung dines siges vnd sy als die, so vsz gebrochnem
 schiffe vszkomen sint enthalten. wir haben denen so von dir
 vberwunden sint vnser thore vf geschlossen, vnd doch wider
 dich kain wåffen zū der weere ye genomen. daz du ee vr-
 35 tailen solt beschechen sin vsz menschlichkait dann vsz sünden
 vnd nit vsz hasse gegen dir, sunder vsz aigner Irrung vnd nit

vsz aincher boszheit, Sunder villicht vsz torechter gütikait vnd
 erbermde. Tû hierzû. daz din gemüt in sölichen aller kürtzi-
 sten zilen, so die natur vns tödemlichen menschen zeleben
 geben hât, niemer möcht sin benüigig dwyle das allwegen
 5 gebrunnen hett in liebe vnd begirden der vntödemlichkait.
 Vnd ist ouch din leben mit zenennen als das, das allain in
 cörpel vnd [99] In zyte begriffen ist, sunder als götlich. Du
 häst gezemmet die kriechen, Verherget lacedemoniam! zer-
 störet Thebas vnd bist noch füro persiam vnd die indischen
 10 vsz stryt vnd gewinnend. Aber dise ding sint alle also, daz
 sy ain natur vnd ain geschicklichkait haben daz sy mugen
 vberwunden vnd gewonnen werden. Aber aigen gemüt vber-
 winden Im selbs gebieten, zorn vndertrucken vnd leschen, sich
 siges nit vberheben, den vberwundne die da bittent, genäd ze-
 15 tûn! ist me zeschetzen götlich dann menschlich. Welcher das
 tût, der ist nit zeglychen den lobwirdigen mannen, sunder
 zeschetzen den götten allerglychest. Darumb so wöllest nit
 gelouben dem zorne, der da ist ain vinde wyses rätes! noch
 dem sige der von natur ist hochfertig vnd vngestüm sunder
 20 so vberwinde dich selbs, der sust vberwindest mengklichen
 mit glori tugend vnd eeren. danne wer ist mit adel mit from-
 kait oder mit lernung güter künsten oder mit gütikait oder
 mit ainchem namen des lobes dich vbertreffend? Wer ist vn-
 der allen verrümpften künigen so ye gewesen sint, mit grösse
 25 der kriegen, mit vile der stryten, mit manigfaltigen sigen, mit
 clügen loblichen anschlegen, mit keckhait des gemütes, mit
 widerstande der vinden, mit gütikait in din vndertäne Vnd
 mit miltikait in mengklichen! der dir mug werden gelychet
 vnd zû gezellet? Dann din rûm glori vnd eere, sint yetz so
 30 grösz (wie wol grössere künftig ist) das lenge der zyt, sölichen
 dinen sigen kain ende bringen mag. So ist ouch niemant mit
 vernunft so hoche erluchtet! der gantz vnd gare (jch sprich
 nit zieren, sunder vssprechen mug, Die geschichten [99^b] von
 dir loblich gewürcket vnd begangen. Doch so tût das alter
 35 vnd zû vil lenge der zyt in die harre das alles bedunckeln
 vnd füren in vergessnûsz, Wo das nit der geschrift zû ge-
 decktnûsz diser dingen geben vnd entpfolhen wurd. Aber wer
 ist vnder so vil tusent menschen, die getrülicher din lobe

sagen oder bas beschriben mügen, danne die athenienses, denen doch haimant sint hüslich lere der wyszhait vnd natürlicher künsten, darmitte sy den gantzen vmkraisz der welte durch mittailung sölicher künsten tünt fruchtbar machen wessern vnd füren. Darumb so werden dine begangnen geschichten gefyrret vnd geeret mit worten vnd mit wercken wundersam vnd frölich! nit allain mit vnsern, Sunder ouch mit aller fölckern zungen vnd geschriften! Vnd beschicht niemer daz ainch alter oder lenge der zyt, diner lobs vnd eeren geschwygen werd. Vnd bedarf din leben nit fürchten ainchen nebel der vergessnüs, sunder wirt die ewigkait das aller welten gedechnüs beschirmen vnd werden alle vnser nachkomen wunder haben, din vnzalbarlich stryt vnd sige hörend. Darumbe dwyle dise ding also sint. So bitten wir vergib vnd lász ab vnser statt. Ja diner! vmb daz du nit erleschest der gantzen welt liechte, daz da glycher wyse, Wie die sunn mit glaste irschynes vnder anderm gestirne wyt vbertrift! also ouch vnder allen andern diser gantzen welt stetten, mit zierlicher rede vnd wyshait, glych als ain brunn vsz jm in alle ort der welt bechlin vnd rünse aller künsten vsgeen vnd fliessen lasset. Darumb die abstellung sölicher diner straffe [100] sin wirdt diner gütikait ain ewigs lobe! vnd mit dinem erlouben red Ich das küng Alexander, daz vnder allem dinem lobe, kains grösser ist! danne das, das du vf hüttigem tage tüst erfolgen! wo du vns diser vnser bitte gewerest etc.

Wie ain husvater hus haben sölle etc.

DEm gütigen vnd seligen ritter Reymundo herren der
 burg santt Ambrosy Bernhart gegeben in sinem knecht. Du
 häst begeret von vns gelert zewerden von der sorg vnd mässe
 5 hushabliches dinges daz nutzlich zeregieren. Vnd wie ain
 husuatter sich hier Inn gebürlich halten söll. Darzû wir dir
 antwort geben.. Wie wol der state, das wesen vnd der vsgang
 aller zytlicher dingen! des gelückfals warten müssen vnd dem
 vnderwürffig sint! noch dann so ist der forcht halb die regel
 10 vnd ordnung recht zeleben nit vnderwegen zelassen.. Darumb
 so los vnd merck. Ist daz in dinem huse din bruhe vnd din
 gülte gelych sint! So mag lichtenklich ain vnuerwändter zû
 fale das entrichten vnd zerstören sölichen stande dines huses.
 Der stand aines liederlichen sümigen menschen ist ain bufellig
 15 huse.. liederliche oder sinnselikait ains menschen, daz da hus
 haltet! ist ain füre daz da grosz ist vnd vnnützlich entzündet
 vnd brünnend. darumb so erfare aigenlich den flysse vnd für-
 satze dero! die dann daz din versehen solten.. Wenne din
 güt abnimpt [100^b] vnd hinfallet vnd doch nit gar hingefallen
 20 ist! So ist minder schand sich zemessigen vnd abzesteen!
 Dann gantz zefallen vnd zeuerderben. Dann oft aber vnd aber
 zebesechen die güter so ains menschen sint vnd was wie vnd
 wo die syen! ist ain grosse fürsichtikait.. Betracht vmb spyse
 vnd getranck diner tieren. dann sy haben durst vnd hunger
 25 vnd können das nit fordern.. Brutlöf vnd gastung kostlich
 gehept! bringent costen vnd schaden än grösz eere Bruche
 cost vnd zerung vmb ritterschaft ist eerlich vmb hilff der
 fründen vernünftig, aber vmb hilff der güdern vnd vertügern
 gantz verloren. Fresserye ains sümigen vnarbaitamen men-

schen, ist ain füle! Aber ains gefissnen übenden menschen,
 ist sy ain gesunthait vnd wollust.. Tû die fresserye kriegen
 mit dem seckel. Vnd hüt dich daz du nit syest des seckels
 vogt vnd pfleger.. Ist aber daz du zwüschen der fresserye
 5 vnd dem seckel ain richter syest! So sprich vnd fell die vrtail
 oft vnd doch nit allwegen für den seckel. dann die fresserye
 bewyst vnd bringet für ir dinge, durch lyplich raitzung vnd
 begirlichkait vnd mit vngeschwornen zügen. aber der seckel
 bewyset sin ding treffenlich wider die fresserye.. Etwenne be-
 10 schlüssset gyttikait den seckel! Aber niemer vrtailt recht sölich
 gyttikait zwüschen der fresserye vnd dem seckel.. Din hus-
 gesind solt du mit grober vnd gemainer spyse vnd nit mit
 seltznen wolberaiten vnd gelustsamen spysen füren. Aber zû
 hochzytlichen tagen völlenkich vnd genügsam vnd doch nit
 15 gelustsamklich mit seltznen spysen, Vmb daz du sy hie näch
 nit enpfindest widerspenig vnd aber sölicher [101] spys be-
 gerende.. Dann wer also fressig worden ist der verwandelt
 das kumm anders dann mit sinem tode. Gyttikait ist ain
 töterin irs selbs.. Item gyttikait ist ain forcht der armût zû
 20 aller zyt in armût lebende.. Recht also lebt der gytig an Im
 selbs sparende vnd aim andern behaltende.. Es ist besser
 andern verlieren, dann an Im selbs ersparen.. Hâst du vil
 korns? so hab nit lieb die türe. Dann wer die türe lieb hât!
 der ist der armen tötter.. Verkouff das korn so es gnûg giltet
 25 vnd nit so es die armen nit kouffen mugen. Vnd dinen näch-
 buren vnd dinen vinden tû es vmb ain minder gelte verkouf-
 fen. Dann nit allwegen der vinde vberwunden wirt mit dem
 swert, sunder oft mit diensten vnd früntlichen täten.. Wer
 ainen haupt vinde hât! der ist als gelegt in ainen turne vnd
 30 kercher.. Hâst du ainen vinde? so bis nit von Im du habest
 dann din ouge zû aim hüter. vnd gedenck allwegen, daz ain
 listiger vinde, gedenckt vnd sûchet sinen vinde zebekrencken..
 Die kranckhait dines vindes ist nit ain statt des frides! Sun-
 der allain frid tage etlicher zyte.. Ist daz du dich tröst vnd
 35 sichrest! dinen vinde nit gedencken die ding die du gedenckst!
 So legst du dich in ain grosz sorg vnd zwyfel.

— Von argwenigen fröwen was die schaffen oder tügen!
 wöllest lieber sûchen das vnwissen danne das wissen.. Dann

wenne du erfahren häst das laster diner husfröwen! so magst du von kainem artzat mer werden gehailt.. Dinen schmerzen von ainer bösen husfröwen milterst du denne! so du hörst des gelychen von andern husfröwen.. Dann ain edel vnd hoch hertze, 5 fräget nit von handlung vnd übung [101^b] der fröwen.. Ain böse husfröwen, solt du lieber vnd ee, straffen mit lachhen danne mit ainem stecken. Ain wyb alt vnd ain hüre vertüt allen rychtum vnd wo die recht das verhangten! So were sy lebend zeuergraben.. Hochfart wider sinen nächgepuren ist ain bade 10 das da wartet des donners mit dem schlage.. Klaider zevil costlich! sint ain anzaigung vnd bewysung klainer sinnen vnd vernunfte.. Aber klaid das zû vil erschynet! gebirt dem nächgeburen ouch bald verdriessung.. Darumbe flysz dich zegefallen mit fromkait vnd nit mit klaidern.. Die bitte ainer 15 fröwen die klaiden hât! vnd füro klaiden begert! zaiget nit vesten mût.. Halt vnd geloub daz der mensch ain fründ ist merer vnd gröszrer liebe! der das sin gibt! dann der sich selbs mit worten erbütt. dann von den selben ist ain grosse vile der fründen.. Du solt den nit halten für ainen fründe der 20 dich lobet so du es hörest vnd gegenwürtig bist.. Ist es daz du dinem fründe räten solt? So sûche nit dar Inne Im zegefallen. Sunder so sag in dinem räten mit vernunft, Also vnd also beduncket mich Das vnd das ist nit gantz also zetûn etc. Danne es kumpt lichtlicher vnd vil ee verwyssung vnd 25 vfhebung von ain bösen vsgange ains räts! Dann von ain gûten vsgange kom lob oder dancke.. Ich hab gehört wie dich sûchent vnd besechent gougkler! höre was darnâch folge.. Ain mensch der den gougklern anhanget vberkumpt bald ain fröwen dero nam sin wirt armût. aber wer wirt diser husfröwen 30 sune! fürwâr verspotung. Gefallet dir des gougklers wort? tû dem glych [102] als ob du es nit hörest vnd anders gedenckest.

Wer lachhet vnd sich fröwet in den worten ains gougklers! der hât Im yetz selbs geben ain pfande des 35 todes.. Gougkler die got scheltent, sind wirdig ainer henckung. Was ist ain gougkler? Ist ainer der böses bösem gebüetet den todschlag by Im tragende.. Dinen diener ains hohen hertzen, trybe vs als ainen künftigen vinde.. Ainen diener vnd fründe

die dich gegenwürtig lobent tryb ouch vs. Dann sust gedenc-
 kent sy dich betrogen haben.. Ainen diener der sich lich-
 tenklichen schament hab lieb als dinen sune.. Wilt du buwen?
 So füre oder bewege dich hierzû mer notdurft dann wollust..
 5 Dann begirlichkait zebuwen wirt mit buwen nit hingenomen..
 Zû vile vnd vnmessig begirlichkait zebuwen! gebirt vnd wartet
 des bouws verkouffung.. Volbrächte sorg vnd geläret casten
 vnd seckel machent den menschen bald arm aber selten wyse..
 Wilt du etwenne din gût verkouffen oder ainen taile dins
 10 erbs? so hüt dich das zeuerkouffen ainem mechtigern vnd ge-
 waltigern dann du syest, Sunder so verkouff das ee vnd lieber
 ainem mindern vnd vmb ain minder gelte. Aber das gantz
 erbe, vnd gûte verkouff dem der allermaist darumb geben
 werd.. Es ist besser zelyden vnd zetragen sweren hunger dann
 15 verkouffung väterliches erbes. aber besser ist zeuerkouffen
 ainen taile dann sich vnder zewerffen dem wücher. Wücher
 ist ain redlicher morder vnd rouber der do vor sagt was er
 willens hät. kouff nützit in gesellschaft ains mechtigers.. klaine
 gesellschaft hab vnd lyd dulthenklich! vmb daz sy dir nit zû
 20 geselle ain stercke.. wer in mangerlay vnd gnügsamkait [102^b]
 der winen nüchter vnd gemesse ist! der ist der Irdischen ain
 gotte.. Trunckerye würcket nützit rechts, dann allain so sy
 in das kâte vellet.. Enpfindest du des wins? so flüch die
 gesellschaft! vnd sûche ee den schläffe dann die mitredung..
 25 wer sich selbs mit worten entschuldiget truncken zesin der
 schuldiget sich siner trunckenhait.. Es steet vbel ainem jüng-
 ling win erkennen.. flüch ainen truncken artzat.. hüt dich
 vor aim artzat voll kunst vnd mit übung nit bewert! der da
 wolt an dir lernen wie er ander in aim glychen siechtum ge-
 30 sund machen möcht.. Klainne hündlin lász den pfaffen vnd
 grössen fröwen.. Hund die hüter sint! Sint nütz Aber hund
 zû dem waidwerck! costen vnd gesteend mer denne sy nutz
 bringent.. häst du ainen sune so setz den nit zû ainem In-
 nemer vnd vsgeber dins gûtes. Aber du möchtest sprechen.
 35 Wenne das gelücke von ist vnd gebricht was ist dann nütze,
 die leer zeleben? höre was ich hier von sag. Ich hab ge-
 sehen toren vnderwegen lász die leere vnd zelest sich
 entschuldigen vnder dem gelücke. Aber doch wer die leere

haltet! wirdt selten schuldigen das gelücke.. Der treg mensch
 wartet jm zû hilff komen werden von dem der in diser welt
 gebotten hât zewachen.. Darumb so wachh du vnd erwige
 gegen ain ander die lychtikait vszegeben vnd die lichtikait
 5 zegewinnen.. Es nächet das alter. Ich râte dir daz du din
 sele, ee vnd lieber entpfelhest gotte, dann dinem sune. Du
 setzest din testamente? Ich rât daz du des ersten schaffest
 dine schuldner bezalt werden. Nit enpfilch dine sele denen
 die din person lieb habent Sunder so enpfilch sy denen die
 10 Ire aigen sele liebhabend sint.. Du solt din gescheffe vnd
 [103] testament tûn vor dinem siechtum.. Dann oft ain mensch
 wirdt knecht vnd aigen der kranckhait? Ain aigner mag aber
 nit testament setzen. darumb so wöllest frye din testament
 setzen vor vnd ee du werdest aigen.. So der vatter gestorben
 15 ist! sÿchent die kind taillung irs erbes. Sint sy edel! so ist
 weger ir schaidung von ain andern dann taillung der erb-
 schaft. dann sÿlich taillung Irs erbs, Ist ir schwere zerstörung.
 Sint sy aber arbaiter, so tügen sy was sy wöllen. Sint sy
 dann koufflüt, so ist sichrer ir taillung! vmb das nit ir ains
 20 vngelück von den andern werd geschulten vnd dem selben ver-
 wissen.. Aber die mûter die widerumb sÿchet vermechelt ze-
 werden! tût torlich. Aber vmb des willen daz sy ire sünd
 büsse vnd waine! so nimpt sy alt ainen Jungen man. Er
 nimpt aber nit sy! sunder ir gûte. so das vertân wirt, so
 25 trinckt sy mit Im den kelch des lydens, des sy begeret hât.
 darzû sy füre ir verdamplich alter.

[103^b] **D**Er durlüchtigen fürstin vnd fröwen fröw Margarethan, geborner hertzogin von Saphoye vnd grefin zû wirttemberg etc. miner gnedigosten fröwen! Enbütt Ich niclās von wyle der zyt Statschriber zû Esselingen min vnderthenig willig dienste zû uor. . Doctor felix hermelin! dem got wöll gnedig vnd barmhertzig sin! ist gewesen probst zû solotorn! senger zû zürich chorherre zû zofingen, beder rechten vnd der hailigen geschrift wol gelert! zytliches gûtes rych, vnd der kunste (als hernäch folgt) gytig vnd arm! vnd doch dero beder der miltest den ich ye hab erkannt. des gûtes darumb rych danne er stünd des benüdig vnd wolt nit arm leben vmb daz er rych sturbe. vnd der kunst darumb arm. danne wie vil er dero mit emssigem studieren lernt! so bedücht jnn doch allwegen des zelützel sin, vnd jm hier an gebrechen, vnd stünd wyter in steter begird vnd übung sölichs noch zeerfolgen. aber darumb der miltest! vnd des ersten sins gûtes halb. danne er teglichs allen armen menschen sin hus sÿchend! das armÿsen vsztaillet, gelych ainer teglichen spende. vnd āne das so was ouch sin tische stetz gezieret mit erbern gesten! die jm dann vnberÿft selbs komend lieber wāren dann berÿffet. welche er dann ouch nit allain mit gnÿgklichem essen vnd trincken! sunder ouch mit süssen hÿpschen schwencken reden historien Caronicken argumenten vnd anderm yetz schimpflich dann ernstlich (wie gelegenhait der gesten das erfordert) also spyset vnd fÿret! daz niemant Inn ainist hörende! nit müste zû Im günstigen willen enpfächen, Vnd begird hān Inn mer vnd [104] oft zehören! Item vnd fÿro darumb der miltest siner kunste. Dann so bald er die siben zyte (die wir nennent horas canonicas) In dem stift zû zürich mit singen vnd lesen (Dar zû er dann allwegen der erst, vnd darvon der hinderst vnd letzte was)

mit andäch volbrächt hatt! So gab er die vbergen zyte lesung
 vnd übung der geschrifte! aintweders (als vorgemelt wirt)
 etwas studierend, oder etwas samelnd vnd schribende! das
 vsgegeben andern lüten nutz vnd fruchtbringen möcht. So
 5 oft ain arm mensche zü Im kam räts begerende! den räte
 tailt er Im getrülich mit! Vnd machet dem ouch ge-
 schrift brief vnd anders, zü der notdurft gehörig vnd begert
 des kainen solde noch lone anders danne etwenn von ain
 geburen, dryer oder vierer pfennig wert hanfsamens sinen
 10 fögeln dero er stetz vber Jär ain grosse zal in siner liberye
 singend, Vnd vnderwylen da selbs Jung ziehend fliegen hatt!
 So tett er ouch sine bücher, dero ich ob dritthalb hundert
 gezellet hab, niemant erberm durch lernens willen die ent-
 lechnende, versagen. Gesanges gemeldes vnd aller künsten
 15 hüpskait vnd äfentüren ist er gewesen ain grosser liebhaber,
 vnd wolt ouch des yetklichs selbs etwas können als vil er
 des mocht begryffen! also daz ich nit waisz yetz ainchen
 menschen vnser landen Im in disen tugenden allen samenthaf-
 tig zeglychen. Diser man (gnedigoste fröwe) hät gemacht
 20 (als obgemelt wirt) vil loblicher kurtzer bücher vnd Tractäten!
 namlich ains von den lolharten vnd begynen vnd von denen
 die mit starcken muglichen lyben das armüsen nement. Item
 ains von dem gotzdienste in der kirchen gottes zevolbringen
 [104^b] Item ains von boshait der richtern. Ains von handlung
 25 kouffens vnd verkouffens vnd aber ain von dem Jubel Järe
 vnd von ablasz der sünden. Ouch ains von den warmen bedern
 Vnd zü letscht ains von dem adel. Von dem selben mir sicherer
 ist zegedencken, danne darvon vil zescriben. Mit disen sinen
 schriften er sinen namen, vnder den gelerten vnd latinischen
 30 menschen, der ewigkait geben hät also daz er tott lebet vnd
 sin niemer mer wirdt vergessen. Wyle Er aber mir zü zyten
 do jch zü zürich schülmaister was vnd ouch sidher mer gütes
 getän hät! dann mir näch vatter vnd müter, Von ainchem
 menschen ye beschechen syg! des Ich dann Im töten gern
 35 danckbar sin wölt. So hab ich sin erstes büchlin von den
 starcken wolmugenden bettlern getütschet vmb das sines na-
 mens vnder den layen vnd tütschen ouch siner lobrychen
 wercken nit minder dann vnder den latinischen werd vergessen

welches büchlin also getütschet Ich üwern fürstlichen gnäden hier mit schick, als miner gnedigosten fröwen zwayer vrsachen halb. Des ersten vmb daz üwer genädrych miltikait, mit vsgebung des armüsens, wie wo vnd wem, sich dester bas wisz
 5 näch gebür zehalten. Zum andern vmb daz. Ob ich mercken vnd versteen wurd! üwern gnäden disz mans gedicht gefellig sin vnd in üch nutz vnd frucht bringen werden daz ich dann hienäch des von üwern gnäden vnderichtet! andere sine werck (ob Ich die wyter tütschen wurd! ouch dester fürderlicher
 10 wiste zeschicken! den selben üwern gnäden darin mich vnder- tenig tün enpfelhen. Geben vf santt Cünrats tage, näch cristus gebürt tusent vierhundert vnd Im vier vnd sechzigosten Järe.

[105] **D**Em hochwirdigen in got vatter vnd herren herrn
 15 hainrichen von gotes vnd des bapstlichen stüles gnäden bischoffen zü constentz sinem gnedigen herren! tüt, felix hemerlin Senger des Stifts zü zürich sich flyssig enpfelhen. wyle die sorg des angenommenen regiments! emssiget den hirten. daz er der nutzbarkeit siner vndertänen (vnd besunder in den dingen,
 20 da durch der selan haile zü hilff komen wirt) schaffet geflissenlich fürsechen ze werden! vnd die Irrenden füret in den wege der wärhait. Als der appostel spricht. j. cor. ix. Ich bin worden allen menschen näch allen sitten, vmb daz ich sy all tü behalten. vnd sich ouch nit gebürret mit blintzenden
 25 ougen sich gefellig zemachen den wolffen, wider die scharen der schaffen vnd daz Inn wendig gemüt zebinden den irdischen kerchern. Darumb so wölle üwer vätterlich hochwirdigkait wissen vnd mercken! daz nu ain man gewesen ist in vnserm lande! weder mit namen noch mit wercken Job. ouch nit
 30 schlecht emssig gerecht gotzförchtig noch fliechend von den sünden, als man liset von dem selben Job In principio Vnd als ir jnn werden bekennen in sinen früchten Mathei septimo. Vnd hatt ain kutten vnd dar vnder ain kappen vnd schapper. Vt in cle. j. de statu Mo. Vnd ainen rocke bis vf die füz. Vt genesis. xxxvij. Vnd das was sin claid des er sich gebrucht vnd die schnür da mit er sich all wegen gurt. ps. c. viij. Er was ouch röt vnd ainer hüpschen angesicht vnd ains zierlichen
 35 schönen antlitz. j. regum. xvj. Vnd als ain [105^b] starcker

vnd gefülter von wine psalmo. lxxvij. gefüret gefaisset vnd
 gewytert. Deutro. xxxij. Mit grossen erhepten Bagken ainen
 roten mund habende. xxxv. di. ecc. princeps. Vnd starck als
 ain rise zelouffen sinen wege. psm. xvij. Vnd wenig grawes
 5 häres in sinem bart tragende, als man liset von santt Bartho-
 lomeo vnd batt, daz man Im geb das armüsen. act. iij. Vnd
 führt ainen esel wol geladen mit brotte vnd ain lägel wines. j.
 regum. xvj. Vnd dwyle ain yeder darfür gehalten wirt als er
 geet beklaidet Desen. ex. in audiam er. e. ti. c. iudex laycus.
 10 Do vermarckt jch jnn bald sin ainen beghart oder lollhart
 vnd darumb so redt Ich zû dem selben mir also begegnende
 in disen worten. Du altbarrender in sünden vnd böser
 tagen. Vt dann. xij. Werlich du bist ainer vsz denen. Mt.
 xxj. main ich, vsser dem schützlichen vnmenschlichen state,
 15 etlicher böser lüten die beghart genennet werden, vnd die in
 vnsern tütschen landen verdamplich vmb füllung irs buchs
 vnd böser wercken vf erstanden sint. Vt in. cle. ad nostrum
 de. here. Vnd darzû, So nüssest du nit die arbeit diner hen-
 den vnd darumb so bist du nit selig, vnd wirt dir ouch niemer
 20 wol. Nach der sage des propheten psm. j. xxxvij. Vnd darzû so
 bedenckst du nit das, so geschriben steet. In. l. j. li. xj. c. de
 vali. mendi. Das ist daz den armen zegeben ist das armüsen
 die mit jren henden nit arbeiten mugen. Ist aber daz ain
 armer der da arbeiten mag sich Inmischet das armüsen ze-
 25 nemen! So ist er zefachen vnd vsz siner fryghait sines libes
 in aigenschaft zebringen. Hec Ibi. Vnd in dem Canon. Qm.
 xxj. q. j. Wirt geschriben, daz die allain [106] sölle nemen
 die spyse der armen die da nit mugen arbeiten noch wercken.
 Darumbe so Is vnd nüsse din brot in dem schwaisz dines
 30 antlitz als gesprochen ist vnserm vatter Ade dem aller edel-
 sten, den got mit sinen henden hatt gemacht. Vt genn. 3.
 di. in capite. Vnd du grob gemachter vsser dem aller vn-
 wissendosten geschlechte der geburen vnd vsser dem schnödi-
 sten gehüse der hütten, wöllest nit würcken wider die gebott
 35 vnser gottes. Deutro. xv. Da geschriben steet. Gantz wirt
 vnder vch nit sin aincher armer betler. Vnd der betler wirt
 vszgeschlossen! also daz er nit syg ain sämme des gerechten.
 psm. xxxvj. Vnd in der hailigen geschrift wirt bettlen ver-

merckt vnd vsgelegt in ain räche der bösen. ps. x. Vnd
steet, Ire kind werden gestössen vsser Iren hüsern vnd zwy-
felnde, hin weg geschickt den bettel sùchende, vnd Exeo. xx.
Steet! du solt nit begeren des gùts dines nebent menschen.
5 Aber zenemen das, So allain denen zegeben ist die wärlich
arm sint! als den krancken, das vbertrift wüterye alles rou-
bens. xij. q. ij. amico. et. c. Si illi. j. ij. clericos. Aber wyle
du aigens willens vnd nit genött bettelst, Vnd wol arbaiten
möchtest! darumb so vbertrifst du an laster ander röber vnd
10 diebe. vnd wirst geglychet ainem vfbrecher der kirchen, Als
da selbs steet vnd prosper In. li. xx. de vita contemplativa.
spricht wer sich mag mit sinen henden hinbringen vnd neren!
der sol nit nemen das! so den armen zùgehörig ist! Vnd In
der collect Patrum wirt gesprochen. Wissz dir hier von komen
15 vnd entsteen werden grosse straffe so du gefüret wirdest mit
dem armüsen, das allain*[106^b] den krancken ist zegeben, Vnd
noch vil mer wiste ich bede der nüwen vnd der alten ee.
Vnd ander der hailigen vnd vättern sprüche dir fürzeheben
die ich von kürtze wegen vil vermyden. Aber vber das vorig
20 alles, Vmb das du böses zù bösem vfhuffest! So traist du ain
gugel vnd schapper, die da sint zaichen vnd klaider ains wären
vnd bewerten ordens Vt in cle. ne. Ju. agro. de. sta. mo. Vnd
darzù ob du wol werest von der dritten regel der mindern
brüdern, So gebürte sich dir noch dann sölichs nit zetragen,
25 Angesehen daz die selben nit gaistlich sint noch von aincher
gaistlichkait die bewert oder bestetigot syge! sidmāls sy sich
in dem sacramente der ee mugen vermecheln. Vt. de vo. c.
vnico. lib. vj. Vnd sölicher Ir stāte ouch wärlich zereden nit
weder ain gaistlicher stande noch regel genempt werden mag,
30 Sunder allain ain māsse zeleben oder ain brüderschaft, Vnd
sint sölich brüder layen. Vt legitur In cle. pen. de sen. ex.
Vnd darvmb so sint die dem weltlichen gerichte der layen
vnderwürffig vnd dar In gehörig. So wolt ouch santt Fran-
ciscus, do er die māszz zeleben von der dritten regel (als sy
35 die nennent) vfsatzt, die selben nit münch sin. So hāt ouch
babst nicolaus in der bestetigung der dritten regel Inen nit
geben noch erloubt, kutten gugel noch schapper noch wöllen
oder Inen vfgesetzt daz sy mit gesundem lybe betteln sölle.

Sünder haisset er sy arbeiten vnd würcken. Als das offenbar ist, Durch des selben babsts Niclasen Bulle vnd durch sin satzung derselben brüderschaft die Ich deshalb gesehen hab. Aber [107] dwyle du ain habitt vnd beklaidung ainer nüwen
 5 relyon vnd gaistlichkait von dir selbs mit frefenlicher türstikait an dich genomen häst? so bist du mit derselben getäte gefallen in den bane. Vt de. reli. do. c. j. li. vj. Der da ist die gröst pene der welte. Vnd besunder in denen die denselben bane verachtend als dann du tüst. xxiiij. q. ij. corripiat
 10 vnd darumb so bist du zeberouben der gemeinsame de gelöbigen cristenlichen lüten. Vt de. sen. ex. c. ij.

Zürnent. doch also daz ir nit schlachent? Du bist erschrockenlich vnd wer mag dir widersteen? ps. lxxviiij. Schlach die berg so werden sy richen Ibidem. ps. c. xliij. vnd wissz
 15 daz Ich mit denen die den fride hassent niemer friedsam wirdt Contra prophetam. ps. c. xix. Ist nit geschriben daz du den altern nit solt straffen sunder bitten als ainen vatter. j. ad thi. iiij. Vnd die gesatz tût schamrötig machen die sün die da sträffent vnd kestigent Ire vätter. in auc. de nupcys. §.
 20 Si vero. Vnd die eere der alten ist ir gräwe. lxxxiiij. di. porro. Vnd gegen dem gräwen häre stand vf vnd tû eren sin person. leuit. xix. Vnd schray mit grosser stimme sprechende. jch bin nit ain lollhart noch beghart so hab ich ouch kainen nüwen habit noch beklaidung der gaistlichkait an mich ge-
 25 nomen, Sunder bin Ich ainer von den Anachoryten näch folgende helyam von denen Ysidorus schribt. vij. ethicorum. c. xvj. Ich hab kainen künge als die höwschrecken. prouerbio. xxx. Vnd wer hät dich gemachet zû ainem [107^b] fürsten vber vns. Exo. ij. Aber daz ich gesund vnd starck das armüsen
 30 nüssz, das mag ich wol tûn Dann got hät mich das von miner Jugend vf gelert. Vnd bisz yetz verkünd ich sine wunder vnd bis in min alter wirt mich got nit verlassen. psm. lxx. Vnd ist daz du mich darumb vrtailst vnd verdampnest? So sag ich dir, daz du nit got fürchtest vnd doch mit mir bist in
 35 der selben verdampnung. luc. xxiiij. Darumb so lyd vnd trag die gesatz die du selbs häst gemachet. De consti. cum omnes. Dann es ist lasterlich spricht Catho dem lerer, So sin aigen

werck vnd schuld, widerhilt siner lere. darumb vrtaile der
 ains andern Irrung, der in jm selbs nützit hab das er straffen
 mug. 3. q. vij. Judices Danne welches menschen leben ge-
 schulten wirt, desselben lere wird ouch verachtet vnd ver-
 5 schmächet. 3. q. vij. §. pone in fine. Es sol ouch kainer
 machen noch vflegen satzungen andern lüten, die er selbs ver-
 sumpt zehalten. De preben. pro illorum. Vnd der, der ainen
 wisböme trait in sinen ougen? wirt bezügt, daz er nit muge
 ain ageln nemen vsser dem ouge sins brüders. luc. vj. Dann
 10 in welchem dinge du ainen andern richtest, In dem tust dich
 selbs verdampnen. xxij. q. vj. c. j. Vnd darumb so wöllest nit
 wider reeden das, so du schuldig bist zebeschrmen. De nac.
 ex. li. ven. c. j. Vnd geschriben ist wöllent nit richten so
 werdent ir nit gericht. xxij. q. j. §. j. ij. q. j. deus. Aber daz
 15 du starck syest vnd nit niessest die arbeit diner henden, sun-
 der dinen rugken kerest von den burden glych als Ich, Ist
 kund vnd offen. Aber daz du ouch das armüsen essest vnd
 bruchest, wil Ich dich [108] bewysen durch geschribne recht
 vnd durch vernunft vberflüssenklich. Sag? wirt nit geschriben?
 20 . xxij. q. vij. quot autem Das die güter der kirchen, syen der
 armen? Vnd des gelychen ouch die güter der priestern. Vt
 . xxij. q. viij. conuenior. Vnd daz die den armen syen mitze-
 taillen? Vt xlvij. di. sicut hy et. xxj. q. ij. c. ij. Item zum
 andern, So mag ain yetklicher in hingebung sins gütes setzen
 25 vnd machen ain satzung näch sinem willen. Ob er Joch sölich
 güte wol hin gibt der kirchen. Vt de. condi. app. verum. xvij.
 q. ij. Cleuterius Ja in hingebung sins gütes, mag er Joch setzen
 vnd machen ain geding näch sinem gefallen so ferre das in den
 rechten nit ist verboten. Vt. l. Intraductionibus. ff. de. part.
 30 et C. de contrahen. emp. l. 3. nisi. Vnd also hät ain stiefter
 ainer ewigen messe vnd pfründe gewölt, sin güte geben in
 ain armüsen, Also daz das ain armüsen syg vnd blybe? vnd
 ist disz nit wider sie satzung der rechten vnd beschicht söli-
 cher mäsz lichtenklich daz ain ding widerumb kert in sin
 35 nature. ff. de pactis. l. sumus Vnd der wille wirt belönt vnd
 nit das weeck, vnd der selb wille machet ouch das wercke
 lones wert. De. pe. di. j. voluntas. Vnd allain die gestalt
 vnd form des willens bekent das werck. ff. de fur. qui iniurie

circa prin. xxxij. q. v. ti. j. et. c. corpus Vnd Ja aber. So ist
der wille anzesechen vnd nit der vsz gange. ff. de homi. in
lege et. l. dyuus. Were nit disz ain endrung des gewalts
gottes. ps. lxxvj. daz du von dinen gülden vnd früchten an-
5 ders machen wöllest, dann ain armosen! Es were dann daz
sölich rent vnd frucht diner pfründ gesetzt vnd gestellet weren
vf wücher. [108^b] als Ich dir her näch sagen wirt, vnd dar
vmb so spricht sanct gregorius In ainer collecte Deus cuius
misericordie non est numerus. O. herre got des barmhertzi-
10 kait kain zale ist! Erhöre vnser demütigs gebette, vnd tû
den selan die vns In vnser gebette enpfolhen worden sint vnd
dero armûsen wir niessen! ablassen Ire sünde vnd pine etc.
welche collecte sanct gregorius dich haisset lesen für die
toten, da durch du dich erzögest sin ain armûsner. Wârlich
15 zwüschen dir vnd mir ist kain vnderschaid Dann allain, daz
man dir den sack haim nach tragt in din huse vnd aber ich
mit dem sacke louffen mûs durch die statt von hus zû huse.
Wârlich die harpf concordieret vnd hielt vbel mit der pfaltery.
De cleri. coniug. diuersis fallacys. Vnd vmb sust tût der an-
20 rüffen die gesatz des rechten, der selbs sich In der selben
satzung verwürcket. De vsuris quis frustra. Aber was aincher
nit lieb hât tût er lichtenklich verschmächen. ij. q. 3. presens.
Nim wâr. Du hâst mir mine tag gemessen, vnd min wesen
ist vor dir als nicht. ps. xxxvij. Gang hin vnd wöllest füro
25 nit mer sünden vmb daz dir nit wirser geschech. Job. viij.
Danne wenne ich mit betteln ützt verschulte, so tett ain ge-
lych sünd vnd arg getât vns bed vermassgen, vnd ain gelyche
pen vnd strâffe vns bed büssen. xv. q. 3. Sane. Vnd darumb
so sagt prosper, wol reden vnd vbel leben ist nützit anders
30 danne sich selbs mit aigner stimme verdampnen vnd verurtailen.
Vnd darumb so betracht das kaiserlich rechte das da spricht,
daz vns menschlich gebürre, den dürftigen zefürsechen vnd Inen
hilff zetûn (als den armen [109] vsz dero zale Ich ainer bin)
daz sy an spys vnd fûrung nit gebrechen haben. Vt. C. de.
35 sacro. sanc. eccle. l. privilegia Vnd darumb hât der prophete
gesprochen selig ist der, der da vfsechen hât vber den dürfti-
gen vnd armen. In den vbeln tagen wirt Inn der herre er-
lösen. vber das alles hât ouch Cristus gesprochen. In welche

statt oder castelle ir geen werden daselbs frägent welcher
 wirdig syg, daz ist welcher ain güter wirt syg. Alda belybent
 bis ir abschaident Vnd in welches huse ir gangent, so sprechent
 frid syg disem huse, vnd essent von dem daz man vch fürleg
 5 vnd wer üch nit enpfäch vnd herberge noch üwer red höre?
 so gänd von dem huse hin vs, vnd von der statt vnd schlachent
 von üwern füssen den stoube. Mt. x. Vnd darumb so stee ab
 von zorn vnd lasz din grimikait vnd wöllest nit nyden vmb
 daz du nit boszhait tügest. ps. xxxvj. Danne du handelst,
 10 vnd redst vsz ytel gyttikait, Die alles bösen ist ain wurte,
 De. pen. di. ij. Radix .xj. di. bonorum. Vnd allwegen nüw
 kriege begeren tüt. Vt in prohemo decre. Dann man spricht
 das ain hafner hasse den andern von glyches gewins wegen.
 Danne man sicht vnder üch chorherrn der stiften? daz
 15 als vil die rent vnd gült üwer pfründen vnder minder per-
 sonen getailt werden, So vil werden grösser die tail üwer
 yedem gehörig. Vt de consti. cum. M. de concessi. preben.
 c. ulti. l. vj. Vnd also beschech ouch daz das armüsen das
 mir versagt wurd dir wüchs vnd zü nem. Vnd woltest hier
 20 mit rycher werden mit vnrecht vnd mit minem schaden wider
 die regel des rechten. l. vj. Nim wär all dine reden mangelnt
 rechter vernunft vnd grundes vnd darumb so sint sy vszerüten
 [109^b] vnd zeverwerfen. lxxvij. di corripi. Aber mine reden
 sint natürlich vernunft vnd deshalb so machent sy ain recht.
 25 ff. de bo. damp. cum rom. Vnd darumb so wart vnd bait des
 herren vnd behüt sinen wege, so wirt er dich erhöchen daz
 du zü erbe nimpst das ertrich, Vnd so die sündler verderbent
 so wirst du das sechen. Vt ps. xxxvj.

Gib antwort ainem toren näch siner torhait vmb daz er
 30 sich nit wys sin beduncken werd, spricht salomon. Prouer-
 biorum. xxvj. Vnd daz du nit mer verstandest dann notdürf-
 tig syg. De renun. c. j. li. vj. Das hab ich gewist, dann du
 bist grob vnd hert vnd ist din geäder ain ysiner waltenwachs
 Vnd din stirn erin. Ysa. xlviij. Vnd wyle du nit zü allen
 35 minen reden geantwort sunder etlich vnderwegen gelassen häst
 vnd deshalb darIn geholen vnd dero bekennt vnd vergehen
 Vt in. c. nonne de presump. So sag ich noch dann nützit

dester minder als du in dem anfangе diner antwort jm grund
 vermainst, dich nit sin ainen begharten, sunder ainen anacho-
 riten nächfolgende helyam den propheten, kainen küng zeha-
 ben als die höwschrecken etc. das sölichs nit ist, Vnd daz
 5 das offen klerlich erschynet. Vnd darumb so wirt Ich nit
 genött das wyter zeuerantworten vnd vszerüten. Aber Ich
 vermerck! Möchtest du ettwas vnzümlichs zû dinem verant-
 worten fürheben, da mit du entschuldigotest die schuld diner
 sünden. Vt. ps. [110] c. . xl. De consue. quarto. xvj. q. j.
 10 predicator de exces. prela. inter dilectos. Daz doch kain ent-
 schuldigung ist, als hernäch gesagt wirt! du staltest nit abe
 zegloryeren vnd dich zefröwen vnd zerümen in diner boszhait.
 Aber wyle du geantwort häst daz der belestiget mit sünden,
 ainen andern nit mug straffen oder leren! Merck. o. Beg-
 15 hart. Waist du nit daz geschriben steet Vf dem stüle vnd
 sessel Moysi sint gesessen die gelerten der geschrifte vnd die
 gelychsner. Darumb was die gesagt haben das haltent vnd
 tünt. Aber näch Iren wercken wöllent nit tün. Mt. xxij. Et
 in cle. dudum de sepul. Vnd sagt der canon. lxxxij. di. §.
 20 uli. Wie wol die priester müssen vnd sollen bede ir aigen
 vnd fremder sünden ab vnd ledig sin! Ye doch ob sy sich
 anders hielten! so sint noch dann dar vmb die wort vnd lere
 irs predigens nit ze verachten. Vnd dar umb so sag Ich dir!
 Ob got der herre allain geb mit grosser tugend sin wort göt-
 25 licher jnsprechung den predigern. Vt. ps. lxvij. Die da
 werent ains rechten fromen hertzen! Welcher vnder vns äne
 sünd, wurff des ersten sinen stain? Vt. xvij. Ja als dann
 were die predige des herren kostlich. Als in den tagen Sa-
 muelis vnd hely des priesters. j. R. 3. Vnd ob du dar von
 30 klerlicher wissen wilt so besiche die omelye des priesters bede
 vber das Ewangely Estote Misericordes. luc. vj. . Wie aber
 dem. So wöllest von der andern diner worten wegen, Die da
 raichent in verlümdung der priestern mit flysse vfmercken!
 Daz ich dir gesteen daz die gütter der priestern vnd der
 35 kirchen sint der armen, durch geschribne recht [110^b] von
 dir fürgehalten! Doch mit vnderschaide vnd messigung als
 her näch folgt. Vnd Ich sag dir Beghart! daz sy darumb
 der armen haissent, daz sy zû notdürftigen zyten den selben

armen zemittailen sint! Aber nit zeaignen. Vt de preben. c. . iij. de dona. c. ij. Vnd die güter der kirchen die werdent also genempt vnd gehaissen sin der kirchen, daz die kirch hab dero herschung vnd oberkait. Vt. xxv. q. 3. inter Oder
 5 als sagt Johannes andree. Post gar. Vnd johannes mo. m. c. ij. de re. ecc. non alie. li. vj^o daz die kirch daz ist die samlung vnd gemeinsame der gelöbigen dero Cristus ain houpt ist hab dero herschung vnd oberkait, vnd syen doch der armen zû narlicher vfenthaltung vnd der priestern zû Innhab-
 10 licher besitzung die vszetailen. Aber doch sint söliche der kircher güter nit also der armen, daz Inen darumb gebür spruch vnd anforderung rechtlich in gericht zehaben wider die priesterschaft wie ryck Joch die syg. Vt ar. xlvij. di. sicut et ibidem in glo. ultima. Vnd also wirt es gehalten. Dann
 15 sust weren stetz alle gericht vol armer lüten, Die teglichs zû sprechent den priestern vmb spys vnd narung. Aber zû dem als du sprichst daz ainer in hingebung sins gûtes mug setzen vnd machen ain ding vnd satzung etc., sag ich dir lohhart durch die glose. xj. q. j. c. ij. daz das wär ist, doch also, daz
 20 sölich satzung vnd geding nit syen wider das recht noch wider erberkait. Dann ob ain stifter oder hingeber sprech zû aim priester Ich gib dir besitzung dises mines gûtes vnd siner fruchten [111] zû ainer pfründe vnd gotz gaube vmb daz du teglichs messz habest in verfluchung des folckes. Disz geding
 25 vnd dise satzung hetten nit bestands, die wyle die messz angesehen vnd vf gesetzt worden ist zû haile des folckes Item man sprech ich gibe dir disz gût vnd sin frucht in besitzung also daz sy syen ain armûsen vnd daz du alle tage mesz habest vigili. lesest oder den psalter bettest vmb hails willen der
 30 selen miner fordern etc. Disz ist wider vernunft wider rechte beschaidung vnd wider vfsatzung des armûsens vnd wider desselben armûsens diffinitz vnd wære vszlegung danne die armûsen söllent geben werden den notdürftigen later durch gottes willen. Aber messz haben vnd so vil teglichs lesen ist
 35 für wär ain arbeit Vnd ist ain priester nit schuldig noch pflichtig vmb sust sölichs zetünd noch mit sinem aigen gût vnd solde Priesterlich ritterschaft zetryben. j. ad cor. q. de. prescrip. cum ex officy. Aber disz hab ich mût durch das so

her näch folget dir föllenklicher ze erkleren vnd zebewysen.
 Danne du Beghart nit allain, Sunder ouch vil ander der prie-
 sterschaft vinde, Sint gewon zesprechen! daz die rent vnd
 gült der kirchen syen armûsen. Da merck. Wie wol der
 5 kirchen gûte als die zechent die offer, die geistlichen rent
 vnd gülte, ouch die pfründen vnd der selben gelegne güter,
 dar von dann die priester vnd mûnch (die da nit sint bettel-
 ordens) gespysset vnd vf enthalten werden, sint gauben vsz
 gehaisz oder andechtigen willen der gelöbigen cristenlichen
 10 menschen gegeben. sint ouch löne bezalung vnd abweschung
 der sünden, ouch sint vätterlich erbe der armen menschen
 [111^b] vnd gegeben gülte der bedürffenden selan! noch dann,
 so man hier von aigenlichen reden sol so mugent söliche gü-
 ter darumb nit genennet werden armûsen, oder daz sölich
 15 personen vom bettel oder armûsen leben tügen. Vt no. aug.
 j. li. de ope. mo. Dann sy sint söld vnd löne der arbeit vnd
 burdin Dar zû die priester vnd mûnch durch macht vnd ober-
 kait der kirchen werden erwellet vnd geben. Als der appostel
 spricht wer dem altâr dienet der sol von dem altäre leben.
 20 Vnd wer zû der burde wirt erwellet, der sol von dem lone
 nit werden verschalten. De preben. cum secundum et. xiiij.
 qj. c. v. de sepul. c. j. Vnd also ist der priester nit ange-
 sehen zû arbeit der henden sunder zû dem dienste gottes.
 Aber anders ist es vmb dich lolhardem. vt de hoc per beatum
 25 tho. contra. gen. li. 3. c. j. ij. et iij. et quatuor sequentibus ca-
 pitulis. Item aber merck begharde zum andern das armûsen
 ist nit zegeben den miszbruchenden. De rerum permu. iniu-
 stum. xiiij. q. Si res cum concor. aber die zechend vnd offer
 werden geben den priestern als ain schulde die man Inen
 30 schuldig ist. welich priester sölichs etwenne miszbruchent als
 man dann yetz oft sicht das beschehen in vil priestern. Vt
 in. c. tua de deci. Vnd darumb so sint die zechend vnd offer
 nit armûsen. Item aber zum andern so spricht Sanct Thoman
 vor gemelt. li. iij. di. xv. et q. j. Armûsen ist ain werck in
 35 dem geben wirt etwas den notdürftigen vsz mitlyden vnd er-
 bermde durch gottes willen. Aber die frucht vnd gülte vnser
 pfründen sint nit ain sölichs Vnnd darumbe so sint sy ouch
 nit armûsen. der erst taile dises argumentz [112] daz das

armüsen ain sölichs werck syge als Ich yetz gesagt han! ist
 gewissz vnd vnlougenbar durch Sanct Thoman obgeschriben.
 Aber der nächgend taile, daz vnser frucht vnd gülte nit ain
 sölichs syen! das bewyse ich dir also. Danne die frucht vnser
 5 pfründen sint söld vnd darumb nit armüsen, dann söld vnd
 armüsen sint ainandern widerwertig vnd vngelych sament hel-
 lende Als hernäch bas geoffnet wirt. Daz aber die frucht vn-
 ser pfründen söld syent der gaistlichen vnd nit armüsen? daz
 ist offen vnd kuntbar durch geschribne recht än zale. Vt de
 10 cle. non resi. qua non nulli, j. q. j. clericos et. c. vlti. de con.
 di. vlti. In omnibus vj. q. j. c. vlti. xij. q. ij. caritatem. lxxxj.
 di. c. j. lxxxiiij. di. diaconi sunt. j. q. 3. §. j. de preben.
 dilecta de poscu. c. j. vij. q. j. quia fr., ff. de re Judi. l.
 comod. cum concor. Vnd sölich söld werdent geben vmb re-
 15 gierung vnd singens vnd lesens willen der kirchen vnd der
 pfründen Als man das hät in vil rechten yetz gemelt vnd
 darumb so wirt gesprochen. In. c. vlti. de re. p. li. vj^o die
 pfründ wirt geben vmb das ampte Als ob man sprech die
 frucht vnd gült der pfründen werden geben vmb versehens
 20 vnd dienstes willen der selben pfründen vnd vmb solds willen
 tünt die priester in der kirchen dienen. Vt de preben. cum
 secundum Et. c. exstirpande et. c. dilectus. Vnd die pfründen
 der kirchen sint vsgeben vmb götlich ampt vnd dienste. xij.
 q. ij. concessio. xvj. q. j. generaliter. Et. j. q. ij. ciprianus et.
 25 c. vlti. Vnnd darvmb alle die wyle ain priester von sinem
 ampte wirt suspendieret vnnd vfgehalten, So ist er [112^b] ouch
 näch ordenlicher satzung suspendiert vnd vfgehalten von siner
 pfründe vnd den fürchten der selben pfründe. Vt. di. xvij. eos
 et. c. Si quis sacerdotum xxij. di. preter Vnd durch die ämp-
 30 ter vnd dienste sollen die priester verdienen die frucht jrer
 pfründen. Vt de. cle. non resi. conquerente. Vnd werden
 gesagt ritterschaft tryben in der kirchen gottes. Vt de. cle.
 egro. c. j. Ja vnd werden darumb gehaissen vnd genennet
 ritter der himelschen ritterschaft. De penis de gradacio li.
 35 vj^o. Vnd zû sölicher ritterschaft werden nit vsgenomen die
 da geschickt vnd tügig sint zû dem betteln oder armüsen!
 Als die blinden vnd lamen vnd ander desgelychen, Sunder
 allain die gesunden vnd die so vngebrenchhaftig sint Irer

yben. Vt de corpore viciatis per totum. Dann das latinisch
 wort Mendicus, Daz da zû tütsche haisset ain bettler, hât si-
 nen vrsprunge vnd wirt gezogen von dem kriechischen wort
 Mene daz da als vil gsprochen ist als ain gebrechhe. Vnd
 5 nâch dem als Ysiderus schribt. x. ethi. So haisset der Men-
 dicus der nit hât, Darvon er sin leben hinbringen mug, das
 da ist ain gebrechhe oder dar umb daz er vor zyten by den
 alten gewon was daz die bettler den mund beschlussent vnd
 die hend vsstrackten Nu haissent die hende zû latine Manus,
 10 So haisset Dicere zû latin, sprechen dar vmb Mendicus gehais-
 sen wirt ain bettler als ob er mit den henden redte vnd
 bette das armûsen. Disz alles verbieten die recht beschehen
 sollen in der priesterschaft. Danne kainer zû gelâssen wirt
 [113] zû der wyhe priesterlicher wirdigkait vnd zû sôlicher
 15 ritterschaft er hab dann vor daz er nit gebruchh hab damit
 er bettelns vnd das armûsen zefordern absyge. Als du her
 nâch bas sechen wirst. Sichst du nu lollharde wie wyt von
 ain andern ist, ritterschaft tryben vnd betteln gelycher wyse
 als rych sin vnd arm sin, welche zway ding ainandern gantz
 20 widerwertig sint. Oder sichst du wie wyte vnderscheiden ist
 sich gebruchen des soldes als die ritter vnd sich gebruchen
 des armûsens als die bettler. Item es ist ain vnderscheid
 sich soldes zegebruchen vnd ritterschaft zeûben mit dienen,
 oder zedienen mit ritterlicher übung vmb soldes willen in
 25 der kirchen gotes, welcher solde ouch vsz schulde geben wirt
 vnd mit notzwang gebrâcht von dem schuldner! ob er Joch
 wol vnwillig wer als das leret teglicher handel vnd übung
 vnd ôch gemerckt wirt. ff. de. v. sig. l. debitum Vnd sunder-
 lich gesechen in den zechenden. Vt de deci. tua. ij. de quo
 30 eciam archi. plene. e. ti. c. j. li. vj^o. Aber sich gebruchen
 des armûsens, daz da ordenlich nit vsz schulde geben wirt
 oder von ampts oder verdienens wegen sunder allain dem
 notdürftigen vsz mitlydung vnd erbermde durch gottes willen,
 sôlich armûsen ist ain ding das willenklich geben wirt vnd
 35 von niemant genötiget als das gesechen vnd gemercket ist vsz
 der diffinitz vnd wârer vszlegung des armûsens vnd vsz teg-
 licher praticck vnd übung. Zû dem so wirt ouch gesechen
 daz die frucht vnd gülte der pfründen teglichs geben wer-

den, den bischoffen vnd andern rychen prelaten die [113^b]
 doch des nit notdürftig sind, dar von zemercken ist, Daz sy
 nit nement oder enpfachent das armüsen vsz obgeschribner
 diffinitze vnd vszlegung. Aber doch so spricht Sanct Thomas,
 5 an dem end als ob steet, Ob wol sölich prelaten des armü-
 sens nit notdürftig sint! So wirt Inen doch das armüsen
 geben als dienern der armen vnd vszgebern des armüsens
 Vnd darumb das, daz Inen in ain armüsen geben wirt! Wirt
 durch sy gesant geben vnd geschickt den armen. Hec Ille.
 10 Vnd also vnd glycher wyse wirt ouch geben das armüsen den
 maistern den pflegern den vögten vnd schafnern der spitälen
 vnd herbergen der armen. Wyle von gelychen dingen ain
 gelyche vrtail ist. De transa. Inter corporalia. Vnd sölich
 prelaten denen sölich armüsen geben wirt vnd enpfolhen vsz-
 15 zegeben werden dar vmb gehaissen armüsner vnd mag ouch
 wärlich nit gesprochen werden, Daz sy niessent des armüsen,
 Sunder niessent sy Iren solde vnd das ist kain wunder. Danne
 nim wär lollharde Mag nit ain pfennig der allwegen der selb
 pfennig belybet! In hande ains menschen sin ain armüsen
 20 der bald dar näch gelegt in ain hande ains andern menschen
 kain armüsen ist. Des syg ain exempel von dem dienstbaren
 husgesind ains spitäles. Werden nit in die hande ains spitäls
 maisters armüsen geben? Vnd also ist ain pfennig In der
 hande desselben spitälmaisters ain armüsen Vnd bald darnäch
 25 so der selb pfennig geben wirt In die hande ains husdieners
 oder ains arbiters der dem selben spitale arbeitet! So ist er
 kain armüsen. [114] Gelycher wyse mugen wir sprechen von
 den wüchern, dero gelt gantz ain wücher ist, Aber wenne das
 geben wirt in hande ains der Im in sinem wingarten gearbeitet
 30 hât! So ist es kain wücher, vnd der arbaiter ist ouch nit
 schuldig daz zebekeren als der wüchrer. Also ist es ouch
 vmb ainen verpfrünten priester. Danne ob wol ettlicher
 mensche ain pfründ stiftte in das ende daz ain priester yemer
 ewenklich teglich oder zû vberhupften namlichen tagen messz
 35 haben sölt, vnd mit sölichem willen vnd fürsätze sin gût dar an
 geb, daz das ain armüsen sin sölt, Vnd also hier vber brief
 vnd Instrumente schriben liesz! noch dann so bald sölich
 hingebung beschechen vnd in hande des priesters komen ist

als dann ist es ain sold vmb sin arbeit. Die wyle niemant schuldig noch pflichtig ist ritterschafft zetriben von sinem aigen gûte vnnnd solde als vor gesagt worden ist. Aber doch begharde so høre vnd merck ain wårhait, Nâch sag vnd lere
5 miner lerern vnnnd maistern die also steet. Ain wille ains menschen der da hin gibt vnd ain pfründe stiftet! syg wie er wöll so ist doch sölich gaube weder in hand des gebers noch in hande des nemers ain armûsen als dann ob gesagt worden ist von dem geber. Dwyle der wille nit allwegen das werck
10 machet, Wie der wûrcker vermainet Vt. j. q. j. non est, da der texte sagt. Ob wol yemant von vnrechtfertigem gûte als von roube oder tûbstale vermainete zemachen ain wercke des armûsens! so mag doch in warhait [114^b] des selben menschen wille so vil nit wûrcken danne daz das allwegen ain
15 roub oder dÛpstale ist vnd nit ain armûsen. Es möchten ouch noch vil ander bewysungen vmb vnderschaid der vorigen dingen fürbracht werden. Danne Es spricht archi. xxxij. di. Siquis vero. Armûsen wirt gehaissen ain aller wårist wercke der barmhertzigkait. Von welcher barmhertzigkait gesprochen
20 wirt. Erbarm dich diner sele vnd mach dich wolgefellig gotte. Ecc. xxx. de pe. di. 3. Qui wult. Aber sold wird gehaissen ain gûlt, die den rittern geben wirt. Also sagt das rechte Ag. §. Stipendium. ff. de. ver. si. Nim wår wie wyt von ain andern syen armûsen vnd ritterlicher solde. Nim war wie
25 adenlichen die gaistlichen vnd weltlichen rechte nennent die frucht vnd gûlte vnser pfründen. Dann sy sprechent vnd nennent die nit löne oder dienstgelt, So man den knechten vnd dienern gibt, Oder armûsen das man den armen gibt, Sunder ritterlichen sold vnd gûlte. Vt in Juribus prealligatis. Es hât
30 ouch Cristus gesprochen. Mt. v. Ist daz du opferst vor dem altâr din gaube etc. Welche gaub allain den priestern zû gehört, Als offen ist. Nu sint wyt vnderschaiden gaub vnd armûsen vnd. Mar. 3. Wirt desglychen gesprochen, daz das opfer so vf den altäre geben wirt syge ain gaube. Nim war
35 begharde. Ich lãssz nit vnderwegen zereden wider das, So du gesprochen hât von der collecte die man liset für die tóten, vnd sag hier zû! daz allain die, Die da niessent das armûsen schuldig sint die zesprechen als dann sint die brüder

der bettel örden oder sust arm vnselig priester. Dann mit
 [115] wärhait wirt der gehaissen vnselig der da bittelt als der
 canon spricht. lxxxiiij. di. diaconi vlti. der vnselig priester
 bittelt vf den gassen, gefangen mit dienstlichem wercke, Vnd
 5 fordert von yetklichem das offenbar armüsen! vnd wirt so vil
 mer verschmecht von allen menschen als vil er geschetzt wirt
 als arm vnd verlässen, billicher zû diser vneere komen sin.
 Vnd sint dise wort sancti Jeronimi Ad narbonem episcopum Vnd
 darumbe so tügen die selben vnd Ir gelychen die das armüsen
 10 niessent dise collecte lesen in dem namen gotes etc.

Darzû der beghart mit zorn der schlangen vnd schlichen-
 den vff dem ertrich geredt hât, sprechende. Menschlich oren
 vrtailent söliche wort wie sy vszwendig tönnent. xxij. q. v. hu-
 mane. Aber allain got erkennet die hertzen der menschen.
 15 act. j. Vnd die wort sint darumb vfgesetzt, Vmb daz ain
 yeder hie durch bring sin gedencke, in bekennung ains andern.
 Vmb daz die menschen sich nit betriegent. vt. xxij. q. ij. Institu-
 tum Dann wenne Ich den menschen gefiele so were jch nit
 ain diener Cristi. Ad gal. j. Vnd darumb so sag ich, daz
 20 din gezügnüssen sint worden vngelouplich, Danne Ich hab in
 Inen gesehen boszhait vnd daz ain red der andern wider-
 wertig ist, Vnd aller maist darumb, danne Ich in Inen allain
 finden mag ainen wänlichen schatten [115^b] gantz alles wären
 grunds mangelnde. Vt. xxxvij. di. vnio de consue. quanto de
 25 quo protestor. Vnd darumb so acht ich nit, dir zû miszfallen.
 Aber nützit dester minder sage mir warumbe ist (daz ich mich
 diner Worten gebruch) daz die sölde vnder den priestern so
 vngelych sint? also daz ir ainer ain grosse pfründ hât, ain
 anderer ain klaine vnd Ja ir etlicher vil grosser pfründen vnd
 30 ain anderer ain allerminste vnd die selben allaine. Oder et-
 licher kaine, vnd sy doch glychlich ainer als vil als der ander
 arbeitent mit sprechen singen vnd lesen Ire ämpter götliches
 dienstes Wie ist die erbschaft des herren getaillet? mit vnge-
 lycher mässe der vsgebung? Ist nit geschriben? de utro. j.
 35 daz rechtenklich richten syg ain ding gottes vnd folgt darnäch
 Es wirt nit sin ainch vnderschaide der personen, sunder hörren
 den grössen als den klainen vnd nime nit vf kains persone,

danne das gricht ist gottes vnd got ist kain vfnemer der personen. Actuum. x. leuit. viiiij. xxxij. q. 3. sicut de pe. di. iiij. nequaquam Vnd die vicarien vnd stathalter cristi, daz sint die prelaten, tünt vber sölichs so vnuernünftlich der kirchen 5 gûte vszgeben. Ja es sagt der text vnd die glose die genennet wird ordinaria. lxx. di. sanctorum daz von gemainem rechten niemant haben mag zwo kirchen oder zwo pfründen in aim bistûm, oder joch in aim andern vnd andern bistûm. Ist nit gote vngerecht? daz er vns so vngelychlich vsgeb behelffung 10 des lebens. Also daz du vberflüssig rych bist vnd gnûg hâst vnd die andern arme sint mangel vnd gebrechen habende Vt. xlvij. di. sicut hy etc.

[116] O Begharde. redt ich felix. Waist du nit? daz die reden vnd argumente verworffen vnd nit zû gelassen werden, die da vszwendig gelegt sint vnd nit zû den dingen dienen noch gehörent. veluti arma virum que cano. ff. de ver. obli. l. qui extrinsecus. Vnd dise zufallende materi durch dich vmb Irrung willen ingefürt vnd vf die ban gebracht wil, daz das ende vnd der anfang nit zûsamen hebent Aber vmb 20 des wilhen daz du nit sprechest, der strick ist zertretten vnd sint wir erlöset. ps. cxxiij. so wil ich hier zû kurtz antworten, ouch disz nit dahinden lassen vnd sage dir, ob wol die recht von dir gemeldet sölichs Inne haltent? daz noch dann nützit dester minder mit den hohen edeln vnd wol gelerten 25 personen, die mit grössern pfründen zeeren sint? so vernunft vnd vrsache erfordert vnd haischet das sy mer pfründen habent? durch den bebtlichen stûle wol mag dispensieret vnd Inen des erlobung geben werden. ut de. preben. de multa. Vnd füro sagt ouch Innocencius der aller fürnemist doctor der 30 rechten. in. c. dudum de elec. et c. cum Jam dudum de preben. daz (vsgenomen pfarkirchen vnd wirdikaiten (als dann sint bistûm, prelaturen, propstien, decanien, sengeryen vnd scolastrien der stiften) aincher wol haben mug vil pfründen in andern vnd andern kirchen, doch also daz söliche vile nit 35 zegrosz syg, vnd mug das sin von gemainen rechten dise mainung vnd oppinion haltet ouch johannes andree. in. c. gra. de rescrip. li vjº. doch so ferre, daz sölich pfründen von

satzung oder gewonhait wegen nit haischent vnd [116^b] for-
 dernt persönlich besitzung. Vnd spricht Innocencius nit sünde
 sin, vil sölicher pfründen zehaben. Von welcher materi, Ob
 du wilt volkomenlichen wissen vnd vnderwysset werden? lesen
 5 wöllest Johannem de lig. In suo tractatulo. de pluralitate
 beneficiorum quem posuit in cle. gracia de Re. p. Vnd cler-
 licher des fundamentz vnd grundes halb, besich Gwilhermum
 parisiensem. In Tractatulo suo consimili. Aber daz Ich ge-
 schwyge vnd vnderwegen lässz vil subtylkait argument vnd
 10 disputierung vnd äne das, Die geschichten vnd exempel Im
 rechten beschriben vnd durch ettlich maister vnd summisten
 vsgelegt? So tüt der welt praticck vnd übung ouch die mai-
 sterin aller dingen, die da ist erfahrung vnd Innenbringung?
 erzögen die wärhait. De elec. quam. sit. li. vj. Danne möch-
 15 ten wir nit von rechte vil pfründen haben so tett vns doch
 hier zü nöten vnd zwingen grosse notdurft, Welche notdurft
 kain gesatzt hät. D. con. di. ij. Sicut de consuetu. quarto, De
 pigno. significante, de. con. di. v. discipulos de furtis si quis pro
 necessitate. Danne es ist kuntlich vnd offen daz mer pfrün-
 20 den sint, Ja zechenfaltenklichen me? Dann syen tügiger ge-
 schickter priestern zü pfründen. Aber die pfründen yetz ge-
 stiftt vnd got dem herren ainist gegeben vnd gewyhet? Sint
 nit widerumb zebringen in menschlichen bruhe der layen. De
 re. In semel. li. vj. Was solt dann anders beschechen danne
 25 daz von notdurft wegen ain priester haben müst vil pfründen
 Ar. optimum. xxj. q. j. clerici in fi. Vnd so vnderwilen ainer
 ist edler oder [117] gelerter danne der ander? darumb so
 haben die selben sölich vile der pfründen Aber welcher clagend
 syg daz Im vnrecht beschech daz er kain pfründ hab oder
 30 ain klainen? der selb verwyse das Im selbs, daz er prister
 worden syg? Vmb ainer sölichen klainen pfründe willen vnd
 daz er nit belaib äne pfründ vnd sich gab in die arbeit sines
 vatters vnd sich nart oder aber sich noch nere mit wercken
 so Im sin pfründ nit gnüg syg. Vt con. j. di. c. ij. et de cele.
 35 mis. c. j. etc. Aber zü dem begharde als du gemeldet häst
 von glycher arbeit vnd vngelychem solde, Vnd häst fürge-
 halten, ob nit got vngerecht syg? etc. Dar zü antwort dir die
 wärhait Mt. xx. fründ ich tüt dir kain vnrecht. Bist du nit

mit mir des tags vmb ainen pfennig vberkomen? Nim hin das
 din ist vnd schaide ab etc. Vnd darumb bist du bestellt durch
 ain pfründ ainer marck silbers so bist du als wol schuldig vnd
 pflichtig zû den siben zyten die wir nennent horas canonicas
 5 als ain anderer vmb tusent marck. Sicut legitur et nôtur de
 cele. mis. prespiter Darumb ob yemant bruchhe hât vnd arm
 ist vmb sin aigen schulde so ist nit billich Im zû hilffe ze-
 komen. De consci. que in ecclesiarum et in glo. Vnd den
 schaden den aincher vsz aigner schulde entpfindet den sol der
 10 selb jm selbs vnd niemant anderm verwissen. de regulis Juris
 li. vj. cum concor.

[117^b] O her domine sprach der Iohart vnd kirret vber
 mich mit sinen zenen vnd redt, Ich enpfinde ouidium den
 poeten jn libro de vetula wâr gesagt haben, da er sprich
 15 werlich linkge vnd vnselige ding koment selten ainig. daz ouch
 bezüget das gemain sprüchwort das dann gewonlich geredt
 wirt, ain vngelück kumpt selten ane das ander. vnd söliche
 gemaine sprüchworte mugent ouch gealegiert vnd fürgezogen
 werden. Vt. ff. de fundo instru. li. j. Et in cle. j. de re. do.
 20 cum concor in glo. Et cortiua cortiuam trahit de sacra vnc.
 c. vnico. §. ad exhibendum. vnd vsz ainer vnzimlichen rede die
 zû gelâssen wirt vnd dero man gesteet, wachset vnd folget
 nâch vil vnzimlichs. vt no de R. p. statutum. li. vj^o. Vnd
 darumb zum tûfel die armen! wie wol diner gaistlichen rechten
 25 ain canon sagt, daz armût nit syge von dem geschlecht der
 bösen. xv. q. j. illam. in fi. Aber merck. die wyle die pfründe
 wirt geben, vmb das ampt, als von dir ob gesagt worden ist.
 Ob dann aincher priester oder chorherre nem die pfründ, das
 ist die frucht vnd (nâch dinen Worten) grossen solde! vnd
 30 tett nit das ampte mit singen vnd lesen als vfgesetzt ist! sag
 an nimpt der selb nit den solde âne arbeit, vnd tût vnd ver-
 schuldet hie durch rouberye vnd dÿpstale glycher wyse als
 ainer, der da spricht sich ainen gantzen tage in aim wingarten
 gearbaitet han Vnd doch müssig âne arbeit vmbgegangen ist
 35 vnd zû complett zyt den lone nimpt glych als die so die burde
 der hitz vnd der arbeit den gantzen [118] tage getragen
 haben. Sag sint nit sölich schuldig das zebekeren? Sint nit

sölich ze entsetzen irer pfründen vnd früchten. Vt de cle.
 non resi. c. ij. et. c. exparte et. c. duobus sequentibus, xxxij. di.
 preter hoc. C. de epi. et. cle. generaliter. xvj. q. j. in fi. ge-
 lycherwyse als ain ritter der nit dient wirt entsetzet sines
 5 soldes. Vt. ff. de re. mili. l. desertorem. §. qui milice et l. qui
 exculpa et. l. penult. c. e. ti. Vnd darzû so legent vnd huffent
 sy boszhait vf boszhait. Danne näch der rede sanct Bernhartz,
 so wöllent sölich priester ain anders sin vnd ain anders ge-
 sechen werden? dann mit Irem habit vnd beklaiden sint sy
 10 ritter, mit Innemung der nutzung sint sy priester. Aber mit
 den wercken bewerent sy entweders. Dann sy stryent nit als
 ritter, So predigent sy nit als priester, vnd welches ordens
 sy sint also wirt ir yeder in sinem orden vf ersteen. In wel-
 chem orden erstend aber die? Ich fürcht daz sy nit an ain-
 15 chem andern ende syen zeordnen danne die kain orden ist.
 Sunder Inwonet ewiger grus vnd schrecke. Hec ille. Sag
 verdienet nit der sin fryghait zeuerlieren? der sich miszbruchet
 des gewaltz so Im verlichen ist? De regulis licet de priui-
 tuarum de sen. ex. contingit. Sag welcher ain ding tûn mag
 20 vnd doch das nit tût? wirt nit der vermerckt das nit tûn
 wöllen? ff. de. edi. edic. l. Item queritur Item wer nit tût das
 er tûn solt wird vermerckt zetûn das er nit tûn solt. ff. de
 edi. edic. quid sit. §. Idem. lxxx. di. non satis. Fürwar herre
 wirf nit mine wort zû rugk hindersich, Sunder werden die
 25 geschriben vnd gehüwen in ainen kisling Job. xix.

[118^b] Darzû Ich felix aber antwort Nim war lolharde.
 Es ist kuntlich wer sine sinn vf vil vnd manig ding setzet,
 daz desselben sinne dester minder vnd vnuolkomner sin müssent
 30 zû der selben dingen volbringung. Vt no. de here. accusatus.
 §. de quibus. li. vj^o. Vnd wer zû zwayen dingen yllent, der
 tût entweders erfolgen. xvj. q. j. prespiteros. Vnd der zorne
 tût Irren das gemüte daz es nit mag erkennen die wärhait.
 Vt dicit catho. Du häst vor gesagt, dich sin ainen armen
 35 ouch dich des vberhept. Aber nu yetz so sichst vnd redst
 wider die selben armen sy zeschelten. Dar zû so wöltest du
 gern mich vil dingen vf mercken, da mitte du mich von minem
 fürnemen fürtest, als du dann vor ouch getân häst. Aber

nützit dester minder wissz daz Sanct Gregorius. li. v. mora.
 Spricht daz die ketzer des geloubens! habent die aigenschaft
 an Inen, daz sy bösem gütz vndermischent, da mit sy dester
 lichtenklicher die gemüt vnd willen der vfosenden In fürent
 5 vnd bringen mugen vf Ire mainung Dann wenne sy all wegen
 das bös sagtent so würden sy in Irer boszhait vermercket vnd
 möchten dester minder mit Irem fürheben Iren willen erlangen.
 Hinwiderumbe wenne sy allwegen das allain so recht vnd güt
 wer sagten! So weren sy für wär nit ketzer des geloubens.
 10 Hec ille. Vnd also tůnt sy vnder ainer gestalt der tugend In
 geen sůnde vnd laster. Vt de here. sicut in vno. Vnd dar-
 umbe so tůst du nu yetz sagen min gerechtikait vnd nimpst
 dir selbs für min be[119]zůgnůsz zetůn durch dinen munde,
 Vnd besunder in dem daz du sprichst, Wer nit tůt sin ampt
 15 mit singen vnd lesen als Im vfgesetzt ist etc. Dar zů ich selbs
 sag. Das den priestern der kirchen dar Inne Thůme, Stifften
 oder conuent sint (Vnd dar Inne man von rechtz vnd gewon-
 hait wegen die syben zyt (die man nennet horas Canonicas)
 Singen sol! ist nit gnůg, sůlich syben zyt zebetten in jren
 20 hůsern oder an andern der gelychen enden, Sunder sint sy
 schuldig die zesingen vnd zelesen in dem chore. Danne nůch
 dem Vnd sanct bernhart spricht. So ist got vngenem was du
 Im tůst, So du vnderwegen lassest das, so du zetůn schuldig
 bist, Vnd mag ouch ains für das ander nit geben noch bezalet
 25 werden wider den willen vnsers schuldherren der da ist Cristus
 ff. de. re. cre. l. ij. Et insti. qui mo. tol. ab. §. j. ff. Si ter.
 pe. l. ij. Vnd darumb so spricht sanct Gregorius, für wůre
 nit mittelmessig noch wenig tůt der mensch got erzůrnen der
 sin bezalung die er got dem herren schuldig ist nůch aignem
 30 willen endert. xxij. q. iiij. si is qui. aber der erst anfang
 diner worten ist nit ain wůrhait. Dar vmbe dwyle du die sel-
 ben wort hůst lůssen fallen! So hůst du hier mit gnůg ge-
 holn vnd bist gestendig, dasz den wol mugenden menschen nit
 gebůrre zebetteln, Vnd darumb so gangen wir vf die hůpt-
 35 sache, dar Inne Ich dir leg ain sůliche beschliessung! daz
 weltlich verpfrůndt priester vnd ouch můnche die nit betler
 ordens sint! Was stůtes vnd wesens Joch die sust [119^b]
 syen! mugen nit genempt werden armůsner oder daz sy das

armüsen niessent, Sunder werden sy gehaissen söldner vnd niessent ouch Iren solde, als kuntpar ist vsz dem so vor gesagt ist. Item dise beschliessung wirt bewyset vnd bewert durch ainen andern wege. Scilicet via sumpta per locum a
 5 sufficienti diuisione, quod est argumentum validum In Jure vt. ff. de acci. et obli. l. obligacionum. §. placet. etc. Also zesprechen. In kainem rechten weder göttlichem noch menschlichem wirt vergewisset oder gesagt daz die frucht vnd gült der pfründen syen oder genempt werden armüsen. Darumbe ist
 10 die obgemelt beschliessung wäre. Dann sölich frucht werden gehaissen söld als in den rechten obgemelt. Vnd die selben söld werden geben den priestern von dem erb cristi, dar von sy ouch lebet. Vt de preben. cum secundum. Welches erbe wirdiger ist, vnd alle erb der layen vbertriffet. Die wyle die
 15 gaistlichen dinge wirdiger sint danne die weltlichen. Vt de pe. et re. cum infirmitas. Vnd die layen haben sich nit zegebruchen freuenlich ützt von sölichem erbe. Es syg dann daz sy beschaidenlich von den priestern hier zü werden berüffet. lxxxvj. di. non satis. Dann es ist ain offer vnd gaube gottes.
 20 xiiij. q. j. §. his ita Aber sölich layen werden billicher gesprochen daz sy lebet von dem güte der kirchen danne der priestern danne was sy den priestern gebent das ist vor der kirchen als zehend vnd offer. xvj. q. j. statuimus vnd sölich eigenschaft haben die priester vff [120] ertrich. Vt de. deci
 25 tua. xiiij. q. j. §. j. Vnd hät sölichs vnd alles ander ainen vrsprunge vnd kumpt her von den priestern vnd von dem güte der kirchen. Wann von dem obersten priester das ist von dem Babste nimpt vnd enpfächt der römisch künge die kaiserlichen Cronen vnd den gewalte zerichten. Vt de elec. venerabilem
 30 lxiiij. di. tibi domino. scm. Inno. et hosti. Vnd wenne ain römischer künig oder kaiser mit tode abgangen ist vnd des rychs regiment deshalb ledig steet, So ist sin gerichtszwang gefallen an den babste Vt in. c. licet. de foro. compe. Ja vnd ain babst mag absetzen ainen kaiser vmb sin sünde vnd laster vnd nit
 35 hin widerumb der kaiser den babste. De re. Indi. c. ij. li. vjo. Er mag ouch vmb sumseli des kaisers sinen vnd des rychs gerichtz zwange wider vmbe an sich nemen Vt in dicto. c. licet Vnd Inn zwingen das zetün das recht vnd billich ist.

xxiiij. q. v. administratores Vnd das gaistlich recht ouch in
 etlichen sachen zehalten. De fo. comp. c. ij. der Jur. Jur. licet
 de sen. ex. decernimus. li. vj^o. Aber doch ist ain kaiser vszen-
 pfächung sölicher Crönung vber alle küng. Vt vij. q. j. in api-
 5 bus. Vnd alle geschlecht der fölckern sint vnder Im. ij. q. j.
 volumus. Vnd ist als danne ain fürst vnd herre der welte.
 ff. ad l. rode deprecaris Vnd sint ouch die Juden vnder Im.
 C. de Judeis Judei Vnd alle lande. lxij. di. adrianus. v. Vnd
 als dann sint alle ding in gewalte ains kaisers. viij. di. quo
 10 Jure. xxij. q. viij. conuenior. C. de. quadra. prestip. l. bone
 Nim war disz alles hât Im verlichen der oberst priester das
 ist der babst vt in [120^b] dicto. c. venerabilem. Vnd darnâch
 so lychet der kaiser hier von den andern weltlichen fürsten
 vnd die selben fürsten dann füro andern grauen vnd herren.
 15 Vnd aber dieselben wyter den edeln, vnd also für vs bis vf
 gemain schlecht personen Vnd folgt hier vs das die layen
 danck sagen müssen dem allmechtigen gotte vmb eer vnd gûte
 Inen also verlichen von dem obersten priester ainem vicarien
 vnd stathalter cristi vnd ainem houpthe der priesterschaft vnd
 20 der gantzen kirchen, Darumbe ouch grosz reuerentze vnd eere
 Im erbietent nit allain vmb sölichs sunder vnd aller billichost
 vmb die gaistlichen gûthait von der selben priesterschaft Inen
 beschechen. Darumbe so bedenckent vnd erwegent die selben
 layen den spruch Sanct Gregorien in siner humelye da er
 25 also spricht Bewerbung der liebe, ist ain erzögung des wercks
 darvon dann ouch spricht. Johannes in principio sue cante.
 c. ij. Wer da sagt daz er got lieb hab vnd doch sine gebott
 nit haltet? der ist ain lugner. Darumb ist daz sy cristum
 lieb habent, so nement sy das für sich daz Sanct Johannes.
 30 schribt. Jo. quinto. Welche erent den vatter, die erent den sune.
 vnd welche den sun erent die erent ouch sin priesterschaft
 als sine vicarien vnd stathalter. vnd darumb vom ersten bisz
 zum hindersten zearguwieren so tût die eere so der priester-
 schaft wirt angelegt)ouch die scheltung die Inen von dem
 35 folcke beschicht) alle, entlich lenden vnd komen in cristum.
 Vnd tûnt die den herren crutzigen, die Inn in sinen priestern
 durächtent. ij. q. j. nulli. Vnnd die eere der priestern wirt
 gehaissen ain eer Cristi. ij. q. v. hoc habet [121] daher spricht

der erwirdig doctor. Maister hainrich von hessen. In prolago
 galeato super gen. Ir etlich so sy kain ander bekomlichkait
 noch vrsach haben die priesterschaft zeschmechen oder zeschenden
 so sprechent sy daz die priester gefüret vnd vfhalt
 5 halten werdent von dem armüsen vnd daz sy ouch armüsner
 syen, daz doch falsch ist dann freuenlich öch abgelöblich vnd
 gantz Irrend nement Inen sölich layen das für zereden. Hec
 ille. Nim war begharde wie grosz vnd vil lobs vnd eeren du
 vnd ander abziechent vns priestern vnd deshalben ouch cristo
 10 die da sprechent vns leben von dem armüsen etc.

Wirt gar schnell röte dann ich wird dir sagen ain grosz
 laster vnd dar näch dich geschwaigen. Du sagst Im grund.
 Daz ain pfründe als ain ding got gegeben nit muge wider be-
 kert werden in menschlichen bruche! daz falsch ist. Dann
 15 Ich hab dir vor gesagt, das du nit mercken wilt! die frucht
 der pfründen sin ain armüsen Es syge dann daz sölich pfrün-
 den gesetzt syen vff wücher als oft gesechen wirt in den
 priestern die da habent zinsz vnd gülte die erkoufft vnd durch
 gedinge ablösig sint mit dem houpt güte als man danne gibt
 20 von zwaintzigen oder fünf vnd zwaintzigen ainen guldin zinses
 etc. Welcher zinse (daz ich mich diner Worten gebruch) durch
 maister hainrichen von hessen (Den du vor für geloupwirdigen
 häst für gehept in sinem tractät, da er von sölichem handel
 diser köffen schribt, ain rechter wücher ist. So [121^b] hab
 25 ich ouch noch nit gesechen ainch geschrifte besunder geloup-
 wirdiger mannen die das wider sprechen tüg vnd sölich sünd
 vnd laster der wücherye, ist als wol in der alten ee als in
 der nüwen verboten. vt de vsuris super eo Et exo. xxij. Dar-
 zû tüt ouch der haide die verwerffen vnd hassen. vt patet. 3o.
 30 ethicorum. c. iiij. Nim war wo sint dine gründ vnd funda-
 mente in den hailigen bergen, So doch vmb kains güten dings
 willen bösz zetünd ist. vt in dicto. c. super eo. cum concor.
 vnd vil diner mit brüdern nement sölichen wücher vmb daz
 sy messz haben vnd götlichen dienst volbringent vnd ver-
 35 dientent hier mit, glycher wyse als ob sy von roube machen
 wölten ain armüsen. das nit sin mag noch sich gebürret. vt.
 xiiij. q. v. forte. vnd also wüschent sy Iren hindern mit trüsen

vnd heffen Aber daz sölich pfründen nit ewig syen das erschynt bei dem. Danne durch bezalung des houptgütes, hörrent vf die frucht zins vnd gült vnd dannen hin ouch die pfründ vnd ist nützit anders danne boszhait zû boszhait vf huffen.

5 **O** Begharde. Was wöllen wir der dingen? die wyt vs-
sen stend vnd nützit zû den sachen gehörend. de diuor gaude-
mus. Dwyle sölich zinsz der wücherye nit geloubt werden
machen mugen ain gaistlich pfründ ainer messe. vnd Ja nit
allain priester sunder ouch layen. Die sölich zinsze Innement,
10 sint wüchrer es were dann daz sy so vil houpt gütes darumb
gebent als näch gemainem louffe sölich zinse in die ewigkait
gekoufft werden mugen, aber wer [122] ist der, so loben wir
Inn. ecc. xxxj. der die sölicher mässe kouffet. vnd disz redent
die aller verrümpstisten doctores vnd lerer vnd hörr ouch kain
15 gelöpwirdig stimm hier wider sagen vnd also werden sölich
nit gehaissen verpfründet? glycher wyse als ain falsche gerech-
tigkait nit ist ain gerechtigkeit. xxij. q. iiij. est iniusta. noch
ain falscher pfennig ain pfennig noch ain falscher pfleger ain
pfleger. ff. de. ver. sig. Paulus Aber dise ding dienen nützit
20 zû vnsern fürgenomen sachen? sunder daz du tûn wilt, das tû
bald. Jo. xij. vnd da mit du mich wilt geschwaigen, das ver-
züch nit lenger vszelegen.

Hier zû der beghart antwort vnd sprach noch belypst du
in diner ainfaltikait. Sag got lob vnd dancke vnd tû ver-
25 dienen. Job. ij. Danne es spricht der prophete. Den menschen
hab Ich gedurächtet, der na haimlich sinem nebenmenschen
abzüchet sin lob vnd eere. ps. joo. et.. xxij. q. iiij. nimirum.
Darumb wie grosz vnd vil verschulte ich mich mit miner
zungen so ich abzug minen nechsten das Ist vnserm vatter,
30 die wile du sprichst das ich abzüch Cristo so ich red dich
sin ainen bettler vnd niessen das armüsen. Danne es ist ge-
schriben daz vnder den wercken der liebe nit das minste syg,
den Irrenden menschen ab dem wege der Irrung zeberüffen.
De spon. inter opera. vnd Ich wölte lieber alles vbel lyden,
35 danne sölichem vbel minen willen geben vnd darjn gehelen.
ut. xxxij. q. v. ita du tûst zevil [122^b] ergrüblen vnd wilt vs-

ziechen das blüte. Vt de renun. nisi. §. 3. in fine. Merck vf
 vnd geschwyg. Vnnd lege den finger vff dinen munde. Job.
 xxj. Vnd min mund wirt reden die wysheit vnd die betrach-
 tung mins hertzen! die fromkait. ps. xlvij. Ich wird vf
 5 tûn minen munde vnd in glychnung reden die fürgelegten
 wort von dem anfang. ps. lxxvij. Dwyle der ain grimer
 röwer mensche ist der da versumpt vnd verachtet sinen lüm-
 den. xij. q. j. nolo. Darumb werffen wir von vns die werck
 der vinstre, das ist des lybs begirden vnd legent an vns den
 10 harnüsch vnd die wäffen des liechtes. Das ist gebruchen wir
 vns der worten vnd wercken Cristi. Ad ro. 3. Danne es ist
 geschriben! nement an vch die wäpenye gottes vmb daz Ir
 an dem bösen tage mugen wider stryten vnd in allen wercken
 rechtlich besteen vnd belyben. Ad eph. vj. Dann Jhesus sprach
 15 zû Sanct Peter folge mir nâch. jo. vlti. Vnd aber. Wer mir
 nâch folget! wirt nit wandeln in vinsternissen, Sunder wirt
 der haben ain liecht des lebens. jo. viij. Vnd aber. Für war
 sag Ich vch wer in mich geloubet, Der wirt tûn die werck
 die Ich tûn, vnd ist daz Ir mich lieb habent so halten mine
 20 gebott. jo. xiiij. Vnd aber redt der selb. Himel vnd ertrich
 werden zergeen. Aber mine wort zergend niemer. Mt. xxxiiij.
 et luc. xxj. infi. Nim war du priester daz mer ist, das in
 wârhait gehandelt wirt, dann das so allain in aim schyne für-
 genommen wirt qui fi. sunt legi. pertuas. Vnd darumb von
 25 wegen diner müssigen vnnützen worten müst du geben rech-
 nung [123] Vt xxij. q. vlti. c. quociens. Vnd ob ich die wâr-
 hait verhielt so sündete ich tötlich. Vt de testi. co. c. j. xj.
 q. 3. quisquis. Vnd darumb so lose. hât nit Cristus gesprochen.
 Ich hab vch gegeben ain exempel daz Ir ain andern tügen
 30 gelycher wyse als ich vch getân hab. Jo. xiiij. Dann er hât
 vns hinder Im gelâssen ain exempel daz wir nâch folgent
 sinen fûsstapfen. j. pe. ij. de cele. mis. cum marthe. §. exeo.
 Dann Cristus hûb an zetûn vnd zeleren. act. j. Vnd darumb
 so ist die übung vnd das werck Cristi vnser vnderwysung. ij.
 35 q. j. deus omnipotens. Vnd sine werck vnd getâten (als Sanct
 Gregorius spricht) sint vnser gebotte, danne so er etwas haim-
 lich tût! gibt er vns dar by zeuersteen, Was wir würcken
 sollen Vnd also hât er gelert armût vnd des gelychen betteln,

Danne er selbs willenklich bettelt vnd daz du das verstandest,
 So ist er in sölicher armüt geborn worden, daz er stetz ge-
 legt wart in ain kripfen, danne Im sust kain ander statt was
 in der offen gemainen hütten. luc. ij. Vnd darumbe hăt der
 5 prophete gesprochen in der form Cristi Ich bin ain betler vnd
 arme. ps. xxxix. Item Er hăt durechtet den menschen der
 arm vnd ain betler ist. Jo. viij. Vnd also vmb daz Cristus
 erfulte die geschriften, so tett er mit betteln von der Sama-
 rithanischen fröwen erfolgen das trancke! do er sprach. Gib
 10 mir zetrincken. Jo. iiij. Item er bettelt von Zacheo. Do er
 sprach. zachee schnell kum herab, dann hüt mûs Ich in dinem
 huse essen. luc. xix. Item daselbs wirt ouch gesprochen [123^b]
 Ir werden finden ainer esslin Jungen esel, den bindent ab vnd
 fürent Inn zû mir. etc. Sage tett er nit hier mit betteln?
 15 Item als er was In dem tempel vnnnd mengklichen hatt be-
 sechen vnd yetz vesper zyt was, gieng er gen bethaniam mit
 sinen zwelf Jüngern etc. Als man liset Mat. ii. Item cristus
 redt. luc. viij. zû aim, der zû Im sprach. Maister Ich folg dir
 näch wo hin du geen wirst! Also! die fûchse habent hülen vnd
 20 die fôgel des himels, năster! aber des menschen kind hăt
 nützit darvf er laine sin houpte. Item Cristus hăt gesprochen.
 Mat. iiij. Nit wöllent besitzen gold vnd silber, Noch gelte an
 üwern gürteln, nit ainchen ledersacke noch zwen röcke noch
 geschüche Item es spricht Cristus luc. xiiij. Ain yetklicher
 25 vsser vch der sich nit verzicht alles des so er besitzt, mag
 nit sin min Junger. Item Cristus hăt gesprochen zû aim
 Jüngling. Mat. xix. luc. xvij. Mat. x. Wilt du volkomen ge-
 recht sin, So gang hin vnd verkouff alles das du habest vnd
 gibs den armen vnd kum vnd folg mir näch. Darumb spricht
 30 Paulus ij. ad cor. viij. Ir wissent die gnăd vnsers herren
 Jhesu cristi. Danne er von vnser wegen (Wie wol er ryche
 was) arm worden ist, Vmb daz Ir durch sin armüt rych weren.
 Darumb so syg der Junger nit vber sinen maister noch der
 knecht vber sinen herren. Es ist gnûg dem Junger daz er
 35 syg als sin maister. Mat. j°. Vnnnd hab nit wunder du priester,
 ob cristus mit der schlechten graden wege, der aim yeden
 verstentlich ist, gebütet zebetteln! Dann es ist gnûg (Als vor
 gemelt [124] wirt) daz der, der ain fürst vnd ain houpt ist,

mit lerung ermant vnd sich gebrucht des amptz Vnd flysses
ains bettlers. Vt. ff. de his qui no. infa. §. hoc verbo. Danne
Cristus ist gewesen ain fürste. Ysa. viiiij. vnd darumb ledig vnd
nit vnderwürffig den satzungen vnd ordnungen der welte Vt
5 ff. de legi. l. princeps. Sunder was dem fürsten gefelt das
nimpt vnd hât dann craft des rechten. Insti. de Jur. na. gen.
et ti. §. quod principi. Vnd des gelychen bin ich, der da
geführt wirt durch den gaist gottes nit vnder menschlicher
satzung. Vt de renu. nisi. §. verum. vnd darumb hât ge-
10 sprochen der hungsüsz doctor Bernhardus in der omelye. super-
ewangelio cum factus luce. ij. Nâch vil worten. Was sol ich
sagen min herre got? ist es darumb? daz du dich in allwege
gelychnotest vnser armût vnd vf dich nemest alle vnseeligkait
disz lebens vnd gelycher wyse als ainer vsser der schare der
15 armen den heller vor den türen betteltest? Nim war. daz
also wyter zebewysen willige bettlerye vnd armût Cristi! were
als vberflüssig als ob du die sunnen wöltest behelffen mit
brinnenden fackeln. Vnd du hâst ouch das in dinem canon.
vij. q. j. Si omnia. vnd bewyset ouch das die glose magistra.
20 xij. q. j. habebat. Aber der vnwys man bekennt das nit vnd
der tore versteet des nit. ps. lxxxij. vnd darumb so verlâsse
ich nit nâchzefolgen den fûszstapfen dises vnseren herren Jhesu
Cristi, vmb dines vppigen geschwatzes willen der mir betût
das rettschen der froschen dar mit geschlagen vnd [124^b]
25 gestrâffet worden ist egipten. Vt exeo. viij. Vnd als du ouch
hâst in dinem Canon. xxxvij. di. legimus. Welchen Cristum
ouch nâch gefolget hât Sanctus Alexius. Vnd ist ain aller
bestes argumente ze arguwieren durch die exempel die da
gütikait in Inen selbs beschliessen. Ad hoc de. con. di. 3. fac-
30 tum est. Dar von volkomenlicher sagt archidya. De re. Judi-
cum eterni. li. vj^o. Hier vmb so tûg Ich achten vnd mercken
die gilyen des ackers die da wachsent vnd nit arbeitent noch
spinnent. Mt. vj. Tûg ich ouch sechen die fogel des luftes die
da nit seyent noch schnident noch zû huffe sarnelnt in Ire
35 schüren! vnd noch dann vnser himelscher vatter sy fûret.
Ibidem. Darumb was sag Ich dem? der da gibt das essen
den hüngringen? vnd was wirt er mir antworten? Tû vf dinen
munde vnd ich wirt dir den fûllen. ps. lxxx. Danne die gerechten

essent in gezierden, vnd fröwent sich in der angesicht gottes vnd habent wollust in fröiden. ps. lxxvij. Item vnd sy haben geessen vnd sint gesettet worden vberflüssig vnd ir begird ist Inen zü gebrächt vnd erfüllet, vnd sint an sölicher Irer begird,
 5 nit vervntrüwet noch betrogen. ps. lxxvij. Vnd dwyle cristus hât gebotten luc. xvij. Das man allwegen müsz betten vnd niemer dar von lassen vnd der appostel spricht. j. ad thela. v. bettent äne vfhören vnd sagent in allen dingen got dancke! So tett arbeit der henden sölich gebett Irren. Danne es
 10 spricht der herre. Ist daz ir selbs wöllent vnd mich hörrent, so werden ir niessen vnd essen die gût des ertrichs. ysa. j. Vnd darumb so rûwe vnd lern [125] wol tûn. Ibidem Vnd widersprich nit dem wort der wârhait in kainen wege. ecc. iij. Vnd die ding! die dir zehoche sint wöllest nit sûchen! noch
 15 die so dir zestarck sint erfündeln. Ibidem so wil ich also diner ainfaltigkait diner vnernietung vnd diner grobkait hier Inne vertragen. Juxta nota. in c. super literis de R. p. in glo. danne die menschlich nature ist schipfig zû sünden. Vt dicit lex in auct. de mo. §. Si quis col. j. Aber du wirst nit ain
 20 betrieger vermercket Wenne du widerumb zû der wârhait kerest. xxxij. q. j. apud. Vnd das so beschechen ist vngebürlich mag, gebürlich werden widerrüffet.. xxxv. q. viij. quod quis commisit. Ja vnd der wyse man verwandelt sinen râte so er sich wyslicher bedencket. Ad hoc C. de collo. l. nunquam. Dann sünden ist menschlich. Aber tûfelsch ist in sünden zeuerharren. C. quomodo et quando Judex. l. consentaneum Vnd darumb so rûwe dann du hâst gesündet. ecc. xxj.

O begharde redt Ich do vnd sprach Es ist geschriben Ysa. v. We üch die da wyse sint in üwern ougen vnd vor
 30 üch selbs geschyde vnd vernünfftig. Item es ist geschriben, nit wöllest vertrüwenlich anhangen diner aignen wysheit. Vnd der wirt genennet also anhangen siner aignen wysheit, der da die ding die Inn beduncken zereden vnd zehandeln sin, Im fürsetzt vnd mainnet besser sin, Danne die lere sprüch vnd
 35 satzung der alt vättern. De consti. ne inuiteris. Vnnd sagt Augustinus. In prohe^o [125b]. x. l. de trinitate. Das gemüt ist mer lobs wert dem da bekant ist, aigner gebrechh!

Danne daz, daz sinen gebrechen nit sechen wil vnd sust alle
 stett der welt, alle löff des gestirns alle fundament des ert-
 richs vnd die höche der himeln waisz ze erfahren. Vnd darumb
 daz du luter verstandest din Irrung so merck! daz ich dir
 5 gesteen daz die würckung Cristi vnser vnderwysung ist. Aber
 daz du nächfolgest sinen füsstapfen. Des bin ich dir wyt ab-
 red. Dann man liset Cristum mit nackenden füßen gegangen
 sin. Du häst aber dine füsz beschüchet. Vnd doch nit in
 yllung vnd erjagung des friedes als dann zebeschechen gebüt
 10 der appostel Ad eph. vj. Ja vnd du besitzest gold vnd silber
 ouch gelt an diner gürtel vnd teschen vf dem wege habende,
 Das sint grosz seck, Vnd zwen röck, daz da ist wider das,
 das Cristus hät gesprochen. Mt. x. dá durch du bewysen vnd
 den menschen inbilden wilt die armüt cristi, dero Ich dir ge-
 15 steen vnd sin betteln, des Ich mit vestem gemüt vnd hertzen
 dir niemer gehil, Sunder dir kurtz hier zü antwort gib vnd
 dennocht vmb kürtzrung willen vermiden wil, vf din Ingefürten
 sunderlichen puncten sölich antwort zegeben die vor zyten ge-
 tån hät Armachanus ain hibernischer, Dadurch klerlich erschyne,
 20 dich mit dinen fürgehepten sprüchen das betteln Cristi nit
 bewyset han. Vnnd sprich mit Sanct Gregorien also. Welcher
 mensche gesund der sinnen richtet In sinen lestzgen Job ge-
 sundet han! Wyle doch die götlich vrtaile dem widerspricht.
 Wer tüt durch sin zwýfelhaftig rede [126] yemant gelöbig
 25 machen Cristum gebettelt han. Wyle doch Petrus an dem
 gewalt Cristi zeversteen gibt, daz die starcken vnd muglichen
 Irs lybs nit söllen betteln. Danne do der die müter Clementis
 sach betteln vnd er sy schatzt vnd maint muglich sin zear-
 baiten! do sträffet er sy sprechende. fröwe welches gelids ge-
 30 bricht dir das du das armüsen forderst vnd nit lieber mit
 dinen henden würckende, din narung süchest? Als dann das
 sagt der selb Clemens selbs. In Itinerario suo. Vnd wie wol
 desselben Clementis sage zegelouben von der kirchen nit be-
 wert ist! So wirt doch sölich mainung ouch klerlich bewert
 35 durch die getätt Petri vnd der andern Jüngern Cristi. Danne
 von Inen wirt geschriben. Act. viij. Also. Vnd vnder Inen was
 kain armer gebrechen habende! Sunder als vil sy Ir besesse
 der äckern oder der hüsern verkouften, So erzögten vnd off-

noten sy das gelte, des so sy verkouft hatten, Vnd legten das
 für die füsse der apposteln. Do dann sölichs yetklichem wart
 getaillet als vil aim yedem notdürftig was. Hier by verstanden
 wirt, daz die menschen zû der nächfolgung Cristi bekeret!
 5 Ane zwyffel durch der Jünger Cristi vnderwysung, alles Ir gûte
 verkouffent näch râte desselben vnsers herren Jhesu Cristi.
 Vnd dann das gantz gelte dar vs erlöset antworten tätten!
 Den apposteln, sy in kainen wege zû bettlern machende.
 Danne als ob steet kainer vnder Inen arm was mangel habende
 10 Nim war des râtes cristi zû früscher getâte vsgelegt den füs-
 sen [126^b] der apposteln der da vsschlüsset das betteln. Als
 du aber von bernhardo gesagt häst etc. Sag ich daz der also
 ermanlich anruffend vnd näch wâne vnd besunder nit für aigen-
 liches vnd gewissz sölichs vermerckt wirt geredt haben! sunder
 15 in fräg wyse vnd zwyfelnd also forschet Min got häst du dich
 in allweg gelychet vnser armût etc. Wie obsteet etc. Vnd wirt
 des billich bewegt Angesehen daz Im ewangelio gesagt wirt.
 Daz cristus dryg tage in dem mittel der maistern wundersame
 werck tett würcken. Vnd wo hüt by tage ain Jüngling sölich
 20 alters so lobliche werck volbrechte! ist gelouplich daz er von
 vil menschen miltenklich geladet wurd vnd gepyset. Vnd dar-
 umb so ist söliche Sanct bernhartz fräge vnd sin zwyfel in den
 bessern taile vnd weg zekeren vnd zemercken. Dann ain ding
 also vszelegen vnd vfzenemen ist, wie das der wârhait aller
 25 gelychest sin, verstanden werden mag. sc. tho. v. lx. ar. iiiij.
 Et glo. super illud. j^o. xiiij. qui autem manducat et de regulis
 juris estote cum concor. Aber zû der glose magistrati. Die
 du häst fürgehalten, sag ich daz ain yetklicher der den texte
 da selbs recht erwig der merckt vnd versteet, daz cristus sölich
 30 armûsen, daz die gelöbigen menschen Im zû brächtent! Vsgab
 als ain vernünftiger vsgeber, vnd das taillet zû der sinen vnd
 der ander notdurfte. Die er dann aller beste wist vnd dar für
 erwellet was. Vnd also hât cristus wie ain schaffner maister
 oder schaffner vnnd procurator ains spitäls sich nit gebrucht
 35 des armûsens sunder allain des amptes sölichs vszetailen, Als
 dann noch hüt by tage tûnt [127] die bischoff vnd prelaten
 wie vor gesagt ist. Vnd also wirt ain dinge zwurent geben!
 Des ersten dem vsgeber vnd dar näch von dem selben, den

armen. Vnd wirt also von dem armûsen gegeben armûse Vnd
das selb wil die glose obgemelt. Vnd ist daz du sprichst daz
der Psalmiste Daud In der person Cristi sprech. Ich bin ain
bettler vnd arm! So sag ich dir hinwiderumb, daz er ouch
5 spricht. Ich bin ain wurm vnd nit ain mensche Wie wol er
in wârhait got vnd mensch gewesen ist. Aber dise hailig ge-
schrift! ist so grob vnd rôwe nit zeuersteen noch zemercken.
Vnd drutz daz yemant sprech! daz kain doctor, Sunder der
kunst treffenlich vnd verrûmpt in diser welte ye geschriben
10 hab, Cristum gebettelt han, vnd des zû sôlicher siner mainung
ainch gewissz geschrift vnd geloupwirdig hab fürgehalten die
sôlich betlerye bewysen mug! als man aber wol dar wider
genûgsamklich sôlich geschrift fürhalten möcht. Dann es ist
offen vnd du gesteest ouch des selbs, daz cristus nie genött
15 vnd von not wegen gebettelt hab. wyle er dem tode gegeben
vnd geopfert ist, darumb daz er das wolt Ysa. liij. Vnd alles
das das er wolt das schûf vnd machet er. ps. c. xxxiiij. de con.
di. v. Omnia Vnd allermaist ouch darumbe daz offen ist, gieng
er yetz alsdann zemåle in diser welte! das er sich vnd die
20 sinen mit den wercken siner henden genûgsamklich ernarte
(ob er wölt) Vnd von rainigung ains vszsetzigen menschen
zerung vnd narung etwa mancher tagen verdiente vnd hin-
brechte. Vnd hier vmb so folget vsz [127^b] dem! hette er
gebettelt, daz er das willenklich getân hett. Da sich gebürt
25 das mit vrsachen gelouplich zewider tryben. Sag ist nit ge-
schriben durch den propheten. ps. xxxvj. Ich hab den gerechten
nie gesechen verlassen noch sinen sâmen, sûchen das brote.
Hett nu Cristus gesûcht das brote mit betteln, als dann die
hailigen lerer den yetz geschribnen spruche also exponierent
30 vnd vslegent so folgte vsz dem! daz Cristus nit gewesen wer
von dem sâmen des gerechten, daz ist ain sune der gerechten.
Item hette Cristus, der da ist der oberst priester willenklich
gebettelt! so tett sin hailige kirch wissenlich Irren, die da
gesetzt hât! kainen zû priester zû vicarien oder zû stathalter
35 cristi gewychet werden sôllen Er syge dann vor mit gnûg-
samem titel vnd vergewissung ainer pfründ oder erbes ver-
sehen. Vt. lxx. di. sanctorum de preben. c. ij. Wyle cristus
nit yemant mit sinem exempel hât leren betteln. Item hette

cristus willenklich gebettelt! So gehorte betteln zû volkomen-
 hait ains rechten lebens. Vnd hette got vngebürlich geben die
 alten gesatz darInne er setzet, daz die priester für andern
 menschen sin sölle ains volkomenlichen rechten lebens vnd
 5 daz sy dann darby hetten besitzung aigner gütern vnd zehend
 vnd darzû ouch ersten frucht etc. vmb daz sy nit bedörften
 betteln. Darumbe were betteln ains bessern vnd volkomen-
 lichers lebens! So hette er Inen das ouch vfgesetzt. Item
 hette Cristus willenklich gebettelt! so gehorte betteln zû vol-
 10 komehait der ewangelischen lere. [128] vnd hett die kirch
 gottes wissent geIrret, daz sy vfgesetzt hett, die dota-
 ciones widem vnd begabung der pfrüden vnd altären ewiger
 messen da sy setzet vnd wil (als vor ouch gelut hât) daz
 kainer zû priester gewychet werd, âne sin genügsam dotacion
 15 da mit er verseehen syg. Vt de con. di. nemo. Vnd das wil
 ouch das recht. In auc. vt nullus. fa. aro. do. §. j. coll. v.
 Vnd hette also die kirch durch söllich satzungen (Als ouch
 die noch gehalten werden) die volkomehait rechts lebens Irer
 Prelaten vnd priesterschaft geschwechert vnd gemindert, das
 20 bös vnd vngebürlich ze reden ist. Item hett cristus willenklich
 gebettelt! so hett er selbs getân wider das götlich gebotte
 daz da spricht beger nit des huses dins nebetmenschen beger
 nit sins wybes, nit sins knechts vnd nit siner dienstmagt, nit
 sins oxsen nit sins esels noch ützt des sinen. Exo. xx. Danne
 25 wer willenklich bettelt der tût wider disz gebott. Danne er
 bittet vnd darumbe begert er des gûtes sins nebenmenschen,
 daz von cristo niemant wärlich getar reden daz er söllichs ge-
 tân hab, danne er ist nit kome daz er die gesatz brech sun-
 dern daz er die erfülle Mt. v. de con. di. iij. si quis at.
 30 Item hett cristus willig gebettelt so hett er die gesatz gottes
 von der liebe des nebenmenschen zerbrochen! Danne wer wär-
 lich sinen nebenmenschen lieb hât als sich selbs! der tût Inn
 mit vnbillichkait nit mügen noch bekümben Danne was du
 dir nit wilt beschechen, das tû kaim andern. Mt. vij. luc. vj.
 35 Bitten aber von ainem nebenmenschen das, So des selben ist,
 âne armût vnd [128^b] notdurft, das ist Inn vnbillich mügen
 vnd bekümben. Von cristo ist aber nie gesagt worden, daz
 er yemant ye vnbillich gemüget hab vnd bekümbert. Item hett

Cristus willig gebettelt! So were er wärlich gewesen ain
 yppocryt vnd ain schine ains bettlers, daz aber nit ist danne
 er was grosz vnd allmechtig. Kainer ist aber wärlich ain
 bettler, danne der, der Im selbs nit mag gnûg sin als vor ge-
 5 sagt ist in der vslegung was ain bettler syg. Wer aber willig
 bettelt vnd von notdurft hier zû nit wirt gezwungen, der er-
 zöget sich sin das, daz er nit ist vnd tût mit der selben getät
 liegen gelycher wyse als ain pure der da vf sinem houpte
 10 tragt ain blatten vnd an sim lyb priesterliche klaider vnd
 doch kain priester ist. Aber sölichs zesagen von cristo were
 ain boszhait. Item hette cristus willig gebettelt, So hetten
 ouch desgelychen getân die appostel sine Junger die da haben
 nâch gefolget dem lambe wa hin das gegangen ist. apoc. xiiij.
 fecissent. Vnd allermaist Paulus dem cristus ain gewine was
 15 zeleben vnd zesterben. Ad. phil. j. vnd der da gesprochen hât.
 ij. ad thi. xx. Ir wissent das ich nie gold silber noch klaider
 ainches menschen ye begert han, danne das min hende disz
 verdienet haben zû notdurft mir vnd denen so by mir waren.
 vnd darumb hett cristus also gebettelt! So hetten die appostel
 20 jm in allwege nâchgefolgt. da man aber nit liset ainchen der
 apposteln gebetteln han Item hett cristus willig gebettelt! so
 hett er selbs sinem [129] ewangelio ain verletzende Inrede
 gesachhet. Mit dem, daz er durch ain wunderzaichen gevestnet
 hätt, do er fünf tusent menschen gespysset vnd gefüret vnd
 25 yetz sich selbs nit spysen möcht. da durch die Juden Inn ze-
 verspotten! aber sprechen möchten Er hât andern geholffen
 vnd Im selbs mag er nützit helffen. Mt. xxvij. sunder wider
 die alten satzungen, tût er ander lüt beschweren. Vnd wir
 möchten hüt disz tags hie mit reden daz er mit sölicher ob-
 30 gemelter fürung der fünf tusent menschen! den menschen
 ainen betrogenlichen schyne gemachet hett. als yetzt tûnt die
 gougkler, die da andern lütten machent ainen schyne vil goldes
 vnd silbers vnd doch sy dar by sint die aller ermsten. das
 von cristo niemant reden mag. Item hette cristus gebettelt,
 35 vnd darumb betteln ain tugent vnd seligkait sin sölt, als du
 mainst! so geburte sich begharde, daz man dir vnd allen
 andern begharten das armûsen manigfaltenklich versagte vnd
 abbrech vmb daz ir mer arm vnd notdürftig wurden vnd hie

durch dester seliger. Vnd wenne ir also hie mit so notdürftig arm bettler wurden. Daz ir von hunger sturben, so weren ir die aller seligosten. Aber sölich seligkait were dir villicht nit eben noch bekomlich, so gibt ouch din fisiere vnd gestalte
 5 sölich seligkait nit zeerkennen, als vor gesagt ist. Vnd ich möcht noch vil argument infüren treffenlich wider dich dienend vnd die armachanus gesetzt hät, die Ich aber vmb kürtzrung willen belyben läsz vnderwegen etc.

[129^b] **U**Ach sprach der beghart der du zerbrichest den
 10 tempel gottes vnd entrichtest daz gantz wercke mit fürhebung armathani des ketzers den ouch die hussen in irem gelouben inzugent vnd fürhübent. Es ist aber nit billich, daz die sprüche werdent zû gelässen, die da vrsprünglich gend von denen die von der kirchen sint verworffen vnd verdampnet. de testi. licet.
 15 Vnd lichtfertig sint die! die schnell geloubent die ding die nit mugen bewyset werden. xj. q. iiij. jniunctis. de cle. non resi. tue. Vnd die ding so mit bösem anfang sint angehept, mugen kum mit gütem vsgange volbrächt werden. lxj. di. mit-tamur. Vnd die jrtung ist nieret für zeachten! die vsz dem
 20 rechten nit wären grund erfolgen tüt. De regulis Juris non prestat. li. vj. Danne du waist daz Sanct alexius gebettelt hät, noch dann haimant gnüg habende.

O Begharde Es irt nit daz die hussen vnd ander ketzer zû jrem gelouben fürgehalten hant Armathanum vnd daz dar-
 25 umb dester minder geloubet werden söll in diesen vorgesagten dingen. Dann ich sag dir daz die hussen ouch zû jrem gelouben fürgehalten hant die ewangely der apposteln vnd die vier lerer vnd wir hinwiderumb orienem der in vil dingen wol gesagt hät vnd in vil dingen ain ketzer funden worden ist
 30 vnd darumb näch sinem tode von der kirchen anathemasiert vnd verworffen. xxiiij. q. ij. quidam . § . orieniani. Dann es ist nit zeachten wer ain ding red sunder [130] zemercken was vnd wär vmb ain ding geredet werd. Vt. viij. di. ego et in glo. Vnd darumb so werden die schamrot als ain vnnse-
 35 liger Jude. Danne sy habent geIrret vnd von Irer geburt vf, geredet das, das falsche ist die da gesagt haben Cristum ge-

bettelt han. Sy würcen die boszhait vnd darumb so werden
 sy verloren als alle die so reden tünt die lüge vnd ist das
 die vrsach/ Danne es ist gesprochen, des herren ist das ert-
 rich vnd sin vollung ouch der vmbkraisz der erden vnd alle
 5 die so dar Inne wonent. ps. xiiij. Vnd er ist komen in sin
 aigen vnd die sinen enpfiegen Inn nit Als vil Inn aber en-
 pfiegen ob Im die ützit gaubent, so gaubent doch allain die
 sinen Im das sin. Daher der prophete gesprochen hät, din
 sint alle ding vnd das so wir von diner hand enpfangen ha-
 10 ben/ haben wir dir geben. j. paral. xxix. Item din sint die
 himel. din ist das ertrich vnd du häst geschaffet den vmb-
 kraisz des ertrichs vnd sin vollung. ps. lxxxviij. Du bist
 vber alle fürsten. Dir ist rychtum glory vnd eere du her-
 schest allen dingen, danne alles das so in himel vnd vf ert-
 15 rich ist/ ist dine. ps. xix. Nim war wie wyte vnderschai-
 den sint rychtum vnd vollung von denen die da gebunden
 sint mit bettel vnd ysen. Aber von Alexio sag ich dir beg-
 harde, daz er geIrret hät mit betteln. Aber durch den hai-
 ligen gaiste erluchtet, gieng er widerumb zü dem sinen vmb
 20 daz er niemant wer ain vberlast vnd burde. Dann Augusti-
 nus ouch oft geIrret hatt. Aber dar näch. In libro retrac-
 tionum. Hät er das verkert vnd gebessert Aber doch sint
 wir nit allwegen [130^b] schuldig nächzefolgen allen wercken
 der hailigen als wir sechen von Marcko der da abschnaid si-
 25 nen thummen. lv. di. siquis abscidit. Ja die ding die sich
 von gemainem rechten ziehend, sint in kainen wege fürze-
 heben daz man denen nächfolgen müsz. De regulis Juris Que
 a Jure. li. vj. Aber daz du Begharde bedächt vnd betrachtet
 häst die gilgen des ackers vnd die fögel des himels vnd ver-
 30 mainst zwüschen Inen vnd dir zemachen ain gelychnüsz vnd
 doch nit gantz als das erschint in der prattick dann der herre
 wider rätet In disen worten zehaben gefissenhait des zytlichen
 gütes, Sunder so hörst du ouch teglichs die prediger vnd das
 gebotte des herren mit was mässe sölich gefissenhait zehaben
 35 ist Es ist aber ain ander vnderschaide zwüschen dir vnd Inen,
 Ja vast ain grosser, danne die gilgen sint nackent vnnd blöse
 du bist aber mit zwyfaltigen röcken vnd manigfaltiger beklai-
 dung versechen als vor gesagt ist So tünt yetlich fögel yet-

liche körner vlesen. Aber du sündler tust mit allen vnd yetlichen dinen secken voll erfüllet durch geflissenhait des zytlichen güttes die körner vfhuffen. daz du aber sagst dich selbs betten äne vnderlász etc. Darzû sag ich, daz du nit bettest äne
 5 vnderlász als man liset. in collacione patrum. daz lucius der abt mit sinen henden gebettet hab. Der selb machet körb, die er verkouffet vnd den ainen taile brucht er zû narung vnd notdurft sin selbs vnd der sinen, Vnd den andern taile, Gab er hin zû narung vnd fürung der armen! In das ende, Daz
 10 der selben armen gebette hie durch [131] die zyt so er schlieff vnd esse, tett er füllen! vnd also bettet er äne vnderlász des du nit gewon bist zetûn, sunder falt din gebette dir zû sünde. ut ps. x.

Nauch disem tett der beghart mit endrung der farwe
 15 sins angesichts vnd in bitterkait siner sele reden vnd spräch. Ich hab gearbaitet schryende vnd sint haiser worden mine rachhen. ps. lxxvij. Vnd ist erhitziget min hertz in mir, vnd in miner betrachtung hebt an zebrinnen ain füre. ps. xxxvij. Danne der mund des sünders vnd der mund des gefärrers ist vf getân vber mich. ps. cvij. Aber doch wirt der nit gesechen zebrechen sinen fürsätze der den in ain bessers tût verwandeln. De Jur. Jur. peruenit. Vnd darumb wider den kläffigen vil redenden menschen wöllest nit kriegen mit Worten spricht Catho. Vnd niemer habent end die lichtfertigen wort, glych dem luffte. Job. xvj. Vnd mir felt zû
 25 das wort Gregory. Mar. xxx. Da er spricht. Es sint etlich die gar trege vnd kum anheben zereden. Aber so sy ainist angeheben so wissent sy kain mässe me der rede ze geben. Hec ille. Vnd spricht Augustinus Ich bin Innenbrächt worden
 30 daz die wärhait von den senftmütigen vnd fridsamen vnd nit von den kriegischen funden wirt. Et habetur. iij. sentenciarum. di. vlti. Vnd sagt Aristoteles. Primo de celo & mundo. Es ist ain notdurft daz die sūcher der wärhait nit syen vynde, danne von des wegen so haben die behem vnd
 35 die tūtschen [131^b] als die zû präge in der hohen schūle von dem gelouben disputierten nie mugen ains werden, Vmb daz sy vynde wären. Vnd also wurd zwüschen dir vnd mir, mit

sölicher disputierung niemer kain ainhellikait. Vnd darumb so ist dem menschen ain eere der sich sündert von kriegischen worten. Prouer. xx. Vnd spricht Augustinus nützit ist gelychers den würcungen des tufels danne hadern vnd kriegem Vnd Jhesus sprach nit wöllest kriegem mit dem wolgezüngten menschen, noch des holtze schüren in dem füre. Vnd spricht der Appostel nit wöllest kriegem mit worten danne es nienert zü nütze ist danne zü entrichtung der zühörenden Item vnd der diener gottes müs nit sin kriegesch sunder gegen mengklichem senftmütig. ij. ad thimo. v. Vnd Jhesus als die Juden stain brächten vmb daz sy in Inn wurffen, verbarg sich vnd gieng vsz dem tempel. Jo. viij. Danne es ist besser näch der sage Gregory. In omelya (so ferre nun vnser cristenlicher geloub nit verletzt wirt) daz wir geloubent frömder verstentnüs dann stetz deshalb zekriegem Vnd aber sagt der selb. In alia omelya super. ver. magister quod est mandatum magnum in lege. Es sint züsamem kome die Juden, vmb daz sy mit vile der menschen überwunden obgelegen dem, den sy mit vernunft nit möchten überwinden vnd haben vergehen sich, ain wärhait nackent vnd blösz sin, die sich doch mit vile der menschen hatten gewäppnet. Also tüst ouch du priester mit vngestümikait vnd vile der worten vnd nit mit vernunfte dich flyssen mich zeüberwinden vnd darumb so folge Ich näch cristum der da spricht Sint wyse [132] als die schlangen vnd ainfeltig als die tuben Hüten üch vor den menschen dann sy verrätent vnd gebent üch hin in Iren reten. Vt. Mt. x. Vnd darumb hät gesprochen der prophete nement war, die sündler haben gespannen vnd vfgezogen Iren bogen vnd zügericht Ire pfyl vnd geschütze in jrem kocher vmb daz sy schiessent in der finstre die so gerecht sint in jrem herten. ps. iiij. Vnd mag es gesin näch der lere des Appostels. ad Ro. xij. so wil ich mit mengklichem frid haben, mich wyter nit beschirmen noch verantworten, Sunder stattgeben vnd entwychen dinem zorne, Vnd wirt geen in die berg als der spare vnd als ain fruchtbarer ölböm in dem huse gottes hoffen in sin barmhertzikait yemer ewengklich vnd von welt zü welte. ps. lj. Vnd hier mit allweg zü schied er ab vnd gieng hin mit sinem esel, vnd was nit me da. Vnd ich süchet jnn

vmb daz ich wyter mit Im redte vnd ist nit funden worden
sin statt. Vt. ps. xxxvj.

Wyle aber üwer vätterlich wirdigkait nu me erkennet hât,
 5 daz diser Beghart worden ist als ain mensch nützit gehörende
 noch in sinem mund ainch widerrede habende sunder mit
 sinem swygen vermerckt wirt miner rede gehuln haben als
 dann die regel sagt. qui tacet de regulis juris. li. vj. do ver-
 schwand er mit siner jrrung nâch sitt der fechtern vnd schir-
 10 mern, die, so sy nit mer nütz sin, noch schaden [132^b] schaden
 getûn mugen, abtretten mit etlichen apparäten glycher wyse
 als ob sy gesigen haben. Vnd got verlies Inn. Hochwürdiger
 fürst vnd herre, durechtent vnd ergryffent Inn mit sinen an-
 hangenden begharten lolharten Begynen vnd beguten wyle
 15 sust niemant ist, der mit gerechtikait sölichs tûn werd vnd
 machent daz dero pene syg ain forcht den andern. ff. de penis.
 l. capitulum. §. famosos. Danne es kuntlich ist, daz die Ir-
 rung, dero nit widerstand beschicht, wirt gevestnet, vnd die
 wârhait so man die nit beschirmp, wirt vnder gedruckt. Aber
 20 zeuersumen die verkerten bösen menschen zestrâffen, so du
 das wol tûn möchtest! ist nützit anders! danne jnen gunst
 geben vnd sy vfenhalten. lxxxviij. di. error Dwyle doch disz
 verflücht geschlecht der menschen von denen ist, darvon sa-
 lomon vor zyten bischof zû costentz ain vorfare üwer hoch-
 25 wirdigkait gered hât. post ysid. li. suo vocabulorum de mo-
 nachis. Da er sy nennet circumcelliones, die da vnder ainem
 klaide vnd habit der münchen allenthalben vmbschwaffent
 vmb die zellen der hüsern, hin vnd her louffende, vnd (als
 der selb spricht) sint ain aller böstes geschlecht der menschen
 30 gantz verachtet vnd verlassen, daz da durch Ananiam vnd
 Saphyram in dem anfrage der kirchen blûyt vnd sich erhûb
 vnd durch den appostel Petrum ward abgetân. Vnd sölich
 sint füro me in kain wege, münch danne die selben mit ai-
 niger professz got werdent zûgefüget. Hec ille. Von welchen
 35 circumcellionibus vnd vmbschwaffern obgemelten, man ouch ge-
 schriben findt jm rechten. xxiiij. q. v. c. j. Vnd sint wâre
 [133] gelychsner phariseen vnd yppocriten die cristus allwegen
 in sinem leben hât gehasset vnd in sinen leeren gestrâffet für

alle ander geschlecht der menschen, Als das kund ist aim
 yetlichen, die ewangely ansehenden, darzû sint sy vngehorsam
 ouch hochfertiger rede vnd verkerer, die alle huser entrich-
 tend lerende! das vnnütz vnd nit notdürftig ist von wegen
 5 schnödes gewins allwegen bettlende, böse vnuernünftige tier
 jrs buchs, lassz vnd trege Ad thi. c. j. Erschynende in klai-
 dern der schäffen vnd doch sint Innwendig röbig wölfe. M.
 vij. Vnd vast nütz vnd güt zû vngütikait danne ir rede
 schlycht als ain krepse.. ij. ad thi. ij. et cetera.

10 **D**Arumb gnediger herre Ich demüttenklich bitt, daz Ir
 sölichen der lolharten vnd begynen jrrungen, wöllen widersteen
 die wärhait beschirmen vnd sölich verkert menschen betrüben
 vnd äne alles verziechen sy füro nit mer vfenthalten, durch
 den der vsz willen vnd begird des vatters vnussprechenlich
 15 gegangen ist vsser dem lybe der jungfröwen hüpsch von ge-
 stalte ob aller menschen kinden, vmb daz er vszgiesz die gnäd
 sines gaistes in üwer hertze vnd leftzgen vnd vch salben mit
 dem öle der fröiden für ander üwer gesellen. o. bischoff in die
 ewigkait lebende, verstee merck vnd volfar glücklich vnd re-
 20 giere in dem der da regiirt vnd rychsnet gesegnet von welt
 zû welt yemer ewenklich Amen.

[133^b] **D**Em durlüchtigen fürsten vnd herren herrn Karlin Marggrauen zû Baden etc. Vnd zû spanheim Minem gnedigosten herren Enbüt Ich niclās von wyle der zyt Stattschriber zû Esselingen min vnderthenig willig dienste all zyt zeuor.

5 Ich hab nechst gnedigoster herre ain latinische epistel gelesen von babst Pio (wylant do der kaiserlicher Secretari was) gemachet vnd dem durlüchtigen fürsten hertzog Sigmunden von österrych etc. zûgesandt! nāch dem mir aber dise epistel gefiel! vnd Ich die main Jungen fürsten fruchbar sin! dero

10 üwer fürstlich gnād yetz dryg hāt! die nu zemāl in. Irer Junglikait ze enpfelhen sint ainem leer maister daz der die güter künsten züchten vnd tugenden vnderwyse. darzû ich dann vsz schuldiger danckbarkait, der manigfaltigen güthait, mir von üwern gnāden bewysen! ouch gern fürdern rāten

15 vnd helffen wölt! so hab ich die selben obgemelten epistel transferyeret vnd in disz nāchfolgend tütsche gebrācht! die ich bede zû tütsch vnd zû latine. üwern gnāden hier by zwifaltig schick, vnderthenig bittende. daz üwern gnād dar ob sin wöll! daz denselben üwern gnāden sünen minen gnedigen herren

20 sōlich schriften zû gebürlichen zyten für gehalten werden vnd so sy durch das tütsche dise latinische epistel verstanden haben! Sy ouch als dann den leren vnd vnderwysungen dar Inne begryffen nāchkoment vnd da mite zūgelerten fürsten gerātent! ander fürsten vnser landen an kunste vbertreffende!

25 Vnd üwern fürstlich gnāde hierInne sich selbs bedenck vnd erwege! wie grosz vnd vile Ir yetz darumb geben wölten! daz ir der latine so vil gelert weren! daz ir die poeten vnd oratores wo Ir [134] die lesent versteen möchten vnd selbs vsz kunste güt gerecht vnd wolgeziert latin reden kōnden.

30 Das aber in den gemelten minen Jungen herren nit wol

beschechen mag äne üwer gnäden hilffe jrem pedagogen vnd leer maister zetûn. gegen den selben üwern sünen mit vätterlicher vnderwysung vnd gütiger straffe zû leschung der gailigkait Irer Jugend! die gewonlich hier Inne jrren tûnt! als das
 5 üwer durlüchtig hohe vernunft basz waisz vnd kan ermessen danne Ich dar von schriben mug! der üwer gnäden bin vnd sin vnd belyben wil getrûw bisz in min ende etc.

Dem durlüchtigen fürsten vsz kaiserlichem blüte entsprossen herren Sigmunden hertzogen zû österrych zû styr
 10 zû kernten vnd zû krain etc. grauen zû tyrole! sinem andern herren Enbüt Eneas Siluius poet vnd kaiserlicher secretari vil hail. Des ersten als jch an den kaiserlichen hofe komen bin! ist mir grosz begird zûgestanden dir etwas zescriben. jch hab aber gefürcht die sitten diser nüwen wölte, dero
 15 nützit gefelt danne was sich ir allermaist tût gelychen. danne zû der zyte ist ain sölich gewonhait! daz gar nâch alle die so yemant schriben tûnt (ob sy wol in sölichem schriben nit mer dann ain ainige persone anreden wöllen) sich gebruchent jrtzens. Ir vnd nit du sprechende. Gelycher wyse, Als ob
 20 sy hie durch der selben persone me eeren tügen zûfügen vnd bewysen. Welcher gewonhait wyte in tûtschen landen pflegen wirt ouch die in welschen landen etwa lang geweret hat. aber als darnâch Franciscus petrarcha die grobkait [134^b] sölicher zyte verlies vnd anhüb nâchzefolgen dem loblichen wolgezierten schryben der alten. Vnd darby ouch vil andern also
 25 gefiel zescriben vnd zereden wie das kûscher alter vor zyten geredt vnd geschriben hat! do kam her vs! vsz kriechischen landen Johannes Crisoloras, der da zû costentz Im consily starb vnd alda vergraben ligt ain man grosser kunst! des alt
 30 fordern von röm bûrtig! Vor zyten dem grossen Constantino gen bisuntze (daz man yetz constantinoppel nennet) nâchfolgent. Der selb Crisoloras vil der gelerten in Italia tett fûren vnd bringen zû rechter vnd wärer kunst zierlichs gedichtes redens vnd schribens. Also daz vf hütigem tage der selben
 35 walchen in Italia hoflich vnd künstlich gedicht red vnd schriften gesechen werden sich gelychen den reden vnd schriften lobs wirdig! so zû zyten des kaisers Octauiani Augusti

gewesen sint. Dann ob yemant liset leonardum aretinum,
 guarinum veronensem, poggium florentinum, aurispam sicculum,
 anthonium Vincentinum vnd etlich ander so yetz in Italia le-
 bent! So findet er in den selben wärlich erschynnen den
 5 guldin flusse zierlicher gesprechnüsz Marci Tuly Ciceronis vnd
 den milchin bachhe lobliches gedichtes Titi Liuy Patauini.
 Disz alle obgeschriben yetz tünt dutzen in Iren schriften, die,
 zû denen sy dann schribent. Vnd sagent das bede die kriechen
 vnd latinischen also zû obgerürter zyte geschriben haben. Als
 10 das die brief vnd missiuen der hochgelerten maistern Socratis
 demostinis Ciceronis vnd Macenatis, den aller grösten vnd
 mechtigosten mannen zû gesand tünt bezügen. vnd sprechent
 daz sy hierjnne nit allain den haiden nächfolgent sun[135]der
 ouch denen, die wir als hailigen anruffent vnd eerent daz ist
 15 Jeronimo Augustino Ambrosio vnd Gregorio. Die nit allain die
 menschen sunder der götlichen maiestate anredende, also spre-
 chent. verlich herre. gib. tû verheng. erbarm dich. tail vs vnd
 desgelychen vil etc. Welche doch zierlicher vnd bas danne wir
 gewist hetten sich Irtzens zegebruchen besunder gegen gotte!
 20 wa das eer gebracht haben sölt. Aber dise fürsten wolredens,
 hât bedücht daz sy alle schonhait vnd zierlichkait jrs redens
 vnd schribens hetten entschöpft vnd verwüestet, wo sy das als
 wir yetz tünt hetten gesetzt. Mit disen mannen gehile ich.
 Vnd tûn von min selbs wegen vnd in minem namen nit ye-
 25 mant anders dann dutzende schriben. Aber doch ist daz Ich
 an dich briefe schriben sol. So zwyfeln ich was mir zetünd
 syg vnd fürcht daz du mer lobest, die gewonhait diner lüten,
 dann dise min vrtail, vnd mainst villicht den kungen vnd für-
 sten nit anders zescriben sin! dann wie sy sich selbs schri-
 30 bent vnd sy ouch andern schriben tünt, denen gewon ist sich
 selbs ze Irtzen vnd zesprechen wir gebieten, wir tünt, wir
 wöllen. Vnd des gelychen tusender laye. Aber sölichs, das
 vsz menschlichkait vnd demût ainen vrsprung gehept hât! wirt
 vnbillich zû hoffart gezogen vnd gebruchet. Dann ob die
 35 küng wol gewalt vnd macht haben! daz für gang vnd craft
 des rechten haben müs, was sy wöllen vnd Inen gefellig ist!
 So gebruchen sy sich noch dann der messigkait vnd demût
 so sy schribent vnd etwas haissent oder gebietet! daz sy nit

wöllen gesechen werden sölichs durch sich selbs allain getän
han, sunder mit ander [135^b] Irer reten vnd vndertanen ge-
fallen. Vnd dich sol hier wider nit bewegen noch des zū
ainchem vngelouben füren! daz die andern fürsten den obern
5 schribende, Sölich Irtzen Ir selbs halb als ain hoffart vermy-
dent Als die brief vnd missiuen zum kaiser aim obersten für-
sten des rychs gesant kuntbarlich tünt bewerer. Danne der
hertzog von mailand schribet dem kaiser Ich bitt vnd nit wir
bitten. Item üwer maiestäte tün Ich mich enpfelhen vnd nit
10 wir vns enpfelhen etc. Vnd hät das ouch vrsachen vf Im
villicht anders danne du mainst Dann wyle die vndern gewält
entspriessent vnd koment von den obern gewälten! so ist es
nit vngebürlich so die nidern den obern schribent daz sy das
irtzen ir selbs halb tügen vermyden Gelycher wyse als ob der
15 vnder sprech den kaiser anredende. o. kaiser ich mag mich
der minen gegen dir mit minem irtzen nit gebruchen! wyle
sy die sint die du mir häst enpfolhen. Darumb ob ich wol
die selben gegen andern in minem schriben betütt, so mag
ich doch die gegen dir nit betüten! sunder so betüttest du
20 als ain oberer mich vnd dieselben. daz man aber gewon ist
vnd pfligt die küng fürsten vnd hohen amplüt anders dann
ich yetz schrib ze irtzen, das läsz dich nützit abfüren, danne
dasselb ist das, daz ich hie schilt vnd straffe. danne wer vil
die fürsten Irtzen vmb der dingen willen dero sy sich ge-
25 bruchent von messigkait vnd demüt wegen. Sölichs ist nit
eer erbietten sunder mer den eeren abziechen. gelycherwyse
als ob die fürsten nützit äne die Iren vermöchten. darumb
wenne wir Inen rechte eere wölten erbieten! so fluchent wir
billicher das, das sy durch [136] demüt getän hant vnd schrib
30 gib fürst. Tü. läsz ab, vergib. etc. als ob wir sprechen, des
bist du allain mechtig vnd gewaltig, ob es sust wol allen dinen
reten wider wer. Dann wie wol der babst sich selbs schribt
ainen diener der dienern, noch dann schribt man nit also jm
hinwiderumb, aim diener der dienern sunder ainem vatter der
35 vättern daz ist aim herren der herren. Aber diser worten
sint villicht anefangs zevil vnd die mich von minem fürsätze
zū wyte haben vsgeführt. Ich hoff aber hiedurch beschechen
sin, daz du mit mir diser dingen obstenden gehellest, oder

aber mir zû kainem argen vermerckest, daz Ich den alten
 nächfolgende, dich in minen schriften dutzen tûn vnd ob du
 das nit vsz obgemelten vrsachen tûn werdest, So tûg doch din
 angeborn gütigkait dich des bewegen. Nu ist das so ich dir
 5 (als obsteet) langest gern geschriben hett vszerichten.. Als
 ich des ersten an disen dines vettters des kaisers hofe kam!
 ist mir vil gesagt worden von diner grossen fürpündigen tu-
 gend. Ainer sagt von diner grossen gütigkait, der ander von
 diner wundersamen messigkait. Etlicher prediget din wysheit
 10 grösser sin dann sölich jugend tett haischen. Vil lobtent dich
 sin milte vnd ainen liebhaber des rechten vnd aber ander daz
 du dich latinischer rede, als dero ain rechter liebhaber ge-
 fiessenlich gebruchtest! daz doch zû disen zyten selten vnder
 den fürsten funden wirt! vsz welchen dingen jch anhûb sament
 15 dich zewundern vnd liebzehaben vnd schätzt sin als ain mer-
 wunder so ainen jungen fürsten mit so vil tugenden erschinen.
 doch so was ich nit bald gelöbig noch ains yeden stimme für
 war vfnemend, sunder gieng ich zû andern [136^b] vnd frägt
 yetklichen vnd fand mengklichen mit ain mund sölichs reden.
 20 daz noch dann mir nit genûg was, sunder hieng Ich wyter an
 diner syten vnd so die edeln etwenne an ainem ring hielten
 oder stûnden! hab ich mich als ain specher dir dennoch vn-
 bekant vndergemischet, dine sitten besehen vf din geberd vnd
 rede gemercket, din gestalt vnd angesicht nit klain durch-
 25 schöwet, vnd fand messig sitten, gût geberd vnd vnsträfbar
 latine! da durch wärhait der dingen mich tett vberwinden, daz
 ich nit mer sölichs nit gelouben mocht sunder lies ich zû, für
 zügen diner tugend! mine aigen ougen vnd oren vnd bin
 worden ain prediger vnd verkûnder der dingen dero ich vor
 30 gewesen bin ain späher vnd forscher. Vnd du solt nit ge-
 louben mich disz ding schriben als ainen gelychsner vnd lieb-
 koser! danne vor allen dingen râte ich dir daz du alle ge-
 lychsner vnd liebkoser in welcherlay gestalt vnd vnderscheid
 die sien fliechest als ainen aller bösten vnd schedlichsten
 35 schelmen vnd daz du kaine menschen mer hasset vnd ferre
 von dir vstribest danne die so mit Worten sûchent dir zege-
 fallen vnd dich vnder ougen lobent vnd was du tûst, bewerent
 Item vnd wes du abred bist! sy ouch abred sint! vnd hin-

widerumb wes du gestendig bist, sy aber gestendig sint. Ja
 Ja. nain nain als in dem bûch terency gnato tût Vnd ouch
 Juuenalis schribt, wo du sprichst mir ist haisz, da sprechent
 sy wir schwitzent. dann disz ist ain aller böstes geschlecht
 5 der menschen das die fürsten aller maist tût verführen vnd
 bringen zû schedlichem fale. das nit allain der Jugend ze
 fürchten ist, sunder ouch den alten. Aber warumb ich dich
 öffentlich vnd vnder [137] ougen lobe! des wil ich ouch nit
 geschwygen Es erschynent für wâr in dir dise tugend, die ich
 10 yetz erzellende gelopt han. Ich hab aber die nit darumb
 erzellet daz du dar von glorieren, dich des vberheben oder
 darumb dester hochfertiger sin söllest. Allain schrib ich disz
 hier vmb daz du ain söllich gûthait behüttest vnd ainen söl-
 lichen schatze behebest vnd merest vnd dich also haltest, daz
 15 dine tugend mit den Jären dines alters wachsent vnd du wer-
 dest von tag zû tag tugentrycher vnd nit in. das laster fallest
 etlicher menschen die gût Jüngling gewesen sint vnd worden
 bösz alte (als daz sprûchwort ist) ain gûtes hünlin vnd ain
 böse henne. Dann min begird ist. Daz vsz dir ain gûten
 20 Jüngling werd ain aller bester man, das dir so vil lychter ist
 vnd sint wirt, als vil du bas gezogen werden bist vnd für
 wâr! so solt du vor allen dingen dem durlüchtigen fürsten
 dinem vatter des danckbar sin daz er din gemüt zepflantzen!
 dich vnder maisterschaft in gûter gehorsamkait gezogen hât
 25 vnd dir zûgefüget vnd geben wolgelert maister vnd vnderwyser.
 Dann disz ist ain aller nutzlichoster husrâte vnd ain aller
 rychstes erbe! vnd besser danne ainch fürstentûm dann rych-
 tum gût gewalt macht vnd eere diser welte, sint gauben vnd
 gûte des gelückes, vnstett wandelbar fliessend vnd hinfallend!
 30 die da nâch willen des gelückes hin vnd her sich verwandelnt!
 daz selb gelück hat menschlich geschlecht als in ain schimpf-
 lichen spile! yetz den erhebend vnd yetz den vndertruckend
 und ist Im nit grosz (als Juuenalis schribt) vsz ainem hafner
 zemachen ainen kûng vnd herwider vmb vsz ainem kung ainen
 35 hafner. Der grosz alexander als der Indiam [137^b] erobert hatt!
 tett (vmb des willen daz man sech wie vil vnd grôsz er ver-
 möchte) ainen gartner zû der höche kûngklicher wirdigkait
 erheben. Dyoclecianus zû zyten do er der welt regiment vnder

jm hatt! entschlug vnd vssert sich der purpur vnd kaiser-
 lichen hoffart, vnd gab sich zu pflanzung der bömen vnd zu
 buwe vnd wesserung der garten vnd krütern. Aber die güt-
 hait der sele vnd des gemütes die da sint küschhait stettikait
 5 stercke gerechtigkeit mässigkait verstentnusz vernunst vnd ge-
 dechnusz hangent dem menschen an mit vestem bande vnd
 mugent vns nit anders genomen noch entwert werden, dann
 mit dem tode. Dise sint wärlich vnser güt, dise tünt vns (die
 wyle wir in diser welt sint) verlyhen ain süsses leben, vnd
 10 gebent vns so wir von hinnen schaiden hoffnung ewiger selig-
 kait. Vnd darumb wyle die natur dise gauben dir verlichen
 hät vnd dins vatters sorg vnd flysse, die in dir hät gemeret!
 So vil ich dich des sin gewarnet daz du behaltest sölich güte
 so in dir ist. Zu welichem dinge ich main aller maist not-
 15 dürftig sin lernung der geschrift, dar Inne du güten anfang
 getän häst Aber siddem mäle du gesechen wirst sölich lernung
 der geschrift yetz gelych als ain Joch vnd burde ab dir ge-
 worffen han So ist nit fremd! ob Ich mich flysses gebruch
 dich widerumb hier zu zebringen. Danne die fürsten nit dar-
 20 umb (als etlich mainen) Die geschrift lernent, daz sy der
 latine vnder richtet, mit fremden lüten reden vnd gemeinsame
 mit Inen haben mögen! Danne ob wol das nutzbar vnd
 fruchtsam ist! So ist doch des ain ander vnd edler vrsache.
 Dann wyle all leere vnd vnderwysung [138] rechtz lebens in
 25 kunst der geschrift vnd besunder latinischer wirt begriffen.
 Darumb gebürt sich die zekönnen vnd ist nit gnüg allain ge-
 lernet han die regel vnd anfänge diser dingen man gange dann
 hier Inne wyter. Aber die fürsten vnser zyt tünt oft sölichs
 schetzen wysen vnd laiten zu dem maistern der philophie vnd
 30 der rechten! glycherwyse, als ob sich nit gebür den fürsten
 recht zeleben. Darumb ich dich bitt! du wöllest den selben
 nit vflosen danne niemant zu ainem lobwirdigen man oder ver-
 rümpften fürsten geraten noch werden mag Er habe dann mit
 den gauben der nature Im selbs ouch zugefüget leer vnd
 35 kunste. Vnd für wär, alle fürsten die vor alten zyten in
 grössem lobe erschynen sint! Sint gewesen der geschrift wol
 gelert. philippus Macedo (als sin sune Alexander der grösz
 geborn was) fröwt sich daz er zu der zyt ainen sune hatt!

do aristoteles in leben was. Der selb Allexander tett sich ouch
 zû den zyten söliches alters als du yetz bist, nit vssern noch
 entschlachen der kunst der geschriften! Sunder als er asiam
 zoch! fûrt Er mit Im die maister Aristotilem vnd calistenem
 5 vnd lies nit ab vnder dem gerûsche der wâffen vnd des har-
 nûschs zehören vnd zelernen die kunst der philosophie, des-
 halb er vberusz vast selig gewesen wer, wo er allain das
 laster der trunckerye nit an jm gehept hett! Alcibiades vnd
 temistocles! die da by den kriechen durchlüchtig vnd verrûmpt
 10 gewesen sint! wâren gelert vnd geübt in der kunst der phi-
 losophie. Epaminides ain tebanischer, der zû kriechen für ainen
 fürpüntlichen fürsten gehalten was, tett nit minder [138^b]
 flysses zû lernung vnd studierung schriftlicher kunste danne
 zû übung der wâffen vnnnd ritterlicher dingen.. Ich kum nu
 15 vf die römer. Was mag schöner bas vnd zierlicher geschriben
 werden! danne die bücher commentaria die Julius der kaiser
 von jm selbs geschriben hât? der selb do er in franckrych
 vnd tûtschen landen stryttens, pflag, nachtz anschraib was er
 tags hatt begangen. Sin erb Augustus tett machen vnd setzen
 20 bede frye vnd vngemessne gedicht vnd ouch gedicht der ge-
 messnen mensuren vnd findt man ouch noch sines gedichtes
 schon lobwirdig gemessen geschrift die Er zû lobe des büchs
 Eneidos virgily gemachet hât. Was sol jch melden die hoch-
 gelopten gelerten Fabios Cornelios, oder catones? was sol jch
 25 sagen von pompeio der so girig entzündet was vf die kunst
 der geschrift daz er zû zyten grosser vnmüssen vnd do er
 consul Vnd der oberst zû röm was, noch dann nit vermyden
 wolt! den natürlichen maister Possadonum in Rohado in siner
 kranckhait zebesechen. Item Catho als er der latinischen
 30 kunst vol was vnd lang die kriechisch geschrift hatt verachtet!
 gewan zû letscht des rüwen Vnd tett des, so er Jung ver-
 schmachtet, Erst an sinem alter begeren vnd hatt nit zwyfels
 Er wölt sin alter sölicher kunst noch vnderwysen vnd sinen
 mund zû kriechischer zungen beweglichkait biegen vnd wennen.
 35 Recht vnd wol hant getân dise fürsten welche! ob sy wol
 fürstentûm gewalt vnd macht gehept haben zeherschen vnd
 den fôlkern zegebenen! noch dann ouch darby der geschrift
 wolten dienen. Sy haben aber gewist die stimm platonis, die ouch

[139] gesagt wirt gesprochen sin von cicerone vnd boecio daz denne ain yetklich regiment ain gemainen nutzes selig ist vnd wol darumb steet! so des rigierer kunst der wysheit haben gelernet. Welche wysheit äne zwyffel geschöpft wirt vssz dem
 5 brunnen der philosophie. Aber du mainst vnd wännest villicht dise ding mären sin so geschriben sint von den alten (die als man sagt, in müsse arbeit vnd in arbeit müsse flissenklich gesücht haben. Aber disen dinen wäne mugent dir benemen etlich yetz lebend menschen. Welche ob sy wol an
 10 gewalte gemaines nutzes mit grosser vnmusz beladen sint! noch dann die kunst der geschrift nit versumment. Leonellus yetz Marggrafe estensis schribt so schone hoflich vnd zierlich gedicht, daz du nit ützit vnderschaides berüfen magst zwüschen siner vnd Ciceronis geschriften. Des gelychen wirt ouch ge-
 15 sagt von dem Marggysen von salus Item des marggysen von mantöwe sün handelnt übert eerent vnd haben lieb sament wäffen vnd geschrifte. Alfonsus küng zü Aragon dem ouch das küngrych Sicily gehorsam ist vnd der taile welscher landen der etwenne daz grosz kriechen genempt was, der ouch
 20 so oft vber wunden zü letst vberwand vnd das gelücke jm langzyt wider wertig zü letscht in günstigen willen Im tett verkerren! ligt in kainen kriegen zü felde, äne sine bücher. Wohin der rytet oder fert! dahin folgent jm ouch näch die selben sine bücher. Vnd er syge haimant in hüsern oder
 25 vsserthalben zü felde in den zelten! So tüt er doch zü allen tagen, Aintweders etwas lesen oder etwas hören. . . Ich gee wyter vsz welschen landen [139^b] vnd verlässz all ander vmbkraisz der welte, Vnnd kum gen Britania do ain hertzog ist Cleoestrie, der vil Jär her geregieret hät
 30 das küngrych das wir yetz nennent Engelland, dem selben ist so vil liebe zü kunst der geschrift, daz er vsz ytalia zü Im berüft hät, etlich maister der poetrye vnd oratorie künnend vnd wol gelert Sichst du nu? daz ouch dise vnser zyt zü lasset duldet vnd hät, gelert fürsten vnd herren
 35 vnd vnder denen du magst gezellet werden! wo du in der lernung der geschrift wie du angefangen hät, füro tüt vol faren. Vnd Ich nenne dich darumb nit gelert daz du latin reden kanst! Danne ob wol das hüpsch ist! So wirt es doch

ouch geben den hehern rappen talen vnd aglaistern. Dann
 als Anthonius vberwunden vnd stryts nidergelegen was! vnd
 Octavianus Augustus ain vberwinder widerumb haim zoch!
 Redt ain rappe der latine vnderwissen. Bis wilkomen Auguste.
 5 ain kaiser vnd gebieter. Daher ist ouch der spruchh persy,
 da er spricht, Wer hât den sitich vnderwissen sines cheres!
 daz ist sines redens vnd die aglaister gelert sich zefflissen vnser
 worten. Vnd antwort darzû des vrsachh sagende vnd spricht
 der buche das ist der hunger, der da ist ain maister diser
 10 kunste vnd ain ziecher merer vnd wyterer Innwendiger sinnen.
 was bedunckt dich aber, so da kumpt ain vnger oder ain
 walch oder francose ain redner der latine vnd so du jüngling
 den versteen wirst vnd die andern alten by dir sitzende
 glych den vngehörrenden den nit mercken noch versteen mugen.
 15 Aber noch hüpscher wirdt daz sin, vnd denne wirt jch dich
 nennen [140] gelert, so du versteen wirst die oratores vnd
 die maister der philosophie vnd du von dir selbs vberläffest
 vnd mercken magst die poeten. Disz bedunckt dich aber vil-
 licht zegrosz sin vnd zevil schwer. Es ist aber nit also ich
 20 wil dich nit tag vnd nacht bücher vmbziechen, sunder beger
 ich allain ains yeden tags ainer stünd, die du gebest der ge-
 schrifte. Aber das wil ich dir sin zû sorge! daz der gelert
 syg, den du hörest vnd wyse vnd erfahren den du vfnemest zû
 dinem maister vnd vnderwyser. . Vnd dich wölle hierInne nit
 25 betriegen vnd verführen, ain vppig hoffart des namens vnd Titels,
 Dann kainer darvmb dester gelerter ist vmb daz er ainen
 namen der maisterschaft zû parys oder athenis, oder andern
 hohen schülen hât erfolget. Aber der ist gelert vnd erfahren
 der mit natürlicher vernunft begaubet, ouch flyssig vnd ems-
 30 senklich gelernet hât vnd erfahren die maister der künsten vnd
 so er vil gesechen gelesen vnd gelernt hât manigfaltig schriften
 der büchern! denne ouch dero vil hât in siner gedechtnüsz
 behalten vnd nit allain der hailigen geschrift, Sunder ouch der
 weltlichen gelert ist vnd maniger dingen ernietet geübt vnd
 35 getriben! Vsz sölichen maistern wölt Ich ainen by dir sin,
 mit dem du redtest näch dinem willen, vnd der die zyt dich
 zeleeren nit vsz jm selbs sunder vsz dir tette nemen vnd der,
 so du wöltest les vnd so du nit wöltest schwige. aber dir

wurd gebürren alle tag etwas wöllen vnd so du zway Järe dise min leere vnd vnderwysung also hettest gehalten! So wurdest dich selbs schetzen vil mer gewins vsz disem lesen vberkomen han dann ob du ain gantzes [140^b] lande gewonnen hettest.

5 Ich lob dinen hofe vol sin rittern vnd rittermessiger lüten danne sy sint die die dine land behüten vnd beschirment vnd ist loblich vnd zierlich ainen fürsten mit güter weere erschynen. Aber kainen gelerten man by dir sin, mag jch nit loben noch beweren, danne als du die ritte fürest also möchtest ouch

10 führen die lerer güter künsten, die dich vnderschaide des rechten vnd vnrechten vnderwysent vnd dich machten ainen man gantz in allweg gerecht vnd zü allen setteln (als man spricht) tügig! Vnd dir gebürt nit denen zefolgen die vmb daz sy costen abstellen, lerer der geschrifte vsz schliessent! Vnd löwen vnd

15 beren fürent. Als der spruch ist Juuenalis. der vnseelig vsgeber hāt nützit daz er geb sinem fründe vnd hāt doch wol daz er gebe sinem bülen Quintilie Im ist ouch nit gebruchh daz er kouff vil flaisches zeführen den vngezempten löwen vnd setzt der selb Juuenalis darnäch yronice, daz ist spötlich oder sträf-

20 lich vnd daz widersins zemercken ist Vnd spricht, daz vnuernünftig tier wirt gehalten mit minder costung aber das Inge- waid des poeten tüt vil zevil hinnemen vnd verschlinden etc. Vnd darumb so sag Ich. Nim* dir ainen man grosser kunst vnd lere. Vnd sich nit an ainchen costen wavon dir grosser

25 nutze komend ist. Du frägst villicht was nutzes? Ich sag dirs mit wenig worten, Vmb daz du nit sölichen nutze der geschrift tügest verachten. Wenne du die manlichen järe erraichet häst! So wirt dir die eere vnd der nutze hieruon entsteen! daz so du in dem räte redest! die andern alle schwygent. wyle du

30 ainiger me danne die andern alle kanst waist vnd versteest. Niemand mag dich [141] betriegen, niemand getär sprechen das ist recht das ist vnrecht, das billich das vnbillich, Es syge dann daz er aigenlich vnd wärlich wissz sölichs also wär sin. Ist daz aincher Im fürnimpt etwas vnerbers zeräten oder ze-

35 fürdern! So bist du berait da, sölichs mit gegründten vrsachen zewiderreden vnd zeuerwerffen. Wilt du anreden das folcke? Welcher mässz zereden syg! tünt dich die geschriften vnderwysen. Wilt du aber yemant loben oder schelten, das tünt

dich Quintilianus vnd tulius leren. Ist krieg vfenemen? vnd
 sich der waffen oder der weere zegebruchen? des tüt dir vege-
 cius (welcher mässz das beschehen soll) vnderichtung. ouch
 des gelychen Titus Liuius vnd quintus Curcius vnd Justinus
 5 vnd Luctius Flaccus vnd swetonius vnd Salustius Crispus vnd
 die gantz schare der schribern der historien. DarInne du die
 stercke des grossen Alexanders vnd die listikait hanibals vnd
 die behendikait vnd vfsetze Faby vnd die wysheit Cipionis vnd
 kriegens maisterschaft July des kaisers vnd die türstikait Ser-
 10 tory vnd Marcelli vnd die geschidikait Jugurte vnd die kunst
 aller dero, die kriegens vnd strytbarer dingen gepflegen hant,
 finden wirst. Vnd magst durch aigen erfahrung niemer so
 vil erlernen, als vil du des mit lesung der geschriften wirst
 vnderichtet. Wilt du aber, wie du ain regiment gemaines
 15 nutzes regieren solltest wissen? So sint dir die bücher polli-
 tiorum (die Aristotiles gemacht vnd Leonardus Aretinus in
 latin gebracht hât) zelesen. Aber die alten translatz der selben
 bücher lässz rüwen vnd tû dich dero nützit bekümben, danne
 sy ain zierlichkait des gedichtes/ laster vnd gebrechen [141^b]
 20 haben vnd zevil die verstantnüss Irren tûnt. Zû regierung
 hushabliches dinges, ouch dines husgesinds vnd din selbs/ Ist
 fruchtbar nütze vnd güt yconomica Aristotilis vnd Tuly in
 dem büch Officiorum vnd die santbrief Senece vnd alle des
 selben bücher. Wie zeregieren syg, ain eeliche husfröw/ hât
 25 beschriben Franciscus barbarus, Wie kind zeziehen? Plutar-
 chus. Wie du dich mit fründen halten solltest Vnd wie dich
 selbs in dinem alter? Cicero Arpinas der selb ouch von ver-
 achtung des todes vnd von andern anfechtigung geschriben
 hât in Tusculanis questionibus. Wie aber die sittbaren gûten
 30 tugend zevmbfachen syen? das haben die so ich obgenempt
 han, Vnd nâch Inen Macrobius vollenklich gesetzt. Wilt du
 das buwerck des feldes erkennen/ des tüt dich Virgilius in
 georgicis vnderwysen. wilt du die figur vnd gelegenhait diser
 gantzen welte mit den ougen dins gemütes, sechen vnd man-
 35 gerlay lendern anstössz vnd dero sitten beschöwen vnd was
 ain yetklich land trag vnd habe vnd was es vermyde vnd wes
 es mangelnd syge? So nim dir plinium von der natürlichen
 histori ptholomeum vnd solinum vnd ysidorum hispalensem.

Wilt du des himels gestirn vnd der planeten löffe vnd des
 hagels der regen Vnd des tonners vrsachen wissen? So kere
 widerumb zů Aristotilen zů Senecam vnd Virgilium. Wilt du
 der kůngen vnd fürsten sitten vnd die vnseligkait der her-
 5 schenden erfahren? So lise senecam in tragedys. Wilt du die
 menschen des gemainen pűfels vnd die ritter Inen selbs vsz
 hoffart wolgefellig vnnnd der bűben vnd riffian vf setze vnd der
 dienenden knechten betrugnűsz (Vmb daz du dich [142] dar
 vor hűten mugest) erkennen? So nim dir für plautum vnd
 10 Terencium. Wilt du gelert werden wie die laster der men-
 schen syen zeoffenbarn vnd zestrűffen? so hab dir schnell be-
 rait Oratium vnd Juuenalem. Wilt du der hirten gewonhait
 beschűwen? so hab dir hier zů buccolicam Virgily. Wilt du die
 mären vnd fabeln der haiden der alten vnd der trurigen be-
 15 trűbten menschen arműt vnd der liebhabenden santbriefe vnd
 der liebe artznye erkennen? des tűt dich ~~Ouidius naso~~ vnder-
 richten. So ist ouch Stacius thebeidos vnd achileidos hierzů
 nit vnnűtz, des bűcher allenthalben mit treffenlichen hohen
 sűnnen sint gezieret. wilt du aber nűch dem so obgeschriben
 20 steet (vmb daz du dester gerechter vnd volkomner werdest)
 etwenne die gaistlichkait vnd diner sel haile bedencken? So
 gebruch dich der bűcher Jeronimi Augustini Ambrosy Gregory
 Lactancy Cripriani vnd Leonis, vnd hab die hailigen geschrift
 allwegen haimant by dir in dinem huse vnd tű yetz die ge-
 25 scharfften der alten vnd dann der nűwen ee beschechen. Wo
 aber ain gelerter man vsserhalb ytalia das so ich yetz schryb
 lesen wirt! so wirt derselb mich strűffen daz ich vnder den
 yetz genanten lerern zelesen nit ouch genennet han hugonem
 de sancto victore oder Alexandrum de ales oder Magnum
 30 albertum vnd Petrum blesensem vnd Nicolaum de lyra vnd
 Alanum vnd dise schare der nűwen. Aber hűte dich daz du
 die nit leset noch hűrest dann ob sy wol gelert sint! So sint
 Inen doch kaine Junger zeenpfelhen. Danne sy die nit leren
 mugen. Darumb so rűt ich dir das, das ich selbs schetz vnd
 35 acht recht vnd wol getűn sin. Vnd red nit vsz ainchem [142^b]
 trűme Sunder waisz ich, mich die allgelertisten in allen
 welsche nlanden haben, mir des mithellende. Vnnnd geloub mir
 das nűtzit zelernen ist! das besser wer ze entlernen. Darumb

so übe dich vnd lise in den büchern vnd geschriften der mai-
 stern, so die bewertern sint, die Ich dir vor genennet han die
 selben hör vnd folg den selben näch! ist daz du wilt vil vnd
 mangerlay dingen wissend werden vnd ain fürst sin in dem
 5 gantzen vmbkraisz der welte für andern wunderbar vnd loblich.
 Doch rät Ich nit daz du in dinem leben vnd regiment die
 gemainsame des folckes fliechest! wil ouch nit daz du ainig
 syest. Es were dann so du in tieffe diner vernunft von andern
 lüten abgeschaiden etwas allain wöltest ain zyt vnd wyle be-
 10 trachten. Ja rät Ich daz du grüßbar syest vnd gemain allen
 vnd dich selbs gebest zesechen vnd yetz disen dann den an-
 redest! rät halttest, selbs dar in gangest vnd zû gesetzten tagen
 vnd zû berüffungen vnd samlungen dines folckes in aigner
 persone komest! dich jnen erbietest vnd selbs redest, dann
 15 ich waisz nütz fruchtbar vnd güt sin, was die menschen durch
 geschrift gelernet haben, daz sy das durch practik üben tryben
 vnd bewären. Vnd Ich lob niemer die menschen die sich der
 geschrift also gantz gebent daz sy hie durch alle ander dinge
 verachtent Als gewesen sint democritus vnd dyogenes, die allain
 20 Inen selbs gelebt hant. Aber die menschen sint wirdig der
 höche alles lobes, die den regimenten gemaines nutzes recht
 vnd wol dienen, Vnd darby die kunst vnd lere der geschrift
 ouch nit vnderwegen [143] lässent noch versument Als wir
 finden getân han Platonem Aristotilem Demostenem Julium
 25 Ciceronem Plinium Macenatem et Augustum, Dise yetz ge-
 nempten was die kunst oder wyszhait vssz der geschrift ye
 geschöpft hant! das haben sy alles geübt vnd mit jren wercken
 getriben vnd volbrächt in diensten gemaines nutzes. Das selb
 du ouch tûn solt? wo du anders ain aller bester man vnd
 30 fürst sin vnd genennet werden wilt. Gib ain zyt zû lernung
 der geschrift vnd ain zyt dem regiment gemaines nutzes.
 Machh yetz gericht. hab yetz räte. Yetz handel werck ritter-
 lichen dingen. besich yetz den nutz dines hofes vnd hushab-
 lichen dinges. Vnd in dem allem wirst du gewâr vnd Innen
 35 brächt wie grosz vnd vil die geschrift hier zû dienet nütz vnd
 güt ist. Vnd so du also den nutz diner rûw vnd mûsse, daz
 ist dines studierens mit dem nutze anderer diner arbeit zû
 samen bringst! so tûst du mengklichem ain wunderbar hoffung

von dir machen. Also daz du allain oder mit wenig andern
 fürsten in der gantzen welt für ainen wunderbaren fürsten
 gehalten wirst. Vnd nit die schöne diner gestalt (Wie wol die
 fürpündig ist) noch dine guldine klaiden! noch die gezierd
 5 dines häres, noch das gebreng diner pferden vnd rossen, tüt
 dir so vil lobs vnd eeren zü füren! als vil tüt die gezierd der
 geschriften vnd der lümde der tugenden. welcher tugenden
 angesicht so schon ist (als Aristotiles schribt) daz die (wo sy
 gesehen werden möcht) vil hüpscher vnd schöner wer dann
 10 der morgenstern lucifer, Oder der aubent stern hesperus [143^b]
 genennet. Aber zü disen dingen bist du yetz von dir selbs
 (als mich bedunckt) entzündet. Danne als nechst dine vnder-
 tån ab der etsch komende, die kaiserlichen maiestate bätent,
 daz er dich daselbs hin an die etsch haim schicken wölt!
 15 dine land vnd lüt selbs zeregieren! spricht du. Ich bin nit
 noch so alt oder so vernünfftig daz Ich mine land regieren
 mug. Disz ist gewesen ain stimm vnd rede wirdig daz sy vsz
 dinem munde. geen sölt vnd die künstenklich ain yetklich altar
 loben wirt. Dann wenne sich etlicher dingen zebeladen ist!
 20 so gebürt sich vor zebetrachten was vnd wie vil die achseln
 tragen mugen! Oder was sy nit tragen mugen. Danne das
 so, bias gesprochen hāt daz ain yetklich ampt ains regiments
 geb zeerkennen ain man, daz ist den man sölicher regierung
 das mugen wir hie wol vnd recht sprechen von ainem fürsten-
 25 tūm. Dann welcher fürst gūt vnd recht messikait haltet, ist
 glycher den göten danne den menschen; Danne es nit schwer
 ist in armūt mäsz zehalten vnd küschhait. Aber schwer ist
 als marcialis spricht, grossem gūt vnd rychtum nit zegeben jre
 sitten! Vnd grosse macht zü sünden volget nāch ain fürsten-
 30 tūm. Danne alda ist, anraitzung der fressnie, genügsami man-
 gerlay wines grösz eere milter tischen, der folle allenthalben
 güter vnd seltzner spysen vnd daz wir vns gebruchen der
 worten lucani Alda sint verwyser gelychsner liebkooser gougk-
 ler sprecher vnd spillüte die sich flyssent das schlosz vnd dir
 35 burg der jugend stetz allenthalben zestürmen vnd zegewinnen.
 Der, der gytig ist tüt das recht verkouffen vnd spricht zü
 dir. Nim hin das gelt vnd hab dir dise [144] sach enpfolhen
 wer vszgibt ist milte vnd hāt allwegen vil das er geb. Ain

anderer tüt dich raitzen zû zorn vnd spricht. Der hât wider
 dich gesündet. Nim hin das schwert vnd richh vnd strâff die
 sünde. Du fürst lydest das vnrecht das nit ain schlechter man
 vngestrâffet lyden tett. Ain anderer sagt, ain hüpsch schön wybe
 5 hât dich lieb vnd stirbt diner lieb halb! wes hâst du nit mit-
 lyden vnd erbarmest dich jrer Jugend, fröid mit ir habende.
 Item gangen wir Jagen spricht ain anderer starcker man.
 Wes verligst du also fulend die scharer der hirssen vnd der
 schwynen sint beschlossen vnd vmbgeben. Ich wil dir ain
 10 hüpsch gesichte zaigen. Kume mit mir vnd lász dise dine
 alten, wyse sin vnd den gemainen nutz versechen vnd bis du
 frölich, dwyle die zyt vnd die Jugend das erfordernt Aber
 die dero vrsache gûts lebens in dem rachen ist! sprechent
 wes steest du fürst yetz hât man das essen vfgetragen vnd
 15 erkaltet. Kum die wyle die edeln vische warm sint vnd vor
 und ee das wildgebrett verrieche, der pfeffer ist gût vnd vol-
 berait vnd der schwinkopf vnd das gebrâten vf dem tische,
 wes steest du so vil wollust verlierende. Ir vil rätent zû laster
 vnd wenig zû tugend. was sol tûn ain Jüngling? des alter
 20 noch von jm selbs wenig stercke hât vnd des gemüt vnd natur
 schlipfig ist in liplich begirde? Kumm möchten alt menschen
 widersteen so vil anraitzungen. Was sol ich dann sagen von
 den Jungen Es sprechen aber etlich, ain fürst hât rât, vnd
 stând vmb Inn die so grosz sint vnd von hohem adel geborn!
 25 râtschlagende! was zetûn syge, vnd erwegent den nutz der
 landen das ain hüpsch ding ist etc. Aber alle [144^b] die so
 vmb den fürsten stând flyssent sich vnd sûchent Inen selbs
 den herren zû fründe zemachen vnd redent vnd râten nit das
 so gût vnd notdurftig wer! sunder das! das sy hoffen dem
 30 fürsten aller gefelligest sin! vnd In dem râte aller liebtest
 hören Vnnd ist yetklicher darobe, daz er der aller liebtest
 werd. Vnd ist niemant der frye wort rede sines gemütes. vnd
 ob wol ain taile recht rätet! So steet es doch zû frigem
 willen des Jünglings, wem er wölle folgen. Aber wyle der
 35 vnerniet ist vnd vnerfaren vnd non wenig gemessner wysheit
 in Im hât! So tüt er oft, nit das so gût wer vnd nütze, sun-
 der das, des Inn aller best gelustet vfnemen vnd vmbfâchen
 Vnd für war nach dem vnd min geloub steet! So mûs aint-

weders ain fürst sin der Jaren zytig vnd rātes wyse vnd erfaren oder aber so grob ruche torecht vnd vnwissend, daz er glych wie ain block von jm selbs nützit handele danne das, was der merertaile gab beschlossen daz das enpfolhen werd
 5 entlich zevolbringen. dann welcher fürst etwas waisz vnd kan, vnd doch minder dann gnüg ist? der ist sorgklich aim gemainen nutze Vnd tüt oft sin land vnd herschaften zerstören? wyle er nit näch vernunft dann allain näch lyplichen anfechtungen vnd begirden tüt regieren. Dar von kumpt, daz wir
 10 in der küngrych findent ain kind acht Jaren alt wol geregieret han, oder ob Joch daz selb kind küm alt was sibem Jären? Joab ain sune ochosie. Danne der selb nit regiert sunder sin rātt vnd amptlute, das küngrych regierende versächent Es ist aber ain fürstentüm ain grosse raitzung zū lastern vnd gar
 15 wenig fürsten werden funden die nit [145] verIrrent? So sy aller zömmen fryge entlediget geend. Vnd von Saul bis vf Sedechiam sint gewesen in Juda vnd jsrahel nün vnd dryssig künig, vnder denen nit mer danne nün güt gewesen sint vnd die andern all vnwissend vnerfaren vngelert vnmechtig gytig
 20 hochfertig zornig wütrich vnküsch vnd diener der torhait vnd liebkoserye, die da mit etlicher vnordenlicher eergytikait (nit waisz Ich mit welcher) zū schaden vnd sterbung der menschen geborn, den abgötten dientent kriegens pflāgend vnd finde wāren des friedes der rūwe vnd müsse. Vnd haben noch dann
 25 dise geherschet vnd geregieret vber das folck gottes vnd sint ir vil durch die propheten knechte des herren zū sölichen küniglichen wurden gesalbet worden. Vnd macht ouch Salomon nit besteen Wie wol der sin kunst vnd wysheit von gotte hatt erfolget, sunder tett er lieb han frōwen von ferren her
 30 vnd fremder geschlechten, denen er verstricket was so mit grosser brinnender liebe, daz jm vermechelt wāren (gelych als künigin) sibenhundert, vnd zū wyber oder kepswyber drühundert Die sin hertz verkarten daz Er nächfolget fremden götten So was ouch Daud nit lasters āne. Wie wol der von gotte was erwellet Dwyle Er sament ainen todschlage vnd eebruchh tett volbringen. Das er nit getān hett do er ain hirt was. Aber sin fryung vnd gewalte des küngrychs raitztent Inn hier zū vnd tätten Inn des machen keck vnd türstig. Was

sol ain anderer tûn dem minder stercke ist? Was ain Junger?
 Was ain Jüngling? Ist yemant der main ain herschaft [145b]
 vnd fürstentûm sin ze enpfelhen Jungen Jären! so doch oft
 starckes alter dar vnder hât gebrechhen, Darumb du wyslich
 5 getân hâst, daz du din herschaft lieber dinem vetter dins
 blûtes danne andern wöltest enpfelhen vnd vor lieber komen
 zû wysheit danne zû regierung. Aber ain anderer hett villicht
 ain anders getân vnd vsz forechtem wâne vf sich selbs so vil
 gehalten, daz er gesprochen hett. was geet mich an dise ge-
 10 horsamkait Ich wil yetz fryge sin. Dann ich waisz gûts vnd
 böses. was ist bessers dann ain herre vnd gebieter zesind
 Ich sprich zû dem tû. Vnd er tûts. Es ist yetz zyt daz ich
 vsz fliege. Wie ouch tett Icarus ain sun dedali Als man liset
 in der fabel, dann do der selb vatter dedalus Im selbs vnd
 15 sinem sune mit hartze bech vnd wachse angemachet hatt flügel
 hinweg zefliegen, damit er fluch vnd endrunn dem kerckel des
 huses vnd turns laborinti. do flog er hinvs in den fûchten
 lufte vnd fôlg mir nâch Icare vnd das lûg du nit yenert hin
 von miner syten komest. Der sun hielt das gebott als lang
 20 die forcht weret der vnbekanten kunste des fliegens. Als bald
 er aber maint sich sôlicher kunst fliegens wissend sin vnd
 geloubt, Daz er füro nit mer bedôrft ainches vnderwysers!
 da vbertratt er sines vatters gebott, Vnd die flügel wyter
 schlachende vnd schwingende, hûb er an vmb zeschwaiffen yetz
 25 hin dann her farend vnd allweg zû höher vnd höher flie-
 gende, berürt er zû letst die fürin region vnd spere der himeln
 vnd als da selbs die anheftung der flügeln von der werme
 vnd hitze zergiengen vnd alle federn vnd sôlicher hitze der
 sunnen verbrunnen, tett Icarus ainen [146] fale nackent vnd
 30 blosz in daz mer fallende. Welches mere von sinem namen
 noch haisset ycarum. Ich nim für ain ander fabel Pheton ain
 sune Phebi des gottes der sunnen, batt den selben sinen vatter
 hebum, daz er Inn geweren wôlt, Warumb Er Inn bett. Der
 vatter schwûr durch stigem den hellischen gotte, daz er Im
 35 nützit wôlt versagen Vf das der sun batt jm zeenpfelhen den
 wagen der sunnen zefüren vnd zeregieren Der vatter Phebus
 hatt rûwen sins gehaissens vnd zûsagens vmb daz er den sune
 wisset ains sôlichen regiments nit könnend noch mechtig sin!

yedoch wyle er sölichs geschworn hatt! do mocht er Ims nit
abschlagen noch versagen (Wie wol Cicero in dem büch offi-
ciorum maint) daz diser aide billicher vernichtet vnd abge-
stellet worden wer. Pheton staig vf den wagen frölich vnd
5 nam die zöm vnd zügel der pferten in sine hand vnd schatz
vnd maint yetz sich selbs ainen küng sin vnd got gelych. Als
man aber vf das mittel taile des himels komen ist vnd Pheton
die pfert der sunnen nit maistern noch Innen weeren mocht
danne daz sy wider vnd füre lüffent vnd die gantzen welt mit
10 füre der sunnen verbrennen täten! Ist Pheton mit dem tonner
gottes Jupiters geschlagen vnd in daz mere Meridianum ge-
worffen worden. Mit disen fabeln warnent die poeten ainen
yetklichen daz er vor vnd ee vf das genäwest erweg vnd er
messz sin kunst craft vnd macht ee er sich vnderstand ze-
15 herschen vnd zeregieren vmb daz er nit vnder der burde fall
vnd nider gelig, Danne Es ist ain burde vnd nit [146^b] ain
wollust vnd kurtzwyle zeregieren so ferre wir das mit ver-
nunft vnd näch billicher schulde wöllen volbringen vnd in das
ende tün deshalb dann die küng vnd fürsten angesehen vnd
20 vfgesetzt worden sint, Danne die küngrych vnd fürstentüm
nit sint von wegen der künigen vnd fürsten! Sunder sint die
die küng vnd fürsten von wegen sölicher Irer landen. Die
römschen geschribnen rechte so vrsprung haben vsz den athe-
nischen vnd spartanischen, die, dieselben wylant gaubent den
25 ligurschen! sagen vnd wöllen die kind bis in das vierzechend
Järe sin vnder pfegnüs. Vnd näch dem selben alter gaubent
sy sölichen Jünglingen pfleger vnd für minder bis zü vier vnd
zwaitzig Jären. Danne vor der zyt, mainten sy sölich alter
zekranck sin der sinnen vnd vernunfte. Von der sache wegen
beschehen ist! do zwen cipiones von den carthagischen in
30 hispania erschlagen wurden vnd hanibal mit heres macht yta-
liam verwüst vnd verherget vnd deshalb cipio affricanus der
grösser, den römern versprach, mit Irem gezüge vnd here in
hispaniam zeziehen vnd da selbs sinen vater vnd vetter ze-
rechnen! daz er lang von dem rät vnd senate der römer ver-
35 achtet vnd verworffen wart, vmb des willen daz er dennocht
nit vier vnd zwaitzig Jären alt was zü lest aber als sust nie-
mant sich diser dingen beladen wolt! tett er dise hauptman-

schaft me durch notdurft danne durch willen des senätz er-
 volgen Item die Carthaginenses als dero hauptman amilcar
 todes abgieng, wolten nit sinen sune vmb daz er Jung was
 die hauptmanschaft enpfelhen wie wol er des [147] begeren
 5 tett. So ist ouch hanibal nit zû hauptman der penischen er-
 wellet vor vnd ee hanno erschlagen was siner vatters näch-
 folgender hauptman. Item masinissa ain kûng In numidia tett
 sterbend sine sune vmb daz sy Jung wâren dem römischen
 folck vnd besunder dem geschlechte der Cornelien enpfelhen.
 10 Was sag Ich dir aber von den getâten der haiden? Es ver-
 bieten die hailigen recht vnd canones kainen man vor vier
 vnd zwaintzig Jâren priester zewerden noch vor dryssig jâren
 bischoff. Aber sagen wir etwas vsz der alten ee, danne ouch
 daselbs der Jungen rât vnd wysheit für vnnütz gehalten wor-
 15 den sint. Als Salomon gestorben was, der vber die zwelf ge-
 schlecht des folcks Israhel geregieret hatt kam sin sun Roboam
 gen sichem, daselbs das gantz folcke Israhel besamlet was Inn
 zeerwellen zû irem kûnge vnd sagt zû Im die menge des
 folckes, din vatter hât vns vfgelegt ain aller schwerstes Joche/
 20 aber du wöllest das gegen vns enklain mindern! vnd söllicher
 hertikait dines vatters nächlâssen! So wöllen wir dir gehor-
 sam sin vnd dienen als die dinen. Darzû er antwort Geend
 hin vnd komen an dem dritten tage herwiderumb zû mir.
 Vnd als daz volcke abgeschied, gieng der kûng zû râte mit
 25 sinen alten, die Im rieten vnd sagten, Ist daz du hütt zû
 willen wirst disem folck vnd du sy ir bitt gewerest vnd Inen
 mit gütigen senften Worten zûredest! So werden sy dir zû
 ewigen tagen getrülich dienen. Aber Roboam verachtet der
 alten râte vnd nam zû Im etlich Jüngling die mit Im erzogen
 30 wâren vnd zû Im sagten. Red also zû disem folcke vnd sprich
 Min [147^b] minster finger, Ist stercker grösser vnd gröber,
 dann der rugk mines vatters vnd min vatter hât vf üch gelegt
 ain Jochh vnd burde, die Ich vch wil meren vnd besweren
 vnd min vatter hât vch geschlagen mit gaiseln Aber jch wirt
 35 vch schlagen mit Scorpionen etc. Disem râte volget Roboam!
 darumb zehen geschlechte des folckes diser rede halb erzürnet
 von Im fielent Vnd Inen selbs erwalten zû kûnge Jeroboam
 ainen sune nabachs vnd kam hie durch daz folck Israhel in

ewig taillung, Vmb daz der vnerfaren künge, der Jungen räte
 annam. Da besser gewesen wer Inn ain Junges kind gewesen
 sin. Dann zû den selben zyten, tett Ochosias ain mensch von
 zwain vnd zwaintzig Jären alt geborn, in nemen das lande
 5 Israhel vnd kestiget das folck des herren vnd volbrächt das,
 daz bös was vor gotte, Nit anders hielt sich ouch Achas ain
 sune Joatan, der zwaintziger jären alt was do er anhüb ze-
 regieren in judia So ist niemant böser gewesen vnder den
 künge danne manasses der zwelfer jären alt, zû dem regiment
 10 kam. Gelych was jm sin sune Amon, den in dem zway vnd
 zwaintzigosten Jare sins alters anhüb sin küngrych zeguber-
 nieren vnd von sinen dienern aigner sünden halb denen er
 ingewickel was erschlagen wart. was sol ich sagen von Joa-
 chim ja zweyen joachim von dem vatter vnd dem sune oder
 15 was sol jch nennen sedechiam der zû jherusalem als die statt
 gewonnen was von den Caldeischen ward gefangen Vnd des
 ersten vor Im sin sun sach ertöten vnd er darnäch siner
 ougen ward beroubet. Dise alle haben angehept zeregieren
 vnder dryen vnd zwaintzig Jären vnd [148] wyle sy vnerniet
 20 vnd vnerfaren waren args vnd böses vor got würckende! So
 haben sy sich selbs vnd Ir folcke also verderbet. Diser tor-
 hait ist aber widerwertig din Jungligkait! Welche, ob sy wol
 vil wysheit (als vil dann in sölichem alter sin mag) vber
 komen hät! vnd grösse hoffung gibt künftiger wysheit! noch
 25 dann nit vor haim gesant werden wolt ir aigen land vnd lüt
 zeregieren Ee sy die kraft vnd stercke recht alters vnd er-
 farung mancherlay dingen hett erfolget vnd vber komen. Danne
 du vsz aigner vernunft verstündt vnd wistest, daz du nit ge-
 schickt wurd zeregieren sunder geregeret zewerden, daz du
 30 von vnd vnder dinem vetter yetz vnserm kaiser lieber haben
 vnd lyden woltest, dann sust vnder yemant anderm! Vmb daz
 du dar zwüschen (die wyle din alter wüchse) nächfolgtest der
 kaiserlichen maiestate, Vnd werest in den reten, die gericht
 erkantest, grösz treffenlich sachen sechest, wys lütt hörtest
 35 vnd von tag zû tage durch diser dingen erfahrung, wyser wurdest
 vnd gelerter. Aber by dem ist dir noch dann zehalten das so
 ich obgesagt hab. daz du alle tage etlich zyt gebest lesung
 der geschriften die dann ander dine tugend bessernt zierent

vnd erluchtet. Vnd so du sölicher kunste vnd geschriften
 gelert wirst (Als Ich hoff beschehen sollen) vnd du dann zû
 regierung diner landen komen bist! So wirst du nit glych
 andern, Sunder ain spiegel sin aller fürsten. Vnd werden alle
 5 nachgeburen dich nemen zû ainem richter Irer kriegem zwy-
 trechtikaiten vnnnd spennen! die gütlich oder rechtlich ze-
 richten. Vnd glycherwyse als die künigin Saba vnd ander
 lütte von der sunnen vfgange, zû lüffent zebesechen [148^b] die
 wyshait salomonis! Also werden ouch dich eeren alle men-
 10 schen von der sunnen vndergang vnd von mitternachte, vnd
 dem lümden näch, diner wyshait Ir vil än zale komen dich
 zebeschöwen vnd wirst sin als ander Josias ain sune Amon
 vnd din folcke regieren recht vnd wol, nit gegen der lincken
 hande dich naigende. Ae darumb du aller bester fürste vnd
 15 durlüchtiger jüngling hange an der geschrift, dwyle du die zyt
 häst! lern kunst vnd tû hier zû flysz vnd lässe dich nit
 betrüben ob etliche ding an der etsche vernüwet vnd geendert
 sint, danne din vetter wirt die betragen vnd näch siner für-
 püntlicher wyshait vnd gûthait wol richten vnd verainen.
 20 Vnd dann dar näch so es zyt wirt dich an herschafft an gût
 vnd an tugenden gehöchert vnd gemeret, widerumb schicken
 in das land vnd fürstentûm diner haimant! darzwüsch, jst
 jm dero regierung wol enpfolhen. Wann die etsch lande be-
 dörffen kaiserliches gunstes von wegen vil anstossender lüten,
 25 die diner landen begerende, sich anhenckent vnd mit vfgetänen
 rachen vnd schlünden wartent, Wie sy din vätterlich erbe
 möchten verschlinden Vnd wie wol ir etlich yetz des etwas
 anheben vnd versüchent! so werden doch die selben bas in
 namen des kaisers, danne din selbs geschwaigt vnd abgestellt.
 30 Welche ob du regiertest! verachten tetten din Jugend, Vnd
 deshalb dester herter dine land wurden bekümben. Aber Ich
 lässz das fallen, Danne du häst selbs gewist was in sölichem
 zetûn gewesen ist vnd dich deshalb der kaiserlichen maiestate
 enpfolhen, Darumb mir nit mer gebürt danne dich zevnder-
 35 richten wie vil frucht Vnd nutzes von der geschrift komen
 syge vnd dich [149] zeermanen daz du etlich zyt vnd stunden
 zû dero lernung gebest! das Ich main dir yetz gnûg geraten
 sin, nit als vil vsz dem volle miner kunst vnd dichtens! als

vil vsz aigner gûthait dir von nature angeborn zû naigung
 vnd liebe der geschriften Aber Ich mach yetz ain ende, Danne
 der rumore das geschray vnd das gerüsch darInne ich bin!
 dulden nit daz ich mer schryb Vnd ich leb vnder aim getöne
 5 das aim hertschläffenden menschen vnd den meerschwynen
 möcht brechen Iren schläffe. Es ist in der gantzen Cantzlie
 nit mer dann ain ainigs gemahe vnd sint vnser vil in aim
 huse sament essend vnd trinckende, daz nit die ammaissen so
 gedrungen in Irem huffen vnd in Iren löchern! als wir by ain
 10 andern in ainem klainen sale wonen tûnt. Die binen ligent
 in iren binkörben mit aignen zellen vnderscheiden. Aber wir
 in ainer kamer glych den schäffen so In ainem stale vnd
 pferrich sint! tût ye ainer den andern trucken vnd mag vnser
 kainer spötzen noch vszwerffen daz er nit des andern klaiden
 15 tû vnsüfren vnd vermässgen. Vnd halten vnder vns sölich
 stille vnd schwygen, daz du mainen müstest dich hören die
 kreyen vnd aglaistern in den wälden vnd die frösch in den
 wigern vnd pfützen Ich wundern mich selbs wie ich dir so vil
 hab mugen schriben Es ist aber villicht des zevil dir! der
 20 yetz lernung der geschrift als ain Jochh vnd burde ab dir
 häst geworffen vnd nu bas vnd mer zû sölicher lernung bist
 zeberüffen danne ze ziechen. Aber das ist mir laid daz Ich
 zû dir schribende, vnder so vil vnrüwen nit raingen sübern
 vnd bessern mag, disz min schrifte, die Ich dich hoff lesen
 25 werden! Aber du wirst [149^b] geben ablász der obgemelten
 vnrüwigen statt vnd ouch der klaine miner vernunft die so
 stumpf ist, daz sy nit allain in grossem rumore sunder ouch
 in rûwe kumm möcht zieren was sy schrybt. Hier mit pfleg
 din got in gesunthait. Vnd du wöllest haben mich als ainen
 30 der dinen so vil der kaiser das tût verhängen Geben zû gretz
 Anno

[150] **D**Em hochgebornen herren herrn Eberharten grauen zû wirtemberg vnd zû Mümpelgarte etc. Minem gnedigen herren Enbüt Ich niclās von wyle min vnderthenig willig dienste allzyt zeuor. Wie wol gnediger herre mir zû lust vnd fröiden
 5 wer oft zû üwern gnäden zekomen! So hät doch gelück (mir in dem als in anderm widerwertig) sölich langzyt her nit wöllen fügen! Daz aber ich hie durche, üwern gnäden nit enpfall vsz gedechtnüsz, Sunder des minen etwas nüwes syge by üch! daz da machhe üwer gnäd sin min Ingedenck!
 10 so schicke ich den selben üwern gnäden den handel zû zyten des consily zû costentz an Jeronimo des hussen Junger begangen vnd von mir vsz dem latine In dises nachfolgend tütsche gebrächt vnd tranferyeret! welcher handel ain form vnd gestalt hät ainer Caronick vnd historien! die yetz zû zyten
 15 seltzen vnd lustsam ist zelesen vnd zehören besunder hohen adellichen gemüten, als dem üwern! die allwegen von nature girig sint nüwe vnd fremde ding zehören. Vnd bitt daz vwer gnåde disz min klaines wercklin, wöll von mir so vil gefelliger annemen vnd grösser achten! als vil das vsz vnderthenigerem
 20 vnd trüwrem gemüt flüset vnd komen ist an die selben üwer gnåde dar in ich mich tûn vnderthenig enpfelhen dat.

[150^b] **P**Ogius Florentinus Enbütet sinem Lienharten Arentino vil hail. Als Ich ettlich tage zû Baden Im ergöwe gewesen bin, schraib jch vsz dem selben bade, vnserm Niclāsen
 25 Nicoli ainen santbriefe, den Ich main dich lesen werden. Darnäch als jch von dannen widerumbe gen Costentz in das consily komen bin! jst vber wenig tage dar näch worden angefangen vnd gehandelt, die sachh Jeronimi, den man sagt gewesen sin ain ketzer des geloubens vnd das offenlich. Die

selben sachh hab Ich mir fürgenomen dir geschriben! ains
 tails von jr grösse wegen Vnd zum andern vnd allermaist von
 dises mans kunst vnd wolredens wegen. Danne jch sagen
 mûs mich nie ainchen menschen gesehen han der in ainer
 5 sachhe, die mit rede fürzetragen wer, besunder das leben an-
 treffende, sich necher möcht gelychen dem wolreden vnd ge-
 sprechnûsz vnser altfordern, die wir mit so grössem lobe tûnt
 wundern vnd erheben. Es ist ain wunder gewesen zesechen,
 mit welchen worten mit was schöner vnd zierlicher rede, mit
 10 welchen argumenten! mit was angesicht sins antlitz, mit
 welcheem munde vnd mit was tûrstikait er antwort gab sinen
 widersechern vnd wie er darnâch zû letscht, sin sachh so wol
 vnd mit klûger sage, tett vslegen vnd bringen an den tage.
 also daz laid zehaben ist, so ain hoch edel fûrtreffend ver-
 15 nunfte, zû sôlicher ketzerye komen sin. so ferre wâr ist das,
 das jm fürgehalten ward. Darvber mir nit gebürt zevrtailen,
 Sunder rûwe jch vnd folgen den vrtailen dero, Die wyser ge-
 halten sint [151] Doch so solt du nit mainen mich dise sachh
 vnd yetkliche ding darInne, besunderlich dir wôllen schryben
 20 nâch form vnd ordnung ainer maisterlichen vnd wol gesetzten
 red vnd oracion! danne das lang werden wurd vnd sin ain
 werck etwa manger tagen allain wil Ich rupfen vnd berûren
 ettliche der treffenlichosten artickeln, da durch du disz mans
 kunst vnd leere sechen mugest vnd mercken. Item do vil
 25 wider disen Jeronimum zû samem gelesen vnd vfgefasset was,
 darInn vnd mitte er der ketzerye wart geschuldiget! was den
 vâttern gefellig daz er offentlich vf yetklich puncten vnd ar-
 tickel besunder die im fürgehalten wurden antwort geben sôlt.
 Vnd als er dem nâch also in offentliche verhörung gefûret
 30 wart vnd gehaissen zû sôlichen artickeln antworten! tett er
 sich des lang widern vnd sagen daz er sin sachh billicher vor
 sôlt vszlegen vnd handeln, danne siner widersechern böser
 schuldigung antworten, Vnd so er also deshalb für sich selbs
 redende verhört worden wer! als dann erst zekomen sin zû
 35 siner vinden vnd nydern schuldigung vnd scheltung wider Inn
 gesamelt. Aber do Im dise sin mûtung abgeschlagen wart,
 stûnd er vf in dem mittel aller mengklichs alda zû gegen vnd
 sprach. Was boszhait vnd vnrechtz ist das? So ir drûhundert

vnd fünftzig tage (dero lang Ich in aller hertisten kerchern in vnsuberkait wüst mist gestanck vnd ysin banden vnd in aller dingen armüt gelegen bin) Mine widersecher vnd v̄bel reder allwegen gehört hant, Vnd mich yetz nit hören wöllen
 5 ain ainig stunde! Dar von kumpt [151^b] darvon kumpt so üwer oren, den selben allen vnd yetklichem in sunder offen gestanden sint vnd sy mich gegen v̄ch in so langer zyte versagt Vnd v̄ch Inen gelöbig gemacht haben, mich sin ainen ketzer vnd vinde cristenliches geloubens! Vnd ain durchechter der
 10 gaistlichen! Vnd mir dar wider kain statt noch macht geben wirt! Min sachh zeuerantworten! daz Ir dann in üwern gemüten mich geurteilt haben ainen v̄beltettigen schedlichen mane sin, Vor vnd ee Ir (wer Ich wer) möchten erkennen. Aber Ir sint (sprach er) menschen vnd nit gött, ouch nit ewig
 15 sunder tödemlich. Vnd Ir mugen schippfen Irren betrogen werden vnd verführet. Man sagt v̄ch hie sin liechter der welte vnd die aller wysesten vnd gelertesten des gantzen vmbkraisses disz ertrichs! darumb v̄ch gebürret mit oberstem flysse zearbaiten daz Ir nit ützt freuenlichs, nit ützt grobs vnd vnge-
 20 bürlichs, Vnd nit ützt wider recht handelnt vnd tügent So bin jch ain klainer mensche von des lebens oder todes wegen hie gehandelt wirt, Das jch nit von minen wegen red der tödemlich bin! Sunder so beduncket mich schantlich sin! wys-
 25 fürzenemen vnd zsetzen wider gelychs vnd billichs vnd das schedlich sin wirt, Nit als vil Inbetrachtung miner person, als vil in betrachtung künftiges exempels. Vnd do er disz vnd vil anders mit zierlicher rede schon vnd wol geredt hatt, vnder aim geschraye vnd murmur etlicher vnd nit weniger, die jm
 30 sin red vnder schlügent! ist zelest gesetzt vnd beschlossen worden! daz [152] er des ersten zû den Irrungen dero er geschuldiget wurd, antworten solt, Vnd Im dann darnäch statt vnd macht geben werden zereden was er wölte. Item von ainem pulpette oben herab! wurden gelesen die anfenge yet-
 35 klicher puncten vnd artickeln dero er gezigen wart. Daruf man dann Inn fräget was er dar wider reden wölt. Do dann dar näch sölich artickel wider Inn wurden bewyset. Es ist aber vngelöpflich zesagen, wie geschydenlich, er antwort, vnd

mit was argumenten er sich tet beschirmen. Kainest redt er
 ützt, daz sich nit ainem gütten vnd fromen man zereden ge-
 burte. Vnd redt ouch das also! wo er das in sinem gelouben
 vnd hertzen hatt also vnd wie er das mit Worten vslegt! daz
 5 dann kain vrsach nit allain des todes sunder ouch ainer aller-
 lichtesten verschuldung wider Inn hett mugen funden werden.
 Vnd sagt das alles, so jm fürgehalten worden wer, falsch vnd
 laster sin von sinen vinden vnd nydern erdächt vnd gestiftet.
 Vnder anderm do man meldet jnn sin ainen schelter vnd vbel
 10 reder des römschen stüles vnd ainen widerstreber des babstes
 vnd ainen durechter der Preläten pfaffen vnd priesterschaft
 vnd ainen vinde gaistlicher örden! Stünd er vf mit clagarer
 stimme vnd mit vfgeregten henden schryende. O Ir vätter
 alle hie zü gegen wo hin sol jch mich nu me keren? welcher
 15 hilffe sol jch begeren? welich sol jch wainende bitten? vnd
 anruffen? sol jch das tün üch? aber dise min durächter haben
 mir üwer gemüt von minem haile gefüret vnd enpfremdet!
 So sy mich üwer aller vind sin gesagt hant. Oder sol [152^b]
 Ich dero hilffe anruffen, die vber mich richten vnd vrtailen
 20 werden? Mine durechter haben aber gemaint ob üch die
 dinge die sy wider mich erdächt vnd gestiftet haben, lych
 vnd ring sin beduncken wölt, So wurden Ir doch mit üwer
 vrtail verdampnen ainen gemainen vinde vnd widerstreber aller
 gaistlichhait Vnnd priesterschaft den sy mich sin falschklich
 25 hant gelogen. Vnnd darumb, Ist daz Ir Iren Worten geloubent
 So ist nützt me daz zü minem haile syg zehoffen. Item er
 tett dero vil so wider Inn redten, mit hoflichen schwencken
 vnd Ir etlich mit schimpfierlichen Worten, rupfen rüren vnd
 klampfen! Vnd oft Ir vil in trurigen ernstlichen reden vnd
 30 sachen nötigen zelachen mit schimpfung in Ire scheltwort.
 Vnd als er vf ain mäle von aim gefragt wart, was Inn be-
 düchte von dem sacrament Cristi! Antwort er, Er hielte daz
 es vor des priesters Consecracion vnd verwandlung, brot wer!
 Vnd in der consecracion vnd darnäch! wärer lychnam Jhesu
 35 cristi etc. Vnd anders näch vnserm gelouben. Dar zü ain an-
 derer redt. Aber etlich sagent dich geredt han daz sölich
 sacramente näch der consecracion noch dann brot belyb. darzū
 er antwort. By dem becken oder pfister belyb das brote. Zü

ainem münch prediger ordens, der etwas scherpfer danne
 ander wider Inn mit worten stürmen tett! Redt Er. Schwyge
 du gelychsner vnd yppocryta Zû aim andern parfüsser ordens,
 der da wider Inn schwûr by siner Conscientze vnd gewissne!
 5 Redt er. Disz ist ain aller sicherester schwûr vnd wege die
 menschen [153] zebetriegen. Als aber vile halb der schuldi-
 gung vnd von grösse wegen diser sach. Disz dinge desselben
 tags nit mocht zû ende gebrächt werden Ist es verzogen vnd
 vfgeschoben worden bis an den dritten tage. Vf welchem (do
 10 aller schuldigung argumente wider Inn erzellet wären vnd die
 selben darnäch mit vil zügen bewyset vnd gevestnet wurden.
 Do stünd er vf vnd sprach Dwyle Ir mine widersacher so ge-
 flissenlich gehört haben so ist billich daz Ir mich ouch mit
 dultigem vnd gelychem gemüt hören tügen. Vnd als vil ge-
 15 schrayes Vnd murmors dar wider was vnd doch zû lest Im
 die macht geben ward zereden was er wölte. Tett er sinen
 anfang an got dem allmechtigen vnd batt des gnäde Im ze-
 geben vnd zeuerlychen das gemüte vnd darnäch die facultet
 craft vnd machte, Die Im möchten vnd wurden dienen vnd
 20 sin, zügemache hail vnd troste siner sele. Vnd redet daruf,
 Ich waisz jr aller gelertesten vätter vil fürtreffenlicher mannen
 gewesen sin, die von Irer tugend wegen gelitten hant sträff
 vnd pyne des todes vnd mit falschen zügen des sint worden
 überwunden Vnd mit falschem gerichte verdampnet! Vnd
 25 hûb an von Socrate zesagen. Wie der vnrechtenklich von
 den sinen wer worden verurteilt vnd doch des nit wölt end-
 rünnen Wie wol er gemögt hett, vmb daz er die forcht zwayer
 dingen hinnem, die den menschen aller pinlichest sin, gesehen
 werden. das ist die forcht des kerchers vnd die forcht des
 30 todes. darnäch erzalt er die gefengknüsz platonis vnd die ke-
 stigung vnd [153^b] Pyne Anaxagore vnd Zenonis vnd (âne die
 selben) mancher fólckern vnrechte verdampnung. Er meldet
 ouch das ellend Rutily vnd Boecy vnd der andern aller die
 Boecius in dem bûch de consolacione sagt mit vnerschuldtem
 35 tode verderbt worden sin. Dar nâch gieng er vf die hebrei-
 schen exempel sagende Wie moyses ain erlöser des folckes
 von Israhel vnd ain geber der gesatz gottes von den sinen
 durächt vnd gepiniget worden wer. Ouch wie Joseph von

sinen brüdern von nydes vnd vintschaft wegen wer verkouffet
 vnd dar näch von argwāns wegen ains benotzugs komen in
 gefengknūsz. Mer sagt er. Wie āne dise yetz gemelten ouch
 Ysayas Daniel vnd alle propheten als verschmecher gottes
 5 vnd verfūrer des folckes mit falschen vrtailen weren worden
 beswert vnd vmbgeben Sagt ouch das gericht Susanne. Vnd
 āne das vil ander, die alle (Wie wol sy aller hailigoste men-
 schen gewesen) noch dann mit vnrechten bösen vrtailn vnd
 gerichtn mit tode verderpt worden weren. Darnāch kam Er
 10 vf Sanct Johansen den töffer vnd von Im vf vnsern behalter
 Jhesum Cristum. Sagend! das die mit falschen zügen vnd
 mit falschen der richtern vrtailen todes weren worden ver-
 dampnet. Vnd redt daz mengklichem kund wer, darnāch
 Sanctum Stephanum von dem colleye der priestern getödet
 15 worden sin. Vnd die Appostel alle todes verurtailt vnd ge-
 storben, nit als form, sunder als verfūrer der fōlckern vnd
 verschmecher der götten vnd böser dingen stifter vnd vber.
 Vnd sagt boschlich getān [154] sin von priestern zeverdampnen
 ainen priester vnd arguwiert darus die getāt noch böser sin!
 20 die da beschech von ainem Colleye vnd von ainer besampnung
 der priestern. Vnd tett das beweren vnd bewysen mit ain
 Exempel vnd erzougt ouch das aller kostlichst von ainem
 Consily, Der priesterschaft vormāls ouch beschechen sin Vnd
 redt disz alles schon zierlich wol Vnd mit grosser vfmerckung
 25 vnd baitung aller mengklichs so zū gegen wāren. Aber die
 wyle alle burde vnd schwere diser sachhe stūnd vf den zügen!
 tett er vnderichtung daz kain geloube denselben zügen wer
 zehaben, besunder siddemmāl sy das alles nit vsz wārhait dann
 allain vsz vngunst nyd vnd hasse gesaget hetten. Vnd tett
 30 vf das die vrsachen söliches nydes also vszlegen vnd erkleren,
 daz es nit wyte was von ainem gelouplichen wissen. Dar zū
 was der wārhait gelych die selben zügen also sin (daz allain
 die sachh cristenliches geloubens hindan gesetzt) nit vil vf
 jr sage was zehalten. Bewegt wāren aller menschen gemüte
 35 vnd zū barmhertzikait genaiget. er satzt ouch hin zū, daz er
 von Im selbs vnd fryes aigens willens in das Consilium komen
 wer, sich selbs vnd sin leben zeraingen vnd zeentschuldigen
 vnd erklart vf das sölich sin leben sin übung vnd sin studie-

rung, Die voll wären aller gebürlichkait vnd tugend. Redt
 ouch disen sitten wylant gewesen sin, Den eltern aller geler-
 tisten vnd hailigosten mannen! daz sy in den dingen des
 [154^b] geloubens! ettwenne sich zwaytent vnd näch Iren ar-
 5 gumenten nit ains weren. Das nit beschechen wer zû schwech-
 rung desselben geloubens sunder zû erfahrung vnd findung der
 wärhait. Vnd also Augustinum vnd Jeronimum vngelyche be-
 dunckung gehept han vnd sy nit allain bedücht han vngelyche
 dinge, Sunder dinge ain andern gantz widerwertig. Daz doch
 10 beschechen wer äne allen argwäne aincher kertzerye. Meng-
 klich wartet ob der benant Jeronimus sich entschuldigen
 vnd wider rüffen wölte die ding Im fürgehalten vnd wider
 Inn bewyset. Aber er beharret vnd sagt sich nützit gejrrret
 han, noch sich wöllen wider rüffent! Der andern falschen
 15 laster vnd schuldigung vber Inn boschlich getän Vnnd kam zû
 lest vf das lobe Johannis husz der lang vor zû dem tode des
 füres ouch in dem selben Consily zû costentz was verdampnet
 Vnd redt denselben Johansen hussen gewesen sin ainen gûten
 gerechten vnd hailigen mane der sinen tode nie hett ver-
 20 schuldet vnd sprach wyter sich selbs ouch sin berait mit
 starckem vnd vestem gemüt inzegeen ain yetklich pyne des
 todes vnd wöllen sinen vinden wychhen vnd den zygen, die
 also boschlich än alle schame vber Inn hetten gelogen vnd die
 doch vor got (den sy nit betriegen möchten) diser Irer ge-
 25 zügnüsz halb an dem Jüngsten gericht rechnung geben wurden.
 grosses laide, was aller vmbstender menschen, wo er ain
 rechtz gemüt an sich genomen haben wölt. Aber er wart ge-
 sehen vf siner mainung belyben vnd des todes begeren vnd
 lobet Johannem hussen vnd sprach [155] den nützit wider die
 30 statut vnd satzung der kirchen gottes verstanden noch gehal-
 ten han sunder allain wider den miszbruche der priestern
 vnd wider die hoffart vnd wider die grossen costlichkait herr-
 schaft vnd Pompe der Prelaten, danne die wyle der kirchen
 vätterlich erbgûte, zûgehörig wer des ersten, den armen! dar-
 35 näch den bilgrin vnd darnäch der kirchen büwe! so hette
 den gûten man bedücht, sölich der kirchen erbgûte vnbillich
 gegeben werden torechtten lychtfertigen fröwen, vnnützem bruhe
 der pferten, bastharden jrs blütes, costlicher zierung der klai-

dern vnd andern dingen die des vnwirdig vnd wyt vnderscheiden
 weren von der gaistlichkait cristi. Aber das was ain zaichen
 siner aller grösten vernunfte! so sin rede oft mit mangerlay
 rumors vnd geschrayes gelrret wart vnd von etlichen, die Inn
 5 in sinen Worten begryffen wolten, wart gehindert! daz er da
 der selben kainen lies vngeschmützt hingeen, sunder sich an
 den selben allen rach, vnd not sy sich zeschamen oder zes-
 schwygen. So ain murmur vfstünd so schwaig er vnderwylen
 das folck darumb sträffende. Dar nach hüb er denne sin rede
 10 widerumb an, an dem ende da er die hatt gelassen vnd batt
 die lütte, daz sy litten sin rede vnd gedult hetten die zehö-
 ren! dwyle sy doch Inn niemer me hören wurden. Nie tett
 Er sölicher rumoren erschrecken danne daz er belaib aines
 vesten vnzitternden gemütes. Vnd das was ain grösses ar-
 15 gument ainer güten Memory vnd angedechtnüsz! daz er dryer
 hundert vnd fünftzig tagen lanng [155^b] gelegen was an ain
 boden ains herten stinckenden vnd vinstern turnes (des herti-
 kait er selbs geklaget hät, sagende (sich als ainem kecken
 man zimpt, Dasselbs nie ersüffzet han vmb daz er vmb vn-
 20 schuld litte! Sunder sich allain wundern die grössen vn-
 menschlichkait wider Inn gebrucht! daz er an ainer sölichen
 statt, nit allain nie ützt hett mugen lesen sunder ouch nie
 vtzit sechen. Ich wil geschwygen des kumers vnd der angsten
 - sins gemütes da mitte er teglich müst geübet werden vnd die
 25 billich alle Memori vnd gedechnüsz sölten han vertriben) daz
 er (sprich ich) noch dann so vil aller gelertester vnd wisester
 mannen Im zü hilff vnd zü gezügnüsz sins verantwortens mocht
 allegieren vnd ouch so vil cristenlicher doctorn zü bewärung
 siner mainung melden vnd nennen also daz es gnüg vnd mer
 30 dann gnüg gewesen wer, ob er die selben gantzen zyte in
 grosser müsz vnd rüwe sinen flysse angekeret hett zestudieren,
 sich wol vnd wyslich zeverantworten. Sin stimme was süsz
 cläre vnd verstentlich, darInne etlich kunst vnd dapferkait
 gemercket wurden aines güten redners! bede zü hertikait,
 35 oder zü barmhertzikait in den menschen zebewegen. Welcher
 barmhertzikait Er doch nie weder batt noch begert zeerfolgen.
 Er stünd vnerschrocken vnd äne forcht Vnd nit allain den
 tod nit verachtende, Sunder des begerende Also daz du Inn

gesechen hettest sin andern Cathonem. O mane wirdig ewiger
 gedechtnüsz aller menschen. Ich lob nit ob er etwas in Im
 hatt oder hielt, wider [156] der kirchen cristenliche satzung.
 Ich lob aber vnd tûn wundern sin lere vnd kunst mancherlay
 5 dingen! sin zierlich gesprechnüsz, die süsse sins redens vnd
 sin geschide vnd bestendikait zeverantworten. Ich fürcht aber
 disz alles jm zû schaden von der nature verlichen worden sin.
 Item nâch disen dingen allen jst jm gegeben worden ain zile
 zwayer tagen zebychten. Ir vil hochgelerter mannen vnder
 10 denen der Cardinale florentinus ainer was! giengen zû Im, ob
 sy jnn von sinem sine möchten bewegen! Vnd vf den rechten
 wege biegen vnd bringen. Do er aber ye lenger ye mer ver-
 hertet in sinen Irrungen beharrende! ist zelest Er von dem
 consily siner ketzerye worden verurteilt vnd verdampnet.
 15 Item mit frölicher stirnen vnd mütigem angesichte gieng er
 zû siner vsfürung. Nit forcht er das füre noch die form
 diser pingung des todes Also daz kain Philosophus, dero! die
 wir nennent Stoicos ye gewesen ist, der so mit ain kecken
 vesten vnd stantbaren gemüte ainchen tode gelitten hab als
 20 diser Jeronimus gesechen worden ist dises todes begeren. Do
 er komen was an die statt da er sterben solt. Zoch er sich
 selbs siner klaiden vs vnd fiel nider vf sine knie vnd lobt vnd
 eeret den pfale daran er gebunden werden vnd sterben solt.
 Des ersten ist er mit nassen sailern vnd nâchmâls mit ainer
 25 kettin nackent an disen pfäle gestriket vnd darnach mit holtze
 vnd nit mit klainem sunder mit grössem vmb sine bruste vmb-
 lait vnnnd zwüschen sprüwer geworffen worden; Vnd als man
 das füre anzündt, hûb er an zesingen ain lobgesang vnd den
 gelouben Credo in unum deum jch geloub in ainen got etc.
 30 Den ze lest der rouche [156^b] vnd das füre kum hinnâment
 vnd tamptent Vnd das ist gewesen ain aller gröstes zaichen
 ains vesten vnd kecken gemütes. do der hencker das füre
 rûgklingen hinder Im wolt angezündet han, vmb daz er das
 nit sechen möcht Gang her für sprach er vnd enzünde mir
 35 das füre vornen an vnder ougen. Dann hett ich das geförcht,
 so were ich wol an dise statt nit komen dwyle mir die macht
 geben was das zefliechen. Also ist diser mane (allain sinen
 gelouben hindan gesetzt) lobs wirdig vnd fürpündig gestorben.

Vnd ich hab dise vsführung vnd allen andern handel gesechen
 vnd er hab es dann getän in hasse vnd freuenlicher verach-
 tung der in anderm. Für wär so waisz ich hettest du disz
 ding gesechen du hettest den tode disz mannes beschriben: sin
 5 vsz der schül der philosophie. Ich hab dir gesungen ain lan-
 ges liedlin von müsse wegen danne do ich nützit hatt ze-
 schaffen, do wolt ich etwas tün vnd dir dise ding beschriben
 dir etlich gelychnüsz haben mit den historien vnd Caronicken
 der alten. Dann quintus mucius hät nie so mit kecken ge-
 10 müte sin hand dar gehept vnd Im die lässen abbrennen, als
 diser Jerominus gelitten hät Im sinen gantzen liebe verbrennen
 So hät Socrates nie so willenklich sin gift vsgedruncken als
 diser in das füre gegangen ist. Aber es syg gnüg. Vergib ob
 Ich mit worten lang gewesen bin. dann dise sachh noch len-
 15 gerer rede vnd schribens bedörft hett, Ich wolt aber nit sin
 zevil kläffig vnd schwetzig got pfleg din in gesunthait, geben
 zü constentz etc.

[157] **D**Er durlüchtigen fürstin vnd fröwen, fröw Mechil-
 ten geborner pfaltzgreuin by ryne vnd ertzherzogin zû öster-
 ryche etc. witwen Miner gnedigosten fröwen Enbüt ich nieläs
 von wyle. min vnderthenig willig dienste zû uor Vnd tûn mich
 5 jren gnäden vnderthenig enpfelhen. wie wol durlüchtige hoch-
 gelopte fürstin lactancius firmianus schribt das gelücke an im
 selbs nützit sin, noch das dar für geachtet werden sollen? daz es
 syge ainches lebendigen wesens? dwyle das (als die natürlichen
 maister sagent) allain ist zûfallender dingen ain schnelle vn-
 10 uerwänte geschichte? noch dann, wyle die alten hochgelerten
 poeten vnd oratores (als terencius als tullius als salustius,
 Virgilius, oracius, ouidius Juuenalis vnd die andern näch alle,
 von dem selben gelücke schribende. das anredent vnd bespre-
 chent, als ob es syg ain göttin oder ain künigin das leben
 15 habende vnd die gantzen welt regierende vnd darjnne grosz
 vnd vil vermugende, dem näch ouch wir yetzigen menschen
 das selb gelück oft anruffent vmb hilff vnd gunste vns mit
 zetaillen Als wylant tett der hochgeborn durlüchtig fürst hert-
 zog Lüppolt von österrych etc. In ainem liede, das sin gnäd
 20 machet von ainer fürstin die Im vermechelt zû gebracht wer-
 den solt. DarInne Er spricht. Kum glück vnd tû din hilff
 darzû. Sid Ich nit rûw hab spät noch frü etc. Vnd aber
 ainer noch in lebend vnd üwern gnäden bekant, ouch in ainem
 liede von siner eelichen husfröwen gemachet. Hilff glück daz
 25 er schier füge sich. Daz mir [157^b] geb fröid die minnenklich
 etc. Vnd des gelychen vil ander vnd än zale in Irem anligen
 das selb gelücke vmb hilff besprechent vnd anruffent, als ob
 es syg ain ding vnd wesen des macht vnd gewalt habende?
 So hât der hochgelert poet Eneas Siluius den obgemelten
 30 poeten vnd Oratorem nächfolgende, ainem tröme den er ains

mäls von der obgenanten künigin vnd Irem ryche gehept hät
 in costlichem latin beschriben. Welchen tröme jch vor etlichen
 Jären do jch von üwern fürstlichen gnäden berüft, In dem wilt
 bade badet, muntlich in tütscher zungen (als vil ich des in
 5 miner gedechtnüsz behalten hatt) üwer durlüchtikait sagt vnd
 vszlait. Vnd sidemmäle üwer gnäde näch minem beduncken
 do zemäl sölichen tröme girig was zehören vnd des gefallen
 hatt! Das jch by dem marckt, daz jch durch üwer gnäden
 10 empfelch etlichen andern von nüwem darkomenden edeln manen
 vnd fröwen, sölichen tröme ouch sagen müst! Wyle jch dann
 vernim üwer gnäd yetz in dem wiltbade aber baden. Vnd jch
 vsz gnäden mir von üwer tugend, rycher gütikait manigfaltent-
 lich bewisen, erkenn mich selbs schuldig sin, üch zû zefügen,
 was jch verstünd üwern gnäden in sölichem bade, kurtzwyle
 15 bringen mugen! So hab ich den selben tröme vsz dem gemelten
 latine dem bûchstaben nach in ain besser tütsch gebrächt,
 danne Ich den vor hab muntlich können sagen! den jch üwern
 fürstlichen gnäden zû ainer schencke (dero man dann zetûn
 pflegt in das bade) Schick! Vnd vndertenig bitt, daz üwer
 20 durlüchtikait (der leere näch cathonis) dise klaine gaube wol-
 gefellenklich von mir armen [158] yetz wöll annemen vnd
 empfächen bisz ich mich hienäch gegen vch, grösser gauben
 mug gebruchen Als ich hoff schier sollen beschechen. Dar zû
 mich gelück vnd müsz wöll fürdern vnd got der allmechtig
 25 das bade an üwern fürstlichen genäden tûn würcken gesunt-
 hait üwers lybes, da durch ir vns langwirig in seligkait hie
 vf erden belybent zû frid hail hilff vnd troste aller der üwern
 vnd vor ab min, des billich von hertzen begerende Gebend vf
 frytag näch vnsers herren fronlychams tage Als man näch
 30 crists geburt zalt tusent vierhundert vnd Im acht vnd secht-
 zigosten Järe.

ENneas Siluius poet Enbütet dem gelerten vnd achtbaren
 ritter herr procopen von Rabenstain vil hailes. Der vergangen
 nachte vor vnd ee Ich entschlieff hab Ich mit mir selbs vil
 35 von dinen wegen geredt vnd wunder gehabt daz diner zucht
 vnd tugend nit gebürlich eer näch stäte gegeben werden.
 Danne die wyle in dir erschet adel vnd fromkait! so mag

Ich nit erkennen warumbe du nit vnder den vordersten gesetzt vnd gehalten werdest söllest. Vnd darumbe so schuldiget ich das gelücke, das da wirt geloubet sin, ain vsgeberin eeren vnd gûtes! vnd krieget deshalb erzürnt vil mit mir selbs
 5 wider das selb gelücke, vmb daz es die gûten menschen so oft niderdruckt vnd die bösen erhebet vnd machet hieran kain ende, bis mich ain herter schlâffe tett begryffen! Alda hab ich schlauffend Im tröme wunder gesechen, das ich dir hie nit wil [158^b] verhalten, du recke vf dine oren vnd höre seltzne
 10 vnd wunderbare dinge. Als yetz ain taile der nacht vergangen was vnd die tregen pfert des herrwagens an dem himel den selben kalt wûrckenden wagen nâch vmbgekeret hatten! hatt jch dise gesicht.

Ich kam an frölich stett lustiger grüner gewächsden, dar-
 15 Inne ain gresin felde jm mitten ains lieplichen waldes mit ain fließenden wasser vnd mit ainer mure vmbgeben was! dar an waren zway tore, daz ain hürnin! das ander von wyssem schynenden helffenbain, vnd die muren vnmessig hoch von dyamanten gebuwen, Vnd die wasser vngruntbarer tieffe! Nie-
 20 mant mocht haben zû den toren ainchen zûgange danne vber etlich bruggen die mit ketten vfgezogen garwenig darkomenden menschen nider gelâssen wurden. Hie dishalb des wassers gegen den thoren vber! Sas ain vnmessig grösse schare bede von fröwen vnd mannen, die da Ire hend vfragtent vnd baten
 25 sich vbergelassen werden Vnd als jch diser fremden nüwikait erschrack vnd hin vnd her lûf, begegnotent mir vil dero angesicht jch bekant. Aber nit waisz jch warumb das beschach! daz Ir kainer mir den follen redens geben wolt. Ich kam zû dem hürnin thore in des oberstem taile des turnes jch dise
 30 wort mit alten bûchstaben sach steen geschriben. Ich lâssz wenig zû mir Vnd beheb noch weniger. Vnd als ich begirig was zeerfaren was Innwendig wer! Batt ich ainen Jungen der vff dem turne was, mit grösser bitte (vnd doch vmb sust) daz er mir wölt offnen die [159] Also begab sich von geschicht
 35 daz ain Jüngling kam geritten mit ainer grössen schare weggesellen. Ich bekant by den klaidern das er was von den landen des rynes vnd frâget wer er wer des nechert sich dero ainer zû mir In ainem langen klaide bedecket mit ainem hûte

(vnd ich geloub ain walch bekante den andern) vnd antwort mir Es ist ludwig pfaltzgraue by ryne vnd hertzog zû beyern des hailigen rychs ertztruchsesz vnd kurfürste etc. Der vns füren wirt hin in vber dise muren. Dar zû ich sagt. Min lieber man So erwirb mir ouch den wege mit vch! ist daz vnser
5 gemain haimant daz wir sament lantzlüt sint des ützt rechts oder billichkait haben mag. Das wil ich tûn antwort er. Vnd kume hatten wir sament dise wort geredt, do die bruggen nidergelassen wurden vnd der benant ludwig hin in gelassen
10 worden ist vnd mit Im vil ander die der türhüeter namlich yetklichen nach dem andern nennen tett. Aber ich kam haimlich vnd verborgenlich hin in. Als ain späher vnder ainem mantel ains fürsten der ludwigen anhieng vnd der nach minem beduncken ain Marggräf was von brandenburg; Allda wären
15 geblümp wisen vnd matten vnd bechhe yetz fliessend von milch vnd danne von win. Kaltbrunnen. Seewe voll fischen. Lustige beder. Dicke puschen grüner gestüden. Reben stetz voll truben Vnd böme ewiges herpstes. wie man geloubet sin die garten hesperidos oder pheates, sölich frucht getragen vnd
20 gehept han. öpfel von dero geschmacke allain du möchtest werden gepyset. Zam wild gebrett allenthalben in den wälden lychter gefech [159^b] gefechnusz. Fögel Bede geborn zû spys vnd gesange. In der Morenlande ist allain ain statt Eliotrapeza genant zû allen zyten mit lustsamen gûten spysen näch
25 dem follen zûgericht, darvon äne vnderschaid mengklich wirt gefüret vnd gepyset vnd darby ain seew tünnes brunnwassers vnd ain aller hailsamisten gedrañckes. Aber hie sint sölicher stetten vil. Vnd tische vnder bömmen dar gelegt vnd beraitet mit drinck geschirre von gold vnd edelm gestaine.
30 Kain wine von falern mag sich gelychen dem wine der da rinnet vnd flüset vsz herten selbs gewachsnen felsan. Hönig flüset ouch allda äne vnderlász vsz stenden stöcken So stend daselbs rore voll des zuckers vnd fallet allerlay specerye von den bömmen. Goldes vnd silbers sint vnerschöpfbar ertzgrüben.
35 Kostbar edel gestaine hanget wie kirssen in den wälden Schön minnenklich Jungfröwen vnd grad wol gestalt jünglin fürent ewig tentze. Vnd was der musick von gesang pfyffen trumeten oder saitenspil sin mag wirt alles da gehöret vnd mach-

amett hât sinen nächfolgern nie so ain wollustigs paradyse ver-
 haissen als du da sechen tetest. Bachus. Ceres vnd Venus
 lüffent daselbs vmb hin vnd her vnd gaubent hin vnd tailtent
 vsz jre gauben Vnd siluia mircea verhangt vnd lies zû die
 5 vermischung der wybern vnd mannen zû volbringung natür-
 licher wercken. also gieng jch yetz herfür vsz dem mantel vnd
 begirig dise ding zesechen, luf Ich durch das mittel der scharen
 sölicher fröiden, gantz sicher. Des kam zû mir Vegius Poeta
 laudensis vnnd sprach [160] O. Enea. Wie bist du her in
 10 komen? Ich vmbfieng minen fründe vnd sagt Im wie. Dar zû
 Er antwort. Ich wölt du werest her in komen berüffet! dann
 niemand hier Inne belyben mag äne miner fröwen haissen!
 Ist daz die selb dich sechen wirt so haisset sy dich schnell
 vnnd bald vstryben. Dar zû ich redt. Wer ist dise fröw dero
 15 berüffung man also warten mûs? Min fröw gelück sprach
 Vegius von dero gauben vnd genäden wir alle so hie sint
 selenklich leben tûnt. Dero ist vnderdenig der gantz vmbkraisz
 diser welte Was die haisset vnd gebüttet das ist beschechen.
 Dar zû Ich redt. Darumbe so siche Ich woll, daz du nu me
 20 ouch ainer bist vssz der schare der seligen, der vor gewon
 wert zesin, ain aller vnseeligoster mensche. Ja sprach vegius
 dise fröw hât mich doch zeletscht ouch lieb gewonnen vnd in
 gnåde gebrächt vnsers allerhailigosten vatters des babstes vnd
 gemachhet zû ainem Cardinale vnd Canonick der obersten
 25 kirchen sanct Peters. Ha redt ich Erst yetz heb ich an ze-
 loben dise din fröwen So sy ettlich gûte menschen ouch tût
 erheben. Ich hab sy offt geschulden. Darumb, daz ich sy
 sach gût sin den bösen vnd bös den gûten. Danne du waist,
 wie gût sy gewesen ist Socrati! dem sy Ir gûthait nie wolt
 30 bewysen. Platonem der vnder allen natürlichen maistern der
 gröst gewesen ist! tett sy bringen von fryhait in aigenschaft
 sins lybes. Vnnd Pictagoram zwingen allwegen dar affter hin
 vnd her zelouffen in dem ellend vnd wie wol sy vor [160^b]
 hin vsz Marco Tullio Cicerone ainem redner gemachet hatt
 35 ainen obersten amptman der statt rōme! So tett sy doch ze-
 letscht den geben in die hend siner vinden vnd mit dem
 schwert Anthony ertöten. Scipionem sant sy in das ellend.
 Fabricium machet sy essen vsz Irdin vnd hültzen schüsseln

vf der erde. Den ersten Cathonem tett sy mit armüt belestigen
 vnd beschweren vnd den andern sich selbs ertöten mit sin
 selbs henden. Merck aber vnd siche an die lebenden. Was
 sichst du Juliano dem Cardinale Sancti angelli (der mit so
 5 grossen tugenden gezieret ist) gebürlichs lones bezalt werden?
 Was den Cardinälen Johanni Sancti Petri johanni sancti calixti
 vnd johani tarentino? was ist lones der sich mug gelychen
 weder Iren fromkaiten oder Iren künsten? Wer mag sagen
 herren Caspern schlicken Cantzler (wie wol das gelück jm ain
 10 hertzogin zû eelichem gemachel zû gefüget hât) recht vnd
 würdig löne siner arbeit vnd verdienens empfangen han? der
 yetz dryer römscher kaiser vnd künigen cantzler gewesen ist.
 Es ist wilhelm von scain sunders lobes ain ritter, Vnd der nit
 minder der geschrift, Danne ritterlicher dingen wissend ist?
 15 vnd von begirden wegen tugend ze erkennen die welt durch-
 fären hât. Sag was hat diser erfolgt würdigs sines verdienens?
 vnser campisius voll künst der philosophie vnd der sin jugend
 bis in sin alter verzeret hât in diensten des bäbstlichen stüles,
 ist ermer danne Codrus. Es ist ouch ain ritter an dem kai-
 20 serlichen hofe [161] Procopius genant ain behem, der ainig
 ist? oder hât er diener? So sint doch dero kum vier oder
 fünfe, der selb hât die geschrift lieb vnd tût ouch die üben?
 noch dann so werden ander vngelert vnd die klainer oder
 kainer vernünfte sint über Inn gesetzt vnd geachtet. Vnd
 25 jch wil geschwygen wilich esel ich gesechen han erhöhet vber
 die zerderböm libani die ouch hüttiges tages in eeren sitzent
 menschen äne kunst, Vngesprech vnd so vil äne vernunft, daz
 sy kum erkennen oder rechnen möchen Wie vil finger Ire
 rechte hand habent wer Es ist aber sicherer zeschumpfieren
 30 die töten danne die lebenden. Sag. Welches merewunder oder
 vngestaltete tiere ist ye böser gewesen dann Nero? Vnd wel-
 cher ye sündiger danne Tiberius? Vnd weret vnd belaib noch
 dann den selben Ir gewalt küngliches regimentes lenger danne
 Tito vnd Vespasiano fromen vnd gütigen kaisern. Was ist
 35 lasterlichers gewesen dann Domicianus? Noch dann laid die
 welt vil Järe disen grossen schalcke der anhangend was Irem
 verderben. Aber Jouinianum vmb daz er gaistlich gütig vnd
 from was, do verlor sy Inn bald, erstecket mit aim rouche

der kolen. Wie vil stett vnd schlosz buwt Crispinus ain vn-
 wesenlicher mensche mit kainen tugenden von laster gezogen?
 Spado claudy neronis pophides, besasz so vil gûtes daz er sin
 huse zierlicher vnd wyter buwet vnd machet danne was du
 5 capitolium. Gabrinus Cremonensis ertott siben siner herren
 vnd als die in stinckenden priueten vergraben wurden,
 nam vnd besas er [161^b] Ir aller herschaften. Ich mag nit
 vermeiden Ich müsz der lebenden ouch ettlich berüren Ain
 oberster zû Paryse tett in gegenwürtigkait des kûngs zû
 10 franckrych mit ainer agste, zetode schlachen hertzog Philips
 von Burgun vatter. Vnd der selb tetter hât nu yetz in dem
 selben kûngrych ain aller rûwigostes leben! begaubet mit vil
 nutzlichen landen! Wie wol er ain manschlacht tett vnd dar
 mit ain kûngklich offenlichs gelait brach. Welches gelaites
 15 diser Jemriger hertzog sich hât getröstet vnd dar Inne dahin
 komen was. Dise ding haben oft in mir zorn bewegt. Aber
 so ich nu siche dise fromen vnd gelerten manne mit des ge-
 lûckes gûthait ouch erfrôwet worden sin! So wird Ich linder
 vnd gütiger diner frôwen. Aber Ich bitte dich, fûre mich daz
 20 Ich sy ansechen mug. . Ja jm ist also sprach Vegius Es sint
 vil gûter in disem conuente. Wie wol Ich mich des nit vber-
 heb, daz du mir den namen ains gûten gibst, danne Ich waisz
 mich sünden schuldig sin vnd vnwirdig miner wirdigkait vnd
 eeren. Es ist aber also gefellig gewesen miner frôwen Vnd
 25 ouch minem babste. Aber daz du bekennest, die gûten ouch
 anneme vnd enpfengklich sin miner frôwen so høre michen klain.
 Ich wil aber nit sagen noch disputieren was grosser seligkait
 zûgestanden syen! vmb jr fromkait willen dem grossen con-
 stantino nerue traiano, den zwayen theodosys vnd den ersten
 30 kaiser augusto! sunder wil Ich komen vf die lebenden. Sag.
 Was ist beschechen dinem gaistlichen kaiser vnd minem aller
 hailigosten babste? [162] hât sich nit das gelûcke Inen senft-
 mütig vnd gütig gnûg erzôget? Wer hât den kûng von Ara-
 gon erhebt anders dann das gelûcke? Wer hât den hertzogen
 35 Cleoestrie grosz gemachet? Wer die bischof von köln vnd
 von triere? Grosz ist diser aller tugend vnd sint durch des
 gelûckes schickung erhôhet vnd zû sôlichen eeren komen Nu
 môcht sprechen der bischoff von mentze, min geschlechte vnd

adelliche geburt haben mich erhöhet. Des gelichen möchten
 ouch sagen die sechsichen vnd peierschen hertzogen vnd fürsten,
 gelycher wyse als ob das gelücke nützit an Inen hett gewürcket.
 Aber wer anders hât sy getân so hochgeborn werden wann
 5 min fröw gelücke? Danne die hett gemögt (Wo es ir gefellig
 gewesen wer) mich an ains künigs statt von hyspania oder
 Engelland gelaid han oder geboren worden sin. Danne wir
 den adel vnser geburt durc hkain tugend sunder allain durch
 fale vnd schickung des gelückes vberkomen tûnt. Ist aber das
 10 Ir vil tugendrych sint, die noch dann min fröw gelück fürgeet
 vnd sy nit edelt. So sol ir darumb niemant zürnen. Dann
 dise fröw mag das gûte so ir ist, vstailen vnd geben wem sy
 wil. Dwyle die menschen geborn werden in dise welt nit zû
 besitzung rychthûms, oder zû messung wollustes, sunder zû
 15 arbeit vnd daz sy dem ertrich nit als Inwoner sunder als
 fremd geste vnd bilgri leben sôllen, Vnd durch wercke der
 tugend Ir künftig haimant erfolgen. Aber in grossem gelücke
 wirt nit lichtenklich funden grosse tugend, Daz ain natürlicher
 [162^b] thebanischer maister bedenckende, ain grosse burde
 20 goldes warf in das mere vmb daz er sich dester rûwenklicher
 geben möcht lernung der philosophie. Cristus vnser behalter
 vnd gotte! lert rychtum sin zefliechen als stechend torne.
 Des Junger liebhaber gewesen sint der armût, Vnd benüigig
 an schlechter narung vnd beklaidung. So tett ouch Jeronimus
 25 in aim armen hûslin wonende, nützit schuldigen das gelücke
 Danne er nit dem gelücke als siner fröwen, Sunder cristo
 nâchfolget verschmechende das ewig zegeben vmb das zytlich.
 Anthonius ain abt warf willenklich von Im, Was Im das ge-
 lück geben hatt. Vnd wo wir ains wysen gemütes weren! so
 30 tetten wir ee vnd me des gelückes hasse, Dann des gunste
 begeren, Danne sin gunste vnd süsz erzögunng tûnt vns zû
 fûren aller gröste hindrung zû erfolgung ewigs-lebens, Vnd ist
 der menschen seltzen vnd seltzner dann ain wysser rappe, der
 mit ainandern bede mug nâchfolgen miner fröwen dem gelücke
 35 vnd dem wege in die himel. Aber geschwyge Ich vnd stelle
 ab dise min rede! Vmb daz ich nit gesehen werd diser miner
 fröwen abgezogen han etwas Irs lobs vnd eeren, dwyle Ich
 mich yetz gebruch vnnd fröw Irs gunstes. Aber hüt dich Enea,

Daz du mer redest procopium vnd die andern die du genennet
 häst! sin, liebhaber der tugend vnd vnantailhaftig gelückes
 Danne sy nit Cardinäl ritter oder edel weren, wo min fröw
 gelück nitt hett gehulffen. Aber gangen wir (Ob du wilt)
 5 necher vnnnd sechent dise fröwen ain [163] bewegerin aller
 küngrychen vnd kaisertümen. So gangen wir sprach jch vnd
 ob ich villicht wol ain vngeladter vnd vnwerder gaste sin wirt.
 Vnd do wir also kum als wyte wegs gegangen wären als ain
 armbrost geschiesen mag do nam mich Vegius by miner
 10 rechten hand vnd sprach. Lüg Enea zû der rechten syten da
 ist min fröw gelücke. Alda wären gezelte von purpur mit
 berlin gezieret! die da hundert Juchart wyt felds bedackten
 vnd was in dero mitttel ain hoher küncklicher stüle der da
 erschain mit claren Schmaragten So taten vil ander wunder-
 15 sam staine das helffenbaine des küncklichen stüles beklaiden.
 Sagada ain edel gestain der in tüffe des wassers Euftratis sich
 des schiffes boden gewon ist anzehencken vnd aller frölichst
 zeerschynen. Mirchites ainer wunderbaren mirren farwe, der
 mit ryben zû hitze gebrächt ainen rouche gibt gelych aim
 20 geschmacke des krutes nardi. Mitridas der berürt von dem
 glaste der sunnen mit mangerlay farwen tût erschynen Item
 vnd pyrites der sich nit gech vnd vngestüm lasset heben.
 Calathyas aines hagels farw habende vnd Ehites mit flecken
 gelych ainer natern gespregelt vnd Dyonisias der von siner
 25 natur brun ist, Vnd der vermendet mit wassers vnd geknist,
 Wines geschmacke geben tût. Der sunnen gestain vast klär
 vnd gelych ainem schynenden gestirne Item vnd veneris häre
 ain gestalt habend roter löcken Seletines mit hellem glantz
 schynende Pyropus der sich gelychet ainem flammen. Mecho-
 30 nites [163^b] magol vnd Mirmites ainch kriechende ämaissen
 erzögende. Calcoptongos der da klingelt vnd tönnet gelych
 ainer eerin glocken Syderites gelych aim ysen vnd mit etlichen
 zouberyen, zwytrecht in dem menschen erweckende flogites der
 in Im selbs flammen erzöget, gelych wie sy haisz brinnet.
 35 Autracias gelych aim sternem glestend. Euchidros also schwit-
 zend daz du maintest ainen vfallenden brunnen in Im sin
 verschlossen. Melochytes vsz Arabia grüner dann ain schma-
 ragte Vnd der da widersteet der sorgfeltikait Junger kinden

Yris in dem roten mere funden, der da an helem lufte vnd
 wetter von Im wirft vnd gibt gestalt vnd farwen des regen-
 bogens Andradamas ainer silbrin farwe, der da lindert vnd
 stilltet die vngestümikait hitziger gemüten vnd zemmet hoch-
 5 fertig zörne vnd pederos von gestalt als helfenbain nütz vnd
 güte wider die kranckait des krampfes vnd achates ain ver-
 richter vnd widerbringer des frides. Vnd es ist vngelouplich
 zehören wer sagen sölt vile der edeln stainen die daselbs ge-
 sehen wurden. Aber dise fröw gelück was grösser gestalt
 10 vnd zwayerlay angesichten! Yetz ains gütigen vnd denne ains
 erschrockenlichen vnd mit guldin klaidern voll edels gestaines
 beklaidet, Hielt sy ainen höhern sitze, Vnd hatt grösse ougen
 vnd doch die oft beschlossen. In iren oren sach Ich wachse!
 Vmb daz sy (als Virgilius schribt) mit verschopten oren nit
 15 horte das anruffend geschraye der Jemrigen vsz den schiffen
 in sorgfeltikait gesetzt. Vnd hatt in Ir lingken hande ain
 [164] rüten zü straffung gerichtet. Aber in jr rechten hande,
 sässen eer! wurde, gunst, fröid, ämpter, hochmüt, gelechter,
 liebe, vermechelschaft, craft, stercke, gezierd, gesang, spys,
 20 trancke. Vnd nit an ainer nidern statt sässen ouch rüm, gün-
 lichkait, sige, adel, wirdigkait, frid, müte, gewalt, macht, hüp-
 sche, lob, genäd, gütikait, hoffart, wollust, brutlöf, troste. Vnd
 zü jren füssen, gelycher wyse als megt vnd dienerin ir näch-
 folgende stünden rychtum, gelte, mütwill, liebkoserye, vnd mit
 25 vfgeregten oren vflosende, ob ir fröw sy ützt hiesz! daz sy
 das hortent vnd schnell tetten volbringen. Aber in dem grase
 an ainer nidern statt wurden gesehen vil stüle sessel vnd
 sitze verdeckt, darInne jch sitzen sach vil schätten vnd gaiste
 dero cörpell daselbs erschinnent blaich an farwen. Also kart
 30 ich mich gegen vegium vnd fräget wer die selben weren, die
 da sessent als menschen wirdig der eeren vnd doch trurig.
 Des antwort mir vegius vnd sprach. Dise sint die, die min
 fröw gelück von anfrage der welt hät grosz gemachet vnd so
 die selben sich sölicher miner fröwen gnäden vf erden gnüg
 35 gebrucht hant So sint sy herkomen vnd näch dem ain yeder
 grosz gewesen ist! also ist er ouch yetz mit sinem sitzo necher
 miner fröwen danne man hie nit den sitze gibt näch tugenden
 vnd fromkait sunder allain näch seligkait. Diser erste den du

sichst ist kaiser augustus der da gemacht hât mit fride die
 guldin welte, vnd sine gewalt vnd herschaft gewytert vnd ge-
 meret vber die garamanten Vnd die Indischen fólcker. Ale-
 xander ist nâch Im der ander, Dem selben folget nach kaiser
 5 Julius [164^b] Darnâch die zwen scipiones vnd nach den selben
 pompeius. Aber der den du sichst schilhend ist hanibal. Dar
 nâch der grosz Fabius Emilius, Paulus, Marcellus, Alcibiades,
 Temistocles, Priamus, Hector, Agamenon, Achilles, Vlixes, Da-
 rius, xerses, Vnd Ninus. Ich vber hupf vnd fürgee vil. Aber
 10 der den du sichst bezaichnet mit ainem zaichen des crützes
 ist constantinus. Dem selben folget nâch constancius der veste
 vnd constantinus valencianus vnd theodosius. Es sint ouch
 nüwer. der grôsz karolus pipinus arturus. Ich lász aber fallen
 die eltern. Kaiser sigmunden hâst du bekennet vnd sinen
 15 tochterman albrechten, der nâch sinem schwecher nit lang
 regiert vnd doch beder gelücken des seligen vnd des wider-
 wertigen erfahrung getân hât. Dann diser albrecht ist vsz
 ainem hertzen worden kûng vnd hât die kûngrych hungern
 vnd behem In genomen vnd ist nit lang dar nâch erwellet wor-
 20 den zû rômischen kûnge. Aber wie Er bald vnd schnell wûchs
 vnd vfgang also tett er ouch bald abnemen vnd fallen vnd
 hatt kum drü Jâr geregiert da er todes abgangen ist vnd gott
 sinen gaist geben hât. Do redt ich. In welcher wyse nimest
 oder mainest du hie die seligkait, Ich hab in dem bûch Ju-
 25 uenalis gelesen kainen bösen menschen selig sin Nu vnder denen
 die du genennet hât sint ir vil gewesen aller böste menschen.
 Danne du waist wie grimsam falsch vnd gyttig gewesen ist
 hanibal vnd hât noch dann den selben gesagt selig sin. Dar zû
 Vegius antwort. Ich hab hie den namen der seligkait nit ge-
 30 nomen als die wysen den nement, sunder hab ich all hie nâch
 gefolget dem sitten des püfels vnd gemainen folckes, [165] von
 dem die selig sin geachtet werden, denen aller maist zû steet
 vnd kumpt nâch jrem willen wes sy begerent. Dar zû jch aber
 redt. Ich hab nit acht Vegi vmb die tóten jch bitt aber du
 35 wöllest mir die lebenden zóigen. Lûg sprach vegius vf dise
 syten. Sichst du nit ainen jungen mit wyssem vnd schlechtem
 hâre der noch nit alt ist dryssiger jâren, der selten lachtet
 vnd ains schweren sittigen ganges ist, ains langen antlits vnd

schamig in sinem angesicht vnd von form gestalt vnd gerede
 sins lybes me dann mittelmessig vnd ainer wyten bruste. Ich
 siche jnn sprach jch. Aber wer ist er? Es ist sprach vegius
 din herre kaiser fridrich. Dar zû Ich redt. Ich bekenn yetz
 5 minen herren Aber warumb flüchet er das angesicht diner
 fröwen des gelückes? vnd was worten redt sy zû jm? Ich
 hör wol die stimme. aber der worten kan jch nit mercken.
 das wil jch dir Enea sagen sprach vegius. Venus hät nie
 so lieb gehept adonem Als min fröwe dinen herren. Aber doch
 10 flüchet er vnd wil jren günstigen gûten willen nit annemen.
 das angesicht miner fröwen ist (als dū sichst) gütig! aber
 fridrichs ougen schützlich vnd vnwirtsch vnd mugent kum mine
 fröwen recht ansechen. Ich waisz nit was sins gemütes ist.
 Aber miner fröwen worte sint also. Fridrich belyb vnd gibe
 15 dich mir! So wirt niemant vnder allen kûngen seliger danne
 du. Wo du mir gefölgig bist vnd losest. Ist aber daz du
 mich flüchest, so flüch ich ouch dich. Vnd sichst du, wie
 min fröwe Ir hand jm legt vf sine achseln vnd Inn by sinem
 göller begryffet. Ich waisz nit ob er sich wil lassen fâchen
 20 (Das got wöll) danne beschicht [165^b] daz er den gunste mi-
 ner fröwen des gelückes verschmâchet vnd sy tût fliechen. So
 waisz ich Ire sitten daz sy Im niemer gût willigerer wirt!
 Danne sy ist hochfertig vnd wil ee gebetten werden, dann
 bitten. Vnd Ich hab dise fröwen nie gesechen ainchem men-
 25 schen als günstig vnd gût willig gewesen sin als yetz dinen
 herren Selig wirt er, ist das er ir folget. Aber Jemrig ob er
 sy flüchet. Do redt ich. Wer ist der nechst by kaiser fri-
 drichen der da geet mit vfrechtem houpte vnd etwas wyterer
 schritten vnd enwenig brun? Es ist sin brüder sagt Vegius
 30 hertzog albrecht ain milter fürst vns ains adellichen hohen
 gemütes. Vnd dem selben folget näch sin vetter hertzog Sig-
 mund ains schnellern ganges vnd behend von hande vnd von
 grede. Nâch dem selben Graue vlrich von zilge ain maister
 töchlichs strytens vnd ain liebhaber vnd bûler nit als trûw
 35 als selig vnd gelückhaftig. frâgest du aber wer syg der alt
 von Jâren ains grossen lybes, so siche zû sinen füssen, so
 sagt sin schûch ich bin der von walse. Disen folgent näch
 fûrtreffend mane namlich, der bischoff von kemsee vnd von

gurge, din herr der Cantzler Caspar schlicke! der (als du sagst) minder hăt danne er verdien. der camer maister herren hans vngnade, der zebinger der marschalke, dise sint vsgesandt gen Nüremberg zekomen. Bitten sy aber so belybent sy da
 5 haimant. Bischoff Lienhart von passöwe, Der Graue von schöwenburg, der hofmaister nitperger vnd vil ander die all sint süne miner fröwen des gelückes. Wie wol ain yetklicher sich claget sines gelückes Vnd Ir kainer des sinen steet benüigig. Dar zû ich sagt. Was vnd [166] wie ist danne der
 10 selben gelücke? Güt sprach Vegius ist das gelücke Irs yetklichen so ferre, din herre miner fröwen stimm vnd Worten loset vnd folget Aber vnstett wandelbar vnd vngelych jst es Inen wo Er jr stimme tût vber hören. Vnd do wir also redten So sich jch ainen man klaines lybes mit ainem schwartzen
 15 angesicht vnd frölichen ougen der mit sinen henden in das häre diser fröwen gefallen was vnd ainen locke erwüschende sprach. Gestand zû letscht fröwe vnd siche mich ouch an. Wa hin flüchest du mich yetz wol zwelf Järe? Du bist gefangen, du wöllest oder wöllest nit. Vnd müs sin daz du
 20 mich ouch ansehest. Du bist mir gnüg lang widerwertig gewesen Nu main jch du werdest mir ain ander angesicht erzaigen vnd mir gütiger sin! oder jch wirt dir alles din häre vszrouffen. Warumb flüchest du mich? Vnd folgest vnd yllest nach den klaimütigen? Vnd was diser fröwen stimme zû
 25 Im. Du häst mich vberwunden bekenn jch, vnd wirst mich füro nit me finden dir widerwertig. Also frägt jch vnd sprach. Vegi wer ist diser der also gewalt vnd frefel tût diser fröwen? Er ist Alfonsus (sprach er) ain küng zû Arragon, der mit sinen brüdern by Stancia gefangen vnd dem hertzen
 30 von mailand vber gegeben noch dann darnäch sölicher gefencknusz ledig gelassen! sich ander werb kriegens verfieng vnd wider dise fröwen Im vinde vnd widerwertig zeletscht mit anfechten vnd beharrung, So vil gearbeitet hăt! daz er Im dise fröwen von schame vberwunden yetz hăt [166^b] berüft vnd
 35 widerumb gebrächt zû gütwilligem gunste. Der ander den du kam dryer schritten wyt von miner fröwen sichst! ist der hertzog von burgun vnd by Im sin gemachet Cordata. Aber der lange der vf miner fröwen rüffen treg, ist vnd Ir kum

ain wort antworten mag. Ist ain herre vnd regierer der lam-
 partern, dem ist min fröw oft gütig gewesen! Er hāt aber
 ir stimme nit wöllen hören als er billich getān haben sölt,
 vnd darumb so besitzet er dester minder landes vnd besessz
 5 noch minder wo natürlich miltikait nit gebrochen hett die
 tröwung miner fröwen des gelückes. Aber der, der so frölich
 ist gewāpnet in sinen harnüsch ist Johannes vainoda ain herre
 der enetweldern in hungern durch des macht vnd tugend die
 türcken niderligens verlassen haben hungern. Diser schwartzer
 10 ist giskra. durch des gezüg vnd hilffe behütt sint die taile
 hungerscher landen küng laszla zūgehörig. Aber der kalwe
 den du sichst, Ist der behem tasco ain verstandner vernünf-
 tigger mane vnd doch vnstett vnd mangerlay willens Vor dem
 selben magst du sechen Piceninum des tugend vnd kunst krie-
 15 gens wir bas mugen wundern danne gnüg sagen vnd vssprechen
 By dem selben steet Franciscus contuuola me von gunst des
 gelückes dann von sinen tugenden zū disen zyten grosz wor-
 den. Vnder disen siche ich in wyplicher wāte vnd beklaidung
 ain fröwen. Vnd wer ist die, sprach ich die also vor den an-
 20 dern dryer schritten wyt geet, vnd so hochfertig gesechen
 wirt? das ist sprach vegius venedy, die da hāt miner fröwen
 des gelückes schlüssel zū barschaft des geltes [167] vnd die
 tarpeyam behütten tūt. Das ander ist brucken In flandern,
 die dritt köln, dar nāch nürnberg der selben folget nāch
 25 strāszburg, vnd wien ist vnder disen ouch nit die hinderst.
 florentz gelychet sich etlycher māsse Venedy. Aber Ich fürcht
 Ir. dwyle sy yetz vil Jār her enpfunden hāt minder gunstes
 miner frowen Din Statt die hoch senis, ist yetz in seligem
 stande Aber ich waisz nit was tröwung Ich Ir hörre beschechen
 30 Barchinona vnd valencia gend vf vnd wachsent des gelichen
 lünden vnd sint lustsam vnd hüpsch als du sichst Do redt
 Ich. Ich siche etlich beklaidet In langen wyten menteln wer
 sint die selben? Der erst sagt Vegius, Ist min babste. hāst du
 nit bekennet Eugenium? Woffa sprach ich. Bekumbert sich
 35 dann dise frow ouch mit gaistlichen dingen der kirchen? Ja
 sprach vegius nit minder danne mit Weltlichen. siddemmāle
 vnd vnser priester angehept haben zeherschen vnd me vnd
 grösser zeüben vnd zeachten Weltliche ding dann gaistliche.

Näch dem selben Eugenio sitzet sechs staffeln niderer In der tieffe, babst felix vmb daz die fürsten In nit halten wöllen. Aber die andern alle sint cardinäle die du alle bekantest! wenne du necher Ir antlich vnd angesicht sechen tettest. Vnd
5 dryg gaistlich fürsten sitzent vf höchern stülen patriarchen. die selben sint arm bede die latinischen Vnd die kriechischen vnd darvmb so sitzent sy dahinden. Aber die witwan ange-
tän mit schwartzen wainbaren klaidern vnd die daligent näch dem grossen alexander vnd herculem! das sint stete! die vor
10 zyten grosz schön machtig vnd lobsam gewesen sint vnd nu yetz gesechen werden zerstört geebnet [167^b] vnd verglychet sin dem ertrich wie min fröw gelück das gewölt vnd gebotten hät. Die ain so gelegen ist in dem gebirge ist Carthago. Die
ander vf dem wasser eufreten, Ist babalon. Vnd die dritte ist
15 Troye ain oberstes houpte in asia die da ligt zerbrochen vnd vszgerütet zwüschen den wassern xanctum vnd simeontem. darnäch Amphionis Thebe! So dann tetropis ain müter der poetrye Vnd näch der selben Lacedemonia, die vor zyten mechtig
gewesen ist strytens vnd kriegens Näch disem saget Ich.
20 Lieber jch bitte sag wer sint die, die sich also schüchent vnder die vnsern zemischen. Der vorder sprach Vegius ist küng Soldan dem da gehörig vnd vndertänig ist Egipten. Der ander ist den türcken gebietend. Der dritte den parthischen. Der viert den äfren vnd der nackent, der allain ange-
25 legt vnd beklaidet ist an den armen vnd mit bryszlin vnd ain costlichs hals bande an sinem hals hangen hät der hät die herrschafft vber die Indischen.. Näch disem kart ich mich gegen der lingken hande. Alda sas armüt vneere verspotung vnrecht, siechtum, alter, kestigung gefencknusz, hunger,
30 schmerz, frost, forcht, schame, nyd, hasz, verzwyflung, krieg, sterbend, ainikait, strach, sorg, angst, nott Vnd tusentfaltigerlay vbels zenennen. Turre lande ane wasser, ler vnd blosz aller früchten sunder allain bedeket mit stainen. Dar zû Ich redt. Ich bitte dich Vegi Sag was wil Ir dise wüste? Ant-
35 wort Er. Hie wonent die so von hohen staffeln gefallen sint! So sy den gunste miner fröwen gelückes haben verloren. Vnd [168] sichst du nit die hohen fröwen mit sibem bücheln als mit füssen vnderstützet vfenthalten vnd belyben die selb

ist die statt röm vor zyten guldin vnd nu yetz katig. Capna
 folget ir näch. Darvf nechst Sy racufe! so dann Janua, lune,
 pisa, lucka, paryse. Vnder den germanen sint noch steet in
 gûtem wesen, dann allain præge ain gezierd der selben nacion
 5 tût abnemen vnd sich schwechern. Constantinopel ain houpt
 der krjechen nächet dem tode. Die zyt zemmet vnd bringet alle
 ding Vnd ist kainem dinge das gelück ewenglich gût vnd
 werend. Diser truriger mit nidergesencktem houpte ist kûng
 Renatus den das gelucke vertriben vnd beroubet hât des kûng-
 10 rychs zû Nopels. So ist der da! thomas fulgosius der ains
 hertzogtûns entsetzet in gefengknûsz ligt in ainem wûst vnd
 gestancke. So ligt alda Pangracius in band ysen gefangen der
 da pflag mit mengklichem kriegisch vnd vngestûme zeleben
 vnd aller maist mit dinem cantzler So sichst du ouch da den
 15 hertzogen von borbun der dem kûngrych zû franckrych recht
 satzt vnd machet, der nu ains tails sines landes vertriben!
 yetz sin mûs vsserhalb sines kûngklichen sales vnd gesesses,
 Sichst du ouch nit dort den alten wolgestalten man Mit ainem
 jangen grâwen barte Der selb ist hertzog ludwig von beyern,
 20 den sin sun sines landes hât entsetzet vnd yetz haimant ver-
 hûtet ingefengknûsz. Vnd do vegius also mit mir redt. do
 lûget Ich wider hin vmb gegen der rechten hande! vnd sach
 ain felde bedeckt mit wyssen schynenden wolcken Vnd so ich
 hin in blick Es were dann ain wære [168^b] ain wære figur
 25 oder ain vnwârs gestiffts dinge so bedûcht mich. Ich seche
 laidislaum ain kind mit ainer kronen Vnd mit kûngklichen
 klaidern beklaidet vnd mit Im vil Junger kinden spilen vnd
 schimpfen. Des batt Ich Vegium frâgende. Wer die selben
 weren. Die also mit ainer hohen wolcken weren vmb geben.
 30 Sy sint sprach vegius die denen min fröw gelück verhaisset
 künftigen gunste, ist das sy lebent vnd gefölgig sint ange-
 sechner schickung vnd bescherrung vnd kum hat Vegius dise
 wort vsgeredt, Do die göttin fröw gelück in mich Ire ougen
 warf vnd mit zûsamen gezognen brâwen sprach.. Wer hât
 35 dich her berûft enea? Darzû jch antwort niemant fröw. Sun-
 der in begirden dich zesechen bin jch her in gegangen. Du
 wöllest (bitt Ich) mir darumb nit zürnen. Ich hab din rych
 besechen vnd wil nu yetz abschaiden Aber ains dinges bitt Ich

dich bittlich daz du mir vf wenig miner fragen antwort geben
wöllest. Das wil jch tûn sprach sy. Frag an. So sage.
sprach jch. Wie lange bist du dem menschen gütig? Kainem
lang, antwort sy! Aber frägt jch. Mit welchen künsten mag
5 man dinen gunst vberkomen? Mit kainen sprach sy, dann
allain mit türstikait mit frefel vnnd mit wägen. Wer behept
dich Im vor andern? Wer min gebotte mit sterckerm vnd
grosserm gemüt trait vnnd lydet. Wem bist du aller findest?
Dem zagen vnnd klainmütigen. Wer mag dich verachten?
10 Vnnd verschmächen? der wyse. Wenne wirst du mir gütiger?
So Ich [169] dich berüff. Bin ich aber icht zeberüffen? des
wirst du hie näch gewär. Wer ist dir der aller annemest
vnder allen die da lebet? der so mich Jaget vnd nit der
so mich flüchet. Ich hab sin gnûg redt ich. Got behütt dich.
15 Got behüt dich ouch sprach sy. Doch so wöllest nit reden
daz du nit syest ainer von der schare der minen vmb des
willen daz ich dir nit geben han guldin berge. danne das, daz
dich vil lieb habent vnd dir gûtes tûnt ist ouch miner gauben
aine. Ich dancket ir vnd schied ab. Vegius verlies mich vor
20 dem thore, daselbs vnder der schare der vfbietenden henden
fand ich peregallum minen aller liebsten fründe vnd Im gelych
michaelem von pfullendorff ainen swäben Wentzelaum vnd Ja-
cobum schriber der kaiserlichen cantzlie! welche, mich (als
bald sy min sichtig wurden) vmbstünden vnd frägten was ich
25 hett gesechen. Aber do ich jnen sagen wolt was ich gesechen
hett! bin ich schnell erwachet. Vale Got syg mir dir vnd
was dise ding jnen wöllent oder vf jnen haben, das wöllest in
diner klügen vnd scharpfen vernunfte erwegen vnd mir dann
das ouch offnen geben zû wien sexto kalend. July Anno domini
30 M^o.cccc^o.xl^o quarto.

[169^b] **D**Em hochgeborenen herren herrn Eberharten
 grauen zû wirttemberg vnd zû mümpelgarte etc. Minem gne-
 digen herren Enbüt jch niclās von wyle min vnderthenig willig
 dienste allzyt zû vor Poggius florentinus hāt gnediger herre
 5 von kriechischer zungen zû latinischer gebrächt vnd transfe-
 ryeret ain wundersam gedicht von luciano ainem aller eltisten
 poeten gemachet vnd lutende von ainem menschen der durch
 etlich kunst der zouberye in ainen esel verkeret! ain gantz
 vmbgend Järe sölich form vnd gestalt ains esels tett beheben.
 10 doch vnuerendert siner menschlichen vernunfte Nu bin ich oft
 gebetten worden das selb latinisch gedicht wyter ouch in tütsch
 zebringen! da mit die menschen der latin vngelert dise wunder-
 bare geschicht ouch möchten versteen vnd sich dero zû kurtz-
 wyle gebruchen. dar Inne jch aber bisher verhalten han! dar-
 15 umb daz nit ferre näch dem anfangе desselben gedichtes (da
 gemeldet wirt von der dienstmagt palestra vnd ouch zû letschte
 nit wyt vor dem ende, da meldung beschicht, daz menocles
 dienern ainer, pfleg disen esel etliche menschen vmb gelte ze-
 sechen lassen) so vil vnküscher wercken mancherlay gestalten
 20 hierjnne, ständ geschriben! daz Ich nit wolt vnd noch nit wil
 die selben geschrifte sölicher wercken zû tütsche bringen, Noch
 yemant ain vrsach sin zû lernung fremder süntlicher künsten.
 Als Ich aber nechst ain zyt in dem ellend gewesen bin! müs-
 sig aller arbeit! āne des gemütes! kam mir zû handen das
 25 selb gedicht Luciani obgemelt [170] Vnd die wyle ich aber
 dozemäl aller andern miner büchern daselbs mangel hatt! fiel
 in min gemüte Mir besser vnd weger sin! daz ich zû vertry-
 bung schwerer gedencken vnd fantasyen, Dises gedichte zû
 tütsch transferyerte vnd die geschrift der lasterlichen wercken
 30 ee fürgienge vnd die nit beschribe, Danne daz ich in müsse

min gemüt mit sölichen gedencken sölt wyter belestigen vnd
 entrichten Vnd hab darumb sölich latinisch gedicht dises esels
 (doch mit vermidung der schamperkait yetz gemelt) transferye-
 ret vnd in disz nächfolgend tütsche gebracht das ich üwern
 5 gnäden hierby des ersten vnd vor mengklichem ander schick
 als minem gnedigosten herren, des gnedigen willens ich in
 dem gemelten minem ellend, gegen mir so gröslich hab enpfun-
 den! daz mich der billich verpflichtet vnd bindet üwern gnä-
 den vor mengklichem andern (näch minen gnedigen herren
 10 üwer gnäden vettern) zemittailen! was ich verstünd oder
 marckte komen den selben üwern gnäden zü dienste zü kurtz-
 wyle vnd zü gefallen So ich aber waisz üwer genäde sin ainen
 liebhaber aller künsten vnd hüpschkait, vnd nit allain gegeben
 ainem dinge, daz ir darumb die andern mydent vnd üch dar
 15 Inne nit übent! Sunder (als das sprüch wort ist) zü allen
 sätteln gerecht güt vnd tügig, gelych dem Terentzianischen
 Pamphilo in andria. So hoff ich disz min translantze so von
 ainem afentürigen esel! üwern gnäden komen sollen zü ge-
 fallen. Wie vil aber geloubens oder vngeloubens, Der wärhait
 20 halb disem esel syg zehaben! gelust mich üwern gnäd wenig
 lenger vf [170^b] zehalten vnd dero wyter etwas zeschryben
 das Ich in dem düch Sanct Augustins von der statt gottes
 in sinem achzehenden büche funden han daz ist ain sölichs.
 Er tüt in dem selben büche vnder anderm melden. Wie Varro
 25 (der ain wärhafter schriber der historyen gehalten syg) Schrybe
 von der zouberin Circe! daz die selb Vlixis gesellen all ver-
 karte vnd machre in gestalten vnuernünftiger tieren. Item
 vnd das etlich menschen des landes archadie, vber ain wasser
 gefürt in ain Insell schwument vnd daselbs all in wolfe ver-
 30 kert wurden, mit andern tieren füro alda jr wonung habende.
 Welche aber der selben vber nün Jar herwiderumb schwument,
 Vnd dar zwüschen kain menschen flaisch ge essen hetten daz
 die widerumb zü menschen wurden Item vnd daz der selb varro
 ainen nenne, der da des opfers das die Archaden Irem gotte
 35 liceo geopfert hatten! tett essen vnd niessen vnd dar von
 schnell verkeret wurd in ainen wolffe vnd erst nach zechen
 Jären widerumb zü mensche worden syg. Vf das ouch Sanct
 Augustin vnder anderm dise nächfolgenden wort von jm selbs

schribet also sprechende Söllen wir sagen daz dise ding nit
 zeglouben syen So findt man lüt die yetz sagent, daz sy sö-
 lliche ding nit allain gelouplich gehört, sunder dero wärlich
 Innenbrächt worden syen. danne wir selbs in ytalia des ge-
 5 lychen von ainer gegne desselben lands haben hören sagen
 daz etliche wyber diser bösen kunst gelert vnd daselbs des
 fuchs pflegende! gewon weren in käsen zegeben den menschen
 zeessen! daz die ouch zû fische wurden vnd alle der wyber
 notdürftige dinge [171] trügent da hin sy die gern haben wöl-
 10 ten vnd wenne das volbrächt worden wer! daz sy dann wider-
 umb zû menschen wurden daz Inen noch dann in sölicher
 verkerung belib menschlich vernunfte daz Inen die nit wurd
 genomen Als apuleius in dem bûch das er nennet vnd intitu-
 lieret den guldin esel! aintweders wärlich zaiget oder stift
 15 vnd erdichtet Im selbs beschechen sin, daz er durch innemung
 etlicher gifte zû aim esel wurd. Vnd jm doch belibe mensch-
 lich gemüt vnd vernunfte disz sint die wort sanct Augstius.
 Ich wil aber gnediger herre wyter ouch ains hin zû setzen
 daz ich ainsmäls von herren Micheln von pfullendorf dozemäl
 20 kaiserliehem kamerschriber gehört han Der selb sagt mir vnd
 vil andern by jm ob ainem tisch sitzende, daz ain wirt vnd
 gast gebe in ainer statt eer vnd güt habende, by sinen trü-
 wen hoch vnd türe redte, daz er durch gemecht ainer fröwen
 lenger dann ain gantzes Jär ain wilde gans gewesen wer, mit
 25 andern sölichen gensen vmbfigende als lang, bis ains mäls ain
 gans in aim gezengk vnd kampfe Im von geschicht ab sinem
 hals risse etlich gemechte vnd zouberye Im in ainem tuchlin
 angestrickt. Ich kum aber widerumb vf das schriben sanct
 Augustins der in sinem obgeschriben bûche meldung tût, daz
 30 die historien sagent daz Dyomedis gesellen in dem abzuge
 als Troye gewonnen was alle in fögel wurden verkert vnd
 nächmäls den tempel desselben Dyomedis vmbflugent vnd dar-
 inne Ir wonung hetten etc. Vnd so nu sanct Augustin diser
 dingen aller also in lengern Worten meldung getän hât So
 35 schribt er darvf dise nächfolgenden worte. [171^b] Dise ding
 sint aintweders falsch oder aber so vngeübt. daz sy billich
 nit geloupt werden Aber vestenklich ist zeglouben den all-
 mechtigen gotte alle ding tûn mugen, die er wil Es syge zû

straffung oder belöning vnd die tüfel nützit mugen würcken
 danne daz gott verhenget, des vrtailen vil haimlich sint, aber
 kaine vngerecht So mugen auch die tüfel nit creatures schöpfen
 noch machen. aber der gestalten halb, wol die ding so von
 5 dem wären got geschöpfet sint also verkeren, daz sy fantas-
 tenklich gesechen werden sin daz sy doch nit sint, dann ainer
 genant parstancius sagt vns ains mäls daz sinem vatter be-
 gegnet wer, daz er des giftes in der käsen ainem obgemelt
 vf ain zyt in sinem huse geessen hett vnd darvon an sinem
 10 bette leg gelych aim schläffenden vnd doch also daz er kains
 wegs erwecket werden möcht. Als er aber vber etlich tage
 von Im selbs erwachte sagte er wie ainen tröme, daz er ain
 pfert gewesen wer vnd ettlichen rittern zû rethica korn ge-
 tragen vnd sich grosser arbeit erlitten hett etc. Das nach-
 15 mäls durch erfahrung funden wart also war vnd beschehen
 sin wie es jm getrömet hatt. Vns vnderrichtet ouch ain an-
 derer, daz er in sinem huse ainer nacht vor vnd ee er ent-
 schlieffe gesechen hett zû Im komen ainen Philosophum jm wol
 bekant, der mit leere vnd vnderwysung jm vslegte vnd ent-
 20 schiede ettlich schrifften vnd spruche platonis, die doch der
 selb philosophus Im vor nie offnen vnd vszlegen wölt ouch
 oft gebetten. Vnd do man nochmäls von jm frägte! War umbe
 Er das getän hett in aim fremden huse vnd vngebetten das
 er vor nie tün wölt gebetten vnd in sim [172] aigen huse
 25 Antwort Er. Ich habs nit getän! wol hät mir getrömpft daz
 jchs getän hab etc. Vnd ist also dero ainem der da wachet
 durch fantastig gespenste erschinen vnd begegnet das, das
 dem andern hät getrömet disz sint die wort Sanct Augustins.
 Ob nu wol gnediger herre die theologi vil arguwierent vnd
 30 probieren vnmüglich sin, daz ain mensche in ainen esel ver-
 keret werden mug, anders danne daz mit würckung des tü-
 fels durch gespenst vnd fantasien der menschen gesicht vnd
 wäne hierjnne werd betrogen daz sy wännent vnd geloubent
 sich sechen das sy doch nit sechent, vnd ain ding sin, das es
 35 doch nit ist. Noch dann wenne jch mich selbs wände sin
 ainen esel vnd mich selbs dar für anseche vnd des gelychen
 mich ander lüt ouch dar für sechen vnd hielten, so bedüchte
 mich jch were esels yemer gnüge. Aber die poeten pflegent

oft etliche ding verdackt vnder gestalt ainer fabel zebeschriben so sy noch darjnne die wärhait vermainen also mag ouch hie sin, daz lucianus gemaint hab disen menschen von dem er schribt in siner bülschaft zû aim esel worden sin, das ist zû
 5 aim toren vnd narren Als an me enden geschechen mag. Wol dem der nit vber ain jâr darjnne beharret. aber disz ist villicht zû vil lang üwer genâd vfgehalten. Darumb geloub ain yder was er wölle vnd hören wir yetz das gedicht luciani.

[172^b] DO ich ains mals in das land thesaliarn ryten
 10 wolt, da mir dann etlich rechnung von mins vatters wegen zetûn waren! kam ich vf dem wege von geschicht zû etlichen thessalanen desselben landes jnwonern, die da gen ypatam in ain statt daselbs haim geen wolten. Ich rait vf aim pfert etliche notdürftige ding mit mir fürende! vnd nit mer dann
 15 ainen knecht by mir habende, der mir zû fûsse nâchfolget. Vnd als wir vnder sôlichem ryten vnd gange von mancherlay dingen redten vnd yetz nâch zû der benanten statt komen wâren! frâgt ich von den selben thessalanen, ob sy nit ainen burger in der selben irer statt bekanten genant hispartus! dann
 20 ich hett etlich brief an Inn stende vnd daz ich zû Im als minem wirte Inkeren vnd etlich tage by Im belyben wurd; Sy antworten mir, Inen disen menschen wol bekant vnd den vast rych vnd doch karg sin, vnd nit mer in sinem huse haben dann ain eliche husfröwen vnd ain magte. Sagten mir
 25 darby an welchem ende der statt sin huse in aim garten gelegen wer. Vnd als wir zû beder syt vrlob von ainandern genamen, schieden wir abe, vnd rait ich zû hisparten huse vnd klopfen an. des kam sin husfröwe, die ich frâget ob nit hispartus anhaimsch wer. Vnd als sy hin wider gefrâgt, wer
 30 ich were vnd was ich wölt, vnd ich geantwort. Ich hette von Decriano sophista patrensi, ainen briefe an Hispartum lutende! hies dise fröw mich enklain warten, vnd beschlos die türe! vnd kam bald herwider [173] vnd hies mich hin In geen. Das Ich ouch tett, Vnd grüst den menschen vnd gab Im den
 35 briefe. Er was in dem anfangе sins nachtmals vf aim vast klainen betlin sitzende vnd sin fröw mit Im essende, Ob aim tische ler der spyse. Vnd als er den brief geläs! Redt er!

Min allerliebster fründ vnd der fürnemest aller kriecken De-
 trianus, hat wol vnd recht getan! daz er in güttem vertruwen,
 die sinen zû mir schicket. Du sichst luci dise min wonung
 klain sin vnd doch wyt genûg mir Irem inwoner. Du wirst
 5 aber durch din gegenwürtigkait dises huse (so ferre du für
 gût haben wilt) wyter machen. Darnach berûft er sin dienst
 magt vnd sprach. Gib disem vnserm gaste ainen rock vnd
 ob er etwas mit Im gebracht hab, das behalt Im. Dar nach
 schick Inn in das bade das wyt von vns gelegen jst. Des
 10 nam mich Palestra (Dann also was die magt genant) Vnd zaigt
 mir ain aller hupschtes huse vnd gemache vnd redt, an dem
 bette wirst du hinacht schlauffen. Aber disem dinem knechte
 wil jch ain ander bette zûrichten. Vnd als sy disz geredt
 hatt! gab jch ain mes gersten der magt zû fûter minem pfert
 15 vnd gieng hin in das bade Vnd als jch gebadet widerumb an
 die herberg kam, enpfieng mich hispartus gütenklich vnd hies
 mich zû Im nider sitzen ze essen. Das nachtmäle was zierlich
 vnd costlich wol zûgericht vnd beraitet Vnd dar by genûg gû-
 tes alten wines Vnnd ob dem selben nachtmäle vnd ouch dar
 20 nâch getranck Vnd rede die sich ainem gûten wirte geburten.
 Vnnd als wir den aubent also mit trincken Vnnd gûtem ge-
 schwatze [173^b] vertriben hatten! giengen wir zeschlauffen.
 Des andern tages frâget mich Hispartus wa hin Ich wölt vnd
 vber wie vil tage Ich widerumb zû Im komen wurd. Ich sa-
 25 get Im Ich wölte gen latissam vnd wurde aber zeuor vf fûnf
 tage by Im belyben. Dises redt Ich aber nit nâch willen
 mins gemütes, Danne der selb min wille stünd etwa lange alda
 zebelyben! bis von mir etlich zouberye funden wurd von dero
 zouberye Ich etlich wunder sechen möcht Es were ainem flie-
 30 genden menschen oder ainen menschen verkert in ainen staine
 oder in ain anders des gelychen! Vnd sölchs zeerfaren hûb
 ich an die statt zedurch geen, Wie wol ich was vngewissz
 wo ich ain sölchs sûchen sölt. In dem siche Ich ain
 fröwen gegen mir geen vnd als vil ich vf der strâsse erken-
 35 nen mocht Jung vnd ryche. Danne Ire klaider wâren von
 blûmen gemusieret. So hatt sy ouch an ir vil goldes vnd by
 ir vil diener. Vnd als dise fröw zû mir kam! nampt sy mich
 mit minem namen vnd sprach Ich bin abra ain fründin (ob

ye ainch fründin gewesen ist) diner müter. vnd die wyle ich
 ire süne nit minder lieb hab, danne die minen! so wil ich
 daz du zû mir Inkerest. Dar zû ich antwort Ich sag dir grossen
 danck müter, Vnd wölte gern by dir sin! Aber schame tût
 5 mich hier an hindern, Vmb das ich nit gesechen werd minen
 früntlichen wirte verschmächen wo ich sin hus verliesse. Ich
 wil aber haben den willen für die wercke vnd by dir sin mit
 minem willen vnd gemüte. Vf das sy frâget. Ist nit Hispar-
 tus der gytig karg mane [174] din wirte? O. nit gebruche
 10 dich müter (sprach Ich) me diser worten! Danne er ist milt
 vnd costlich gegen mir gewesen vnd das so vast, daz er von
 zeuil costens wegen geschulten werden möcht; Sy lachet vnd
 nam mich by der hande vnd fûrt mich enklain hindan von
 von den andern vnd sprach. Ich wil daz du dich hüttest mit
 15 allem flysze vor Hispartis husfröwen danne sy ist ain grosse
 zoubrerin Vnd die die menschen kan verkeren vnd verwandeln
 in ander formen vnd ist der mannen begirig, Vnd wenne sy
 zû Jünglingen liebe enpfâchet! Es syge dann daz ain yder
 mit allem flysz tûg vnd lebe nâch jrem willen, So richet sy
 20 sich an Inen etlich ertödende vnd etlich in tiere vnd fremd
 gestalten verwandelnde! So bist du lieber sune Jung vnd
 hüpsch daz du lychtenklich ainer fröwen gefallen magst So
 bist du ouch hier zû ain gaste vnd fremd, die man lichtenk-
 lich verachtet Vnd als Ich hie marckt, daz Ich das ding das
 25 Ich so geflissenlich sûcht da haimant an miner herberg hatt!
 verlies Ich die fröwen, Vnd vf dem weg haim gende, hûb Ich
 mit mir selbs also an zereden, Nu wol an sprach Ich. Du
 der so mit grossem flysse vnd erste begeret hâst dise wunder-
 baren kunst zeerfaren! erwecke dich selbs yetz vnd lern dise
 30 âfenture! da durch du dich gebruchen mugest wes dich werd
 gelusten, Vnd die wyle sich nit gebürt dines früntlichen wirtes
 husfröwen zebûlen! So bûle die dienstmagt Palestram, Vnnd
 kere an alle din vernunfte dir die zeverainen, Danne wo du
 die erbûlest vnnd du Ir hier [174^b]. Inne gerychest! so magst
 35 du füro âne arbeit lernen vnd erkennen des du begerest! An-
 gesechen daz gewon ist knechten vnd megten offen vnd vnuer-
 borgen sin tugend vnd laster Irer herren vnd fröwen. Vnnd
 als ich sölichs mit mir selbs geredt! gieng ich in das huse,

darInne ich weder hispartum noch sin husfröwen finden tett.
 Palestra sas aber in der kuchhe by dem füre das nächtmäle
 beratende, zû dero ich sprach. o. Palestra wie gar schon vnd
 lustenklich wegest du vnd traist hin vnd her vmb, in rechter
 5 mässe dinen hindern vnd die häfen. Du häst mich gantz ent-
 richtet vnd mir zû vil lustes vnd begirden gegen dir erwecket!
 Selig were ich tetest du mich sölicher burde entladen. Dise
 dirn vsz disen worten schamperer gemachet, antwort vnd redt
 mit göttigen worten. Gang hin Jüngling ob du wyse syest.
 10 Es sye dann daz du lieber wöllest dir din leben werden ge-
 nomen vnd flüch die steet des füres vnd rüsses. Dann wo du
 mich ainist in liebe der minne berürtest so wurd dir folgen
 ain fürin wunde, Da durch dir gegen mir gebruchh sin wurd
 vnd dero dich kain anderer artzat noch got möcht hailen,
 15 Sunder wurd ich allain dich brennen vnd wunder vast in
 schmerzen vnd grosser vnrüwe üben vnd tryben. Welcher
 dingen artznie du nit lichtenklich möchtest lyden noch mit craft
 der stainen disen süssen schmerzen vermeiden vnd vertryben.
 Wes lachest du aber? Wes besichst du also ainen menschen
 20 der ain kochh ist nit allain gelert zeberaiten dise schnöde spyse,
 Sunder ouch menschen (Ja vnd das [175] zûtûn grösser ist)
 söliche menschen ze enthöpten, die hut abzeziehen vnd die
 gelider vnd die geäder in stucke zezertailen vnd die hertzen
 ze erfahren. Da häst du (sprach ich) recht vnd war gesagt.
 25 Dann wie wol jch wyte von dir bin, So häst doch mich yetz
 nit allain getân warm werden sunder gar näch gantz ver-
 brennet vnd din vnsichtig füre durch mine ougen geworffen
 in min geeder, die än all min schulde gantz vszebrennen. Vnd
 darumbe bitt Ich dich daz du mir hail bringest vnd tügest
 30 mit disen dinen scharpfen vnd süssen worten (die du gesagt
 häst) vnd mich artznyest vnd mir yetz töten die hut abziechest
 näch dinem willen Vnd als dise Palestra mit sölichen schimpf-
 lichen worten mir götlicher worden was, Verhies sy mir! So
 bald Ir herre vnd fröwe zû schlaffen gangen weren, daz sy
 35 denne zû mir komen vnd by mir ligen wölt vnd minen willen
 volbringen. Vnd als dar zwüschen Hispartus haim komen waz
 giengen wir zû dem nacht essen, Da der volle was gûtes ge-
 dranckes vnd gûtes geschwatzes. Aber bald stift jch mich

schleffrig sin vnd gieng hin zeschlaffen an das gemelt ende,
 da mir Innwendig, alle ding zum aller besten bereit wären.
 Aber vsserhalb was ain betlin minem knechte gebettet vnd
 by minem bette ain tisch dar gesetzt vnd dar vf ain becher
 5 mit gutem nüwem wine, Ouch wasser kalt vnd warme, das
 alles Palestra hatt zügericht vnd vnser bette mit vil rosen
 besprenget vnd dar vf ouch krentzlin geworffen vsz sölichen
 rosen gemachet. Vnd do jch dise wirtschafft [175^b] also fand
 bereit vnd zügericht! Marckt Ich wol daz Ich miner gespilen
 10 vnd mittrinckerin sölt warten. Als aber die! Ire fröwen nider-
 gelegt hatt, Kam sy von stund an zü mir. Alda vns dann
 sament was ain frölich wirtschafft mit vsschenckung wines
 vnd küssens, ouch mit Innemung der gedrancken die vns rüs-
 tiger vnd tügiger machen in die macht der minne. Vnd redt
 15 sy zü mir. Nu lüge du Jüngling (das müs sin) daz du vor
 allen dingen ingedenck syest daz du dich min verfangen vnd
 vnderwunden häst vnd du in disen schimpfe ye komen woltest.
 Vnd darumb so gebürt sich, daz du yetz erzaigest wie tettig
 geschickt geübt vnd mechtig du syest, vnder andern Jüng-
 20 lingen disen stryete zevolbringen. Dar zü ich antwort, niemer
 flüche ich palestra dises din fürfordern vnd bin yetz beraitt.
 mich nackent vszeziehen vnd dinem fürnemen nachzekomen
 vnd mich stryts mit dir zeüben; Darvf sy redt! Ich wil daz
 du mir gefölgig syest Dann wil ich näch sitte vnd an statt
 25 ains maisters vnd doctors dir sagen vnd vnderschaide geben
 vnd gebieten welches fechtens Ich dich wöll gebruchen! da
 dir gebürt, minen gebotten schnell gehorsam zesind vnd die
 zevolbringen. Gebütt sprach ich wes dich gelust, des bin ich
 beraitt sölichs zevolbringen. Vnd als dem näch vf ir gebotte
 30 mancherhand spils vnd strytens gepflegen vnd volbrächt wart!
 Kam vnd fiel ich in ain grosses gelechter vnd sprach. Ich
 wölt O. liebe maisterin, dir von mir ouch etlich sölicher ge-
 botten geben werden vnd daz du den selben ouch [176] werest
 gefölgig. Vnd als sy des verfolget Redt Ich. Richt dich yetz
 35 vf vnd sitze zü mir vnd bütt mir dine rechten hande, daz wir
 yetz sament dises kriegs gericht syen. Danne es ist yetz die
 zyt hie zeschlaffen. Dise nacht mit sölicher übung vnd wol-
 lust vertriben! machet daz Ich des wegs gantz vergas den Ich

tûn solt in die statt larissam. Do mir aber zû fiel die vrsach
 mines belybens vnd was Ich gern lernen wölt etc. Sprach ich.
 O. aller liebste Palestra jch bitt zaige mir dine fröwen da sy
 sich gebruehe Irer zouberye vnd sich in ain ander form vnd
 5 gestalt werd verkeren. Danne jch lang zyt her gewünschet
 vnd begeret hab etwas sölicher wunderlicher dingen zesechen
 vnd aller liebtest von dir, ob du des ützt köndest. Danne jch
 geloub daz du diser kunst nit gar vnwissend syest. darumbe
 jch disz von niemant lieber dann von dir (die yetz worden
 10 bist min sele) lernen vnd haben wölt. Danne du mich (der
 von liebe wegen der minne vf kain fröwen mine ougen ye ge-
 worffen han) dir yetz gemachet häst zû aim knecht vnd aigen
 menschen vnd mit diner kunst der zouberye gantz gebunden.
 Dar zû palestra antwort. Du schimpfest. dann wer möcht mit
 15 zouberye vberwinden liebe, die da ist ain wære maisterin dises
 dinges. Ich schwere dir by minem houpte vnd by minem
 günstigen willen, den jch zû dir han! Mich (die weder schry-
 ben noch lesen kan) diser dingen gantz vnkünnend sin! doch
 ist daz es sich schicken wirt so wil jch flysse tûn daz du
 20 sechen mugest min fröwen sich in ain ander form vnd gestalt
 verwandeln. Als wir nu geschlaffen hatten! tett mir [176^b]
 Palestra vber wenig tage darnäch verkünden! daz ir fröwe
 sich in ainen fogel wölt verkeren vnd zû irem bülen fliegen.
 Nu ist hie die zyt (sprach ich) liebe palestra daz du minen
 25 begirden genûg tûn magst. Bis mütig sprach sy. Ich wil es
 tûn. Vnd als die nacht her gieng nam sy mich by der hande
 vnd fûrt mich zû ainer türe des huses da ir schlauffkamer
 was vnd hies mich zû ainer klinsen der türe hin in lügen
 vnd vfmercken was alda beschehen wurd. Daselbs ich sach,
 30 Die fröwen nackent aller klaidern herfürgeen mit ainem ange-
 züntem liechte vnd sy haben zway körner, dero sy das ain
 (das wieroch was) legt in das brinnend liechte, Vnd etlich
 wort in das selb liecht reden tett. Darnäch schlos sy vf ain
 grösse kisten darInne vil büchsen stunden, dero sy aine hervs
 35 nam. Was darjnne wer mocht ich nit erkennen. Aber als vil
 mine ougen vrtailen mochten, so bedücht mich das so darjnne
 wer! were öle. Welches öle sy dar vs nam vnd von oben bis
 vnden vs iren gantzen lybe dar mit durchsalbet. Darvon ir

bald wüchsent flügel vnd ain hürniner schnabel vnd wart gantz
 verkert in ainen vogel gelyche ainer nacht vllen. Vnd als sy
 nu sich selbs sache ainen fogel sin! tett sy schützlich näch
 sitte der selben fogeln schryen vnd zû der thüre vs hinweg
 5 fliegen. Als ich aber diser dingen begirig, maint sölichs ge-
 wesen sin ain gepsentscht vnd betrugnusz vnd ich minen ougen
 nit getrüwen wolt daz ich das gesehen hett! danne daz ich
 maint! daz mir sölichs villicht also hett getrömet vnd ich zû
 letscht küm marckt mich kains wegs schläffen. Batt ich pale-
 10 stram, daz [177] Ich ouch also gesalbet in ainen fogel verkeret
 wurd Danne ich begert durch erfahrung zelernen ob ich vsz
 aim menschen möcht werden ain fogel. Palestra tett der kamer
 türen vf vnd brächt mir ain büchsen! Deshalb ich mine klai-
 der bald abzoch vnd mich vsz der büchsen gantz durchsalbet.
 15 Aber mir zû vnseeligem gelücke ward ich kain fogel sunder
 schnell vnd bald, hûb mir an hinden zewachsen ain schwantze
 vnd die finger miner henden füßen werden zû horne vnd oben
 an zeentspringen lange oren vnd ain grösser kopffe ains langen
 antlitz. Vnd do ich das alles besach, bekant ich mich worden
 20 sin ainem vngestalten esel. Mir gebrach menschlicher stimme
 mich zeclagen gegen der Palestra. Aber mit hangenden leftz-
 gen mines mules vnd mit form vnd gestalte wie Ich mocht,
 tett Ich sy schuldigen, vmb daz sy mich an ains fogels statt
 gemachet hatt zû aim esel, des sy ir houpt mit Iren henden,
 25 tett ryssen vnd sprach. wee mir armen wie hab ich so vbel
 getân in minem yllen hât mich die vile vnd gelychhe der
 büchsen betrogen! daz ich nit genomen han die rechten
 büchsen vsz dero die menschen werden zû fögeln. Aber habe
 gûten müte hertz lieb mins, sprach sy, lichtenklich beschicht
 30 diser Irrung ain artznie! dann als bald du rosen essen wirst!
 so tûst du dich diser burde entladen vnd widerumb in minen
 bûlen verkeren. Lyd allain dise ainige nacht mit gedult Morn
 frû wil Ich dir helffen vnd rosen bringen daz du wider vmb
 werdest zû mensche. Vnd do sy das geredt, Graif sy mich
 35 an, Vnd tett zartenklich mine oren vnd den gantzen lybe er-
 strychen. Wie wol ich aber ain esel was, So hatt Ich doch,
 [177^b] doch menschen gemüt vnd vernunfte vnd was gantz
 Lucius, âne die gestalt vnd stimme. Vnd als Ich hierumb mit

mancherlay gedanckes clagt die Irrung Palestre Vnd deshalb
 mine leftzgen bais, gieng Ich in ainen stale, Da Ich wisset
 sin min pfert vnd noch ainem andern rechten esel Hisparti.
 Als mich aber die selben ersachent hin in komen sin! täten
 5 sy vsz forchten bewegt daz Ich jnen jr füter essen wölt zů
 mir grüsenlich mit Iren hindern füssen schlagen mich vsze-
 tryben. Do Ich das marckt! Waichh jch vf das wyttest in
 ainen winckel vnd stünd da min selbs lachend. Aber sölich
 min gelechter was ain schray ains esels. Ich hüb aber an in
 10 mir selbs zegedencken. Wie wer jm nu? Ob yetz ain wolf
 her In kom oder ain ander wildes tiere, dich ansturmpete!
 Der nützit böses häst verschuldet. Vnd als jch in disen sor-
 gen stünd! vnd forcht mir etlich noch grösser vngelück künftig
 sin! Vnd yetz nacht worden was vnd in stille des ersten
 15 schläffens! do ist vsserhalb ain gerüsch worden als ob ain
 wande des huses nider gestössen wer vnd was derselben wande
 yetz so vil zerbrochen daz ain mensch hin jn schlieffen mocht.
 Sölichem lochhe näch hinjn schuffent vil gewappeter mannen
 ye ainer näch dem andern! die hispartum Palestram vnd minen
 20 knechte fiengent vnd bundent das gantz huse beroubtent, Gelt
 barschaft klaider vnd allen huszrate hin näment vnd gantz
 nützit jm huse belyben liessent. Vnd fürtent mich min pfert
 vnd den andern esel hin vnd täten vns yllends satteln vnd
 [178] mit schweren burden söliches nomes vnd roubes belesti-
 25 gen vnd laden vnd mit hültzin trämeln flüchtig hinweg an ain
 gebirg durch vngeübt haimlich wege nötigen vnd tryben. Ich
 wisset nit wie vil mine gesellen mit sölichen Iren burden be-
 schweret wären vnd arbeit litten Aber ich der nit gewonet
 hatt in scharpfen felsan vnd ruchem gestain zegeen parfűsz
 30 äne geschüch vnd solen wart seer vast verletzt! deshalb ich
 oft struchhet, Vnder sölicher burde gebruchh habende miner
 kreften. Aber Ir ainer der mir vf dem fűsz nächgieng, tett
 mich des mit ainem stecken oft hart schlachen! So ich dann
 anerűft die hilff des obersten gotes! so tett ich für ain mensch-
 35 lich stimme geben ain grobes geschraye aines esels vnd nützit
 anders danne. yh. ha yh. ha. mit grosser luterer stimme sagende
 Aber kain name noch worte wolten hin nächfolgen. Dar zů
 so ward ich von wegen söliches mines schryens aber dester

mer geschlagen vmb daz ich dar mit sölich rouber vnd tiebe
 tett vermelden. Vnd darumbe do ich also verstünd vnd marckt
 mich mit sölichem schryen mir nützit gütes mügen schaffen!
 Satz ich mir für! durch schwygen sölich straiche zevermyden!
 5 Vnd was yetz tag worden vnd hatten wir vil gebirgs nüchter
 vber gangen vmb daz wir vns mit essen nit tetten sumen des
 weges. Zü mittag zyte kamen wir zü ainer herberg, darInne
 dem wirte vnd sinen diensten knechten vnd megten mit disen
 roubern vnd mordern alte kuntschafft was. Als das vsz Iren
 10 grûszbaren Worten vnd früntlichem enpfächen, Die sy beder
 syt gegen ain andern täten wol gemerckt werden mocht. Die
 selben [178^b] hiessen abeladen vnser burden vnd täten beraiten
 den Imbis vnd gauben vns tieren gersten zü fûter Vnd do die
 andern das geessen hatten vnd jch vast hungrig was Vnd doch
 15 des gemeltem fûters (nâch dem jch des nit gewonet hatt) nit
 essen mocht, gedâch jch wo mit jch minen hunger büssen
 wölte. Vnd ersach ainen gemainen garten voll krutes, darjnne
 mich ouch bedüchten sin etliche rosen. Vnd do jch marckt
 dise menschen ob dem Imbis essens pflegen, gieng Ich in den
 20 garten yetz gemelt vmb daz jch wurd gefûret von dem krute!
 vnd ouch vmb das jch rosen essz dadurch jch widerumb wurd
 zü mensche Vnd als jch hin in kam do âs jch retich vnd
 rûben dero ouch sust die menschen pflegent rôw ze essen vnd
 âs dero so vil, daz jch gantz wart vol vnd satte. Aber daz
 25 Ich für rôsen gesehen hatt! Waren nit rôsen sunder wald-
 blûmen, die man sagt pferten vnd eseln so bös vnd schedlich
 sin, das sy dar von schnell sterben müssen. Do aber der hûter
 vnd schütze dises gemainen gartens ersach vnd enpfand das
 krut oben ab geessen sin (als dann die herren so sy erzürnt
 30 sint gegen den ergriffnen tieben tûnt) er wuste er ain grosse
 hültzin stangen vnd vbersach nit weder minen rugken arse
 noch minen syten Darzû die oren vnd minen gantzen lybe
 erschlûg er also, daz nützit vngeschlagens an mir belyben tett
 vnd als jch zü lest vngedultig sölicher straichen, den gemelten
 35 hûter mit minen beden hindern füssen schlûg! daz er an sinen
 rugken vf dem krute gelag! floche jch ainem gebirge zü. do
 er aber das ersach vnd deshalb vil hunde an mich hetzen
 tett grösse vnd starcke [179] gnûg. bären zevberwinden! Do

maint ich besser vnd weger sin, widerumb in die herberg ze-
 keren danne zerissen zewerden von sölichen hunden. Also
 lüfe ich ains louffens schnell widerumb in den stale! Dise
 hangten mir aber gestrags näch! Vnd horten nit vf mich mit
 5 jren knütteln vnd stangen zeschlachen, bis ich von schmerzents
 wegen das gefressen krute gantz widerumb zum hindern vs
 gegeben vnd gezortet hatt. Vnd was yetz die zyt hie daz die
 morder geessen hatten vnd sich geburt wider abzeschaiden!
 Die selben do! noch mer dings (daz sy geroubet vnd gestolen
 10 hatten) vns vflüdent vnd hinweg tribent. Aber ich der yetz
 von strachen vnd von tragen müde worden was vnd Min horn
 vnd hüfe der füssen hatt zedretten! satzt mir selbs für, das
 ich vf dem wege niderfallen vnd nit mer vf steen wölt! Ob
 sy Joch mich zü tode schlachen sölten Vnd was in hoffung
 15 daz sy hie durch notdurft halb genötet werden müsten, die
 burde die ich getragen hatt, zetailen! vnd die taile dem pfert
 vnd dem andern esel vfzelegen vnd mich als vnnützen den
 wolfen ligen zelassen Aber ich waisz nit welcher tüfel vsz nyd
 bewegt, mir mine rett, tett in das widerwertig keren. Dann
 20 der ander esel der villicht das selb (wie Ich) ouch gedaucht!
 fiel vf dem wege vnd als sy den selben Jemrigen mit stecken
 schlügent vnd er nit vfsteeen mocht noch Ire strach verfahren
 wolten! do namen Ir etlich Inn by den oren vnd die andern
 by dem schwantze vnd nötigottent Inn vfzesteen. Als sy aber
 25 sachent vnd marckten sich mit vnnützer arbeit vnd vmb suste
 die zyt also vertryben (danne der esel lag im wege wie ain
 staine) vnd sy [179^b] aber gericht wären zü der fluchte! daz
 sy dann nit vmb sust sich so lang sumptent! do lüdent sy dem
 selben esel sin burde ab vnd legten die vf mich vnd das pferte!
 30 Aber dem jemrigen esel der da gewesen was ain gesell vnsere
 gefengknüsz vnd tragens, hüwent sy ab mit jren schwertern
 sine bain vnd wurffent jnn, dennocht halb lebend vber ainen
 felsan ab. Vnd machet der tode Im diser siner arbeit ain
 ende. Vnd do jch sach wohin mine rett dienen wolten! satzt
 35 jch mir für mit dultigem gemüte dise burde zetragen vnd
 schnell den wege ze volbringen. In hoffung daz Ich etwenne
 rosen finden sölt da mitte jch mich widerumb zü menschen
 machen wurd. Besunder dwyle jch vsz der mordern Worten

gemercket hatt, noch wenig wegs vorhanden sin, bis an die
 statt da sy diser burde entlediget belyben wurden. Vnd jch
 richt mich ouch hierzû ob es not tûn wurd daz Ich nit allain
 geen sunder ouch louffen möchte etc. Zû vesper zyte kamen
 5 wir haim in Ir huse! darInne ain altes wybe sas by dem füre.
 Vnd als die morder vns vnser burden entludent! frägtent Sy
 das alt wybe. wes sy sesz, daz sy nit billicher den Imbis tett
 beraiten. Die jnen antwort! daz alle ding beraitet weren vil
 brotes alter wine vnd wiltgebrett. Sy lobten das alte wyb
 10 vnd zugent vsz ir klaiden vnd satztent sich zû dem füre vnd
 salbtent sich mit öle vnd waz alda ain geschirre voll warmes
 wassers da mitte sy sich tätent baden. bald darnäch kament
 Jüngling gold silber vnd klaiden von fröwen vnd von mannen
 genomen Vnd das alles an gemaine bütte gehort, mit Inen
 15 bringende. Vnd als sy das hin In getragen [180] hatten!
 tätent sy sich ouch (Wie die vorigen) weschen vnd baden.
 Inen was ain genugsamer Imbis vnd mangerlay rede von ir
 morderye. Das alt wybe gab mir vnd dem pfert gersten!
 welches pfert sölich gersten gyttenklichen vf äs, vsz forchten
 20 daz ich wurd sin ain mitgeselle sines fütters als aber das alt
 wybe hin weg kam! äs ich das bröt das dar Inne lag. Des
 dritten tages liessen sy ainen ainigen Jüngling by dem alten
 wybe vnd giengen all hin vf ir gewerbe. Ich empfand mir
 emsig hütter zû gegeben sin, wie wol ich das alt wyb ver-
 25 achtet! danne lycht was ir gesicht zefliechen Aber den Jüng-
 ling mit ainem schwert vmbgürtet vnd oft mich ansehend
 tett ich fürchten. Des andern tags vmb die zyt mitternachte!
 kamen die böswicht herwider gegangen! weder gold noch
 silber aber ain schöne jungfröwen wainend vnd mit zerströw-
 30 tem håre vnd zerrissnen klaidern mit Inen bringende die sy
 nidersatztent in ain ströwe vnd hiessent sy sin ains gûten
 mûtes vnd enpfalhent dem alten wybe, daz sy stetz haimant
 by dem hus belib vnd mit flysz die jungfröwen tett verhütten!
 die werder essen noch drincken wolt, sunder allain wainet
 35 vnd ir håre zerraisz so vil! daz ich ouch vsz Irem wainen
 bewegt, by miner kripfen die ir nâche was, mine trechen reren
 müst. dar zwüschen namen die böswicht vsserhalb des huses
 vnder ainem fürschoffe das nachtmåle. Mornends als es tag

worden was, kam ain spächer vnd kuntschafter sagende ainen
 fremden gaste vf dem wege sin mit grossem gûte. Vf dise
 kuntschaft sy all gewäpnet vfwusten mich vnd das pfert yetz
 mit ysen beschlagen mit [180^b] Inen nemende. Vnd als ich
 5 vnseliger nit wisset daz ich gefüret wart zû ainem stryten
 vnd fechten vnd deshalb gemachh gieng! wart jch aber mit
 stecken geschlagen bald zeyllen! Vnd als man an die statt
 komen ist, do der gast funden wart! Ertotten sy des ersten
 den selben menschen vnd sine knecht vnd fielent dar näch
 10 alle vngestümenklich vber die wegen vnd fardel die vfhöwende,
 Vnd lüdent mich vnd das pfert mit dem costlichosten so in
 den fardeln gewesen was das vberig alles verburgent sy in
 ainem walde. Vnd karten widerumb haim zû jrem huse. als
 jch aber mit stecken oft vnd vil geschlagen was, Verletzet jch
 15 ainen hüfe mines füsses an ain scharpfen staine so vast! daz
 vsz sölicher verletzung mir mit grössem wee ain wunde wart.
 da durch beschach daz jch den vbergen taile des wegs hinckent
 haim geen müst. do redten dise böszwicht mit ainandern. was
 tût note daz wir disen esel der so oft struchet vnd sich nützit
 20 vermag so lang fürent. Tügen wir den vnnützen fulen schel-
 men etwa vber ainen felsan abwerffen vnd gebent den (als
 man pflegt zetûn) für ain künftig raingung vnd opfer vnsers
 handels. Do Ich dises boschlich rätschlagen wider mich also
 verstünd vnd marckt do vergas ich miner wunden vnd tett
 25 den andern taile des wegs zum besten volbringen. danne die
 forcht des todes mir hinnam allen schmerzen der selben wun-
 den. vnd do wir also zû jrem huse komen wären vnd sy vns
 vnser burden entladen hatten! sässen sy nider vnd ässent ze-
 nachte Vnd Als sy dar näch der selben nacht widerumb hinweg
 30 geen wolten, das ander gûte daz sy jm walde gelassen [181]
 hatten, zeholen. Redt ir ainer. Wes wöllen wir dises vnge-
 lückhaften Jemrigen esels mit vns zefüren der doch vnnütz
 von wegen siner wunden des füsses. Tügen wir der dingen
 so noch in dem walde sint vorhanden, ainen taile laden vf
 35 disz pfert vnd wir die vbergen taile selbs tragen Mit diser
 rede schiedent sy abe, das pfert allain mit Inen fürende. Vnd
 als die nacht von schine wegen des manes hel was! Redt
 ich in mir selbs zû mir. Wes wilt du Jemriger lenger warten

der nützit anders bist dann ain künftig äse vnd spyse der gy-
 ren vnd Irer Jungen? Häst du nit verstanden was dise mor-
 der von dir geredt haben Wilt du von ain hohen schrofen
 in ain tieffe geworffen werden? Die nacht ist hele vnd sint
 5 die böswicht hinwege gegangen. Wes baitest du? Beger hail
 mit fluchte von disen mordern. Vnd do ich disz also gedächt
 vnd ich mich sach ledig steen (Danne min halfter was dort
 vfgehenckt) richt ich mich zû der fluchte mit allem fysz vnd
 gieng also vsz dem huse vnd hûb an zefliechen. Do aber das
 10 alt wybe das ersach! do hûb sy mich by dem schwantze
 Dwyle Ich aber maint dise min flucht sin ain sachh wirdig
 gnûg mines todes wo ich von dem alten wybe behept worden
 wer. Do zoch vnd schlaifte Ich das alt wybe hernäch die
 mortlich schray vnd anrûft die Jungfröwen mit luter stimme
 15 vmb hilff ir gegen mir zetûnde. Als aber die Jungfröwe her
 für kam vsz dem huse! Vnd disen schimpfe tett ersehen!
 hât sy sich ainer edeln getäte wirdig langer gedechtnûsz tür-
 stenklich vnderstanden vnd ist vf mich gesprungen vnd
 [181^b] worden ain gesellin miner fluchte. Als jch aber zû
 20 fliechen girig was von wegen min selbs vnd ouch der Jung-
 fröwen! rant Ich hin ains graden wegs das alt wybe hinder
 mir verlassende. Die jungfröw vf mir sitzende, batt got vmb
 gelück vnd haile. Aber gegen mir redt sy. lieber esel ist daz
 du mich bringest in min vätterlich huse So wil ich dich fryg
 25 machen vnd ledig aller arbeit, Vnd müsz teglichs än allen
 abgange dir sin zû spyse vnd fûter ain vierdling gersten. Vsz
 diser Jungfröwen verhaissung vnd vmb daz Ich wisset mich
 fliechen minen ertöder, do rant jch schnell mit der Jungfröwen
 hin, die wunden mines fûsses gantz verachtende Als wir aber
 30 an ain wegschaide dryer strassen zûsamen stossende kämen!
 do begegnotent vns vnser vinde die morder haimwertz gende!
 die von ferrem by dem mäschyne vns Ire gefangen bekennet
 hatten! Vnd do sy mich louffent erwüst vnd ergriffen hatten!
 karten sy sich gegen der Jungfröwen vnd sprachend. O. schöne
 35 Jungfröw. Wes wandelst du arme also durch wege dir vnbe-
 kant? Fürchtest du nit die tûfel? Darumb kere vmb. Wir
 wöllen dich den dinen wider geben vnd als sy das also lachend
 geredt hatten. Do karten sy mich vmb. Als Ich aber durch

enpfindund miner wunden (Vmb daz sy yetz ernüwert was)
 an hûb zehincken! Redten sy. Bist du erst yetz ze lest so
 du gefangen worden bist hinckend worden. Vnnd vor do du
 fluchest enpfundt du diner wunden gar nützit besunder werdt
 5 du gesund vnd mit dinem louffe schneller wann ain pferte
 oder ain fogel. Vnnd täten dise böszwicht [182] vnder disen
 worten, mich mit tremeln als schlachen daz mine arsbagken
 gantz voll wurden aissen vnd geschweren. Vnd als sy haim
 kamen funden sy das alt wybe von ainem felsan hin ab sich
 10 selbs erhencket han. Danne vmb das sy geförcht hatt (als
 sich gepurt) die morder von wegen der Jungfröwen fluchte!
 do hatt sy Ir leben an aim stricke geendet. Des dise wunder
 hatten vnd sy ahhüwent vnd in ain tieffes tale täten werffen.
 Darnäch bunden sy die Jungfröwen vnd giengen zû dem nacht
 15 essen. Dasselbs als sy vil gedruncken hatten vnd von der
 jungfröwen redten! sprach ainer vnder Inen. Was were vns
 aber fürzenemen mit diser flüchten jungfröwen. Dar zû ain
 anderer sagt. Was mainst du daz wir anders mit ir fürnemen
 vnd tûn sölten! danne daz wir sy ertöten vnd zû dem alten
 20 wybe werffent! dann sy hât sich geflissen vns vnsern nutze
 ze entfûren Vnd vns vnd vnser kunst zeuerrauten. Wann ir
 wissent! were sy also zû den Iren komen daz vnser aller
 leben in sorgen wer gestanden vnd wir all vnuerwândt vnd
 vngewarnet werent worden vmbgeben vnd gefangen. Vnd dar-
 25 umb so rechent wir vns an diser vnser lebens vindin. Aber
 nit also daz sy von ainem felsan geworffen ains schnellen to-
 des sterben werd! Sunder so ist vns zeerdencken ain form
 des todes da durch sy mit langem wee vnd schmerzen von
 vns werd gepinget. Vnd als dise böszwicht von söllichem jrem
 30 tode ye ainer wider den andern redten. Sagt der vorig. Ich
 wil ains hin zûsetzen das Ir all werden vnnd müssen loben.
 Den esel der [182^b] allweg fule vnd träg gewesen ist vnd
 sich yetz lugenlich hinckens angenommen hât! müssen wir ver-
 lieren. Danne er ain gesell vnd helffer gewesen ist der fluchte
 35 diser Jungfröwen. Den selben tügen wir des ersten ertöten
 vnd schnyden dann vf sinen buche vnd werffent dar vs sin
 geterme vnd Ingewaid! Vnd verschliessent denne dar In dise
 Jungfröwen! Also daz ir allain hervs rage Ir houpte vmb

daz sy nit bald ersticke. Der ander taile Irs lybes belyb ver-
 borgen in des esels buche vnd so der zûsament genäyet syg!
 So tügen wir sy bede hinwerffenn den gyren als ain spyse
 berait nach nüwem sitten. Ich bitt (sagt er) nement war di-
 5 ser form grosser kestigung. Des ersten so ist sy lebendig
 anklebend ainem töten esel vnd schelmen. Dar näch wirt sy
 von brennender sunnen in desselben esels lybe wie in ain
 hafen gekochet vnd dar zû mit hunger zû dem tode gepinget
 vnd ist doch nit mechtig sich selbs ze ertöten. Des andern
 10 da mitte sy gepinget werdt (durch gestancke des fulenden
 schelmens vnd durch wûrm dar vs wachsende) wil ich geschwy-
 gen. Zû dem allem ouch die gyren in Irem waiden den schel-
 migen lychnäm vnd den lebenden lybe der Jungfröwen sament
 werden zerzerren vnd zerryssen etc. Disen nüwen funde ge-
 15 lych ainem merwunder lopten sy alle. Ich wainet mich selbs
 als yetz künftenklich des todes aigen vnd was nit als vil trurig
 vnd laidig mines todes als vil des! daz ich solt werden ain
 künftig herberg der armen vnseligen Jungfröwen die nützit
 [183] arges hatt verschuldet. Vnd was yetz worden gegen
 20 tage. do ain macht kam etlicher raisiger gesellen die in fielen
 zefähen dise lasterliche morder, die ouch alle von den selben
 raisigen wurden gefangen gebunden vnd schnell hingefürt zû
 dem richter der selben gegne vnd landes. Vnder disen raisigen
 was ain ritter dem dise Jungfröw vormäls was vermechelt,
 25 Vnd der deshalb disen mordern hatt näch gefragt vnd die er-
 spächet. Der selb satzt die Jungfröwen vf minen rugken vnd
 fürdt die wider zû Iren fründen vnd als das husgesind da selbs
 vns von ferrem her ersachen vnd bekanten, gewunnet sy mit
 luter stimme an vatter vnd müter das mettenbrot vnd vns en-
 30 gegen louffende mit grossen fröiden fürten sy vns haim in Ir
 huse. Die Jungfröw sagt vil von mir wie jch wer gewesen
 ain mit gesell irer gefencknüs z vnd fluchte vnd mit Ir zû dem
 tode worden verurteilt Vnd tett mich deshalb etlichen getrü-
 lich enpfelhen vnd besunder vnder anderm mir bald geben ain
 35 viertail gersten vnd höw als vil ain kemeltiere gnüg sin
 möcht. Do ich aber sach vil hunde in den hofe her In louf-
 fen, die (als an rycher lüten hochzyten vnd brutlöfen gewon
 ist) vil frässent vnd verschlundent! da verflüchte jch Pale-

stram! daz sy mich zû aim esel vnd nit zû aim hunde durch
 ir kunste hatt verkeret vnd gemachet aber nit lang nâch sô-
 licher hochzyt Als die jung fröw mir verhaissnen dancke wolt
 bewysen! tett sy Iren vatter ermanen vnnnd bitten daz er
 5 mich mit der hert vnnnd schare der feld pferten wölt lassen
 vsz vnnnd in geen vnnnd in wollust fryg aller arbeit lassen be-
 lyben. Vnd daz Ich also (Wenne mich geluste) [183^b] mit
 den feldpferten möcht pflegen werck der nature. Das alles
 mich bedücht hett sin genûgsam danckbarkait! wo disz sust
 10 ain ding gewesen wer mines willens. Also berüft er den hir-
 ten sôlicher feldpferten vnd tett mich Im enpfelhen, des ich
 mich fröwet in hoffung daz ich nu mer vnd füro hin vnder
 kain swere oder belaidung aincher burdin komen sölt. Vf das
 ouch der hirt mich mischet vnder die gemelten pfert vnd traib
 15 mich hin mit denen ze waiden. Aber anders dann die mai-
 nung gewesen was tett es mir fallen vnd geräten. Danne
 ainer der vber die hert ain obman was vnd dero gewalt hatt!
 lies mich siner husfröwen haimant jm stalle verschlossen steen.
 Die selb mich denne in der pfisterye mit stricken angebunden
 20 not vnd zwang zemalen kernen vnd gersten. Mittelmessig was
 dise arbeit besunder ainem danckbaren willigen esel zemalen
 so vil sinem herren, als vil zû desselben bruhe gnûg gewesen
 wer. aber dise fröw dero gytig gemüt zû gewin gerichtet was!
 lies mich ouch bruchen vnd minen Jemrigen halse müd machen
 25 in ander lüten (dero vil wären) arbeit vnd geschefften vmb
 lones willen sôliches malens. Darzû die gerste so mir zû
 spyse vnd füter beschaiden vnd zûgehörig was, tett sy mich
 ouch nötigen zemalen vnd machhet dann vsz dem mele kûchen
 vnd zelten! mir für die gersten allain daz grüsch gebende.
 30 Vnd ob wol der hirt mich vnder die hert vnd schare der ros-
 sen vnder wylen zû waide geen lies! so ward ich doch von
 den selben rossen verargwânet vnd veryfert Inen als ain
 eebrecher schaden zetun vnd danne deshalb von Inen mit bys-
 sen vnd mit straichen Irer [184] füssen, also vngeseliget vnd
 35 gemüget daz jch vmb nichte sôlicher yffrye mocht endrûnnen
 vnd darumb so ward Ich In klainer zyte an dem ende vast
 mager vnd vngestalt. dwyle jch weder da haimant rüwig was
 obgemelter arbeit halb, noch vf dem felde an der waide sich

her sin mocht von durechtung der rossen Ich ward ouch vn-
 derwylen an ain gebirg gesant burden holtzes zeholen das mir
 ain v̄bel was böser danne ainches ander. Dann des ersten
 was ain berg vfzestygen der stainin was scharpf vnd herte
 5 Besunder mir der da gieng vnbeschlagen parfusz vnd äne so-
 lan. Sölichen wege wart Ich aber geführt von ainem groben
 eseltryber, der dennocht ain Junger mütwilliger bube was!
 vnd mich etwenne nach nüwem sitten sücht zeuerderben dwyle
 Er mich oft schlüg so Ich rant vnd luf. Vnd er tett ouch
 daz nit allain mit schlechtem holtze sunder mit sölichem dem
 10 scharpf stechend zingken Ingewachsen wären, dar mitte er dann
 die hindern taile mines rugkens also erbart vnd erstraichet
 daz min arsbagken durch sin emssig straihe an dem selben
 ende allwegen vffen stunden vnd vnsuber von geschweren vnd
 aissen. Dar zû so lûd er mich, so mit grossen schweren bur-
 15 den, daz die ainem helffand zetragen schwer gnûg gewesen
 weren. Vnd wie wol der abgange des selben bergs gech vnd
 schlecht was! So mocht jch doch noch dann von dem selben
 buben vnd eseltryber straihen nit ab sin. Begab sich dann
 etwenne, daz ain burde vf der ainen syten die andern burde
 20 vf der andern syten fürwag! So tett der bûb vmb nichte
 [184^b] von der schweren burde holtz nemen vnd die lychtern
 dar mitte verglychen! sunder legt er vf die lychtern syten
 schwer grosz staine. Da durch dann ich Jemriger also be-
 lestiget haim gieng bede holtz vnd vnnütz stain tragende. Vff
 25 dem selben wege was ain bach äne schiffung. Wenne ich da-
 selbs hin kam, So sas der bûb (Vmb daz Er siner schûchen
 schonte) hinder die burde holtzes hinden vf mich bis er hin
 v̄ber kam. Also daz gar oft beschach daz ich von arbeit we-
 gen vnd von so grossen burden nider fiel. Als denne was
 30 mir erst vnlichenes Jâmer zûgericht. Danne er sprang nit
 ab mir vmb daz er mir vf hulff oder mich mit sinen henden
 vf richte oder daz Er die burdin lychter machte! Sunder
 oben an minem haupt vnd an den oren anhebende durch
 schläge er mich vnd allen minen lybe ains schlachens, als lang
 35 bis er mit vile der straihen mich zû lest zwang daz ich mit
 grosser note vfkam Vnd aber hab ich noch ain grössers vnd
 vnlicheners Jâmer vnd v̄bel von disem buben vnd eseltryber

gelitten vnd lyden müssen Ain burden spitziger tornen die ich
 vf mir trüg gebunden vf minen hindern! tett er mir knüpfen
 vnd binden an minen schwantze sölicher mässe, daz die selb
 burde also hangende mine bain, wenne ich gende die bewagt
 5 (als ich ouch geen müst) bitterlich tett sthechen vnd pingen So
 mocht ich ouch diser boszhait nit vor sin näch dem die torn
 hinden ab hingend vnd von mines ganges wegen stetz schwanck-
 ten vnd wider schlügent. Dann wenne ich dester gemecher
 [185] gieng vmb daz Ich der tornen schleg vermitte so schlüg
 10 er mich hart mit ainem tremel. Wolt Ich dann mit bald geen
 sölich straih vermyden so wurden mine hindern bain dester
 herter von den tornen gestochen Also daz disem eseltryber
 sin gemüt gantz stünd mich zetöten. Ains mäls hatt Ich Inn
 mit minem füsz geschlagen des wolt er mir füro niemer mer
 15 vergessen. Vf ain zyt wart Im enpfolhen werck vnd flachs
 von diser gegne an ain ander ort zefüren, daz selb wercke Er
 mit etlicher kunste band vf minen rugken, hier mit boschlich
 sühend min sterben Vnd do Ich mit diser burde wenig ferre
 gangen was! Verbande er haimlich ainen gelügenden zun-
 20 der in das wercke, dar von es bald enzündet gantz an hüb
 zebrinnen Vnd do Ich des enpfand, vnd marckt mich hie durch
 müssen verbrünnen, Lüf Ich vsz dem wege in ainen see der
 mir zü gelücke nit ferre was vnd vil darIn vnd walet mich
 mit sampte disem werck vnd flachse in dem wasser so lange
 25 vmb, bis das füre ward erlöschten. Nächstmäls gieng jch den
 andern taile des wegs an sorge, die wyle der büb nit mer
 macht hatt sölich wercke zeentzündten daz yetz voll worden
 was wassers vnnnd schlymes. Als aber diser lasterlicher bube
 vnnnd eseltryber haim kam! legt er alle schuld vf mich sa-
 30 gende, Daz ich von mir selbs aigens willens in ain füre wer
 gesprungen. Darnäch erdacht ain anderer wüster büb vnnnd
 böser knabe ain grösses vbel vber mich. danne do mich der
 selb zü dem gebirg gefürt vnd mir daselbs ain grosse burde
 holtzes [185^b] vfgelegt hatt! tett er sölich holtze ainem ge-
 35 buren verkouffen vnd mich ler haim füren vnd schuldigen vnd
 sagen. Wes wöllen wir disen esel fürbas lenger vmb sust
 füren der ful treg vnd schwer ist? Schöw zü wo mit Im
 wol syg? Ist daz er ain hüpsche fröwen oder Jungfröwen

ersicht! Von stund an schlecht er mit sinen hindern füßen
 vf vnd rennet zû ir wie menschen tûnt zû Iren lieben bûlen
 vnd mit byssen vnd mit küssen Ir begerende, Vnder steet er
 sich die zehälsen! dar vs dir herre krieg vnd hasse entsteet
 5 durch clag vnd forchte aller menschen. Dann nechste trûg
 er holtze Vnd als er ain fröwen ersach in das felde geen!
 Warf er das holtze von Im wyt zerströwet vnd luf der fröwen
 näch, Als ob er die wölt hälsen vnd vnküschhait mit ir tryben
 vnd pflegen. Bis daz zû lest etlich von allen orten her zû
 10 lüffent vnd die fröwen errattent von dem ansturme dises hüp-
 schen bûlers. Vnd als der patron vnd obman des fichs sö-
 lichs dem bûben geloubet! Sprach er die wyle er dann nit
 recht geen noch die burden tragen wil, sunder als girig den
 fröwen nächfolget in bûlschaft vnd menschlicher liebe! So
 15 tötent Inn vnd werffent sin Ingewaid hin den gyren vnd be-
 haltent das flaisch den arbaitem vnd wercklûten zû spyse.
 Frage dann yemant wie er tode syg So sagent vnd stiftent
 jnn ertödet sin von den wolfen diser rede wart der bös schalk-
 haftig bûbe erfrowet vnd richtet glych zû, mich bald zeertöten.
 20 aber von geschicht des gelückes beschach, daz ain ackerman
 der ain nächgepur was mich von disem tode tet erretten, vnd
 sprach. Vmb kain sach tû disen esel ertöten, der [186] noch
 geschickt vnd tûgig ist in die pfistery zemalen vnd zetragen
 die secke So ist es ouch nit grösz zeachten daz er fallt in
 25 liebe der fröwen! Verschnyd jm so vergeet jm die gailigkait
 der minne vnd wirt zam still vnd fuisse! daz jm ouch nit
 schwer sin wirt aller schwerest burden zetragen. Vnd ob du
 nit waist wie man jm verschnyden sol! so wil jch in dryen
 oder vier tagen dir ainen man zûbringen diser kunst wissend
 30 vnd ernietet. Diser räte was allen denen so zû gegen wären
 gefellig als jch aber das erhört do gos jch vs mine trechen,
 daz jch in ainem esel solt vfhören zesind ain mane vnd be-
 gert ouch fürbas nit me zeleben wenne Ich wurd sin ain ver-
 schnitter enuche vnd satzt mir für ee hungers vnd vngeessen
 35 zesterben oder vber ainen felsan ab hoch zespringen, da mitte
 Ich mit Jemrigem tode entwichhe noch aim Jemrigerem leben.
 Also beschach daz zû angender nachte ain bottschaft kam in
 das dorffe, die tochter so vormäls als obsteet gefangen gewesen

was vnd jren elichen huswirte mit dem sy nechst hochzyt ge-
 hept hatt zû mittag zyte alz sy by dem stade des meres ge-
 gangen weren, von dem vngestümen wasser desselben meres,
 sin verzucket vnd erdruncken vnd dises ende Irs lebens ge-
 5 nomen haben. Die knecht satzen jnen für vnd wurden des ains,
 die wyle sy Ire herren und fröwen hetten verloren vnd ir huse
 ler worden wer, daz sy dann fürohin kains wegs nüwe herren
 haben oder aigenschaft jrs lybs me lyden wölten Vnd roubtent vnd
 näment deshalb mit Inen was vf dem lande was vnd flüchent dar
 10 mit hin wege. Aber der so vber [186b] die roszt vnd pfert gewalt
 vnd oberkait gehept hatt! vasset gütes vnd anders vf, als vil
 er mocht vnd lüd das alles vf mich vnd die pfert vnd zoch
 hinwege Es müß mich daz ich nit trug ain burde zimende
 ainem esel. Doch fröwt ich mich endrunnen sin der sorgfel-
 15 tigkeit des verschnydens. Diser gantzen nacht zugen wir ainen
 ferren wege vnd kamen an dem dritten tage in ain statt des
 landes macedonia genant berria die grösz was vnd voll folckes
 darinne der, der mich fürt maint zebelyben vnd sine pfert
 daselbs zeuerkouffen. Der büttel stünd in dem mittel des
 20 marcktes vnd bod fail vns alle. Aber die köffer besächen
 aigenlich vnd mit flysse alle ding, vnd täten vns vf vnser
 müler, an den zenen das alter ains yeden erfahren. Die pfert
 vnd tiere alle wurden verkouffet bis an mich der zum letsten
 vberbelaib. Der büttel hies mich widerumb an die herberg
 25 füren! sagende. Du sichst daz allain diser esel kainen kouf-
 man funden hât! magst du nu mer selbs gedencken wie du
 des abkolest. Aber die schickung des gelückes das vil endert
 vnd verwandelt fügt mir zû ainem herren, aller minst, mir an
 nem oder gefellig. Es was ain alter Cineder der menschen die
 30 da die göttin syram vmbtragent durch die land vnd dörfer
 vnd opfers begerent vnd das samelnt von den lüten zû eere
 der selben göttin. Disem mane ward Ich vmb vil geltes ver-
 kouffet namlich vmb dryssig pfund heller dem ich angebunden
 haim nächfolget. Vnd do wir zû dem huse Phileni kamen
 35 (Dann also hies der köffer mit sinem namen) rüft er gegen
 siner türe mit lüter stimme. O. [187] Corrosia. Ich han vns
 gekouft ainen aigen knechte hüpsch grosz vnd starcke vnd
 der geburt von Capadocia. By diser Corrosia was ain gantze

schare der Cineden, die helfer vnd mit gsellen wären des be-
 nanten Phileni gelte vnd gauben der göttin zesameln die sich
 all diser siner rede fröwtent vnd wändent Er hett ainen aigen
 menschen zû knechte gekouffet. Als sy aber mich esel sahent!
 5 schultent sy Philenum, der nit ainen knechte sunder ainen
 prütgum vnd gemachel haim gefüret hett, siner hochzyt vnd
 sinem brutlöffte wol wirdig von dem Er schier Junge geberen
 wurd. Vnd do sy diser worten all gelachten vnd nu willen
 hatten Ir terminye fürzenemen vnd mit diser vor gesagten
 10 göttin gelt Inzebringen. Vnnd sy dem näch da haimant Ir ge-
 bett vnd opfer volbrächt hatten! lüdent sy die göttin vf mich.
 Vnd als sy vsz der statt gangen wären vnd yetz durch das
 lande zugent! Kämen wir in ain grösses dorfe darInne ich
 mit der göttin gestünd vnd belaib Vnd als der selben ainer der
 15 vnder Inen dises dinges ain obman sin solt, Etliche wort vor
 aller mengklichem redt vnd sagt recht gelycher wyse als ob
 er gottes voll wer. do wurffent die andern von jnen jre hütt
 vnd kappen vnd entackten jren lybe oben her ab von dem
 houpte bis vber die schultern vnd schlügen vnd zerhüwen jre
 20 achseln vnd arme. So zugent ouch jr etlich Ir zungen her
 vs vber Ir zene darin höwende vnd schnydend Also daz in
 kurtzer zyte Es alles voll blütes ran diser göttin zû eeren.
 Alda ward ich vast vbel [187^b] erschrecken! bewegt vnd förcht-
 tent, das man esels blütes der göttin zehaben ouch notdürftig
 25 sin wurd näch disem handel, do sy also ir blüte hatten lassen
 vsz fliessen! do sameltent sy von den vmbstenden lüten Vnd
 geburen heller vnd pfennig. Ir etlich brächten Inen ouch
 flaisch Ir etlich kās Ir etlich wine Vnd ir etlich waissen vnd
 gersten zû spyse vnd füter mir jrem esel. Dar von dise Cine-
 30 den den vollen hatten gütes essens vnd trinckens Vnd täten
 vnd volbrächten ouch noch dann dar by gaistlich opfer vnd
 zugehörde diser göttin. Vnd als sy nu wyter wandelten vnd
 durch ain dorf zugent! Ersahent sy daselbs ainen gewachsenen
 hüpschen Jüngling den sy vf fastent Vnd mit Inen an ain her-
 35 berg fürtent Daselbs sy mit disem Jüngling als mit aim wybe
 pfülgent schamlicher wercken Als dann das diser lasterlichen
 menschen der Cineden sitt vnd gewonhait ist. Ich hatt laid
 daz jch in ainen esel verkeret was vnd deshalb so grösz sünd

vnd laster nit kond noch mocht sagen vnd offnen
 Aber do jch schryen wolt! o. jr lasterlichen böswicht!
 do gab jch für ains menschen stimme ain geschraye
 ains esels Sich hât aber begeben das in dem, etlich des
 5 dorfs geburen sūchten ainen verlornen esel vnd als die
 selben min geschray in dem huse erhorten! fielent sy snel
 in das huse mit kainer vorgender warnung vnd mainten jren
 esel also alda zefinden! do funden sy die Cineden an sōlichen
 lasterlichen wercken, Des sy hin lūffent vnd mit grossem ge-
 10 lechter durch das gantz dorf sagende diser gaistlichen menschen
 lasterliche sūnde vnd v̄bel, die sy von Inen hatten gesehen
 Die Cineden (vmb daz [188] sy also an diser sūnde ergriffen
 vnd des schandenhalb erschrocken wāren) zugent sy der selben
 nacht hinwege. Vnd do sy an ain besunder ainig ende ka-
 15 men! Do schuldigotent sy mich mit vast grossem zorne, sa-
 gende! Ich hett Iren handel mit minem geschraye geoffnet.
 Dise böse wort dero sy sich gegen mir gebruchtent, wāren
 strāffe vnd schāden mir wol zelyden! Aber das so nāchfol-
 get was schwer zedulden. Danne sy satztent die göttin vf das
 20 ertrich vnd zugent mir den sattel ob minem rugken Vnd bun-
 dent mich nackent an ainen starcken böme vnd schlūgent vnd
 schwungent mich mit stecken von adern gemacht bis vf den
 tode vnd hiessent mich hie nach geschwigenlicher sin Sy wur-
 den ouch nāch disen straichen zū rāte! daz sy mich wōltent
 25 ertōten vmb daz ich diser puren zorn in sy hett erwecket Vnd
 daz sy minenthalb nit hetten daselbs mugen haben vnd sameln
 Iren gewonlichen gewine Aber die göttin die vff der erde
 stūnd, was mir zū hilff vnd schirme mines lebens, Vmb daz
 nit gebruchh wer aines, der sy möcht tragen. Also nāch vil
 30 erlittner straichen lūdent sy zū lescht, die göttin widerumb
 vf mich vnd fūrent hin ir strāsse. Des aubentz kamen wir
 zū ainem hofe ains rychen menschen. Der vns willenklich
 vnd wol enpfieng in sin huse vnd daselbs der göttin opfert
 vnd tett gebūrllich zucht, vnd eere. Alda begieng ich ain
 35 grosses sorgklichs dinge. Es hatt ain gūter frūnde vnsers
 wirtes jm zū schencke geschickt ain stuck wiltgebretz von
 ainem waldesel, Das aber ettlich hunde die haimlich in das
 huse komen wāren, hatten gefressen von [188^b] liederliche

vnd sumnüz wegen des kochs der Im deshalb so grosz vnd
 vast forcht, daz Er durch enpfelch sins herren gesträffet wurd,
 daz er deshalb gedächt sich selbs ze ertöten. Wo der herren
 husfröwe Im das nit hett benomen mit jrem räte der also
 5 was Wilt du mirgelouben vnd folgen (sprach sy) so behaltest
 du dich by leben vnd tust ouch disen schaden gantz fürkomen
 vnd verbergen? dise Cineden haben ainen esel wo du den
 fürest an ain sunder ainig statt, So magst du Inn lichtenklich
 töten! Von dem selben nim dann ainen taile, Vnd beraitt den
 10 zü spyse dinem herren. Den andern taile verwirf daz er nit
 syg ze finden. So werden die Cineden mainen Iren esel hinweg
 gelüffen sin vnd füro nit me funden werden mügen So ist diser
 esel faisz vnd vast gelych ainem wilden waldesel daz er lychten-
 lich dar für wirt geachtet. Vnd als nu diser fröwen räte an-
 15 genommen wart! Illet der koch den zeuolstrecken. Do Ich
 aber ersach sölichen sinen fürsätze. Do maint Ich sölich, min
 künftig vbel aller beste mit flucht ze fürkomen vnd schnurret
 vf vnd zerraissz die halffter vnd den zügel dar an Ich was
 gebunden! vnd her vs springende luf Ich ains vngestümen
 20 gnadenlouffes als vil Ich verlouffen mocht in den sale da die
 Cineden by dem herren ob dem tische sässen vnd rumpelt vnd
 sties vmb liechter tische essen vnd trincken vnd alles das so
 vf dem tische was. In mainung daz das ain hüpscher funde
 sin sölt minem künftigen haile, vud daz der herre mich müs-
 25 sigen schnell vnd bald wurd haissen behalten ettwa an [189]
 ain ander sicherer statte. Aber disz ding kam mir zu grössem
 kumber vnd lyden. Danne sy all mich mainten wütend vnd
 vnsinnig worden sin vnd schlügent vf mich mit schwertern
 meszern schytern vnd stangen gelycher wyse als ob sy mich
 30 begerten zetöten. do Ich aber dise sorgueltigkait sach vnd
 marckt! floch Ich In den hindersten taile des huses, da die
 Cineden schläffen wurden vnd vsserhalb die türen hatten be-
 schlossen. frü gegen tage lüdent sy die göttin aber vf mich
 vnd schiedent ab In ain ander statt, an folck vnd rychtum
 35 mechtig mich mit Inen fürende. Dasselbs sich ain nüwes wun-
 der begab, Danne do die göttin abschlug in aim schlechten
 huse ains sundern menschen zebelyben! Hies sy sich setzen
 in den tempel des gotes der von den burgern daselbs aller

maist geeret vnd angebetten ward. Die burger wären des
 gütwillig ain fremde göttin, nähe zû Irem gotte in den tempel
 zestellen! Vnd gäben vns zû herberg ain huse ainer armen
 fröwen Vnd als die Cinedenn etwa manig tage alda beliben
 5 wären, Vnnd abschaiden wolten, vnnd deshalb der göttin von
 den burgern begerten! lies man sy in den tempel die zenemen.
 Als sy aber bös lüt wären do stälent sy daselbs in dem tem-
 pel ainen guldin vyol vnd verburgen den in die göttin. Do
 man das erfür! yltent vns die burger näch. Vnd als sy zû
 10 vns käment, sprungent sy von Iren pferten vnd fiengent die
 Cineden alle vnd nampten vnd schultent die sin dieb vnd
 kirchenbrüchel. Vnd als die burger den vyol fordertent vnd
 den allenthalben süchtent! fundent [189^b] sy Inn zû letscht
 in der göttin schöse verborgen vnnd verschlagen. Darumbe
 15 sy diese wybischen böswicht gefangen vnd gebunden fürtent
 in die statt vnd wurffent die in kercher vnd türne vnd stal-
 tent die göttin in ainen sundern tempel vnd gaubent den vyot
 widerumb Irem gotte. Des andern tags dar näch verkouften
 sy alles der Cineden dinge vnd mich des gelychen. Ich warl
 20 aber gekouft von ainem brot becken der gesessen was in ai-
 nem dorfe näch by der statt gelegen, der mir schnell vf lûd
 zechen viertail kernens von Im alda er kouffet! darmit er
 mich durch bösen scharpfen wege haim für. In sinem huse
 wären vil arbeitsamen tieren vnd vil Mülin die von den selben
 25 tieren gezogen wurden vnd Innwendig alles vol mäles Aber
 mich liessen sy desselben tags rûwen als ainen müden vnder
 ainer schweren burde ains sölichen weges (als man dann pfligt
 nüwer knechten des ersten zeschonen) mornends bunden sy
 mich an ain Joch des zuges diser mülin vnd verhanckten mir
 30 mit aim tûch mine ougen, daz Ich nützit mocht gesechen vnd
 hiessen mich ziechen vnd malen. Vnd wie wol Ich daz vor
 wol kond vnd gelernet hatt! do tett jch noch dann dem glych
 wie jch es nit künde in hoffung mir hie durch rûwe ze er-
 folgen. Das aber vmb sust was, danne bald jr ettlich die da
 35 gegenwürtig wären stecken erwusten vnd vff mich (der des nit
 wartend oder gewarnet was) schlügent, daz Ich bald die Mülin
 also zoch, daz sy vmlüff, schneller dann ain winds brute oder
 ain [190] müle des windes. Danne Ich durch erfahrung

gelernet hatt vnd wist, daz ain knechte zû volbringung der
 dingen so zetûn sint, schnelle sin sol vnd nit erwarten die
 strâff vnd hande sines herren. Vsz diser arbeit ward ich vast
 mager vnd blöde an minem lybe, Dar umbe Er mich ainem
 5 gartner verkoufft der anhûb ainen garten zebuwen, der selb
 oft vff mir krut gen marckt fûrt, Vnd dar nâch in dem felde
 vnd in den âckern mit graben mit pflantzen vnd mit wässern
 arbeit hatt dar zwüschent Ich rûwet. Aber hart gnûg was
 min leben von kelte wegen des winters. Die wyle min mai-
 10 ster nit allain mir, sunder ouch Im selbs nit mocht gebûrlich
 bete vnd geliger machhen deshalb yetz lindes kâte! denne
 hertes ertrich mir vil vngemachs geberen tâten. ain gelyche
 spys sures lactuckes was vns beden vnd begab sich ains mâls
 Do wir in die garten giengen daz wir bekâment vnd begegnotent
 15 ainem edeln man der angelait was mit ritterlichen klaidern
 derselb des ersten in welschen worten den gartner anredt vnd
 fraget! wohin er den esel tryben wölt! Welche wort aber
 der gartner (als ich vernam) nit verstûnd vnd deshalb ouch
 kain antwort dar vf gab! daz der edelman vermarckt Im zû
 20 schmäche sin beschechen vnd darumb den gartner mit ainem
 kolben schlûg vnd vbel tett miszhandeln. Des ergraif aber
 der selb gartner den ritter vnd warf Inn in dem wege vf das
 ertrich nider vnder sich vnd tett den also ligent mit henden
 fûssen vnd stainen vast hart schlachen. Vnnd [190^b] als sich
 25 der ritter wart vnd dar by trôwt. kem Er vf Er wölt Inn mit
 sinem schwert ertöten. Do zoch der gartner Im sin schwert
 vs der schaiden vnd warf das wyt hinwege vnd gab Im noch
 mer der straichen Als lang bis der ritter sorg sins lebens
 enpfeng vnd sich gelychet aim töten. Des der gartner er-
 30 schrack vnd das schwert vf mich legt, den ritter verlies vnd
 in die statt die flucht nam. Vnd daselbs ainem andern sinen
 garten tett enpfelhen den zebuwen vnd kart mit mir in. Zû
 ainem siner frûnden! da er sich verborgen wolt enthalten.
 Nâch desselben frûnds râte Er sich verschlos in ain kisten
 35 vnd ward jch by minen bainen oren vnd schwantze gezogen
 vil stegen vf vnd in dem obersten taile des huses in ain haimlich
 gemache versperret Als nu der ritter Im weg zû letscht kum
 vfgestûnd vnd mit note geen mocht von wegen der enpfangnen

strachen vnd doch in die statt kam vnd sinen fründen vnd
 gesellen die Im beegenotent sagt vnd clagt das vnrecht von
 dem gartner an Im begangen vnd nu die selben erfurent wo vnd
 in welchem huse der gartner sin solt? nämen sy zû Inen der
 5 statt richter vnd giengen für das selb huse vnd hiessen den
 hencker hin In geen ze erfordern alle die so in dem hus
 weren her vs zekomen. Do aber der gartner verborgen nit
 funden wart? Schrüwent die rüter vnnd raissigen diener des
 ritters vnd sagten Inn vnd sinen esel in dem huse sin. Dar
 10 gegen die so in dem huse wären [191] wort gäbent vnd
 sprächent, daz weder der gartner noch der esel sunder sy
 allain in dem huse weren Vnd als deshalb ain grösse vfrür
 gemürmel vnd geschray an der gassen entstanden vnd ich
 oben vff, girig was zewissen was das were? sties ich minen
 15 kopf oben zû aim pfenster hervs? daz die rüter bald ersachent
 vnd all schrüwent, den huswirt gelogen hon vnd mich oben in
 dem huse gesechen sin. Vnnd fielent dar mit all vngestüm-
 klich in das huse vnd als sy alle kamern vnd gemache durch
 süchten funden sy zû letscht den gartner in ainer kisten ligen,
 20 den sy hervs zugent vnd dem richter gäbent zesträffent vmb
 sy verschuldung. Als sy mich aber mit not all stegen hin
 abgebrachten gabent sy mich den rütern, Die sich all gegen
 mir karten Ir gespött mit mir trybend vnd sagende Ich wer
 ain böswicht vnd hett minen aigen herren verräten. Wie Es
 25 dar näch dem gartner ergienge waisz ich nit. Aber der rüter
 ainer kouffet mich vmb zwaintzig pfund heller Der selb rüter
 was ain diener ains vberschwenkigen rychen mannes ainer statt
 Thessalonia genant des landes Macedonia Dises rüters dienste
 was, daz er sinem herren sin spys vnd essen beraitet By disem
 30 wonet ouch ain anderer mit diener, der basteten vnd confect
 vnd honig zucker vnd güter spetzerye machen vnd bachten
 kond Vnd was Inen beden gemain aller husräte vnd alle ir
 geschirre vnd Instrumente zû iren künsten gehörig. Dise zwen
 beschieden vnd gaubent mir ain statt vnd gemache an aim
 35 orte des [191^b] huses dahin von den dienern vnd truchsessen,
 getragen wart was yedem herren ob sinem tische von flaisch
 fischen pfeffer gebachnem oder anderm vberbeliben was. By
 diser spyse liessen mich die diener vnd dienerin beschlossen

steen vnd giengent sy hin in ain bade. Ich lies die gersten
 mines fütters ligen Vnd fult mich diser menschlichen spyse.
 Do sy her wider kämen! do mochten sy von vile wegen der
 spyse nit berüffen noch mercken mich dar von ützt geessen
 5 han, Danne jch ouch dester messenklicher ge essen hatt vmb
 daz sy es dester minder möchten spürren. Do Ich aber sach
 sy sölich nit gemercket han! Do trost Ich mich wyter Ires
 vnflysses vnnnd fult minen lybe mit bessern stucken der vber
 belibnen spyse bis Ich gantz satt vnd volle wart. Zû letscht
 10 vnd vber lang als sy des schadens empfunden! hatt, ye ainer
 den andern argwenig vnd tätten doch von schame wegen das
 verschwygen vnd füro dester mer vnd grösser acht dar vf haben
 vnd die vberbelibnen stuck mercken vnd zellen. Do aber Ich
 also in rüwe wollust vnd fröiden lebet bin Ich worden so faisz
 15 vnd schön mines lybes, daz min hute von hüpschem håre tett
 wider gleston vnd schynen. Als aber dise menschen mich
 marckten hüscher vnd faisser worden sin, Vnd min gersten
 vnnnd füter sich kainist mindern! Sint sy gegen mir in arg-
 wäne gefallen! Vnd tättem dem gelyche Als ob sy aber vsz
 20 geen wölten zû bade Vnnnd als sy die türe näch Inen zûge-
 tätten vnd beschlussent! lügten [192] sy durch ainen spalte
 vnd klimsen was mines fürnemens sin wölt. jch wist aber nit
 sölich jr vfsetz vnd anschlege vnd gieng zû minem Imbis aber
 wie vor essende. dise zû lüger hübent des ersten an zelachen
 25 vmb daz ich sölich spyse ainem esel fremd vnd vngewon essen
 solt Vnd berüften dar näch die andern dienste vnnnd knechte
 alle haimlich sölich wunder zesechen? Die ouch alle mit Inen
 vester wurdent lachhen vnd so sere! Daz der herre selbs
 frägen vnd begeren wart Im zesagen! was beschechen wer des
 30 sy so vil möchten lachhen. Vnd do sy Im das gesagtent!
 Stünd er vf Vnd gieng vsz sinem sale ouch hin in lügende!
 Vnd als er mich also sach essen ain stuck wild gebretz aines
 waldesels! Do fiel er hin in lachend, zû mir in min gemache,
 Vnd ergraif mich an sölicher fressnye vnd düpstale! des Ich
 35 mich ser benam vnd vbel erschrack. Aber näch grossem ge-
 lechter alda gehapt! Hies er mich füren in ain wirtschaft
 güter mannen vnd gesellen vnd daselbs ainen tisch beraiten!
 mit so vil mancherlay menschlicher spysen, daz kain anderer

esel so vil möcht geessen han. Da wären schnegken flaisch
 fisch vnd von schmaltz vnd öle gebachens gesottens vnd ge-
 brätens, Mit senf geseltz gewürtz vnd sultze Ingemachet vnd
 beraitet vnd vil ander fremder spysen. vnd do jch empfand
 5 daz das gelück mir gunst bewysen wolt vnd bedächt daz mir
 durch disen schimpfe wol hail komen möcht! stünd jch zů
 dem tische vnd nam den [192^b] Imbis! alles das essende daz
 vf den tische vnd gestellet was, dar von die gantz wirtschafft
 in gröszes wunder vnd gelechter gebrächt wart. Vnd als et-
 10 licher vnder Inen fräget ob der esel ouch win trunck, hies
 der herre des huses bald win her bringen das zeuersüchen,
 den selben wine allen mir fürgehept Ich gantz vsztranck. Des
 der herre noch grösser wunder enpfachende, Vnd sinem diener
 der mich gekouffet hatt, Hiesz zellen vnd bezalen für mich
 15 zwifaltig als vil geltes vnd als vil er vmb mich vsgeben hatt.
 Darnäch enpfalch er mich ainem Jüngling der sin fryger diener
 was, mich zefüren vnd zevnderwysen vnd besunder zeleren
 alles das so den menschen schimpf vnd kurtzwyle möch ge-
 beren. Lycht vnd nit schwer was disem Jüngling mich der
 20 Im gefölgig was vnd sust gern tett alles das er mir zetün
 fürhalten mocht. Des ersten lert Er mich biegen mine knie
 vf ain bette, wie ain mensch vnd darnäch vf minen hindern
 füssen steen vnd die fordern vfregen vnd acht vnd göme haben
 vf sine wort was er mich hiesz daz Ich das tett vnd volbrechte.
 25 Vf dise sin lere vnd vnderwysung was er an mich begert!
 des was Ich Im gehörig, Vnd was yetz durch die gantzen statt
 vszgeschollen ainem esel können wintrincken schimpfen tantzen
 springen (vnd daz noch wunderbarer zehören was) daz der
 selb esel könde menschen stimme vnd begerungen gefölgig sin
 30 vnd wenne er gern truncke, So mante er des den tisch diener
 mit winckung siner ougen. Alle menschen redten hier von
 vnnd hatten dar ab grösses [193] wunder, Als ab ain dinge
 vormäls nie gesehen noch gehöret. Danne mengklichem vn-
 wissend was daz in ain esel verborgen was ain mensche. Ich
 35 fröwet mich aber Irer torhait vnnd lernet darumb von mir
 selbs darafter zegeen zetragen den herren vnd zerennen vnd
 zespringen äne nötigung vnd sporung ainches vfsitzers oder
 menschens Ich was costlich gezieret mit samentin geraiten vnd

mit ain zöme von gold vnd silber vnderscheidenlich beschla-
 gen daran ouch hiengen klingend schellen süssers getönen
 Der herre Menocles was berüft in Thesaloniam sachen halb
 (als er sagt) daz Er hatt zû gesagt vnd versprochen ain ge-
 5 stäch vnd schimpfe ritterlicher dingen daselbs zemachen. Als
 nu sine diener zû sölichem schimpfe alle berait wären, sint
 wir frü hinweg geschaiden vnd trüge jch den herren in hertem
 wege, der schlitten bös gnüg gewesen wer. Vnd als wir da-
 selbs hinkomen sint! ist mengklich zûgelüffen mich als ain
 10 grosses wunder zebeschöwen. Dwyle allenthalben vsgeschollen
 was, mich wie ainen menschen können springen vnd mancher-
 lay schimpfs machen wundersam zesechen. Als man nu ge-
 essen vnd getruncket hatt! hies mich der herre den burgern
 alda zû gegen! die alle edel wären mine fremde vngelöplichen
 15 schimpfe machen vnd tryben (Als ouch beschach) Der Jüng-
 ling der min pflag obgemelt! hatt mich Im selbs zû gewinne
 beschlossen in ainem besundern gemache, Vnd lies sust die,
 So mich sechen wolten zû mir durch Vfetäne türē doch vmb
 gelt vnnd pfennig die ain yeder geben [193^b] müst. Die selben
 20 mir ouch zû spyse vnd fûter zû trügent, ainer disz der ander
 das, die ains esels buhe aller minst zûgehörig waren. Darumbe
 mines herren vnd der andern burgern spyse mich grosz vnd
 faisz yetz gemachet hatten. Vnd als der zûlouff vast grosz
 wart, vnd mengklich mich vnd min wunder vnd schimpfen
 25 girig was zesechen! Hies der herre vff bitte der edeln obge-
 melten, die min geschicklichkait, gesechen hatten, mich mor-
 gens vf den gemainen platze do man des obgemelten gestächs
 vnd anders schimpfs pflegen wolt, füren. Vnd daselbs dem
 gemainem folcke vnd aller mengklichem zû gefallen mich lassen
 30 tûn vnd tryben alles das, daz ich konde vnd wunderbar wer
 zesechen Vnd wart deshalb in dem mittel des platzes gemachet
 vnd vfgericht ain gerüste vnd erhepte büne Vnd dar vf ain
 wolgeziertes bette von sament vnd golde. Dar vf Ich mornends
 gesetzet wart, mit grossem Jubel vnd geschraye. alles folckes
 35 daz da yetz besampnot was vnd des fröid hatt in begirden
 mine schimpffliche werck zebeschöwen. Ain tische stünd by
 dem bette zûgericht vnd beraitet mit gutem wine vnd mit
 allen den spysen die man zû luste vnd begirden dem menschen

machen mag! Vnd wären dar zû geordent etlich Jüngling die
 mir zû tische solten dienen vnd mir in guldin köpfen win zû
 trincken gaubent. Vnd hiessent yetz die maister vnd hütter
 mich anheben zeessen. So ich aber also vmb mich die grossen
 5 menge des folckes besich! do ersach ich vnder den blümen
 so zû lust vnd gezierde vf dem platze dar gezettet wären [194]
 etlich rosen ligen! deshalb Ich erfrowet, bald ab dem bette
 vfwust vnd her ab sprang, Vnd maint yetz mengklich mich
 das tûn zû anhebung mines schimpfes Do Ich aber bis zû den
 10 rosen kam! Vnd yetz dero etlich geessen hatt! Von stund an
 vnd in ainem ougenblicke Verlies mich die gestalt des esels
 vnd verkart mich widerumb in angesicht aller mengklichs in
 den vorigen Lutzium vnd stünd da vor mengklichem nackent
 ain wärer mensche. Von disem vnuerwändtem wunderbarem
 15 wunder mengklich erschrack vnd grosser murmur vnd rumor
 entstünd in dem folcke, mit manigfaltigen vngelychen vrtailen,
 die vber mich von dem selben folcke gegeben wurden in minen
 tode vnd verdampnusz. Etlich mainten mich gelych von stund
 an vnd zû früscher getäte, als ainem zoubrer der sich in manig-
 20 faltig gestalten könd verkeren sin zeuerbrennen. So mainten
 ettlich ander, Es geburte sich hier Inne ettwas wenig zeuer-
 zichen vnd mich vor zeuerhören vnd zefragen vnd dann dar-
 näch zeurtailen. Als aber jch das marckt! do luf jch für den
 obersten der statt richter vnd amptman, der ouch alda zû
 25 gengen was vnd batt den an mir nit zegächen sunder mich
 in sin behütung zenemen! bis er aigenlich erfüre gestalt her-
 kommen vnd wärhait dises dinges. Vf das der richter zû mir
 sprach sag dinen vnd dines vatters vnd diner fründen (ob du
 dero etlich habest) vnd diner statt da her du bürtig bist,
 30 namen! darzû Ich antwort vnd sagt mich haben ainen vatter
 genant wie jch lucium vnd ainen brüder gaium vnd mich sin
 ainen [194^b] schriber der historien vnd minen brüder ainen
 poeten die all geborn vnd gesessen weren in ainer statt ge-
 nant patera gelegen in dem land achaia. Do der richter das
 35 erhört Sprach er du bist ains mans sun der min bester vnd
 liebster fründe ist vnd des gast ich oft gewesen vnd von Im
 wol empfangen vnd gehalten worden bin. Ich waisz daz du
 nützit lügst. Vnd stünd ab von sinem pfert vnd vmbfieng

mich küssende vnd mich mit Im in sin hus fürende. In dem kam von geschicht min brüder, silber vnd vil ander gattung mit Im bringende, Mit dem selben ich nächmals in aim schiff vff dem mere durch glücklich winde haim kam. Da ich den
5 götten mines hails daz sy mir hatten gehulffen grossen dancke sagen tett etc.

[195] **D**Em hochgeborenen herren herrn Eberharten grauen zû wirtemberg vnd zû Mümpelgarte etc. minem gnedigen herren. Enbüt Ich niclās von wyle Min vnderthenig willig dienste allzyt zeuor Wie wol es gnediger herre ain wyt dinge
5 ist vmb den adel, Vnd daz der durch all disz welt vnd in allen gelouben für grösz vnd in hohen eeren vnd werden billich wirt gehalten. So ist noch dann by vnsern alt fordern vnd vor wysen hochgelerten mannen oft in fräge vnd zwyfel gestanden was adel an jm selbs syg vnd wa her der kom vnd
10 enspriesse Sunder haben dero etlich den gemaint sin in herkomenhait der geburt etlich in altem richtum vnd etlich in übung vnd lobe der tugend. mir ist aber nechst zûkomen ain gerichtz handel, zwayer menschen des adels halb wider ainander redende. do Ir yetweder, sin mainung mit nit klainen
15 argumenten billichtet vnd gründet vnd find doch nit daz darvber ützit syg geurtailt worden. darumb ich sölich red vnd wider rede von mir vsz costlichem latine in disz nächfolgend tütsche gebrächt vnd transferyeret, üwern gnäden vor menglichem andern schicke als ainem gerechten wysen vnd vnarg-
20 wenigen richter hiervber zeurtailen. dann ist daz grosser vnd alter rychtum adel geberen sol? wer dann vnser lands edler syg dann üwer gnäd waisz jch niemant. sachet aber sölichen adel langes herkomen güter geburt? wer ist dann vnser landes? der üch hieran vbertreff? dwyle doch der stamme üwers herren
25 vnd vatters (der so wärhaft gewesen ist, daz sine wort für brief vnd sigel wurden geachtet) Wol bis vf Romulum oder Eneam [195^b] gerechnet werden möcht. So ist üwer fröwen vnd müter güter lümde so grosz, daz der nit mit ainchem lobe mag werden gemeret noch mit ainchem schelten gemindert,
30 der selben vrsprung irs adels (als Ich ains mals gelouplich hab

hören erzellen) von dem stammen Abrahe her tüt raichen vnd
 vnd deshalb irs stammens fürsten namlich von beyern vnd der
 pfallatz allwegen mer sint danne aincher andern fürsten vmb
 daz sy berürt diser spruch ich wil meren dinen sämen als
 5 die sternen des himels. So sint sy ouch stetz wider ain an-
 dern, also daz sy selbs ain andern mer bekriegent vnd be-
 schedigent danne jnen von andern vssenher bescheche. Als
 das bewysent alt geschichten vnd yetz früscher nüwen ge-
 schichten ouch nit mangel ist. Desgelychen in der bible von
 10 den gesipten fründen dises stammens Abrahe beschechen sin
 ouch funden wirt. Ist aber das der adel sin sol in übung der
 tugend? so waisz ich ouch niemant vnser landen dem ir hier
 Inne entwyhent. Aber von disen üwern tugenden wil ich
 hie wyter nit schriben, argwäne der liebkoserye zevermyden.
 15 vnd hiervmb gnediger herre So üwer gnäde mit disen dingen
 allen adel geberende, so föllenklich vnd gelych mit ainen als
 mit dem andern ist begaubet vnd gezieret, daz die selb üwer
 gnäde wol hierjnne vnargwenig vnd frylich vrtail sprechen
 mag, ouch näch hocher vernunft die üch edelt sölich vrtail
 20 wol sprechen kan. So bitt ich üwer genäd mit vndertenigem
 flysze, daz ir disen gerichtz handel obgemelt vnd wie der
 hie nächfolget aigenlich wöllent hören vnd erwegen vnd dann
 üwer vrtail darvf geben vnd setzen? wederm vnder disen
 [196] zweyen von denen das argumente ist, die jungfröw lu-
 25 crecia von dero wegen diser handel aller geschechen ist, söll
 werden vermechelt vnd zü der ee gefolgen, Vmb daz nit dise
 so costliche red vnd wider rede mer äne vrtail funden werd.
 Hier mit tüt üwer gnäde mir disz min arbeit belönen vnd
 mich wilgen vnd raitzen zü wyterer transferyerung noch cost-
 30 licherer schriften von dem adel gestellet, die jch dann ouch
 nit wil verhalten vch als minen gnedigosten herren in des
 gnäd ich mich tün zü aller zyt vndertenig enpfelhen Geben
 zü Stütgarten vf samstag vor Galli Anno domini Millesimo
 quadringentesimo septuagesimo.

35 **V**Or zyten do die macht vnd das loblich regiment der
 statt Röm wüchs vnd zünam ist daselbs gewesen ain man vnd
 burger des rätes mit namen Fulgencius felix, an grössem güte

vnd erberkait, ouch mit fründen vnd gunst der burgern vnd mit allem andern gelücke der aller rychest. der selb by siner husfröwen claudia genant, ain tochter hatt vbertreffenlicher schöne lucreciam, ainen ainigen trost sines erbern alters. danne

5 zû dem daz sy mit lob sölicher fürpüntlicher form vnd hüpsche all ander römisch fröwen vnd jungfröwen vbertraf So waz in ir ouch so vil scherpfe jrer vernunfte, so vil kunst der geschrift vnd so vil eberkait güter sitten, daz ir nützit gebrach an allem dem, so sölicher wolgeschickter Jugend zû lobe ge-

10 wunschet werden möcht. Gegen diser Jungfröwen wären vnder vil andern römschen Jünglingen zwen besunder für ander strengklicher in liebe enzündet. die da wären gelycher [196^b] gestalten vnd alters. Aber vnglyches gütes tugenden vnd sitten. Danne der ain der publius cornelius was genant vnd

15 geborn vsz dem edeln geschlechte der scipionem, hatt vnd besas gar näch alles das gûte? so das gelücke dem menschen zûfügen mag. Danne er zû der höhe sins adels, ouch vnmessig vil rychtums hatt, Vnd demnäch ouch vil mithellender fründen dienern vnd husgesinds, Vnd stünd aller sin fyszze vf waid-

20 werck vf singen vnd vf anders zû fröiden vnd kurtzwyl dienende. Aber der ander Gaius flamineus genant was nit so von hohem sunder von nidererem geschlechte geboren vnd doch von erbern vnd fromen vatter vnd müter vnd hatt messigen rychtum vnd in sinem huse zimlichen vnd benügklichen

25 bruhe vnd mittelmessige zierung dar ingehörig. Doch wie wol sölich sin gûte also ains mindern gelückes gesehen wart? so übt er, sich doch nit dester minder in tugenden da durch sin lobsam adellich gemüt blüeyend in tugend wurd gemercket. Danne in nützlichen sachen siner fründen vnd siner haimant

30 vnd vätterlichen landes, Was er der aller sorghabendigoster vnd in stryten do es not tett der aller künest vnd in lernung der geschrift der alleryssigost Also daz weder kriegisch raisen Im benämen lernung der geschrift noch hin widerumb sölich lernung jm benam das raisen sölicher kriegien. Aber mit messigkait sines lebens öch mit wyszhait vnd gespreche wol redens,

35 erschain er höher vnd grösser dann in aim sölichen Jüngling gesehen wurd gelöpflich sin, Vsz welchen lobwirdigen tugenden Er zû rome verrümpt vnd bekant was vnd für edel ge-

achtet vnd gehalten [197] Dise zwen Jüngling do sy sich ains
 måles des verainten daz ainer dem andern (welchem die ob-
 genant jungfrōw vermechelt wurd) wuchen vnd abtretten sōlt?
 giengen sy bed mit ainandern zū dem obgenanten fulgencium,
 5 der sy gūtenklich enpfieng. vnd batt ir yetweder den selben
 fulgencium jm sin tochter lucreciam elichen zeuermecheln. vnd
 als der selv alt wys man sach sin tochter yetz manbar sin
 vnd tūgig sōlicher vermechelschaft? sagt er ir die vrsach war-
 vmb dise zwen jūngling komen wēren. Vnd hies (so sy Irer
 10 beder sitten vnd vernunft erfahren vnd erlernet hett) daz sy
 dann ir selbs vsz jnen den ainen zū elichem gemachel wōlt
 erwellen. Vnd als die jungfrōw sich zum ersten von erberkait
 vnd schame wegen des tett mit māsse vnd beschaidenlich
 widern vnd der vatter ir sōlichs ernstlicher dann vor tett
 15 gebieten? verzoch sy ir antwort ain klaine wyl mit schwygen
 vnd kart sich darnāch gegen Irem vatter vnd sprach vatter
 ich wil dir vsz disen zwayen den edlern machen zū ain tocht-
 terman vnd der selv syge nu mir yetz ain erwelter gemachel
 mir füro nit zeuerendern. Von diser sache vnd rede wegen
 20 kriegten dise zwen Jüngling mit ain andern welcher vnder
 jnen der edler wer, dem deshalb die Jungfrōw lucrecia billicher
 sōlte gefolgen. vnd wyle disz ding ain wunderbar nūwekait
 gesechen wart? ist es in den rōmschenn rāte für die senatores
 zū offenlicher verhörung gezogen worden vnd sint daselbs von
 25 des adels wegen dise nāchfolgenden zwo reden beschechen.
 Vnd die erst von publico cornelio scipione also.

[197^b] Ist daz lucrecia vsz vns zwayen Ir begert den
 edler zehaben, wer ist dann lieben herren vnd vätter vnder
 vch der nit klerlich bekenn vnd merck Mich publicum corne-
 30 lium der von dem blūt vnd stammen der scipionem geborn
 bin? billich haben vnd hinfüren die eere vnd glory diser er-
 wellung? wyle niemant zwyfel danne daz das rechter adel
 haisz vnd syge, den wir genomen vnd enpfangen hant von
 dem vrsprung vnser edeln altfordern. angesechen daz die selben
 35 sōlichen adel jren kinden vnd nāchkomen hinder jnen lassen
 gelycher wyse als ain erblich gaube. danne so die selben alt-
 fordern mit lobwirdigen getāten ouch mit zucht vnd gūten

sitten vnd tugenden, in regimenten gemaines nutztes oder ritterlicher dingen erlücht worden sint vnd aller loblichost namen haben vberkomen vnd oberste eere vnd aller wirdigoste ämpter erfolget! so sint sy fürwar mit sölichen jren künsten vnd mit
 5 übung güter wercken vnd tugenden edel worden! durch welcher altfordern gedechnüsz ouch dann all ir nächkomen gezieret sint. dann ist daz wir vsz vnserm blüt vsz vnsern gelidern vnd vsz vnserm gebain vnd geäder, vnser kind an dise welt tünt geberen! was mugen dann die selben vnser kinde anders
 10 sin gesagt werden? dann wärlich taile vnser libes? darumbe von notdurft wegen sin müsz, daz die glory vnd eere der vättern in Ire kind glycher wyse als in Irs lybs taile gegossen werden vnd von den selben Iren kinden wyter vnnd fürbas in der [198] vättern, gestalt bildung vnd form in den ange-
 15 sichten Irer kinden oft als ingedruckt in so grösser gelychnüsz gesehen worden! daz wenig vnderschaid zwüschen sölichen vättern vnd kinden erkennenet werden mag. Vnd oft also die vätter hie durch vnd in sölichen Iren kinden gesehen werden widerumb vnd ander werb geborn sin. Sölichen kin-
 20 den folgent ouch vnderwylen näch, glych sitten vnd geberd Irer vättern öch gelyche vernunft vnd gelyche übung der selben lebens. Dar zû dann dienet, daz söliche kind von den vättern emssig vnd wol gezogen sint So dient ouch, hier zû huslich bywonung vnd gewonhait vnd stete übung güter worten vnd
 25 wercken. Da durch dann beschicht, So sy dero also gewennet worden sint! Daz ouch etwenne frömder menschen gemütt zû sölichen Iren übungen vnd sitten naigung gewinnenet vnd dar ab habent grosses gefallen. Vsz disen vrsachen clär ist! Bede die natur vnd die gewonhait aller gröste craft vnd machte in
 30 die kind drucken vnd würcken Vnd kumpt also daz die laster der altfordern Ire nächkomen als mit ainer mäsen befleckt vnd erschöpfent, Vnd hinwider vmb der selben altfordern tugend vnd loblich sitten Ire nächkomen mit wunderbarem schyne des lobes zierent vnd erlüchtent. Vnd wo nit dise min rede, mich
 35 zewyt vsfüren wurd! so were mir grosser folle sölich zenennen die von edeln loblichen vättern geborn! gelych schnell von mengklichem ouch edel genennet vnd dar für gehalten worden sint. Dann [198^b] wer wölt nit die eere vnd tugendryche

wercke. G. camilli vnd ouch desselben kinde sagen vnd vr-
 tailen edel sin vnd lobs wirdig? Welcher camillus zû zyten
 do sin haimant vnd vätterlich lande Rome. In der vinden ge-
 walte komen was? Allain der selben statt tode vnd zerstörung
 5 tett fürkomen vnd erleschen vnd das regiment gemaines nutzes
 wider bringen vfrichten vnd beheben. Wer wölt darnäch die
 andern kinde von den edlen Fabien von den edlen Cathonen
 oder von den edlen Emilien geborn, nit billich sagen sin die
 aller edelsten? Vsz welcher vättern yetzgenanten, tugenden das
 10 römsch folcke so mit grossen sigen stryten, So oft vnd dick
 ist worden beschirmit vnd erlüchtet? Wer wölte nit vrtailen
 das regiment üwer statt vnd des gemainen nutzes nit aller
 billichest zûgehörig sin, den sünen vnd nachkomen dero, die
 so oft von gemaines nutzes wegen wol getän vnd grosz vnd
 15 vil verdienet hant Vnd die der selben statt vnd gemainem
 nutze so vil grosses lobes vnd eeren haben zûgefürt vnd er-
 folget? Für wäre, das wer ain vndanckber statt vnd haimant?
 Wo sy nit der selben mannen allwegen wer Ingedenck vnnd
 dero gedechtnüss als fyrrens vnnd lobes wert tett eeren. Vnd
 20 darumb so haben vnser alt fordern (vmb das sy nit vndanck-
 bar gesehen wurden) ain offenlich statut gesetzt? Das denen
 die vnser statt vynde hetten gezemet, Vnnd der selben vnser
 vynden fölcker hecre vnd gezüge erschlagen oder küngryche
 lannd vnd lüte gewonnen oder die selben gehorsam vnd vnder-
 25 tenig gemachet. Vnd die selben dann also siges obgelegen,
 mit sölichen eeren widerumb haim [199] komen weren? daz
 denen (sprich ich) näch sölichen Iren seligen sigen (dero halb
 man sy als vntödemlich götte mit offenbarer eere, tett erheben)
 gebuwen gemachet vnd gesetzet wurden stainin bogen ires
 30 siges vnd darIn gehüwen bilde Irer gestalten, da durch füro
 hin Ir namen allen nächkomen mit ewigem lobe weren offen
 vnd mit fürpündigen titteln in grüner früscher gedechtnüssz
 niemer möchten werden erleschet? das römisch folcke tett
 ouch näch mäls die selben bogen vnd bilde zû etlichen vf
 35 gesetzten tagen in sunderhait eeren. Vnd darumb ist daz man
 von satzung vnd rechtz wegen, so vil eeren zetûn schuldig was
 sölichen bilden? wie vil grosser eeren ist man dann pflichtig
 der selben gemelten mannen kinden? danne die howung söli-

cher bilden tût allain mit kunst machen gestiff vnd vnwâr
 figuren, die sich gelichent disen edeln hochgelopten mannen.
 Aber die natur zaigt in disen sünen vnd kinden wâre bildung
 Irer vâttern vnd vordern. Dar zû so mugen dise stain die in
 5 jnen selbs kain sele noch leben haben niemer ütztit gût sin
 gemainem nutze. Aber das leben diser sünen mag mit näch-
 folgung den fûsstapfen Irer fordern vil nutzes bringen vnd
 machen, vil burgern gûtz geben vnd ouch vil schades für-
 komen vnd abestellen. Darumb den selben billich zûgefüget
 10 vnd geben werden die wirdigosten ämpter vnd alle oberkait
 vnd regimente diser statt vnd gemaines nutzes. Dann ist, daz
 den edeln selan vnd gaisten so die Ire körpel verlässent!
 ainch sorg oder achtbarkait ist, menschlicher vnd zytlicher
 dingen! So mag für war nützit [199^b] süssers noch gefelligers
 15 Iren gemüten zû gefüget werden, dann daz jre aigen kinde
 die da sint ain vberbelybung Irer lyben, Von verdienung wegen
 der selben jrer fordern in oberkait vnd regimente gemaines
 nutzes gewirdiget werden vnd geeret. Dann wir sechen ob
 die selben vâtter zû zyten so sy dennocht Im leben kranck in
 20 dem todbette sint! ainch wollust haben! daz sölich wollust
 gantz allain gelaitet wirt vnd gekeret vf jre kind vnd daz sy
 nützit merers, danne die selben bedenckent noch ouch sich
 selbs mainent sterben noch sich von menschhait gantz schai-
 den? So sy nun kinde ainen lebenden taile Irs lybs hoffent
 25 hinder Inen zelassen Darumbe wyle so grosse liebe ist, der
 vâttern gegen Iren kinden daz kain grössere in den begirden
 aller lebender dingen erdächt werden mag, vnd ouch der
 selben vâttern so grosse hoffung ist Im leben, vnd in dem
 tode wollust vnd näch dem tode angedechtnüsz! so ist kunt-
 30 lich sich gebürren daz vmb verdienung wegen der vâttern vnd
 altfordern aller billichost jren kinden vnd nächkomen zû ge-
 hörig syen, der selben verlässne wirdigkait vnd daz zû dem
 Sy von der selben Irer fordern eeren wegen werden geeret
 vnd gefüderet vnd die danckbarkait die man den selben vâttern
 35 nit gnûg näch billichem vnd näch jrem verdienen hât mugen
 bewysen! gegen den selben jren kinden vnd nächkomen danck-
 barlich werd geübet. Vnd darumbe so ist das, das oberst so
 in dem adel ist, daz yemant siner fordern eere gemaines nutzes,

glycher wyse als durch ettlich erblich rechte vf sich bringen mag vnd darby sich den selben sinen vordern an forme des lybes [200] gelychen vnd Ire clare bildung vnd gestalt in sinem angesicht bekantlich erzögen vnd geben zeerkennen.

5 Dises haisset vnd nennet mengklich rechten adel. Danne sagent! welch ander nennet das püfel vnd gemain folcke, edel. Danne die so von edeln vättern sint geborn? des gelychen die gelerten der geschrifte? Sagent nit die selben ouch! die wolgeborenen menschen edel sin! gelycher wyse als ob in der

10 geburt der adel syg gelegen! Zû dem so zieret disen adel grosser rychtum zytliches gûtes, da durch die diener das hushabliche dinges dester loblicher sint vnd erschynent, ouch vszwendig früntschafften also hie durch dester bas mugen werden behalten.

15 Das beschechen mag durch emsig adelliche übung, mit günnern fründen gesipten vnd andern vsserhalb fremden vnd vngeipten menschen, die an notdürftigen dingen mangel haben vnd fremder hilffe bedörffent, denen dann ain sölicher edelman näch sinem willen mag wol tûn räten vnd helffen. Danne

20 miltikait ain sunder lob vnd hohe eere ist, des adels, dero sich der mensch vmb sust flysset in ander lüt zegebruchen dem sin gût zû sin selbs notdurft nit gnûg sin mag. Vnd darumb so ist notdürftig wer edel sin wil das sin adel durch miltikait erschyn vnd rûm vnd lob erfolge, dwyle sölicher adel

25 durch gnäd günstigen willen vnd gût getätt andern zebewisen, zû nimpt vnd dester treffenlicher vnd grösser wirt geachtet vnd sust vnd äne das oft sin schyne abnimpt vnd verdunckelt. Vnd beschicht hier von ouch das vnderwylen mancher gesechen wirt nit mer edel sin! So er nit mer milt [200^b] sin mag.

30 Dann sagent. Wie vil aller gelertest mane, sint von armût wegen gantz verachtet vnd vf sy wenig oder nützit gehalten worden? Wie vil hoher vnd klüger vernunft vnd wysheit sint von mangels wegen notdürftiger narung vnd bruhes also abgestorben! daz sy nit von yemant ye gebrucht oder geübet

35 worden sunder gantz verlegen sint? Welcher mannen kunst vnd tugend vsgelegt, nit schynnen oder nächdrucke noch gelouben haben mochten von gebruchs wegen notdürftiger narung irs lebens. Vnd also verlychet rychtum zytliches gûtes grosse

hilff zû zierung des adels. Mit welchem richtum des men-
 schen gemüt, daz zû tugend gerichtet ist, fürnemer werden
 mag vnd sölich tugend clärer vnd loblicher erschynen. Vnd
 darumb lieben herren vnd vätter! Ist das rechter adel in
 5 geburt oder in rychtum begriffen wirt oder sin sol! So ist
 üwer kainer, der zwyffel hab, Danne daz die aller gröste
 gezierd des adels diser statt in mir erlüchte. Dann
 wer hät ye von wegen gemaines nutzes diser statt!
 Stercker gestritten dann min fordern? Vnnd wer hät vsz dem
 10 vmbkraisz diser gantzen welt, Mer küngrych gewunnen vnd
 die vnderthenig gemachet dem römschen gewalt vnd regimente,
 dann min fordern? Wer hät die sorgen angst not vnd Jamer
 üwer Statt Rom zûgestanden! ee vnd schneller ye vertriben
 vnd vch dero entlediget dann min fordern? Der selben ainer
 15 Lucius Scipio genant (als der gezemmet vnd vch gehörig vnd
 vnderwürffig gemachet hatt! [201] alle küngrych in asia ge-
 legen vnd dar zû andere fölker) erfolget hie durch Im zû lobe
 ainen ewigen zû namen Also daz er nächmäls genennet wart
 Scipio Asiaticus, vmb daz er in Asia sölich grösz lob vnd eere
 20 hatt erJaget. Aber ain anderer miner fordern Publius Sci-
 pio, tett das lande Italiam das durch nom brand vnd tod-
 schlege verhergert vnd zerstöret was, ouch die edeln statt
 röme, als die näch dem Canensischen stryete in Jamer süfftzende
 In letster note vnd sorgen stünd! die selben land vnd statt
 25 tett (sprich ich) der selb Scipio mit vngelouplicher tugend rit-
 terlicher übung erlösen. Danne der schedlich verderplich
 brande von dem selben Publio Scipione dem branchinischen
 folcke in Affrica zû gefüget! tett Hanibalem den geschiden
 vnd obersten hauptman der mit so vil sigen wider vch römer
 30 erfröwet was, widerumb haim berüffen. Vber das noch dann
 der selb Scipio den gemelten Hanibalem vnd des gezüge folck
 vnd here mit denen er haim kam, bestrait vnd die niderlegt
 vnd vber wande. Darzû ouch die statt Carthaginem die dem
 römschen gewalte vnd regimente aller vindest was! nit allain
 35 von Irem vnrechten hindersich traib, sunder ouch die vnd das
 gantz Affricam krefftenklich, disem der römern regimente vn-
 derwürffig machet vnd aignet. Diser sachen halb Er nächmäls
 billich den zû namen Affricanus vberkam vnd erfolget danne

die Statt Carthago in dem taile des ertrichs Affrica gelegen
 was. Den selben zû namen Er ouch darnâch sinem suns sune
 scipioni (der zû letscht die selben -statt Carthagnem (als sich
 die aber abwarf) [201^b] gantz zerstort vnd tilket) Verlies als
 5 ain erbschaft. Danne der selb ouch wie sin alt vatter genennet
 wart Scipio Affricanus. Ich furggee die andern alle mines ge-
 schlechtes mit dero eeren vnd tugenden üwer statt röm, so
 oft gezieret worden ist! vnd dero gût getäten so vil sint, ob
 Ich die wölt erzellen! das ich nit wiste das ende vnd den
 10 usgange miner fürgenomen rede. Vnd dero Ich darumb gern
 geschwyg! das ich waisz sy üch sust wol bekant sin. dann
 wo ist in disem rōme ain statt oder winckel der lere syg der
 titteln loblicher sigen miner fordern? Vnd welcher tempel ist
 in diser statt röm der nit er schyn gezieret mit rōben von
 15 minen fordern den vinden genomen? Vnd welich kirchen.
 Vnd gotzhüser sint, die nit zaigent der selben miner fordern
 lobrychen bilde gestalt vnd formen? das zeuersteen gibt, so
 grosse Vnd so lobliche begrebnüsz des adels miner fordern,
 daz nit grössere yemant tödemlicher wünschen möcht. So ist
 20 ouch mir von minen fordern zû erbe gelassen ain aigen loblich
 gesessz vnd possession grössem adel wol zimende. So sint
 mir än zale vil der selben miner fordern figuren vnd bilde. So
 haben sy söliche mine beklaidung getragen. So ist disz min
 angesicht in Iren angesichten gesehen worden vnd tûn Ich
 25 der selben blût Ire gelider jr geäder vnd Ire forme vnd gestalt
 in disem cörper mines lybs tragen. Ich bin von Inen vrsprung-
 lich herkomen vnd lang in Iren hüsern erzogen worden vnd
 nu yetz erwachsen, Hab Ich von sitten vnd nature Iren adel
 mir von Inen Ingegossen. Vnd darumb, ist daz dise ir hai-
 30 mant vätterliches landes Inen vmb Ir so grosz [202] verdie-
 nung vnd gût getätt, ützit von rechtz wegen schuldig belybet!
 So müsz vsz notdurft sin, daz sy mir (der ain taile irs lybs
 bin) sölichs ouch schuldig syent. Vnd darumb ob Ich zû
 ainchen wirdigen ämptern vnd oberkaiten diser statt Rōme
 35 äne min bitte, Sunder vsz üwer aigen bewegnüsz vserkoren
 vnd erwellet wurd! so geburte sich mir, dero vsz billichkait
 vnd aignem rechten anzenemen vnd mich dero zebeladen vnd
 möcht für wär nützit basz gefelligers den gemüten miner for-

dern gehandelt werden. Zû dem allem so ist mir zû zierung
 des adels von denselben minen fordern so ain grosser huffe
 vnd schatze gûtes vnd richtums verlassen worden, Als vil ains
 yeden menschen messig gemût begeren möcht oder wünschen.
 5 Des ersten so sint mir vätterliche hûser so grosser wyte vnd
 wolgeziert daz sy nit kûnglichem gesessze teten entwychen.
 So ist mir in dem tuschganischen lande ain statt aller grôstes
 lustes vnd in dem land campania grossz vnd aller rychest bûwe
 der âckern vnd des felde Dar von nit allain ains ainigen huses
 10 diener. Vnd husgesind, sunder gar nâch ain grosser gezüge
 folkes möcht werden gefûret. So ist der apparâte vnd stande
 mines huslichen wesens ouch die kostlichkait vnd gezierd mi-
 nes husrâtes mit helfenbain gold vnd edelm gestaine vnder-
 schaiden gar nâch allem rômischen folke bekantlich. Vnd dar-
 15 umb so ist âne zwyfel mir, mit so vil seliger dingen wirdig-
 kait! etliche sunder loblich gezierde des adels, vnd die so
 grosz, daz willicht kum (mit vrlob red ich das) in diser statt
 ain grôsser funden werden [202^b] möcht. Vnd darumb so
 schwyge also flamineus vnd tû in disem kriege abstellen ze-
 20 begeren diser Jungfrôwen Lucrecie, Angesehen daz er nit
 allain angeburt vnd rychtum vnder mir ist! sunder ouch wir
 nit wol wissen mugen den vrsprunge sines herkomens! So
 waisz er ouch kum selbs wo er yenert hab ainches lendlin
 vnd darumb so ist von rechtz wegen die edel lucrecia min-
 25 Die mich edeler danne flammineum vnd mich irer hûpschkait
 zûgehörig sin hât erkennt. Aber du Lucrecia tû dich diner
 aller süssisten wyszhait frôwen. Danne dir kain liebrer noch
 gelückhafter gemachel erweltet worden sin möcht Vnd der
 dich lieber vnd schoner gehept hett oder by dem du seligk-
 30 licher din leben möchtest haben geschlissen. Ich wirt dich
 fûren in wyt zierlich vnd lustig hôte vnd sâle vnsers huses.
 Da wirst du sechen bettgewande vnsers elichen byschlâffens
 in sôlicher hûpschkait als ob sy zû gericht weren ainem kûnge.
 Du wirst tragen aller vserweltigoste klainet vnd zierung Jun-
 35 gen frôwen zû gehörig. Wie du die selbs wünschen möchtest
 So wirt dir nit sin arbeit aincher übung dero zû tûn pffigt
 das gemain folke, sunder wirst du fûren ain leben mit rûwiger
 mûsse, also daz nit teglich gewine oder ainch hert geflissen-

hait, dir benemen werden süssen schläffe, danne daz du lebest
 frylich vnd also wo vnd wenne du wilt schimpfen schallen
 singen sagen oder anders tûn zû fröiden vnd zû lieb dienende,
 daz du dich dines willens vnd flysses hier zû wol magst ge-
 5 bruchen vnd wirst darzû haben zû gesellschaft diner wollusten
 Jungfröwen mägt vnd dienerin die all dinen begirden [203]
 werden sin gefölgig. Kain tage wirt dir hin geen vnd ver-
 rucken lär sölicher wollusten vnd fröiden. So werden ouch
 wir bede die necht sament in fröiden üben vnd vertryben.
 10 Welche ding alle flammineus (wyle er selbs von armût wegen
 dero mangel hät) dir nit hett mugen verhaissen, danne daz
 dir mit jm wer gewesen ain leben in armût laidsam vnd trurig.
 Dann ain statt küncklicher schlossen vnd büwen, hette dir
 gefolgt eng gehuse. Für grossen apparätte vnd schynbar her-
 15 lichkait vnd gezierde! wer dir worden schlechter gemainer
 husräte, Vnd für müsse gefiessenhait, für råw, arbeit. Vnd
 wer dir kain tag yemer gewesen fryg vnd ledig teglicher
 wercken. Vnd darumb lucrecia wer zwyfelt? Dann daz du
 mich dir zû gemachel erwellen vnd haben wöltest! da du den
 20 edlern vnder vns erwaltest. Kum hetttest du in diser diner
 aller wysesten erwellung mugen offenlicher vnd verstentlicher
 geredet han. Ob du joch mich Cornelium mit namen hetttest
 genennet. Aber sicherlicher häst du diner begirde vnd diner
 wyszhait hierInne geräten. Danne so du von jungfröwlicher
 25 erberkait vnd eeren wegen dich geschamet häst zenennen cor-
 nelium, so häst du mich genennet den edlern. Vnd were ain
 aller vnwysests dinge, von yemant anders geschetzt werden.
 dann wer wölte gelouben dich für råwe begert haben arbeit
 für rychtum armût vnd für haile Jämer. Darumb lieben her-
 30 ren vnd vätter! so wöllent in ansehung der wirdigkait ain
 römschen räts in disen dingen ain gelyche billiche vrtail
 sprechen vnd geben

[203^b] Zû grossem gefallen ist mir lieben herren vnd vätter
 So mir von dem adel rede zehaben gebürret! daz ich dann sölich
 35 rede vor üch vnd üwern adellichen gemüten tûn sol. Danne
 in kainen andern ende so wärer ernieter vnd erfarnier adel
 als hie by üch funden werden mag. deshalb mir vf disem hüt-

tigen tage zû hohen fröiden kumpt daz in so grosser vnrûwe
 der gemüten in so grosser erkantnûsz mancherlay dingen vnd
 in so grosser übung der tugend, nützit vnrechtes hie mag
 werden erwartet! nützit vnloblichs mag werden gesprochen
 5 noch zû letscht nützit fremdes vnd vngehörtz mag werden
 gehandelt. Aber lieben herren vnd vätter in diser zwytrech-
 tikait die da nûw vnd fremd ist! gebüret sich vch grössern
 flysz vnd ernste anzekerem, Danne in andern gemainen vnd
 schlechten sachen vnd spennen. In ansehung des, daz dises
 10 dinge nit allain zwayer burger ist oder ain gerichtzhandel ains
 ainigen tags sunder wirt es sin vnder allen fólckern vnd zû
 allen zyten als ain ewige satzung vnd ain ewig recht von
 üwerm allerhailigosten vnd wisesten râte vsgegangen vnd des
 man begirlich hât gewartet. Dann ir sechent hütte (anders
 15 dann vor ye) an disem gerichtz handel des gantzen römschen
 folckes aller gröstes vfmercken. Vnd sechent aller burger
 vnd ouch vszwendiger gesten ougen, Oren, vnd münde gantz
 in vch sin gekeret! Denen nit allain fröid ist zesechen
 Welches vnder vns zwayen Lucrecia sin söll! Sunder [204]
 20 mer welcher vnder vns von üwer wyszhait der edler werd
 geurtailt vnd geschetzet darumbe Ich üch vnd üwer hoche
 vernunfft flyssig bitt vnd erman. Bedenckent die grösse diser
 sache (Wie wol in ain yeden dinge die gerechtikait gelychlich
 gehalten vnd geübet werden sol) ye doch so ist sich grössers
 25 flysses zegebruchen so man aller gröste vnd klügiste ding han-
 deln tût. Ich bitt aber lieben herren vätter üwer gedult vnd
 senftmütikait wölle mir verzychen ob Ich scherpfer vnd an-
 ders dann min gewonhait bisher gewesen ist, reden vnd er-
 zellen werd min tugend vnd gelücke. Danne Ich vormäls
 30 nit pflegen han mich selbs zeloben oder yemant andern ze-
 schelten! dero das ain ist, ains vnmessigen rûms girigen ge-
 mütes, vnd das ander ains vndultigen verbünstigen hertzen.
 Aber mich tûnt yetz hier zû raitzen vnd bringen, Des ersten
 dise nûwe form redens. Dar nâch die vngebürlich wackerhait
 35 dises Cornely, der vor nit erberlich von mir geredt hât Vnd
 die wyle Im so lustig gewesen ist, mit sinen worten, min mes-
 sigkait zeschelten! So gebürt sich mir vnd hât er mir des
 vrsach geben sin vnschame zestrâffen vnd zeschmechen . . Ir

hant lieben herren vnd vätter gehört, diser Jungfröwen aller
 wyseste antwort. Dar uf Cornelius vmb daz Er sich selbs den
 bessern machh! getar sprechen den adel sin in geburt vnd
 rychtum vnd hät deshalb gesagt siner altfordern loblich ge-
 5 täten vnd jm von sinem vatter vnmessiger rychtum verlassen
 worden sin. Dises ist alles das, das sin [204^b] lange red be-
 gryffet. Aber von Im selbs sagt er nützit Danne Er waisz
 nützit von Im, daz wirdig syg zesagen Vnd darumb so für
 geet er sinselbs leben mit schwygen. Aber Ich main des men-
 10 schen adel sin in aigner vnd wärer tugend des gemütes, vnd
 nit in fremder eere oder in falschem des gelückes güte. Dann
 adel ist nützit anders dann etliche vbertreffung, damit die
 ding, die wirdiger sint vortail vnd eere habent vor den vn-
 würdigern. Vnd darumb wie ain mensche mit allem vbertreff
 15 edler ist dann ainch ander tiere! Also tüt ouch ain mensch
 mit adellicher tugend sins gemütes ainen andern menschen
 vbertreffen. Vnd also vbertrift ain mensche den andern allain
 in lobrychen adellichen wercken des gemütes. Dann wenne
 das selb gemüt in güten loblichen künsten lang zyt geübt er-
 20 schynen wirt in gerechtikait gütikait vestikait groszmütikait
 messigkait vnd wyshait vnd es gegen den götten gegen vatter
 vnd müter gegen gesipten fründen vnd gegen gemainem nutze
 gütz verdienet hät vnd in güter lere der geschrift erzogen ist!
 so wirt es für ander! edel lobsam vnd durlüchtig gehalten.
 25 Als ouch Cornelius das selbs nechst vor von sinen altfordern
 gesagt hät. hinwiderumb. Wenne daz selb gemüte böser kün-
 sten geübet ist, vnd sich gibt zü boszhait zü wüteryen zu grob-
 kait vnwissenhait lüderye vnd vnuernunft vnd jm kain acht
 ist noch sorg götlicher dingen, noch gütikait zü sinen vatter
 30 vnd müter, noch bewysung günstiges willens gegen sinen frün-
 den! Für wäre [205] der wirt gehalten vnedel schantlich
 vnd zeuerachten Vnd darumb so ist kund vnd offen! wären
 adel allain fliessen vnd komen vsz wärer tugend des gemütes
 Vnd mag ouch darumb weder grosser huffe rychtums noch
 35 langes herkomen der geburt oder des geschlechtes sölichen
 adel weder geben noch nemen. Dwyle allain das gemüt ain
 aigner sitze ist des adels, welches gemüt von der nature die
 da ist ain gebieterin vnd laiterin aller dingen! gelych In

gegossen wirt allen menschen vnd nit von den altfordern als
 ain erbschaft den sünen zûgehörig sunder vsz höche götlicher
 wyshait Vnd hant die selb natur gesetzet, das selbig gemüt
 sin als ainen fürsten des menschen lebens vnd als ain liecht
 5 des spiegels. Welcher spiegel so du Im hüpsche ding für
 hebst! ouch hinwiderumb hüpsche ding in jme lasset erschynen
 Hebst du jm aber für vngestalte ding! so werden sy ouch
 vngestalt in jm gesehen. Vnd also ist der menschen gemüt
 clare vnd luter ouch fryg geschickt vnd tûgig, adel vnd vn-
 10 adel zeenpfächen. Vnd mag niemant in diser aller besten
 vnd fürtrefflichosten gaube, die vstailung menschlicher nature
 schuldigen oder straffen. Danne sy dises gemüt yetklichem
 menschen glychlich geben tût Vnd achtet hierInne weder ge-
 schlechtes, gewaltes oder rychtums. Vnd ist niemant so arm
 15 so schnöd so verworffen oder so verschmechet! der nit ane-
 fangs siner geburt mit der kaisern vnd kûngen kinden âne
 vortail sin sele vnd gemüte enpfächen tûg, Vnnd nit daz selb
 gemüt mit schyne der tugend vnd mit lobe des [205^b] adels
 zieren mug. Vnd waisz yemant! ob mir in diser sache vil ge-
 20 übter exempeln gebruchh syg? das vil von nidern stammen vnd
 von verachten vättern vnd mütern geborn, bald vnd schnell
 edel worden sint. Welcher exempeln mir so grosser folle ist!
 daz kum diser tage mir lang gnûg wer die alle zeerzellen.
 Doch wil ich zû bewerung diser rede, der selben wenig be-
 25 rûren Vnd zû dem ersten vsz der Jüngligkait vnser statt rome.
 Ist nit der vrsprung Tuly Hostily klain gewesen? Der da
 anefangs ain hütten für ain huse hatt, vnd des vatter vnd
 mûter nâch vnbekant gewesen sint? Sag tett nit lang zyt
 der selb des fichs hüten, Vnd tett nit darnâch sin grosse ver-
 30 nunft also erschynen, daz sy Inn fûrt vnd brâcht zû diser
 statt oberstem gewalt vnd regimente? diser Tulus Hostilius
 wyttert vnd meret ouch dise statt vnd machet vil vinde vnder-
 tenig dem Römischen gewalte. Ist nit Seruius Tulus in aigen-
 schaft arm geborn gewesen vnd darInne erwachsen? bis zû
 35 volkommenem zytigem alter der noch dann die höchsten oberkait
 des regiments diser statt habend was, Vnd sich darInne so
 vbertrefflich wol hielt, daz er verdient die Sabinischen den
 römern gehorsam vnd vnderdenig zemachen vnd dryg sige,

zebeheben vnd ouch dryg berge zû wytrung der statt zû ze-
 fügen vnd grosse wirdigkait der ämptern zemerer Aber Mar-
 cus Porcius Catho von dem das Porcianisch folcke der gemaind,
 sinen namen vnd vrsprung gezogen hât, Ist worden geborn
 5 by ainer tuschgulanischen strässe in ainem pürschen hüslin
 vnd [206] was doch desselben wirdigkait vnd der geloube zû
 Im in diser statt so grosse! daz er all fürpündig manne, die
 zû sinen zyten wären vbertraf vnd deshalb wärlich verrümpft
 vnd edel was vnnd des gemaines nutzes trost vnd haile vnd
 10 nit minder der geschriff Danne ritterlicher dingen flyssig vnd
 künnend. Diser man was von den burgern in so hohen eeren
 gehalten daz er durch sinen räte die ordnung der reten vnd
 Senatoren endert vnd meret vnd die maiestäte desselben rātes
 mit sin selbs lobe vnd eeren grōzlich tett zieren Vnnd wissen
 15 wir nit? Marius von aller nidersten vatter vnd mūter ge-
 boren vnd vff vnsuberkait des ertrichs gelegen sin vnd ainen
 aller schnōdisten anefang gehept han In dem aber dar nāch so
 vil tugend vnd fromkait erlucht, daz er in dem Jugurtischen
 kriege des ersten wart ain Innemer vnnd vszgeber Metelli,
 20 des obersten Rōmers Vnd darnāch an des selben Metelli statt
 vnd ampt kam vnd oberster consul vnd hōptman wart, alles
 Rōmschen heeres. Darinne Er sich so redlich vnd kecklich
 hielt daz er Jugurtam vnd Botum den kūng zû Mauritania
 der desselben Jugurte helffer was! Des ersten siges vber-
 25 wand vnd flüchtig machet vnd darnāch vil jrer stetten in Nu-
 midia gewan vnd Innam vnd zû letste Jugurtam fieng vnd gen
 rōm brācht vnd vor sinen wagen gefangen infürt vnd jm des-
 halb vnsaglich grosz eere vnd siges lobe wart bewisen. dar-
 nāch als die zimbri der rōmer gezüge nider laiten vnd dar von
 30 grosse forcht zû rōme entstünd vnd so [206^b] grosz als vor
 kum ye zû Hanibals zyten beschehen ist. Ist aber Marius
 zû oberstem hauptman vnd consul erwellet worden, Vmb daz
 die Galli vnd franzosen die statt nit ansturmten vnd nāch
 dem der selb krieg sich gūte zyt tett verzichten! Ist Im in
 35 sōlichem dise wirdigkait sōliches amptes zû meren mālen an-
 gebotten worden Vnd zû letste do Er dise zimbros vnd frantzosen
 vberwand, hât er zû dem andern māle das lob vnd die
 wirdigkait so man von siges wegen pflag zetūn, von den

römern eerlich Ingenomen vnd enpfangen Aber Socratem ain
ainige gezierde menschlicher wysheit, durch des kunst vnd
lere alle schülen der philosophye sint erluchtet vnd der von
dem got Appollo gevrtailt ist, sin, der allergelertest vnd wy-
5 sest vnder allen menschen (den selben sprich ich) haben ge-
born ain hebamme sin müter vnd ain stainbrecher sin vatter.
Euripides aber der da gemachet hât das aller hoflichest ge-
dicht entliches laides das wir nennen Tragediam vnd Demo-
stenes vnder den natürlichen maistern ain fürst vnd vnder
10 allen Oratoren vnd wolredenden kriechischen menschen der
aller beste vnd scherpfiest haben bede nit allain licht vnd
schnöd vätter vnd müter gehept sunder gantz vnbekant. Vnd
darumb wer ist der? Der ainche vernunft hât der reden ge-
törr! dise yetz gemelten erluchten man, So grosser lobrychen
15 übungen vnd tugenden sin vnedel? Sunder ist not! aitweders
in allen menschen kainen adel sin. Oder aber dise yetzge-
nempten sin vnder allen menschen die aller edelsten, dero
klüge vernunft crefte geschicklichkait [207] vnd aller gûten
künsten lernung vnd vnderwysung! nit allain für ander habent
20 gegrünet sunder gar nâch bis zû götlicher verstentnûsz sint
gewachsen. Vnd dir gebürt ouch nit Corneli das zewiderreden.
Dwyle du dinen altfordern vsz disen tugenden nechst gelych
ainen sôlichen anefang gegeben hâst Vnd darumb so wirt also
der adel nit vsz der geburt des geschlechtes enpfangen vnd
25 genomen sunder vsz Innwendigen tugenden des gemütes.
Danne sust werent die yetz gemelten niemer edel genennet
worden! dero vrsprunge Irer geburt so klain vnd demüttig
funden worden ist. Als wir ouch nit widerreden mugen vil
menschen von aller edelsten vâttern geboren sin, die so schant-
30 lich vnd boschlich gelebt hant! daz die selben nit allain nit
edel sunder aller schnödest vnd lasterliche menschen verdie-
nent genennet zewerden. Vnd Ich wil berüren zum ersten
etliche vnlobliche man, So vnder dinen fordern gewesen sint.
Item des vorigen Affricani sun Scipio genant! vbertraf mit
35 siner groben vnwissenhait vnd zagkait sines vatters fromkait
vnd vestikait, der ouch gegen Anthonio dem kûng schantlich
darnider gelag vnd gefangen wart vnd mit zûsamen gebunden
henden batt ain lybgeding sines lebens. Item Als ouch diser

yetz genanter Scipio ains mäls nit durch sin selbs verdienung,
 Sunder durch verdienung Georci sines vatters schribers! er-
 folget hatt das ampt ains obersten richters! Do hatt er des
 siner nechsten gesipten fründen gunst so vil, daz sy nie kain
 5 ding laider gehorten danne daz Im dise wirdigkait zûgestanden
 was. Vnd als die selben sine fründ forchten [207^b] daz er mit
 etwas siner boshait söliche offen wirdigkait dises ampts tette
 lestern vnd sich selbs des schantlich entsetzen vnd daz da
 durch ir geschlecht der Cornelien des schant enpfächen wurd!
 10 do haben sy nie wöllen lyden, daz der ainch vrtail sprechh.
 Oder sinen gerichtz stül in offenliche verhörung ye getörste
 setzen! So vil vnuernunft wisten sy sin in sinem houpte.
 Dar zû din publius Scipio ain vnnützer mensche, do der ober-
 ster hauptmanschaft pflag kriegens wider Jugurtam, sachen
 15 halb daz der selb Jugurta in verachtung vnd zû schmähe des
 Senates zû rōme boschlich erschlagen hatt atherbalem vnd yem-
 psalem gebrüder vnd künigs micipse seligen süne! die aller
 beste fründ gewesen wären des rōmschen folckes! do verfürt
 Er so vnwyslich vnd torlich das heere sines gezüges vnd folckes,
 20 daz nit zû aincher zyte ye vnser folck vnd heere jemerlicher
 boschlicher vnd süntlicher gelebt haben vnd Als er dar näch
 consul vnd oberster rōmer wart. Ist er von dem selben Ju-
 gurta mit gelt gestochen vnd falsch gemachet worden! daz er
 mit jm ainen schantlichen fride treffen tett. Welchen fride
 25 der Senat vnd gantzer rāte zû rōm dar näch bald tett abkün-
 den vnd widerrufen. Vnd was mag Corneli schantlichers oder
 lasterlichers funden werden. Dann dise yetz gemelten vneere?
 Vnd was sol Ich sagen von dem aller vnschamigosten Jüng-
 ling der ain sun was Quinti faby Maximi? Als der selb ain
 30 vngebürlich vppig leben für! do mocht jm sin vätterlicher
 adel nit hier vor sin, Danne das Quintus Pompeius do zemäl
 der statt richter jm als ainem wütenden oxsen verbotte vnd
 [208] zwang tûn müst. Was sol ich sagen von dem suns sune
 quinti ortensy (aines mans (für wär) in vnser statt von ge-
 35 louben vnd gesprechnüs aller fürnemest) der da zû schande
 sines lebens mit vnküschhait vnd mit liplicher wolluste dar zû
 kam! daz Er Im mittel der offen gemainen frōwen hüsern
 stünd vnd beharret dar näch hier Inne als ain riffian In offen-

licher verschamung. Sag Corneli mainst du dise sin zenemen edel, dero leben so vil sträffbarer vnd lasterlicher ist als vil sy ainen höchern schyne Irs adels hier mit habent erleschet? Sag was ist es? ob sy Joch gemachte bild Irer altfordern erzögent? oder daz sy sagent vnd erzellent wo vnd wie sy hüsllich syen worden erzogen? Sag schetzest du das? etwas lobes Iren lasterlichen wercken bringen mugen? oder möchtest du nit wärlicher vnd rechter sprechen? daz sy hier mit mer Ir laster tetten entecken vnd sich selbs dester schuldiger vnd sträffbarer machen. Vmb daz sy ain sölich exempel der tugent das sy vor Iren ougen gehept hant so Jemerlich vnd boschlich haben verlässen. Darumb ich diser kainen schetz verdienet han oder würdig sin daz man Im von loblicher getäten wegen siner altfordern, ainch regiment gemaines nutzes vf Inn zebewenden schuldig syg. Danne die selben ir altfordern wären diser statt ain loblich zierung. Aber diser ains gemainen nutzes schantliche mäse. Die täten diser statt vnd Irem regimente frid eer vnd nutze zü fügen vnd bringen? Aber dise oft laster vneere vnd grossen schaden der burgern zürichten vnd volstrecken. Die haben ouch Ir [208^b] vätterlich lande so das mit grossen kriegern sorgen angsten vnd nöten belestiget was, oft mit Ir tugend klügkait vnd vernunft errettet. Aber dise habent arbeit gehept vnd sich geflissen frid sün vnd rüwe irs vätterlichen landes mit jren sünden vnd boszhaiten zebe-
 25 trüben vnd ze entrichten. Darumbe. Wie sint in ainer loblichen wol geordneter statt sölicher menschen verdienung? Were nit ainem gemainen nutze weger vnd besser? Sölicher burgern zemangeln? Vnd were nit jren vättern süsser vnd rüwiger, daz sy sölich süne nie hetten geboren? ob joch sölicher Irer kinden würckung langen wurd an der vättern selan. Dwyle sy doch in jrem leben Ir vätterlich lande so lieb gehept hant. Für wär sy wurden vrtailen sölich Ir süne sin zetilcken vsser der gesellschaft aller menschen, Danne kuntbar jst in dem regimente gemaines nutzes vil lasterlicher sünen
 30 durch vrtail Irer vättern verdampnet worden sin zü mancherlay sträff vnd pine. Welcher dingen exempel Brutus ist der erst liebhaber vnd sträffer der fryhait. Der sin aigen süne (Vmb daz sy mitwissent vnd gesellen wären aines pundes

wider fryhait der römer fürgenomen) hies ertöten. Item vnd
aber Cassius der sinen sune (Vmb daz Er der obersten regie-
rung vber das folcke zû Röm begeret) Mit strachen geschlagen
dar näch gebott ze ertöten. Disem folget näch Manlius tor-
5 quatus ain aller edelster burger diser statt. Der selb als sin
sune Decius Sillanus von gelts wegen daz er vngebürlich solt
Ingenomen han geschuldiget wart, von ainem räte! nam er
disz sache vf sich selbs dar Inne [209] zeerkennen vnd zevr-
tailen vnd als er nu das laster sines suns also erfand! do
10 falt vnd lutbart Er ain sölich vrtail vnd sprach. Dwyle kund
worden ist Sillanum minen sune in der prouintze gelt vnbillich
geroubet han So richt vnd vrtaille Ich Inn billich vnwürdig sin
siner vätterlichen hüsern vnd der ämptern gemaines nutzes
vnd ouch der gesellschaft aller burgern. Dar zû so gebütt
15 Ich Im schnell von miner gesicht hin weg zegeen vnd sich
von mir zeschaiden . . Vnd darumb lieben herren vnd vätter
So ist es kain sitte oder gewonhait güten fromen vättern lieb
zehaben, bös lasterlich süne Sunder ist mer Ir gewonhait die
vszetryben zeschüchen vnd sich dero ze entüssern. Vnd dar-
20 umb so ist man ouch sölichen sünen kain ampt oder gûthait
zetûn schuldig von wegen vätterlicher verdienung so ferre in
Inen selbs nit erschynet vätterliche tugend. Dann gelycher
wyse als kain schyne yemer in ansehung ains finstern spigels
wider gelestet Also mag ouch in bösen schädlichen vnd laster-
25 lichen kinden die tugend Irer vättern vnd altfordern niemer
erluchtet vnd gesehen werden Vnd darumb corneli so schetzest
du vmb suste, die eer der altfordern sin in erbschaft den
nachkomen vnd den adel als ainen spiegel denselben nächkomen
verlassen werden. Danne tugend vnd adel stoyscher tugenden
30 werden gesücht vnd erfolgt mit aigner arbeit vnd mugend nit
by lastern steen noch by Inen wonung haben. Darumb corneli
in allem disem dinem rûme der geburt oder des geschlechtes,
predigest vnd berürest du allain fremdes lobe vnd nutzit des
dinen. [209^b] vnd ist das die kind vnd nächkomen nement
35 vnd enpfächent von Iren edeln vnd altfordern blüt gelider vnd
geäder! so tûnt sy vmb sust jnen wöllen zû aigen der selben
adel. welches adels aigner sitze allain ist das gemüte. dessel-
ben gemütes Aber kain taile den kinden vnd nächkomen mag

werden gelassen. Aber die vorigen dinge sint des lybes vnd
 werden mit dem leben erleschet vnd hingeen. füro ist das die
 gelerten sölich süne edel nennent (Als du corneli gesagt häst)
 so nennent sy die selben wol vnd recht! so ferre sy from sint
 5 vnd tugend würent Dann also tüt sy Irem geschlecht näch!
 gelyche werck vnd tugend üben! Das aber du corneli mit
 schwygen fürgangen häst. Sint sy aber grob vnd vnwissend
 ful vnd zaghaft So sagent auch die selben gelerten, sölich süne
 vnd nächkomen sin vnedel. recht als ob sy denne von der
 10 eere vnd von dem adel jrs geschlechtes fremd sygen. Vsz
 disem allem man klerlich versteet! von aller edelsten vättern
 ouch vnadelich geburten fliesen vnd komen mügen Das aber
 das vnkündend grob püfel vnd folcke sich nützit in diser sache
 rechtes versteen mug! Main Ich hier by sin zebedencken!
 15 das es oft in jrrung fallen tüt vnd kainist oder gar selten
 sin mainung gelych hillet vnd steet mit mainung der wysen
 Nu tügen wir komen vf die edeln armüt. Sag wer ist ye er-
 mer gewesen danne agrippa ain fürpüntlicher mane vnd In
 diser statt gemaines nutzes ain aller lobwirdigoster! der so
 20 arm vnd dennocht redlich was! Das man jm von der statt
 renten vnd gülden satzt ain narung dero er sich möcht be-
 tragen. Vnd hinder dem als er gestarb noch dann [210] nützit
 erbes noch gütes funden wart daz man in der statt röm schryne
 vnd gemainen seckel tragen möcht? Sag ist nit Valerius Pu-
 25 blicola ain aller annemister man gewesen dem gemainen nutze
 diser statt? Der ouch consul vnd oberster amptman hie ge-
 wesen ist. Des lyhe do er todes abgangen was, man von der
 statt gemainem güte bestatten müst, Vmb daz er nit so vil
 erbs hinder Im verlies, daz sy dar von bestettiget werden
 30 möcht. Sag tett nit das römsch folcke quintum lucium an-
 turacum der vf dem göw sin leben fürt vnd äcker sayt vnd
 buwet! berüffen vnd erwellen zü oberstem hauptman kriegens?
 Der so grosser tugend was! do die Prenestinen Ir heere vnd
 geleger an der statt röm ringkmuren gemacht hatten! daz er
 35 nit allain die statt erlost von sölichem beligen! sunder ouch
 die vind mit grossen schanden flüchtig machet vnd die by dem
 fliessenden wasser abioram alle darnider legt Vnd dar näch
 acht stett die der selben prenestinen helffer vnd puntgenossen

wären vnd die Statt preneſte ſelbs alſo bekrieget daz ſy ſich
den römern in eigenschaft tett ergeben. Das alles von jm
nit lenger dann in zwaintzig tagen wart volbrächt vnd volendet.
Wie groſz iſt darnäch Sitily ſerani erliche vnd lobliche ar-
5 müt? den ouch als er vf den göwe ſin äcker ſäyt, der ſenät
vnd räte zû rome tett berüffen vnd erfordern ſich des ober-
ſten amptes des conſuläts zebeladen. Der ſelb ſinen pflüge
verlies vnd ſo ſtarck vnd ſo kecklich der vynden gezüge vnd
macht tilgket vnd niderlegt, daz er hie durch groſz hail lob
10 vnd troſte dem gemainen nutze erfolget. Vnnd mochten doch
nit weder die [210^b] wirdigkait vnd eere ſins ampts noch
kürtzwile vnd wolluſt der ſtatt noch der rychtum des gütes
In dem krieg gewonnen oder füro zegewinnen Inn beheben!
das er deſter minder wider umbkarte vnd gienge zû ſinem
15 äckerlin vnd zû ſinem liebgehapten buw vnd wercke Söllen
wir diſe lobwürdigen manne jn dero adelichen hohen gemüten
ſo ain groſſer glantz der tugend iſt erſchinnen! dar vmb ſagen
vnedel ſin vmb das ſy in armüt gelept haben? oder iſt ye-
mant ſo groſſer vernunft der die nit wölte nennen vnd ſagen
20 die aller edelſten ſin, durch dero verdienung vnd loblich ge-
tett der adel gemaines nutzes iſt beſchirmpt vnd behalten
worden? darvmb offen iſt, das adel mit armüt vnd armüt mit
adel ſyn vnd belyben mag. vnd ſöl ouch niemand mainen das
ainem erbern loblichen armen man gantz kain miltikait ſin
25 mug! ſo doch diſe lobliche armen manne yetzgemelt jr hai-
mant vnd väterlich lande habent beſchirmet ouch die mit nū-
wen küngrychen gemeret vnd ſy darzû ouch jn jren regemen-
ten gemaines nutzes zû hilff komen ſint, den notdurften jrer
fründen vnd die burger vor vnrecht haben behütet vnd sölich
30 vnrecht vertriben. Sag ward nit diſz geſehen ain höchſter
taile der miltikait? Danne wer von ſinem aigen ſelbſgewun-
nen güte vnd gewalte, miltikait über den ſchetz Ich nit ſin
zeſchelten. Aber jn klainem vnd jn wenig mag er dennoch
milt ſin wyle von notdurft ſin müſ, das er ſo vil vnmuglicher
35 ſyg yemant güts zetûn als vil jm minder iſt vätterliches erbes
vnd gütes. aber wer ſich ingemainen vnd ſundern ſachen
flyſſet vnd ſich arbeit mit räte mit günſtigem [211] willen
vnd mit fürdrung dem menſchen gebürlichen byſtande zetûnd

zû erfölung jrer gerechtikait! der mag teglichs so vil milter
 sin vnd werden Als vil er mer gewaltes vnd geloubens hät
 an regierung gemaines nutzes vnd ouch als vil er jm selbs
 mit sinen emssigen gütgetäten mer hilffe güter fründen hät
 5 gemacht. Vnd darumb corneli So mag grosse miltigkait sin
 ainem loblichen armen man vnd mag ouch armüt jm sinen
 adel nit nemen! dwyle messige armüt kainen staffel noch
 gräde der tugend hin füren mag Sunder ist das ain aller
 hüpschiste gaube dem menschen, recht ainem wie dem andern
 10 von der nature gegeben. daz ain yetklicher mensche wol mag
 tugend erfolgen. Dwyle sölicher tugend stül vnd sitze (als
 ich vor gesagt han, in Innwendigem gemüte gesetzt ist vnd
 nit in dem frefel des gelückes. Vnd ist ouch kain züfale so
 hert noch so scharpf der den menschen siner tugend mug
 15 berouben Noch kain zü fale so frölich noch so lustsam vnd
 gefellig der ainem groben vnkünnenden tregen lychtfertigen
 menschen lob vnd eere zübringen mug. Danne wo das ge-
 lücke gewalt hett vber die tugend die zegeben vnd zenemen!
 So were die tugend nit mer tugend! Vnd wer ouch kain
 20 lone me noch verdienung der tugend. Angesehen daz die
 erwellung yetkliche ding wol vnd recht zehandeln, nit mer
 were in vnserm aigen gewalte sunder in fremdem gewalte des
 gelüches. Vnd darumb so höre yetz vf Corneli zemainen daz
 der tugend miltigkait oder aincher adel sinen vrsprung hab in
 25 grossem rychtum. Danne sust wenne ain edelman sines rychtums
 [211^b] abkem oder des wurd entsetzet, So horte ouch vf mit
 Im der adel. Das aber nit ist. Danne wärer adel des men-
 schen ist kainem fale des gelückes vnderwürffig Vnd wo das
 sölt sin das du gesagt häst So weren dise hochgeachten manne,
 30 dero jch obgedacht hab in sölicher Irer armüt nie edel ge-
 wesen. Dero namen doch von dem Römschen folcke yemer
 Ewenklich als fyrbar! loblich werden geeret. Vnd darumb
 lieben herren vnd vätter, Ist daz vnderwylen menschen hoches
 adels lasterliche sün vnd kind geberent. Vnd ist daz von
 35 schnöden nidern vnd vnachtbaren vättern vnd mütern ettwenne
 süne vnd kind geboren werden grosser eeren wert. Vnnd ist
 daz in denen so in armüt lebent, vnder wylen grosser glantze
 der tugend erschynet? So ist kuntbar kainen adel sin, weder

an rychtum noch an geburte des geschlechtes. Aber des mens-
 chen gemüte das fryg ist vnd kainem süntlichen laster oder
 schantbarlicher vppikait dienet, Sunder in güten künsten ge-
 übt ist, Für war das sol edel vnd lobsam gehalten werden.
 5 Vnd so wir also hie von dem adel handelnt vnd reden tünt.
 So steet aller kriege zwüschen vns von der tugend zereden.
 In welchem kriege (lieben herren vnd vätter) Ich lieber wölt
 ainen andern für mich reden, vmb daz Ich nit (So Ich von
 min selbs lob sagte) Gesechen wurd Ingefallen sin das laster
 10 aigens rümes. Aber doch ist mir das zü grossen fröiden daz
 Ich vor mir sich vnnd schöw üwer vfrechten runden gemüte
 vnd senftmütigen menschhait vnd daz [212] Ir alle vnser be-
 der leben bekennent. Deshalb Ich üch nit ütztit falsches sa-
 gen mag! noch ütztit wares mir schaden geben tüt. Lieben
 15 herren vnd vätter Als bald Ich vsz miner kindlichkait anhüb
 zewachsen hab Ich sölich min kintlich Jugend ankeret vnd
 die gantz gegeben lernung der süssen lieplichen geschriffte.
 Dar näch als Ich etwas gewachsner worden bin! hab jch ainen
 micheln taile miner Jünligkait geübt vnd verschlissen In der
 20 kunst der philosophye. Welche kunst so lieplich Ist daz Ich
 nit waysz ob in allem leben der menschen ütztit loblichers
 funden werden mug. In der selben lere Ich nit allain latinisch
 maister vnd vnderwyser hatt! Sunder gelust mich zü Athenis
 die kriechischen fürsten aller güten künsten zehören. Vnder
 25 dero zucht vnd maisterschaft, Wie vil vnd grosz jch lernte,
 wil Ich ander lüssen schetzen vnd vrtailen. Allain mag jch
 das von mir selbs äne hoffart oder vberhebung sagen, daz mir
 nie aincher müssiger tage oder vngearbait nachte hin ge-
 schlichen sint. Mir was von nature Ingegossen ettliche güt-
 30 kait der kunst! Also daz jch in miner vernunft nütztit wir-
 digers noch höheres achtet, Dann rechte wäre ertkantnüz
 yetkliches dinges mir flussent zü allenthalben her, der folle
 güter maistern vnd lerern vnd erberer loblicher gesellschaften
 güter schülern vnd jungern vnder dero wysheit kain mensch-
 35 lich gemüt mocht werden grob vnwissend vnd vngelert vnd
 was mir do zemäl so grosse übung lernens vnd rechtes lebens!
 daz jch yetz nütztit vnerbers mag begeren. [212^b] Also daz
 alle laster, nit allain laidsam sunder gantz widerwertig worden

sint miner nature! Vnd mir aller süssiste gesellschaft was
 übung der tugend. Darnäch do Ich vermarckt daz der men-
 schen vernunft verrümpter vnd loblicher wurden, so man sich
 sölicher vernunft zü gemainem nutze gebruchte. Do gab ich
 5 mich selbs gantz minem vätterlichen lande Vnd lies darnäch
 nit mer ab zü aincher zyte, Dann daz ich stetz gedächt des-
 selben mines vätterlichen landes haile zewytern vnd zemerer
 vnd tett hierInne nit fürchten ainche arbeit oder ainchen
 schaden oder sorgfeltikait! so ferre sy nun nutz vnd eere di-
 10 sem vätterlichen lande mochten geben. Also do nechst vor
 etlichen Jären dit Maricen von den birraten zü allen orten
 bekrieget vnd angegriffen wurden. Vnd Trogus Pompeius ain
 aller verrümpstister mane ain hauptman was der römern schif-
 fung zestryten vf dem mere, Vnd er mir vsz sölicher schiffung
 15 lech vnnd enpfalch zehen geschnebelter vnd gespitzter schiffen
 darmitte wider oritem (der andern schiffung vnd parthie haupt-
 man namlich der pirraten) Illends zefechten vnd zestryten vf
 dem mere. Sag? tett ich nit den selben Orienten mit grösz-
 sem flysz sich werende, darniderlegen vnd den mit allem si-
 20 nem folcke keckes mütes vberwinden Vnd do ich ouch in dem
 mitridatischen kriege ain raiser vnd gehorsamer stryter was
 des yetz gesaiten pompey. Sag? wie oft ich da zemäl ver-
 diente den obersten dancke vnd bekrönet ze werden vmb daz
 ich der erst vber etlicher stetten graben [213] vnd vber et-
 25 licher stetten muren gewesen was. Vnd do jch ander raisiger
 gezügen obman gewesen bin. Sag! hab jch nit do zemäl der
 vynden spitze ordnung vnd geschicke vnd heere entrichtet
 vberwunden vnd getilket Also das miner Jünglichkait nie ützt
 gebrochen hät, das vnder der wirdigkait des consuläts, yemant
 30 ritterliche eere bringen mag. Vnd hab als ain Jüngling min
 leben also gefürt! daz so Ich alt wirt hoff gesechen werden
 nit sin ain vnnützer burger dem regimente gemaines nutzes.
 Wie grosse gezierd mir aber syg güter fruntschaft! das haben
 bis her gesechen vnd bekennet Ir min güten vnd lieben fründe
 35 vnd alle mit ainandern all hie zü gegen stende! dero not-
 durften vnd angelegen sachen ich nie abgewesen bin. Danne
 wer ist? Der mich ye gebeten hab Es syg gewesen für ge-
 richt oder für räte Es syg gewesen in gemainen offenlichen

sachen oder in sundern? dem jch nit zû der billichkait getrüwen bystand getân hab? Vnd der hierjnne miner flyssigen arbeit nit schynbarlich hab empfunden? diser dingen halb Ich mir der selben aller fruntschaft vnd günstigen willen Main gemacht han. niemand ist in diser statt Ja in dem gantzen vmbkraisz der welt, den jch ye verstanden hab mich gehasset han. Es syge dann villicht gewesen ain vynde des römischen folckes. Vnd zû letscht so ist das die summ summarum miner wercken übungen vnd getäten. Ich bin in gemainem nutze allwegen gewesen der allersorgsamister vsserhalb aber gesin gebürliches handels. in minem huse frölich vnd schimpfig. In lernung der geschrift flyssig. Gegen minen vatter vnnd mûter [213^b] gütig, Minen gesipten öchemen lieb, vnd sust minen fründen allen trüw vnd besunder zû götlichen diensten der gütwilligest. Vnd hab also allwegen gemaint mich mit disen künsten rechten adel enpfächen mügen vnd geschetzet mich mit disen tugenden gemacht haben min gemüt lobsam gerecht vnd volkomen. Vnd Ja corneli lobsamer gerechter vnd edler danne du das din. dann wie dine sitten syen vnd die übung vnd gestalt dines lebens ist wol kuntbar. Dann was häst du in dinem leben ye verdienet da durch du dir vor mir zû messen vnd aignen wöltest oder möchtest rechten adel? Sag welich lobsam güt getätt gemaines nutzes hät vnser statt von dir ye erkennet? Wyle du bis her hierInne also gelebet häst, daz die selb vnser statt in Iren nutze dich noch nie hät verstanden oder empfunden geboren sin. Wer ist aller menschen der sich ye gebrucht hab dines rätes oder bystands? In wem häst du dise miltikait die du so hoch erhebest ye geübet? Es syge dann in büberye toechten vppigen fröwen oder ouch die du in schantlichen vnküschen dingen häst güdenklichen vsgegeben? Welcher dingen din huse allwegen vol ist Vnd mainst denne allermaist edel vnd lobsam werden So du als ain höptman fürest ain schare vppiger dirnen vnd du dich schöwest vnd sichst in dinen lyplichen wollusten mit Inen allenthalben sin vmb zünet, Vnd du also dich mit vnerberm helsen vnd mit schantlicher vnküschhait vnd mit wüster truncknerye tüst arbeiten vnd üben Vnnd so du dann also ains sölichen lebens bist? So geest du diner altfordern loblich [214] getäten sagen

vnd predigen. Ich gestee der wärhait in diser vnser statt der
 selben diner fordern adel vast lobsam vnd in grössen wurden
 vnd das vast billich gewesen sin. Aber so du der selben hie
 gedenckest, so tüst du darmit vnwyslich din laster vnd vn-
 5 wissenhait offnen vnd entecken. Danne nützit hessigers vnd
 sträfbarers sin mag, Danne in so grossem liecht vnd schyne
 der tugend! so ain blindes vnd finsters leben zefüren. Danne
 dise din alt fordern haben dir hinder jnen verlässen ain ex-
 empel grosser vnd lobwürdiger dingen vnd dir gezaiget ainen
 10 wege als vor dinen ougen aller sichtbar ist, Von wegen ge-
 maines nutzes güts zeuerdienen. Dar durch dir lycht gewesen
 wer in so grossem schyne diner fordern Iren füsstapfen näch
 zefolgen vnd lob vnd adel zeüberkomen. Aber du häst dich
 vmbgekeret vnd bist als vsz aim claren liecht in ain mittel
 15 der finsternüsz gegangen. Darnäch so mainst du in verdienung
 diner altfordern (daz die selben von gemaines nutzes wegen
 getän hant) lob sam wöllen schynen! so du doch mit dinen
 lasterlichen wercken löblichen gemainen nutze enterest vnd
 mainst durch Ire güt getäten adel zeerfolgen! so du doch
 20 nützit bist dann ain fuler treger vnwissender mensche. Du
 mainst mit schläffe müsz rüwe, mit essen trincken lyplichen
 wollusten vnd mit vnküschhait lob süchen vnd erJagen. Welich
 lob vnd eere dise din fordern erJaget hant, Mit grosser arbeit
 mit so vil wachens mit küschhait mit hunger turst hitz frost
 25 sorgen angsten vnd nöten. du Irrest aber hier an gröszlich.
 dann ist daz du begerest mit hohen titeln sunderliches lobes
 vnd adels [214^b] genennet ze werden! so ist notdürftig daz
 du selbs dich machest sin söliches loblichen vnd hohen adels
 Angesechen daz tugend vergebens vnd vmb sust gesücht wirt
 30 in erblichem güte. Süch diner altfordern bücher Irer rech-
 nungen vnd alles irs gütes, So findest du niemer darInne ützt
 geschriben sin Irer tugend. Du häst gesagt, daz diner fordern
 selan näch Irem tode an äner welt nützit frölichers noch ge-
 felligers sin möcht danne daz all wirdikaiten des gemainen
 35 nutzes vf dich der Ir blüt vnd libe bist komen sölten! daz
 du da durch wurdest geeret etc. Aber ich main! sechen die
 selben yetz dich vsz dem schyne irs liechtes, daz dann söli-
 chen jren gesichten nützit miszfelligers noch heszlichers were,

dan daz disz ir loblich vätterlich lande, so lang gelitten hett
 dine lasterlichen wercke, dar von sy selbs (wo sy in leben ge-
 wesen weren) dich langest hetten vertriben vnd schamest dich
 nit zesagen, daz du by den selben syest erzogen, so du doch
 5 so schantlich vnd bübisch gelept häst, daz du gesechen wirst
 in offen fröwen hüsern gelebt han vnd darjnne erzogen wor-
 den sin. du sagst ouch ir bildung vnd antlit in dinem ange-
 sichte erschnen. Waist du aber nit daz du mit dinem laster-
 lichen leben ir eere vnder druckest vnd vberwindest Also daz
 10 in dinen finsternüssen ir liecht vnd glantze nit mer schynen
 mag. Dar näch so wilt du mit dinen wyten vnd schönen hüsern,
 hüpschen stetten vnd rychen vnd nutzlichen büwen des felde
 disen dinen adel grosz machen vnd zieren vnd min schlecht
 huse Minen mittelmessigen husräte vnnnd mine klainen äcker
 15 vnd min erbern armüt schelten vnd [215] lestern. Aber du
 Jämrigier. Waist du nit? wie grosz dise ding dir sint zû
 schande vnd wie grosz mine ding mir zû lobe. Dann hüpscher
 vnd loblicher ist mir klainem vnd wenigem gûte zegrünen vnd
 zû zenemen in tugenden! Danne dir in grossem apparäte vnd
 20 rychtum wüst zewerden vnd in lastern zetorren. Wie wol jch
 an ämptern vnd in kriegem mit minem raisen grösser gûte
 hett mugen vberkomen! Des jch aber nie hab gewölt oder
 näch erberkait gemaint mir das mugen nütz sin Sunder wyle
 jch nützit anders danne erbers beger! so bin jch an diser
 25 miner süssen habe miner schlechten narung benüig Vnd ist
 gnüg daz jch als vil beger als vil erberlich syg danne was
 wyters vnd vber sölichs gesücht wirt, jst vberflüssig vnd kumpt
 zû hoffart. Dann was ist ferrers zebegeren in dem leben danne
 das wir messenklich leben mugen. Welich aber rychtum mit
 30 arbeit gesamelt werden zû gezierde! das sint vnnütz vber-
 flüssig arbeit Sunder syge tugend ains edeln gemütes für sölich
 gezierde vnd nit costlicher husräte Vnd ain fromer lobs wir-
 diger mane tüg schynen in sinem huse vnder aller schnödisten
 dingen Vnd förchte niemant von armüt wegen tugend zeuer-
 35 lieren. Danne nützit ist wenig oder ze klain ainem menschen
 des wille steet recht zetûn. Vnd wer nit lobsam syg, der
 schuldige sich selbs dann vnbillich beclagt er sich des von
 dem gelücke Vnd darumb corneli so höre yetz vf vnd stelle

ab, dich zefröwen vnd zeüberheben in disen dinen rychtumen,
 die din lasterliche vnkünnenhait nun mechtiger vnnnd grösser
 machent. [215^b] höre vf mine schlechten nutz vnd bruhe ze-
 vernichten vnd zeuerschmechen! die min tugend clärer vnd
 5 verrümpter machen tünt. Höre vf den adel zsetzen in dem
 güte des gelückes danne daz selb güte hinfellig vnd fremd ist
 Sunder ist der adel mit der tugend vnd die tugend mit dem
 adel zsetzen. Disen wären vnd rechten adel der tugend häst
 du aller edelste Lucrecia vnsers alters, bekennet vnd den er-
 10 folget vnd überkomen mit wunderbarer grosser vnd hoher ver-
 nunfte. Dir haben nit gefallen Jungfröwlich vfpflanzung nit
 wylich gezierd! nit werckliche klainet nit schinbare klaiden
 nit costlich geliger noch süsser gesange. Dann dise ding alle
 raitzungen sint der vnküschhait, Sunder bist du gegeben ge-
 15 wesen der philosophie vnd der lernung fryer vnd güter künsten
 Vnd häst in küschhait in arbeit in schame in wachen vnd in
 geflissenhait gefürt vnd geübet din leben mit aller vernunft
 joblicher vnd wirdiger Danne von sölicher Jugend ye gehöret
 worden syg. Allain durch disen dinen adel häst du mir ge-
 20 fallen vnd merck mich dir söliches adels halb ouch gefallen
 han. Dwyle in menschlichen dingen nützit bas vnd sich liep-
 licher zü samen füget dann gelyche begird edler gemüthen vnd
 vnd gelycher wille rechts lebens. Vnd hin widerumb nützit
 widerwertigers vnd hesslichers danne so vnder zwayen men-
 25 schen, das ain begert vfzestygen zü clärhait der tugend, Vnd
 das ander schlipft vnnnd fallet zü schantlichen wollusten des
 lybes vnd lasterlichen dingen vnd also Dwyle Ich gelych bin
 dinen sitten Vnd aber cornelius ain [216] vngelych leben fürt
 dem dinen! So ist für wär notdürftig das du mich lieb habest
 30 vnd sin torhait tügest hassen. Dann wie möcht dir mit jm
 sin frölichkait des lebens! so du anhangen wöltest der rûw
 vnd müsse loblicher lernung güter künsten vnd er ain vinde
 sölicher künsten lieber den geswatze vnd das geschraye siner
 husfröwen hören wölt. Vnd sich mit ir intrunckerye vnd du
 35 noch denne aber gern wöltest schöwen den der sich küsch-
 hait vnd erberkait mit dir gebruchte, vnd er dich lieber wölt
 sechen mit Im gailigkait der vnküschhait üben vnd tryben.
 du wöltest zü aller zyte vnder gelerten lüten. gern reden vnd

disputieren von den vrsachen wunderbarer dingen von den
 löffen des gestirnes vnd von gûten sitten der tugend? so er
 vnder siner schare gûter dirnen vnd bûben als ain fürpündiger
 gûter redner lieber wölte predigen von allen schantlichen
 5 wollusten süßem läster vnd sünden jn der gantzen statte yener
 begangen. Wie wölt oder möcht vnder so vngelychen wider
 wertigen gemüten yemer frid vnd ainikait sin oder werden.
 Aber allerliebste lucrecia. Ich wirt din küschhait füren in
 min fridlich gehüse! Welches ob es wol vberflüssiger gezierden
 10 nit vol ist! noch dann mit tugend gûten sitten fröiden vnd
 mit aller zucht vnd schame lücht vnd schynet. Da wirst du
 des ersten finden vnd sechen ain aller fölligoste lyberye gûter
 büchern. Dar In ich allwegen all min hoffung gelegt hab.
 Da ist alle min gezierd Da ist miner mechelschaft bette. Disz
 15 ist min zierlicher vnd costlicher husräte. Alda magst du
 [216^b] büchertext vnd glosan bede der kriechen vnd der lati-
 nischen (Welche du selbs wilt) lesen Alda werden wir oft
 sament in der süßen kunst der philosophye disputieren Vnd
 wirt Ich dich vnderwysen etlicher wunderbarer künsten die
 20 ich in der hohen schül zû athenis hab gehöret. Ab denen
 ich kurtzweyl han so oft Ich daran tûn gedencken vnd wirt
 niemer ainche arbeit anderer huslicher dingen vnd geschefften
 dich von disen müssen vnd lernungen nemen oder ziehen.
 Dann ain klain nutzbar göw des feldes mir gnûg gebirt vnd
 25 ertrait täglicher narung vnd bruches. Ob aber aincher des
 gelückes fale mir sölich göw nemen wurd So mag Er mir doch
 nit nemen min tugend, durch welche tugend tusent nutz vnd
 gemacht mir offen steend zeleben vnd also gebruchest du dich
 in diser höchsten lernung lieplicher müssen, welcher dich ye
 30 gelustet! Also daz niemant zwüschen sölicher rûwe din selig
 gedencken bekumbert oder Irret. Dir wirt nit sin ainch ge-
 rüsch vnd wirtschaft toechter fröwen vnd vppiger dirnen oder
 forcht sin ainches eebruchs. Welche forcht oft die gemüt aller
 küschisten fröwen hât betrübet. Dir wirt ouch nit gebrechen
 35 zevberkomen aller süsseste vnd aller liebste kinder, daz noch
 danne din scham vnd küschhait nützit tût verletzen. Dann
 etliche liebe mit tugend zû samen gefüget vnd veraint Ist ain
 götlich gaistlich ordnung. In ansehung daz da durch mensch-

lich geschlecht nit abgeen Sunder vf erden werd behalten.
 So möcht ouch zû letscht dinen begirden kain seliger gelücke
 zû gestanden sin, Danne [217] was ist seliger in mengklichen
 dingen? wan in aller rüwigosten fröiden tugenden züchten vnd
 5 sitten das leben zeschlyssen? Was süssers danne mugen mit
 güten vnd hüpschen gedencken die vernunft füren zû übung
 güter vszwendiger dingen Vnd was frölichers? Danne mit dem
 menschen sin leben han der sich gelycher künsten vnd be-
 girden mit dir fröwet vnd darjnne kurtzweyl haben tüt Aber
 10 ir herren vnd vätter in dero aller wysesten gemüte sitzet vnd
 hanget dise vrtail so ains grossen treffenlichen dinges? er-
 wachhent yetz ze letscht vnd bedenckent die summe dises krie-
 gens. Wir kriegent von dem adel vnd sint vch biszher vnsers
 yetweders leben gelück kunst vnd sitten wol gnüg erkant vnd
 15 üch die ouch yetz kurtz erzellet. Aber zû letscht ist ain
 ainiger vs gange diser zwytrechtigkait, daz ist! das hütt krie-
 gent wider ain andern Erberkait mit vppikait groszmütikait
 mit lychtmütikait küschhait mit vnküschhait kunst mit vn-
 wissenhait vnd tugend mit laster. Welcher nu lieben herren
 20 vnd vätter vnder vns der edler syg das steet in üwer vrtaille
 zeerkennen etc.

[217^b] **D**Er durlüchtigen fürstin vnd fröwen fröw Mech-
 ilten geborner pfaltzgreuin by ryne Ertzhertzogin zû öster-
 rych etc. witwen miner gnedigen fröwen Enbütt jch niclās von
 wyle min vnderthenig willig dienst zûvor . . Franciscus petrarcha
 5 hāt genedige fröw ain bûch gemachet das genennet wirt ain
 bûch von der artznie beder gelücken vnd sint des zwen taile.
 In dem ersten wirt begriffen die artznie vnd verachtung des
 seligen gelückes des sich die menschen vber die rechten mās
 tûnt fröwen vnd überheben vnd in dem andern taile ain artznie
 10 vnd troste des vnseligen gelückes! des man sich zevil tût be-
 laidigen vnd darInne verzagen vnd ist dise artznie durch ain
 red vnd widerrede der vernunft gegen fröid vnd laid gesetzt
 Vnd das so volkomenlich, daz nit wol ützt dem menschen
 zûsteen mag durch schickung des gelückes fröid oder laid
 15 bringende Er finde des nutzbar artznie in dem selben bûch
 geschriben. Nu ist gnedige fröw mir nit enpfallen do jch in
 aim sterben zû böblingen üwern fürstlichen gnāden lobet disz
 yetzgemelt bûch petrarcha vnd saget wo das wol vnd recht
 getütschet wer, daz es dann nāch minem beduncken alle andere
 20 tütsche bûcher die jch gelesen hett in lobe wyt vbertreffen
 wurd, besunder vnder hochsinnigen vernünftigen lüten! daz
 do zemāl üwer fürstlich genād an mich begert vch dises bûchs
 ain mustre zeschicken vnd ain ainige artznie etliches fales
 des gelükes von mir getütschet üwern gnāden zû zefügen!
 25 dar by ir sechen vnd mercken möchten [218] dises bûchs
 form vnd gestalte. Söliche üwer gnāden begerung Mir zû den
 selben zyten was ain gebotte (als sölichs noch wer) wa nun
 üwer fürstlich genād ützt an mich tett, nit allain begeren
 sunder mit minster anzaigung bedütten) Vnd nam mir deshalb
 30 für vsz disem bûch zetütschen, die artznie des laides so ainem

mane tobet abgeet sin lieb elich husfröwe, vnd tett das dar-
 umb für anders fürnemen, daz ich hier mit üwern fürstlichen
 gnäden gnüg tûn vnd nützit dester minder ouch sölicher
 artznie ander mine gesellen vnd gûten fründe denen Ire hus-
 5 fröwen in obgemeltem sterben todes abgiengen antailhaftig
 machen möcht vnd also mit aim zûgelte (als man spricht)
 zwo töchtern vsgeben. Do ich aber sölich artznie getütschet
 hatt! fand ich darjnne etliche scheltung wypliches geschlechtes,
 die ich forcht komen zû miszfallen üwern fürstlichen gnäden!
 10 die ich waisz nit gern yemans schmahe zehören vnd verhielt
 deshalb üwern gnäden sölich translatze zeschicken in fürsätze,
 ain andere artznie vsz dem selben bûche zetransferyeren üwern
 gnäden gefelliger vnd vch die zeschicken. Das mir aber vn-
 mûsz vnd langes abwesen an dem kaiserlichen hofe nächmâls
 15 tett benemen. Sidher hât das liebkosend falsch trugenlich
 gelücke, so schnell vnd vnuerwândt sin schützlich angesicht
 mir entecket! daz not was mir zû troste dises bûches artznie
 zesûchen. Die Ich ouch so gnûgsam, miner vnschuld näch
 darInne funden han! daz nit yemantz anders troste (des doch
 20 von minen herren fründen vnd gûnnern vil gewesen ist) sich
 disem hât mûgen gelychen. Darumb ich sölich trost [218^b]
 vnd artznie hab in disz näch folgent tûtsch getransferyeret
 vmb das ob ainchem vnschuldigen menschen (wie mir) zû
 ainchen zyten vsz falschen erdichten arges zû geredt wurd!
 25 daz Er sich dann diser artznie vnd trostes des hochgelerten
 mans petrarche dar wider ouch möcht gebruchen. Sölich rede
 als ferr sich geburte zeuerachten vnd als ferr sich nit geburte,
 dem mit gebürlicher were zebegegnen. Welche translatz jch
 üwern fürstlichen gnäden (dem näch so obgelut hât) nit wolt
 30 verhalten, sunder noch zû ainer mustre des gemelten bûches
 schicken. Vnd ob üwer durlüchtikait disem mane petrarche
 zû argem nit vermercken wölt scheltung wypliches geschlechtes
 obgemelt in ansehung daz sölich trost vnd artznie die er
 daselbs geben wil etlich laidung der wyben erfordert vnd
 35 haischet. So wölt jch üwern fürstlichen gnäden die selben
 translatze noch ouch zûfügen vmb daz üwer fürstlich hohe
 vernunfte dester bas die form vnd gestalt disz bûchs (des vil
 vnd das grosz ist) möcht mercken vnd dar by versteen die

grossen kunst vnd erfahrung disz mannes, den üwer gnád (waisz Ich) wundern müst! wo die sines dinges vil möcht hören oder lesen. Wes aber üwer fürstlich gnád gern in yetwederem gelücke artznie haben wölt disz büches, wil jch des von üwer
 5 durlüchtikait vnderichtet vch die schicken von mir getütschet! Mich gehorsam vnd willich erbietend zü allem üwer fürstlichen gnäden gefallen vnd gebieten.

[219] **BE**lestiget bin ich mit argen lümden. Vernunft. Ich forcht du werest belestiget in diner concientz vnd gewissne.
 10 **L**aid. Mit schwerem lümden bin ich gedrucket. Vernunft. Ist sölicher lümde gerecht vnd billich! so waine nit den lümden sunder die vrsach des lümdens. Ist er aber vngerecht! so tû der menschen Irrung mit hochem gemüt verachten vnd dich selbs mit diner aigen gewissne trösten. **L**aide.
 15 **M**it hertem lümden bin ich beschweret. Vernunfte. vnder ainer luft windigen burde süfftzest. Also tût die natur von ir selbs söliche burde dem tragenden machen lychte vnd klain mütikait jm machen schwer. **L**aide. ain schwerer herter lümde entsetet in minen gûten namen. Vernunfte Es ist vnderschaid ze
 20 **h**aben vsz was wurtzen diser lümde syg entsprossen danne kumpt er von wârem, so wirt er grünen vnd sich meren sust wirt er torren abnemen vnd fallen. **L**aide. ain grösser böser lümde ist mir zûsamen geweyet. Vernunft recht sagst du! daz du redest zü samen geweyet dann der lümde ist ain
 25 **w**inde vnd blâste, ouch oft ains vnrainen mundes, der üch also tût bewegen vnd erschrecken Aber für wâre sölicher grosser böser lümde ist manchen menschen gewesen ain anfang grösser eeren vnd lobes, So hât sich dann das püfel des geschamet vnd vmb daz Es als denne siner Irrung zü tett
 30 **n**och grösser Irrung vnd vfschluss allen dingen rechte mässz! So hât das selb püfel zü letscht sölichen vnmessigem bösen lümden mit vnmessigem lob vnd rûme vberwunden [219^b]
LAIDE. Mit vil bösem lümden wirt Ich allenthalben versaget. **V**ERNVNFT. So die winde dich vngestümenklich vmb
 35 **w**eyent! so lende zü in ain porte vnd gang von den wellen der oren in die schlâfkamer dines hertzen. Wenne dann der selben kamer ir stille rûw ist. So hâst ain statt darInne du,

vsserhalb von scheltworten gemüdet, yetz rüwen magst vnd
 (Als man spricht) in ainer schose dich fröwen. LAIDE. Ich
 bin ains schwartzen vnd finstern lümdens vnd ainer lutern
 concientz vnd gewissne. VERNVNFTE. Sag begertest du
 5 aber icht lieber dar für zesind ains güten lümdens vnd ainer
 finstern vnd schantlichen concientz? das also wär gemachet
 wurd der spruch oracy flacci da er schribt. falsche eer tût
 helfen vnd erfrowen vnd böser erlogner lümde erschrecken.
 O vppiges dinge. dann wäre ding mugen helfen vnd erschre-
 10 cken Aber schatten fürchten ist nit ain werck ains mannes.
 LAIDE. Die burde mines bösen lümdes ist grosz. VER-
 NVNFTE. Ist sy gesamelt von boszhait so ist sy schwer
 (bekenn jch) ist sy aber entstanden von geschichte des ge-
 lückes? So ist sy lycht! kumpt sy aber von übung erberer
 15 dingen. So ist sy erlich Ist sy aber erfolgt mit güten künsten
 so ist sölicher arger lümde ain lobe. ob dich denne die toech-
 ten menschen mit rede anstürment, so tû dich fröwen dines
 edeln gewins danne du häst dir selbs vberkomen die aller-
 besten belönung das ist tugend. Wie wol du das getân häst
 20 mit grosser bezalung dines lümdens. welcher bezalung nützit
 grössers sin mag. danne der ist ain wärer vber der tugend,
 der hierjune nützit anders [220] bedencket dann die tugend.
 Aber so ander zytlicher dingen verschmechung vnd verachtung
 loblich ist so ist verachtung des lümdens durch übung der
 25 tugend erfolget die allerloblichost. dwyle doch sölicher lümde
 starcken mannen nit allain lieber jst dann golde sunder ouch
 lieber dann das leben. Darumb welcher mensche von liebe
 wegen der tugend sölichen lümden tût verachten vnd den
 nächgeben! der sol geloubt werden daz Er alle ding mug
 30 verachten vnd nächgeben das loblich ist, aber seltzen. Das
 wissz. dwyle doch ain michler taile der menschen die da ge-
 sehen werden wöllen tugend würcken, bald so sy lob darvon
 überkomen hant dar näch In übung sölicher tugend so lassz
 vnd trege sint. das dar vsz gemercket wirt die selben menschen
 35 yetz ergriffen han das dinge das sy haben gesüchet. LAIDE.
 Vil menschen tünt mich schwerlich verlümden. VERNVNFTE.
 vil haben ouch vor zyten schwerlich verlümdet fabium maxi-
 mum vnd Julium cesarem vnd ouch vil scipionem affricanum.

welches dinge den selben zû höchstem lobe vnd grösten eeren
 komen tett Vnd dar vmb so stelle ab zeclagen ain mitgesell
 zesin sölicher fürpundiger mannen Ingemainem vnd gelychem
 fale des geluckes Dann aller wenigosten menschen ist besche-
 5 chen das sy alles bösen lümdens gantz syen gewesen vertragen.
 Danne des menschen lümde ist ain aller zertest dinge
 das oft vsz lychten vnd ringen vrsachen rost enpfachet vnd
 entlich wie nützit clarers vnd liebers ist dann güter lümde!
 Also ist ouch nützit das ee mug werden bedunckelt vnd ver-
 10 mässget vnd [220^b] das enpfengklicher syge (das Ich also red)
 fremdes schedlichen füres. LAIDE. Mit schwerem lümden
 wird Ich gebrennet? VERNVNFTTE. Diser schelm vnd siech-
 tum ist aller maist erzürnt vnd vinde wirdigen namen! Vnd
 hät ouch aller hailigosten mannen nit vertragen noch die für-
 15 gangen. Welcher hailigosten mannen fürste der aller sün-
 den vnd lasters äne gewesen ist! noch dann von den bösen
 ist in argem worden verlümdet Vnd der hie durch zaigen
 wolt die vnsicherhait dises v̄bels Vnd das dem menschen nit
 syg zehoffen, des got selbs nit wart vertragen. LAIDE. Ich
 20 wirt gepinget mit hertem lümden. VERNVNFTTE. Das tugend
 von nyd vnd hasse nit werd versücht! Sag Ich kum muglich
 sin. Gnüg syg aber daz sy nit werden mug vsgerütet. lässz
 lob vnd eere durch nydig näch rede werden geschulten vnd
 angetast! Ist dann sölich eere gantz vnd veste! So wirt sy
 25 durch sölich antastung dester klarer schynen. LAIDE. Mit
 scharpfem lümden wirt Ich geknistet. VERNVNFTTE. Gemainer
 luftte der von blinden winden der vnwissenhait beweget wirt
 vnd getriben! Schlecht der büwen obersten gibel. Aber nit
 tüt er sy brechen, oder ob er sy villicht brichet! so tüt er
 30 sy doch nit gantz vmbwerffen vnd zerstören. Vnd dir syge
 das ain zaichen merckliches übertreffs aines menschen! wel-
 cher also jn die zungen des püfels wie in scharpfe ruhe
 schrofen fallen tüt. Danne demüttig namen vnd nider vf das
 ertrich gedrucket tünt nit enpfächen weder das liechte grosses
 35 lobes noch das vngewitter grösses vnlümdens [221] vnd schel-
 tensSunder beschicht oft daz daz so verachtet vnd verschmechet
 ist dester grösser rüwe haben tüt. Laide. v̄bel redt von mir
 das püfel. Vernunfte. Es ist noch güt daz du in zungen vnd

nit in stechend stuffeln bist gefallen. Gech vnd vngestüm ist
 des püfels rede. Aber aller minst wirig. Dann welche ding
 vsz lichten vnd falschen vrsachen sint entsprossen, die müssen
 von not wegen ouch kurtzwirig belyben Sy werden schwygen?
 5 So sy lang vnd vil wie die hund haben gebollen vnd als vil
 sy Inbrünstiger vnd vngestümer haben angehebt! So vil ee
 vnd belder werden sy gemüdet vfzehen. Laide. Mit den
 zungen des püfels wirt jch belaidet. Vernunfte. wie aber?
 Ob du komen vnd gefallen werest in schriftlich gedichte ains
 10 treffenlichen poeten oratores vnd schrybers der historien von
 dir args schribende, als vor zyten manchen beschechen ist die
 wir sechen durch die kunst wol dichtens vnd redens jrer
 vinden! gemacht vnd geben sin, der näch folgenden welte,
 verlündet böser dingen. Deshalb wie mich beduncket edel
 15 sin der süfftzge küng Alexanders! Vmb daz Achilles findet
 vnd hasset den grossen hochgelerten Poeten vnd Oratorem
 Homerum Also bedunckt mich ouch edel sin die sorg des
 fürsten Alexanders, do er forcht gelert vnd woldichtend vnd
 gespreche maister vnd die lieb hatt vnd Inen wol tett vmb
 20 daz sy nit von Im etwas args vnd scharps wurden schryben.
 Wie wol noch dann gegen sölihen gelerten scheltern, Sich
 ouch darumb siges nit ist zebegeben, Sunder billicher Iren
 scheltworten [221^b] mit glycher gegenschrifte zebegeggen (Als
 tulius getan hät Crispo salustio, vnd demostenes. eschini vnd
 25 catho vil vnzarbarlichen menschen) oder aber mit sunderer
 keckhait vnd gezügnüsz des jnnwendigen gemütes, alle andere
 weere über treffende, sölichen scheltern ze widersteen vnd ze-
 sagen die wort. die vatinius redt. do Caluus der klüg redner
 wider jnn ain fürsprech was. Nit darvmb (sprach er) das
 30 caluus ain gelerter wol redender mane ist! bin Ich hier vmb
 zeuerdampnen. Aber nützit ist yetz hie aincher sorgen. Danne
 ob wol das püfel vil ruschett! ye doch wie lange es das tüt!
 so hört es doch bald vf. aigens willens oder genötet vnd kumpt
 der tage der disen ruschenden vnd klaffigen höwschrecken
 35 gebürt vnd vfsetzet ain schwygen vnd stille des frides. LAIDE.
 Ainen bösen lümden hab Ich vnder dem püfel. VERNVNFTTE.
 Flysse dich vnd hab arbeit, daz du by dir selbs vnd by güten
 vnd fromen menschen, aiguen güten ewigen vnd wären lümden

habest Danne der lümde des du dich beclagest! wirt bald
 hingeen vnd verschwynen. O. ir lichtfertigen vnd forchtsamen
 tödemliche menschen Wes vberheben oder benement jr vch
 der liebkosenden oder der scheltenden menschen murmurs der
 5 doch kurtz vnd vinsten ist Es werden komen vnd hernäch
 folgen die frylicher vnd rechter von vch vrtailent. Vnd weliche
 sint dise richter (fragest du) jr mugen sy nit bekennen aber
 von jnen wol bekennet werden, danne es sint die (sag ich)
 die näch üch geboren werden [222] vnd die nit druckt noch
 10 übet weder üwer nyd hassz liebe hoffung noch forchte. Wöl-
 lent ir haben ain redliche vfrechte vrtail vnd wære schetzung
 üwer wercken vnd dingen! So baitent vnd wartent der selben.
 kurtz ist die zyte. Sy yllend vnd nim wär bald werden sy hie
 sin. LAIDE. Ainen bösen lümden hab jch mir gemacht mit
 15 tugend vnd treffenlichen güten wercken. VERNVNFTE. Es
 beschicht, das von schäden liebe wirt gefüret Vnd von arbeit
 wachset vnd daz söliche liebe (daz wunderbar zesagen ist) In
 ruhem vngeschlachtetem ertrich, wie das holtz oloes sine wurtzen
 tieffer gründet vnd vestnet. Dar von kumpt, daz in schwerem
 20 grossen vnd sorgfeltigen vflößen vnd zwaynungen der men-
 schen! du oft die sichst sin oder werden ainandern aller
 liebste fründe! die in sölichen sachen vil vnd allergröste ding
 vnd note sament hand erlitten. Das ain ze vil gemain vnd ge-
 übet dinge ist üwern stetten. Dar umb niemant ist noch sin
 25 mag der tugend oder wärhait grösser liebhaber dann der
 mensch der von dero wegen grosz vnd vil hät gelitten vnd
 sich des todes begeben. Vnd darumb so hab lieb die tugend
 vnd tû die ye lenger ye bas eeren vnd von dero wegen du
 dinen güten lümden ain aller schönstes vnd costlichstes dinge
 30 häst verloren vnd darvon du nit klaine noch lichte sträff traist,
 das ist den bösen lümden vnd so du alle andere ding habest
 verloren vnd verachtet! so tû du ainiger allain vmbfahen die
 tugend die dir niemer aincher mensche mag nemen [222^b] oder
 enpfüren vnd sag der selben tugend also vnd sprich. O. künigin.
 35 von dinen wegen lyde jch willenklich. Du allain wirst mich wi-
 derumb in min folle gerechtikait setzen oder aber du allain bist
 mir für alle ding ain gantz benügung. Du allain wöllest mich
 in diner gütigen schose füren lifern vnd trösten. Also tûn

jch nit allain mines lümdens sunder ouch mines lebens schäden nit enpfinden. Laide. Von dem püfel vnd folcke wirt! jch allenthalben vf den strässen geschulten. Vernunfte. verstee es zû gûtem. Dann das püfel vnd gemain folcke machet
 5 dich erkant! aber tugend dich lobsam vnd din gewissne dich sicher.

Ich hab laider verloren min elichs wybe. Vernunfte. O. verkerte wysheit vnd wunderbaren menschen, der in sines ewybs lyche wainet vnd in dero verhürung tanzet vnd springet.
 10 Laide. Ich hab verlorn min eelichs wybee etc. Vernunfte. O. toreicher mane. Sing yetz ain lobgesang des ist zyte. Danne wir haben dich vor so du stryts nidergelegen bist! Gesechen bekrönet. Aber yetz gebuere dich wirdigerer krentzlin vnd krönung danne vor. Wan du häst yetz in ainem grossen stryete gesigen vnd bist von ainer langen belegrung entschüttet worden vnd erlöset. Laide. Ich han verloren min elichs wybe. Vernunft. Also sag dich sy verloren han wie ainer verlürt das Feber oder die rude sines houptes. Danne manig verlieren [223] ist, darInne die verlierung gewin ist.
 20 LAIDE. Ich hab verloren min elichs wybe. VERNVNFTE. Villicht hät dir nie kain tage grössner gewine zû gebrächt. Danne sag usz wie vil banden diner gefengknüsz bist du endrunnen? Vnd usz wie grossem schifbruchhe bist du vsz geschwommen vnd komen zû lande LAIDE. Ich hab aber ain
 25 güt elichs wyb verloren. VERnunft. Das pflegen zereden gewonlich alle mane, ob sy wol das widerwertig wissent. Aber wie wol ain güt ewyb oder ain güt fröwe ain seltzen wunderbar tiere ist vf erden! So tüg jch doch dir gesteen vnd gehelen (vmb das wir lange red vermydent) das du habest ver-
 30 loren ain sölich wyb als du redest vnd dich des erclagest! noch dann so wil jch dir dar uff nit antwort geben, als jch vor zyten antwort gab (da vor dem hoch gelerten mane Seneca ain sölich clage ouch erlutet) daz ob du din vorig ewybe güt gemachet hettest! ain andere ouch güt machen möchtest,
 35 ob du aber die selben vorigen fröwen güt funden hettest! ain andere aber güt finden möchtest. nain nit also sunder tûn jch yetz die selb vrtaile endern vnd uerkeren also sagende. Daz

jch nit wil dich so ain aller sorgklichest dinge widerumb vn-
 dersteen zeuersüchen. Welches ob es ainist wol geräten ist!
 torlichen ander werb fürgenomen vnd gewäget wirt. Danne
 ain bös wybe. E. hundert findet Irs gelychen dann ain güt
 5 wybe aine Irs gelychen finden mug. Vnnd darumb wer ge-
 hept hab ain arges wybe der förcht Irs gelychen zeüberkomen.
 Vnnd wer [223^b] wer ain güttes, der tüg Irs glychen nit mer
 hoffen zefinden Sunder ir yetwederer förcht Im vnd hüte sich,
 der ain sin vnseeligkait zemerer vnd der ander sin gelück vnd
 10 seligkait zemindern vnd zeentschöpfen. Darumbe ist als du
 sagst! Daz du ain güt husfröwen häst verloren! So tû ee
 der vergangnen zyte hier Inne danck sagen! Danne daz du
 zû der künftigen zyte ainch hoffung enpfachest. Vnnd wöllest
 nit vmb daz du vsz vngestümem mere, ainest zû stad vnd
 15 lande glücklich komen bist! Darumb oft vnd dick din schiffe
 geben vnd vertrauwen den vinden. LAIDE. Das bande der
 ee dar mitte Ich was gebunden hât mir der tode zerrissen.
 VERNVNFTE. So wöllest dich nit widerumb darmit Instricken
 vnd binden sunder gedencken wie gar Wunschlich vnnd begir-
 20 lich vnd wie kum ainem andern gûte zegelychen syge! Fry-
 hait des lybes, Vnd vmbfahe den râte Ciceronis, der sin eelich
 husfröwen (die so leblich erschain, daz vmb sust die hilffe des
 todes gegen Ir was zeerwarten) tett von jm vsschlachen vnd
 verlassen! Vnd als sine fründ jnn bâten vnd ermanten ain
 25 ander fröwen zenemen Antwort er Inen! daz er nit sament
 vor sin vnd gnüg tûn möcht lernung der wysheit vnd ainer
 eelichen husfröwen. LAIDE. Ich hab ain güt ewyb verloren.
 VERNVNFTE. Wie ob das ouch nit ain schade sunder ain
 gewine ist vnd ain flucht grosser sorgfeltigkait vnd v̄bels.
 30 Dann syge daz man ain gûte fröwen finden mug. wo süchen wir
 [224] aber ain stete vnd veste. Vnd ist kuntpar der spruch des
 wysen das ain fröw allwegen ain vnstett vnd wanckelmütig
 tiere ist. LAIDE. Ich hab verloren ain güt ewyb. Vnd
 von blügenden Jungen Jären. VERnunft. Sint dir dann nit
 35 bekant wyplich sitten? Wir haben gar vil küscher Junger
 fröwen gesehen! die nächmäls zû gailen vnd vnküschen alten
 wyben geräten vnd worden sint. Danne so oft die brunst
 lyplicher anfechtung das marg vnd gebain ains alten wybes

besitzet! So tüt sölich brunste wie in aim türren holtze ain
füre, vngestümenklicher in der minne brinnen vnd flammen
danne in den Jungen. Darumbe so häst du dich der burde
instender verendrung dines lebens, oder daz nit dar vs kem
5 sorgfeltigkait dines künftigen alters, gantz vnd gar entüsert
vnd die zetragen vermitten. Danne das Johe der ee ist schwer
den Jungen vnd aller schwerest vnd vntragenlich den alten.
LAIDE. Ich hab verloren ain Junges wybe. VERNunfte.
Aintweders so wirt vsz der ee gesücht geberung der kinden,
10 oder lyplich wolluste! dero das ain ist ains emans vnd das
ander ains ebrechers. Aber zü Ir yetwederm ist tügiger vnd
geschickter die Jugend. So du nu aber von dinem ewybe
dise bede gehept häst, oder ir aines! so woltest du begeren
dasselb din ewyb komen da hin da sy zü yetwederm vntüig
15 wer, oder du hoftest daz sy von natur hierzü vntüig durch
das alter möcht werden hier zü tüig! daz [224^b] ain torechte
vnnütze hoffung ist. Laide. So ich min gütig vnd lieplich
ewybe hab verloren so bin ich ainig VERNVNFTE. Ist aber
das ain hessige ainikait Da man ab ist böser gesellschaft?
20 Nützit ist bessers dann ain lere schläfkamer vnd nützit her-
ters dann ain bekümete Vnd den gemüten die lieb haben
süsz schleff vnd erbers wachen vnd die das etwas loblichs vnd
hohes süchent vnd übent! ist nützit me zü Irrung Irem lob-
würdigen fürnemen dann wyplich gesellschaft! Vnd mir ist
25 nit verborgen was geredt wirt von denen die lust haben in
sölicher Irer armüt mit wyben. Dann die selben sprechent.
Welich die ee nie habent versüchet die tünt die ee schelten
vnd verdampnen Als dann ouch ain alt gemain sprüchwort
ist. Der schlecht ain ewyb der kaine hät. Ich hab aber nie
30 kainen man hören clagen abe der ee danne die so die burde
der ee haben getragen. LAIDE. Ich hab ain aller bestes
ewybe verloren. VERNVNFTE. Es beschicht aber daz die
aller besten ewyber vnd die so jren mannen die aller liebsten
gesechen werden, etwenne me vnd scherpfer danne ander!
35 mit yfrung vnd argwäne werden erzurnet. Vsz welcher er-
zürnung denne notdürftig ist! den huslichen fride betrübt ze-
werden. Darumbe wa hin dienet dise din clage? Du häst
verloren din ewybe. Aber dar gegen funden fryhait aignen

gewalte frid vnd rûwe vnd magst yetz âne kriegem still necht
 han vnd üben. LAIDE. Ich bin ân ain ewybe. VERNVNFTE.
 vnd âne ainen menschen dir widerspenig vnd hebst yetz an
 zesin [225] ain herre din selbs vnd dines gûtes vnd ist dir
 5 verhengt vnd erlobet vor tag vsz dinem bette vnd zû mette
 zyt vsz dinem huse vnd spät widerumb dar jn zegeen allain
 oder mit andern vnd mit wem du wilt tag vnd nachte zeuer-
 tryben, das niemant mer ist, der von dir des vrsache oder
 rechnung erfordern tûg vnd die von dir haben wöll LAIDE.
 10 Ich hab verloren min eewybe VERNVNFTE. So ist dir nu
 me widerumb in din schlâfkamer zeberüffen din rûwe, die du
 jang zyt her häst verloren vnd erachtet. Die selb dir vil ain
 nutzlicher geselle ist dann ainch ewybe. LAIDE. Ich hab
 verloren ain gûte schöne vnd hübsche eliche husfröwen. VER-
 15 NVNFTE. Es ist ains toerechten menschen vnd kaines wysen
 liebzehaben vnd zeloben sine ketten vnd bande der gefengk-
 nûsz vmb daz die sint guldin etc.

[225^b] **D**Er edeln fröwen fröw vrsulan von absperg ge-
 born von seckendorf lanthofmaisterin etc. Miner lieben fröwen.
 Enbüt ich niclās von wyle Min willig dienste allzyt zū uor.
 Nechst hab ich dem edeln vnd hochgelerten herren Jergen
 5 von absperge ritter doctor vnd lanthofmaister des hochge-
 bornen herren herrn vlrichs grauen zū wirttemberg vnd zū
 Mümpelgarte etc. Mines gnedigosten herren, üwerm eelichen
 huswirte! gelüchen ain geschrifte die ich verstee üch zū üwern
 handen ouch komen vnd doch miszfellig gewesen sin! Vmb
 10 das dar Inne etwas steet zū vnlobe wyplichs geschlechtes
 raichende. Deshalb Ir mir by uwerm schwäger hern Karol
 von absperg entbotten hant! vch etlich schrifte zeschicken!
 die als vil die männer schelten tüg als vil die vorig schrifte
 die wyber. Vsz diser üwer botschaft Ich mercken müsz!
 15 Mich in disem dinge von üwerem adel verdächt sin! als ob
 ich dasselbig gedicht selbs gemachet hab genaigt, zū scheltung
 der fröwen! das mich so vil mer belaidiget als vil me ich
 waisz mich des vnschuldig vnd zū allen zyten sin ain wyterer
 aller lobs vnd eeren wypliches geschlechtes. Vnd das wärlich
 20 vnd billich danne mir nit zwyfels ist! wo daz selb üwer ge-
 schlechte mit dem vnsern an ain rechnung sitzen Vnd aller
 argen vnd böser getäten in vergangen zyten von anfang der
 welte von mannen vnd fröwen bisz vf hüttigen tage begangen!
 ain summe summarum machen wölt! Man funde vnser ge-
 25 schlechte, das üwer [226] hier an wyt vnd ferre übertreffen
 vnd an tugenden vnd lobrychen wercken das selb üwer ge-
 schlecht dem vnsern ouch nit entwychen, sunder wo es nit
 fürtreffe, sich zum minsten dem vnsern verglychen. dann daz
 jch mich der worten etlicher mäsze gebruche der fröwen nico-
 30 lose, vor ainen bābstlichen legaten zū banonia getän! was ist

des ersten von nature von vernunft oder von gelücke dem
 menschen ye bessers oder nutzlichen, funden vnd geben wor-
 den? dann die büchstaben vnd geschrifte? da durch wir kunst
 wysheit sundern vnd gemainen nutze, ouch die gaistlichen
 5 vnd weltlichen rechte vnd die götlichen leere vnd gebotte vnd
 ander güthait lernen vnd erfolgen mugen. die wyle kuntpar
 vnd offen ist alle kunst vnd erkantnusz götlicher vnd welt-
 licher dingen in sölicher diser geschrifte begriffen sin. wer
 hät aber vns die des ersten funden? für war die fröwen. danne
 10 wir finden daz ysis nit allain erdächt vnd funden hab den
 buwe des ertrichs vnd den bruhe der lynwäte, sunder ouch
 das nützer ist vnd grösser! in egipten die büchstaben der
 geschrifte. welich büchstaben vns latinisch darnach carmentis
 nimpha die man ouch nennet nicostrata Jony des künigs von
 15 archadia tochter nit allin geben sunder ouch vns dero zū-
 samen fügung gelert hät. was sagen wir aber von andern
 künsten zū zyten als phoraneus regiirt zū kriechen vnd egi-
 gius zū athenis. tett minerua in jrer scharpfen hohen vernunft
 allain finden vnd erdencken alle wollin gemechte vnd dero
 20 webung ouch die zale vnd dero zyffer vnd figuren zū maister-
 licher vnd gewisser rechnung dienende. So ist ouch die selb
 minerua oder ain andre (wann wir lesen mer danne ain mi-
 neruam gewesen sin) ain finderin anfengerin vnd fürstin ge-
 wesen des öls der strytwegen vnd der kriegen vnd [226^b]
 25 noema tubals schwester ain finderin der andern hantwercken.
 Was hät dann Ceres getän diē den menschen, do zemäl der
 herten aicheln wie das vich lebende! Vnderwaisz vnd lert
 das ertrich zebuwen des frucht in zelesen zesameln vnd ze-
 niessen Also das dise fröwen darumb vnd nit vnbillich by den
 30 haiden göttin wurden genennet, das als vil ist) als götlich
 fröwen. Daz wir aber wyter vf der fröwen küschhait koment?
 So finden mir das ouch ain Minerua, vmb daz sy jre jung-
 fröwlich küschhait verhüte! jren aigen vatter hab ertötet,
 höher achtend vnd schetzende gantze vestikait jrer küschhait,
 35 dann die schuld jrer lieb, zehaben Iren vatter. jch geschwyg
 vnd fürgee Ephigeniam agamenonis tochter ain vnuermäsgite
 jungfröwen ouch cassandran die dem got appollo genant nit
 wolt verhängen sines vnküschens willens Item vnd vestam

saturniam, die von jrer fürpündigen küschhait wegen ain göttin
 genennet worden ist Item vnd mer aber penolpem vnd didonem
 dero yetwedre an jrem mane Ir küschhen trüwe gehalten hât
 vnd des benüigig gestanden ist also daz man denen beden by
 5 den römern pflag coronen der küschhait zegeben. jch geschwyg
 ouch der küschen lucrecian vnd anderer so vil, wo jch die
 all nennen wölt, daz mir dann ee des tags danne des follen
 sölicher küschen fröwen für zeheben wurd gebrechen. doch so
 mag jch nit fürgeen die kriechischen hisponem vnd candischen
 10 britonam! dero die vorder als sy von menge der finden vf
 dem mere zû schiff also vmb geben was daz sy nit mocht
 endrinnen! sich mit Irem tode Ir küschhait zebehalten nit er-
 schrack noch sich schucht zewerffen in das mere. Vnd die
 [227] ander Als Minos ain küng von candia oder creta, sy
 15 Jeget vnd yllet, sich der vorigen vrsachen halben ouch tett
 stürzten in das mere vnd ertrencken. Gangen wir wyter vf
 der fröwen trüwe jren mannen zehaben das wyplich geschlecht
 aller maist aller fürnemest machen tût. Sag yemant was an-
 ders syg den mannen rechte trüw halten, oder die mit wun-
 20 derbarer liebe rech lieben! danne behaltung der erberkait vnd
 eeren mit rechttündem leben. Dem näch emilia jrem elichen
 man scipioni dem vorigen affricano vnd thuria jrem elichen
 huswirt quinto lucrecio aller trüwest gewesen sint. Sulpicia
 als jr gemachel lentulus in das ellend verschicket wart! tett
 25 (vmb das jr trüw an jm vnzerbrochenlich gehalten wurd) sich
 mit jm in das ellend zekomen willenklich ergeben vnd alle
 not vnd schwere mit jm zelyden. Euande hatt (als stacius
 schribt) jren man capaneum so lieb! do man des cörppel von
 dem wätter erschlagen in ain füre legt den zeverbrennen!
 30 daz sy vsz vngeschwungenlichem laide jrs gemütes selbs ouch
 in das füre sprang vmb daz sy also mit jm verbrant in ver-
 mischter äschen in ain ainigs grab gelegt wurden. . . Aber
 Julia als die jrs mans pompeii blûtige klaiden von dem marckte
 in jr huse tragen sach! sorgende daz Im etwas arges wer
 35 widerfaren! tett vsz schwerem erschrecken vnd laide das en-
 pfangen das sy in Irem lybe trüg vor rechter zyt geberen
 vnd ward (das erbermklicher ist) zesterben hie durch bezwun-
 gen Was hât getân? die künigin des rychs Caria die ain grabe

Irs mans noch lebend vnnnd ätmande werden wolt. Ich geschwyg ouch nit Yppocratee die mit ab-[227^b]geschnitten häre jr sunder schöne vnd gezierd jrer forme in manliche claiden verwandelt vmb das sy dester bas vnd lichtenklicher jrs mans
 5 mitridatis weggefert sin möcht der von pompeio strytes vberwunden durch manig land vnd fölcker fliechen tett, dem sy vnmüdbarlich jrs lybs vnd gemüts nächfolgt Inn nie in nöten lieb noch laid ye verlässende. Mit was grosser wysheit aber (Oder billicher zereden) Mit was götlichkait disz üwer geschlecht
 10 erschinnen syg! bezügent vnd gebent zeerkennen samentlich die tochter Ciri vnnnd Dyonisy müter Tanaquill Calphurnia ouch Citrea vnd Tiburtina. Vnnnd all sibillan so ye gewesen sint. Dann was ist anders? Vsz den trömen vnd wundersamen geschichten künftige ding zesechen vnd vs-
 15 zelegen dann mit sunderlicher wysheit vnnnd götlichem jnsprechen sin begaubet? Was ist ouch wysers vnnnd götlichers danne der Jungfröwen Marie enpfächung des allmechtigen gottes Zükunft des lyden des tode vnd des vrstende dar Inne aller maist vnser geloube steet! Von den Sibillen allen vor
 20 langer zyte sin gewyssaget! Vnd mit manigfaltigen Worten usgeschlossen vnd entecket. So ist ouch so grosse manhait In wypllichem geschlechte oft funden worden das die fröwen In diser ainigen tugend von vil mannen des wunder habende, Aller maist mit grossem lob in die höche erhebet sint. Dann
 25 wir haben gehört die fröwen Arpalirem von Tracia. Irem alten vatter Ligurgo von den gallischen gefangen! Illend mit gesamptomem [228] herre! ee vnd belder danne man sölichs von aincher fröwen hoffen möcht mit gewäppeter weere vnd irer selbs stercke vnd künhait nächgefolget sin, Vnd den siner
 30 gefengknüsz gelediget haben vnd erlöset. Ich wil aber geschwygen Semiramidis der künigin von Asiria! die näch jrs gemachels tod vnd abgange pflag zü behüttnusz vnd schirme jrs küngrychs wäppen vnd harnüsch zetragen vnd sich riterlicher weere vnd dingen In allen sachen kecklich zebruchen.
 35 Aber clodia als die mit andern, persenne dem küng von eutruria in pfands wyse geben was! endran by nacht durch listig fünde vnd betrugnusz Ierer behütern vnd durch schnelles schwümen vber ain fliessend wasser erlost sy Ir vätterlich

haimant Item porcia die gantz nit was aines wyllichen vnd
 waichen gemütes Als die verstund vnd marckt den fürsatz
 vnd räte Bruti Irs mans, daz Er Julium den kaiser erschlachen
 wolt, vmb daz sy versüchte (ob diser fürsätze Irem man nâch
 5 sinem willen nit geriete) mit welcher keckhait Irs gemütes sy
 den tod lyden möchte! hât gelitten sich mit ainem messer
 mercklich werden verwundet. die selb ouch als sy nâchmals
 verstünd den benanten Iren gemachel Brutum In Macidonia
 erschlagen sin, Vnd Ir alle wâffen vnd messer (Vmb daz sy
 10 ir selbs kainen tod antett) wâren enpfremdet! schutt sy in
 iren mund vnd verschland brünnend kolen. Ist aber daz wir
 wöllen sûchen stetikait! so wirt funden do sempronia ain
 schwester der graccen vnd [228^b] scipionis emiliani elichs
 wybe, von der oberkait der gemainde vf den marckt zû röm
 15 vnder das folck gefürt wart, vnd der gewalte yetzgemelter
 oberkait mitsampt der menge des vngestümen vngewissner vnd
 groben folckes! sy mit vnmenschlicher tûrstikait vnd tröwung
 anfacht! Sy noch dann mit keckem vnd uestem gemüt ver-
 warf ainen ritter der sich gegen jr falschlich annam ainer
 20 nâchen sippe, dero sy jm nit wolt bekennen noch yemant sy
 des mocht bereden. Ob wir dann die miltikait her für ziehen
 wöllen! Wirt üwer geschlecht hierjnne ouch tugendrych ge-
 wesen sin wârlich funden. Dann Phanium neret vnnd fûret
 lang zyt miltenklich In jrem huse Marium den vbertreffenlichen
 25 kûnnenden hõptman kriegens vnd ritterlicher dingen, zû zyten
 als der von dem räte zû röm verurteilt wart, sin ir finde.
 Des gelichen tett busa ain vast ryche fröwe des kûngrychs
 Apulia langzyt in Irem huse gûtenklich enthalten Vnd spysen
 etlich römisch burger, die in dem Cannensischen stryete vner-
 30 schlagen endrunnen vnd vnerschlagen vber beliben wâren.
 Wöllen wir aber vätterliche vnd mûterliche lieb vnd gütikait
 rechnen! so finden wir ettlich fröwen Ire vätter vnd ettlich
 Ire mûter in gefengknûsz der kerchern manig tag mit Iren
 aigen brüsten vnd milche gesougt ernert vnd vfenthalten han.
 35 Antigona ain tochter edippi des kûngs zû Thebe. Als ir blind-
 der vatter in das ellend vertriben ward! tett sy Inn mit kint-
 licher erbermdede stetz fûren vnd niemer von Im wichen. So
 lesen wir ouch daz die töchtern Pelei mitlyden habende dem

alter [229] desselben Irs vatters, niemer sich von Im schiedent.
 Item claudia ain Jungfröw der göttin Vesta als jr vatter
 triumphiert vnd zû lob vnd eere sines siges vf aim wagen
 wart gefüret, vnd jnn aber der oberst amptman der gemainde
 5 freuenlich von dem wagen werffen wolt! lüf türstenklich ent-
 zwüschent vnd tett mit keckem gemüt, allain von Irem vatter
 sölichen gewalte keren wenden vnd vertryben. Bedencken wir
 dann übung vnd lernung der geschrifte so ist in sunderhait
 vnder vch fröwen gewesen! Lesbia Sapho zû zyten Homeri
 10 ain grosse maisterliche dichterin von dero ouch das gedicht
 Saphicum den namen gezogen hât. Es ist ouch gewesen Cen-
 tona die vsz den büchern Virgily Maronis so vil versz zû
 vnsers herren Jhesu Cristi lyden vnd vrstende hât gezogen!
 daz jch sy darumb götlich nampte! wo nit Sanctum Jeroni-
 15 mum ain anders bedücht hett. Aber noch dann mag man sy
 hier vsz wol vnd billich wys vnd gelert der geschrift gewesen
 sin nennen achten vnd halten. Was sag jch dann von Ame-
 sia! die vmb daz sy vnder wyplicher gestalt trûg ain man-
 lichs gemüte Androgenes genennet was, die selv vor den rich-
 20 tern mit grossem zûlouffe des folckes selbs ir sachen traib
 vnd arbeit vnd so wyslich wol vnd zierlich redt daz die richter
 vf sölich jr erste rede, sy mit vrtail vnschuldig vnd ledig tä-
 ten erkennen So was gaya framea Lucy des senators wybe so
 tügig vnd geschickt bede an tedingen vnd gerichten. daz sy
 25 oft von den menschen erbetten, Vor manchem amptman vnd
 richter der selben Ire red [229^b] vnd wort wol vnd nutzlich zû
 recht getan hât Item Augeriona als Macrobius meldet hât mit
 hailsamer kunste der artznie den menschen by dem see Furcino
 wonende So wol vnd fruchtbarlich gedienet daz sy von denselben
 30 ain göttin sin genennet wart vnd daz ouch deshalb die Römer
 zû ettlichen zyten in Iren kirchen sy pfägent hoch zeeren. Wöl-
 len wir dann geen uf die sinnrychlichkait maisterlicher wercken
 vnd künsten So ist yrenes gewesen Cratini des güten malers
 tochter die Iren vatter vnd maister in diser kunste mälens wyt
 35 vber wüchs vnd noch von den mälern hoch wirt gerümet! dann
 noch in krieche etlich bilder ab fröwen vnd mannen von ir ge-
 gunterfaitet funden werden! ir kunst vnd maisterschaft grosz
 bewierend vnd brysent Item so ist ouch gewesen ain Jungfröwe

Marcia pharronis! Mälens vnd bildhöwens so ain grosse mai-
 sterin daz sy zû den selben zyten sopolim vnd dyonisiu die
 besten mäler wyt tett vbertreffen Sy hatt ouch sich selbs vnd
 ir gestalt also von marmor gestaine gehüwen vnd mit farwen
 5 gemälet daz niemant, was das sechend der nit des ersten an-
 blicks sy tett bekennen. Gangen wir wyter sûchen die fröwen
 der alten ee. Rebecca vnderwaisz Iren sune Jacobum das er
 sins uatters segen behûb vnd durch Iren râte erlöst sy Inn
 von der durechtung sines brüders. Bersabe hât mit Irer wy-
 10 sen rede vnd râte für Iren Sune Salamonem das küngryche
 erfolget. Hester hât mit Irer wysen rede von küng Aswero
 wes sy begeret erlanget. Abigal hât durch Ir wysheit jren
 mane Nabal von dem tode erlöset. Judit hât das Israhelisch
 folcke von Oliferno gelediget. [230] Aber gnûg syge yetz di-
 15 ser kurtzen erzellung obgemelter tugendrycher fröwen so in
 vergangen wälten gewesen sint! sunder tügen wir nu me
 komen vf etlich fröwen die zû vnsern zyten gewesen vnd noch
 ains tails in leben sint, der künsten gelert vnd vsz vernunft
 vnd erfahrung wyse vnd mit allen andern tugenden zierlich be-
 20 gaubet. Es ist zû vnsern zyten in Italia ain fürstin de mala
 testa gewesen! Villicht noch lebend! der poetrye vnd ouch
 der kunste wolredens vnd dichters (die wir nennent oratoriam)
 so gelert vnd künndend! daz sy sich den allergelertosten man-
 nen der selben zyte in disen künsten hât verglychet Es ist
 25 nicolosa ain burgerin in der statt banonia! die als daselbs
 von aim râte! den burgerin abgestellet vnd verboten was ir
 zierung costlicher klaidern gebenden vnd klaineten! für ainen
 cardinal daselbs bapstlichen legaten trat, mit etlichen dersel-
 ben statt edeln burgerin! vnd vor jm vnd aller mengklichen
 30 alda zûgegen so ain kostliche schöne vnd wyse red tett vnd
 fûrt von wegen aller burgerin derselben statt! daz sy behûb
 daz sölich verbott widerumb werd ab getân, Vnd vorrige zie-
 rung vnd costlichkait wie vor zetragen den burgerin erlaubet.
 Yppolita yetz künigin zû Aragon vnd zû Nopels, des yetzigen
 35 hertzogs von Mailand schwester, ist der geschrift vnd obge-
 melter künsten ain söliche maisterin! daz nit wol yemant yetz
 lebende ire santbrief vsz aigner vernunfte gedichtet vnd mit
 jr selbs hande geschriben! weder an gedicht noch schrifte

möcht straffen noch verbessern. der selben briefen etlich von jren gnäden / an min gnedige fröwen von österrych fröw mechilten etc. vsgegangen jch gesechen gelesen vnd darvf jren gnäden antwort gemachet [230^b] hab. Item die marggrefin zû
 5 mantöw Madonna barbara ain fürstin geborn von brandenburg / ist so wyse vnd hoher vernunft / daz sy für Iren gemachel / wie wol der selb ouch wys vnd gelert ist / noch dann allain regieret land vnd lütte / handelt tût vnd lasset näch Iren willen vnd das so wol das niemand das schelten mag sunder
 10 mit lobe groszlich müsz erheben / vnd jch bin zwurent in botschaft ains fürsten vor jren gnaden gewesen / da jch sy hab hören reden rätschlagen vnd antwort geben vnd irs rätschlagens sölich vrsachen setzen / das ich vnd min mit geselle / jr gnäd deshalb mer müsten wundern / danne wir die näch gebür
 15 gnüg möchten loben Madonna beancka maria des yetzigen hertzogs von mailand müter vnd des alten letsten vnd rechten hertzogs von mailand tochter. Als die durch iren vatter dem contofrancisco des yetzigen hertzogs uatter eelich wart vermechelt vnd der selb alt hertzog nächmäls todes abgieng. Zoch
 20 mit dem selben Irem gemachel zû felde vnd half mit jrem wysen räte irs herren vnd vatters fürstentüm erobern vnd In bringen in wypllichem lybe so ain keck vest manlich gemüt tragende / daz sy der obgemelten Arpalici möcht werden geglychet / Vnd was doch die selb menschlicher grosser zucht /
 25 vnd allen zû ir komenden menschen grosse eer erbietende / des Ich von jren gnäden selbs wol hab enpfunden Ich kum aber hervsz vber das gebirg in tütsche lande. da vns sölicher lobwirdigen fürstin ouch nit gebruchh jst. dann was ist ye adelichers von allen tugenden gesechen worden dann die allerdurlüchtigost fürstin vnd fröwe fröw leonora geborne künigin
 30 von portigale vnd römsche kaiserin loblicher gedechnusz. Ich bin mit der durlüchtigen fromen fürstin vnd fröwen fröw katherinan [231] geborner hertzogin von österrych vnd Marggreuin zû baden etc. Vnd greuin zu spanheim als jrer gnäden
 35 cantzler gewesen an irs brüders des römschen kaisers hofe zû der nüwenstatt etlicher monot lang do dise zwo fürstin vsz zwayen gezimbern in aim gehüse ob ainandern ligende teglichs zûsamen kament mit Iren dienern vnd jungfröwen.

Alda jch von diser kaiserin so vil jrer loblichen sitten jrer
 tugend vernunft vnd wysheit gesechen hab daz mir bapys ee
 gebrech dann der folle sölicher tugend die zeschriben vnd ist
 war daz zû den selben zyten do die hunger jre hungerschen
 5 Crone mit fünf vnd achtzigtusent hungerscher guldin von der
 kaiserlichen maiestate täten lösen! dero die fünf tusent guldin
 jren kaiserlichen gnäden zû gehörig sin solten! daz sy da so
 ain schöne lobsame rede tett vf wären adel vnd grosse from-
 kait gegründet! daz der wolgeborn min gnediger herre grauf
 10 hugo von montfort alda zû gegen zû vns andern miner gne-
 digen fröwen Marggreuin reten vnd dienern ouch alda gegen-
 würtigen sprach. Dise vnser fröwen der kaiserin red vnd
 worte! weren wirdig daz sy mit guldin bûchstaben geschriben
 wurden vnd sint also wo ains armen hirten tochter sölichen
 15 grund in ir hette, so were sy doch für hoch edel zehalten.
 Wes geschwyg jch aber der lobwirdigen fürstin miner gnedigen
 fröwen Marggrefin erst genanten, die den palmen fûrt aller
 erberkait zucht vnd tugenden vnd so grosz trüw vnd lieb zû
 jrem gemachel vnd jren wolgezognen kinden hât! daz der
 20 selb jr gemachel Margraf karol sich selbs wol selig schetzen
 mag! daz got jnn mit ainer sölichen fürstin (dero er doch
 wol wirdig ist) in gemachelschaft hât fürsehen. Ich rugk
 her vf vnd [231^b] fürgee vil fürstin! villicht nit minder grosses
 lobes wert aber mir vnbekant vnd kum in schwaben da ain
 25 fürstin ist namlich fröw mechilt geborne pfaltzgreuin by ryne
 vnd ertzherzogin zû österrich wytwe ain grösse liebhaberin
 aller künsten! dero gûter lümde aller wysheit tugend vnd
 menschlichkait so grosz ist! daz der (in mässen ich vor ains
 mäls ouch von ir geschriben han) mit loben nit mag werden
 30 gemeret noch mit schelten gemindert. aber noch dann mag
 jch mit schwygen nit fürgeen ain dinge so mir ain mäls
 von Iren gnäden begegnet! in bywesen etlicher edeln. Ir
 gnäd fräget mich ob jch ir noch nit getütschet hett das bûchlin
 senece von den sitten. daz Ich iren gnäden vor oft hatt ge-
 35 rümet. Ich antwort nain. des vrsach sagende! daz Ich etwas
 darjnne fund das jch nit gnûg verstünde villicht gebruchh
 halb miner kunst oder vmb das es vnrecht geschriben stünd.
 vnd alz sy fräget was das wer Sagt jch es stünd also. Si

vis omnibus esse notus fac prius neminem noueris. das näch
 dem bûchstaben also lute wilt du yderman sin bekant só
 machh vor daz du niemant bekennest etc. Von stund an
 vf klaines schwygen stillhalten vnd bedencken! tett ir gnåd
 5 dise wort widerumb melden wilt du yederman sin bekant so
 machh vor daz du niemant bekennest. Vnd redt dar vf. Ich
 main es hab vf jm dise mainung wilt du yderman sin bekant.
 Das ist. Wilt du daz mengklich vmb dich, gûtz von dir sag
 vnd rede! So machh vor daz du niemant bekennest. Das ist
 10 so richt vnd gibe dich vor dar In vnd hier zû! daz du ye-
 dermans dingen müssig standest dich vsswendiger dingen nit
 bekumberst vnnd allain ain benügen habest an dir selbs vnd
 an dinen tugenden. hie durch wirst du mengklichem [232]
 bekant etc. O. hoche scharpfe vernunft in wyblichem hertzen.
 15 Ich hab sidher doctores der hailigen geschrift gefragt vnd fun-
 den daz ir gnåd mir (als das sprûchwort ist) all mine kesz
 hât ab errâten. Ir genåd hât mir ain tochter in Irem gezim-
 ber zû hofe also gezogen! daz Ich nit wölt die sölich zyt dar-
 für in aim closter geformierter schwestern von der obseruant-
 20 ze gestanden sin. aber gnûg syg des jch kum nu me haim in
 min huse vnd an den wirtembergischen hofe. Da üwer adel
 vnd jch bede vnser wonung haben. da zwo fürstin sint, aine
 geborn von safoye vnd die ander von brandenburg bed höch-
 stes lobes wert vnd vch in allen tugenden so bekant! daz
 25 vberflüssig wer mich darvon üch ützt zeschriben So möcht
 Ich ouch in sölichem minem schriben! wo Ich vf ir beder
 sunder tugend mich naigen wölt, in liebkoserye werden ver-
 mercket! daz mir nit lieb wer. aber disz gibt wære anzaigung
 sölicher Irer grossen tugend. so oft Ir aine jrs lybes kranck
 30 wirt! daz dann des so grosses laide all jre vndertânen vmb-
 fahet! daz Ich acht von den selben biszher mer ir gesunthait
 vmb got erbetten worden sin! dann daz ainch artznie die hab
 gesachtet, wie wol sy mit hochgelerten wysen artzeten gnûg-
 samlich sint versehen. vsz disem minem lobe der fröwen! Ir
 35 edle fröw hofmaisterin nu me wol mercken mugen min vn-
 schulde Vnd das obgemelt gedichte üch miszfellig nit usz mi-
 ner schmitten sunder usz ains andern, üwerm huswirte bas
 dann mir bekant gegangen sin. Daz Ich aber darumb üwerm

adel ütztit schicken wöll arges von mannen inmässen ir begert hant! Main Ich nit not sin. Aber mit vrlob red jch das gangen yetz herfür diser fröwen aller nechst obgemelten [232^b] elich gemächel, die zû vnsern zyten gelept hant oder noch
 5 lebend, Vnd sitzent mit den selben jren fröwen an ain rechnung gûter vnd arger getäten vnd sechent vnd beschöwent ob sy nit klärlich finden werden! die fröwen sy an gûthait vnd die mane sy an boshait wyt vbertreffen. Gelych ist es vnd wirt funden in nidern stenden des adels vnd der burgerschaft,
 10 danne allwegen gemainlich die fröwen gaistlicher vnd andechtiger sint dann die manne. Darumb Sanct Gregorius die gesegnoten jungfröwen Mariam anredende, spricht. Bitt got für das folcke ouch für die priesterschaft vnd für das andechtig wyplich geschlechte etc. Vnd fürwar edle liebe fröw. Ich
 15 wölt minem herren hofmaister uwerem huswirte noch mir selbs ouch nit räten, daz er mit vch oder jch mit miner husfröwen an sölich obgemelt rechnung sessen wir wölten vns dann vnser tails vor gewins verwegen das mercken jm besten Es ist noch vor der vasnacht vnd gebürt sich ernstlichen dingen zû
 20 zyten schimpfliche ding vnder zemischen vnd gebieten mir als dem uweren datum Stütgarten Vigilia Mathie apostoli Anno domini etc. lxx quarto.

[233] **D**Em erwidigen in got vatter vnd herren herrn Johansen abte des gotzhuses Salmanswyler des ordens von zitel costentzer bistûms minem gnedigen herren Enbüt jch niclās von wyle etc. min willig dienst zeuor. anefangs (gnediger herre) alz
 5 durch schickung des allmechtigen, du zû der höche diner prelature! dises gotzhuses komen bist! vnd jch do zemäl von dir hort rümen! wie du durch din treffenliche wyshait etlich schwer anforderung zû dinem gotzhuse lang zyt vermainet, vnd darvf, vor grosser coste gegangen wer! vnd noch grösserer durch
 10 vechde bald gegangen sin möcht! so kurtzlicht vnd mit ringen dingen, abgestellet vnd hingelegt hettest! daz des wunder gehept wurd etc. tett jch do zemäl des erfröwet! diner väterlichen wirdigkait in latine schriben vnd mich des von dines gotzhuses wegen fröwen, bewegt vsz alten gnäden vnd güt-
 15 haiten mir von dinen forfaren allen ob vier vnd dryssig jären her manigfaltenklich bewisen. vnd maint sölich geschriften diner erwidigkait komen sin zügefallen. aber so jch bald darnach, vnd zû andern mälen aber vnd aber in din gotzhuse komen bin vnd doch von diner väterlichen wirdigkait nie angeredt
 20 worden! hab jchs dafür haben müssen, sölich min geschrifte obgemelt diner erwidigkait zû miszfallen gewesen oder mich gegen der selben sust von iemant versagt worden sin. daz doch minenthalb (waisz got) vnuerschuldt sin müste. aber din väterlich wirdigkait, hät nechst zû stütgarten vf sölich min
 25 anreden! dinen genäden deshalben getän! disz alles also gegen mir verantwort vnd mich zû dir zekomen so menschlich vnd mit gütwilligem vnd frölichem angesicht geladet daz jch gantz benüigig steen vnd sidher gern komen sin wölt zû dinen gnäden wo nit die zwytrechtikait vnser bischoffen vnd zû dem
 30 ouch die (grösse vnd schwere mines lybes) mir daz hetten

benomen vnd darvmb so ich also zû disen zyten zû dinen
 gnâden bekomlich in [233^b] aigner persone nit wol komen
 kan noch mag, vnd jch aber yetz vf bitte, aines miner gûten
 frûnden ain kostliche rede wylant von poggio florentino ainem
 5 hochgelerten redner vor babst nicolao dem fûnften vnd vor
 dem gantzen colleye der cardinâlen beschechen in ain tûtsch
 gebrâcht vnd getransferyeret han So hab ich für min vszbe-
 lyben sôlich translatze an din vâtterliche wirdigkait für ander
 gestellet, vnd die in dinem namen als aines Prelaten, fürsten
 10 stand habende, wôllen wirdigen vnd touffen! hie durch, mer
 geloubens von dir, dann von mir disem minem wercke ze-
 machen! daz din gnâd von mir jm besten (als es ouch be-
 schicht) wôll vermercken! vnd die leeren vnd vnderwysungen
 darjnne begriffen (wes die fürsten vnd grosse herren anze-
 15 manen syen vnd tûn sôllen) nit verachten, sunder denen le-
 ben dann ob du wol nit babst noch bischoff bist! So bist du
 doch grösserm regimente vor! gemaines nutzes dinem gotz-
 huse vnd des armen lûten vnd andern den dinen! dann
 mancher bischoff. deshalb diner eerwirdigkait geburret sôlichen
 20 anmanungen leeren vnd vnderwysungen nâch zefolgen! die din
 wyshait villicht lieber zû latine, dann in dem tûtsche also ge-
 transferyeret haben wôlt. Es were aber als denne ain werck
 poggy vnd nit min. Ich hab aber des minen etwas wôllen sin!
 by dinen gnâden daz mich dir zû zyten etwenne Ingedenck
 25 bringen mug, vnd ist wyters nützit min (bis an min husfrö-
 wen) daz nit vf din begerung werden mug diner vâtterlichen
 erwirdigkait dero Ich mich vndertenig tûn enpfelhen. datum
 Stûtgarten vf dem sibenden tage des hornungs Anno etc.
 lxx octauo.

30 [234] Ich waisz (aller hailigoster vatter) ain gewonhait
 sin, garnâch aller dero, so zû diner hailigkait, die zebesechen
 oder als botten zû dir gesant koment! daz sy sich gebruchen
 schöner worten vnd reden! die da Inne halten, grosse frôid,
 vmb erfolgung diner hohen wirdigkait vnd grosses lobe diner
 35 tugenden. welche gewonhait also in übung gewachsen vnd so
 gemain worden ist! daz ain yeder der das nit tett! für grob
 vnd gantz vnkünnend wurd geachtet. aber wyt ain anders lász

Ich mich beduncken! vnd main daz dero dweders an ainem
 gûten fromen vnd wysen man gelobet werden sölt! dwile daz
 ain wirt gesechen sin aines menschen vnbedächt redende, vnd
 daz ander ain wercke aines liebkosers vnd schmaichers. dann
 5 wes solt du dich mit dem fröwen? der erwellet vnd angeno-
 men worden ist! zû vnmessiger vnd steter arbeit sines lybes
 vnd gemütes, zû aller grösten sorgen, zû regierung manigfal-
 tiger fôlckern, zû vntlicher trübseligkait, zû fürsehung aller
 kirchen, vnd (daz vnder den grösser geachtet wirt) zû schwerer
 10 vnd laidsamer eigenschaft sines lybes. Ja billicher nâch minem
 beduncken, were mit aim sölichen mane vnder so grosser burde
 belestiget laid ze haben vnd zetruren vnd siner so grossen
 arbeit vnd so schwerer eigenschaft barmhertzikait zehaben.
 danne wo du nâch den gebotten gottes, daz scheff petri recht
 15 vnd wol regieren wilt so wirt dir füro nit mer geben noch
 verlichen zehaben nâch diner begird schlâf vnd rûwe nit ze-
 nemen din spys vnd tranke in rechter zyte, nit zesûchen er-
 getzlichkait dines gemütes, nit dir selbs ützt nâchzelaßen!
 nit mit dinen gûten fründen (das dir das aller schwerest sin
 20 wirt) nâch diner gewonhait zeleben! nit die zyte (die wir
 doch den wollebenden wissent kurtz sin) nâch dinem willen
 zeuertryben! Noch dich der geschrifte (DarInne du dich doch
 von [234^b] Jugend vf geübet vnd ergetzlichkait gehept hâst)
 mer anzehangen sunder gebürt sich dir nâch andern fremden
 25 sitten zeleben, vmb das du andern menschen haile mugest
 geben. Es gebürt sich dir anzenemen die sorge alles christen-
 liches folkes! zehören der welt botschafften, die stimmen der
 bittenden, das klagen der beswerten, vnd denen barmhertzikait
 vnd yetklichem gerechtikait zebewysen Dir allain ist dise ar-
 30 bait vfzenemen so alle ander menschen dero sint entladen.
 Du bist gesetzet in die höche als ain beschöwung, darInne
 dir für alle andere menschen gebürret zewachhen vnd darjnne
 dir kain rûw kain müsse noch kain vnderlybung in so vil
 mancherlay dingen wirt verlichen. Deshalb! vnser Seneca wol
 35 vnd wärlich hât gesprochen. Grosses gelücke, sin ain dienst-
 bare eigenschafft. Darumb was fröiden wollusten vnd hug-
 lichkaiten sin mugen vnder diser dingen so schwerer burde
 in so vil anhangenden grossen geschefften in so vil mancher

dingen widerwertikaiten vnd in so vil manigfaltigen sorgen!
 oder wårumb sich vns deshalb mit yemant gebürre zefröwen!
 kan jch in mir selbs kains wegs finden. dann ist es als johannes
 Crisostomus schribet vber die epistel ad hebreos! daz
 5 ainem regierer ainer ainigen kirchen so vil sorg vffelegt syg.
 daz wunder gehept werden mug! wo ir aincher werd behalten!
 was grosser burde vnd beschwerung diser dingen wöllen wir
 dann sagen anhangen? vnd wie grosse sorgueltikait künftiges
 lebens zû steen dem? des regimente wir selbs sagen vnd be-
 10 zügent, alle kirchen der gantzen welte von got enpfolhen
 vnd geben sin? vnd fürwår! die wile man me zefordern hât
 an den, dem mer ist enpfolhen So müsz vsz notdurft bekennet
 werden! daz dise höchste [235] wirdigkait, syg ain vnmessige
 burde, die von menschlichen krefftien nit, oder kumme getragen
 15 werden muge. zû welcher burde du nit allain bist angesehen
 vnd geschetzt! sunder etlicher mässe verpflichtet vnd gefeng-
 klich verbunden. Ich setz hierzû! daz sölich herschaften
 vnd oberkaiten nit gebent tugent noch kunste, nit lere noch
 lengers leben! sunder tûnt sy ee söliches leben machen kürtzer.
 20 aber noch danne haben vil bisher söliches hohen vnd wyten
 standes begeret! der selben dann mer funden worden sint
 torecht gewesen sin dann wyse. Vnd werden dise des meren-
 tails vnd garnäch alle, gelaitet vnd gefüret vsz gemainer tor-
 hait vnd jrrung der menschen! daz sy die ding für die ober-
 25 sten vnd besten achtent, zû denen als zû den wirdigosten vnd
 nutzlichosten die hochfertig der menschen begirde tût fechten.
 danne der merertaile der menschen, lebent vnd werdent ge-
 füret! usz wåne des püfels vnd bewegt vsz den stimmen vner-
 nieter vnd vnerfarner menschen, daz sy grösse seligkait vnd
 30 des lebens gemahe vnd gûthait vermainent sin! in grössem ge-
 walt in grösser macht vnd in hocher wirdigkait. aber fürwår
 nit usz jrrung des wånes, oder usz vnwissenhait der toren,
 sint dise ding zemessen sunder vsz vernunft vnd wysheit ze-
 urtailen vnd zerichten. welche wysheit (so ferre wir dero
 35 vnderwysung nächfolgen wöllen) vns leret, in grössem gelücke
 selten fromkait gütikait senftmütikait hailigkait vnd mensch-
 lichkait funden oder begriffen werden. Wir haben ouch ir
 etlich gesehen anders dann die gaistlichkait oder die gebot

gotes haischent, sich dises gewaltes vnd diser höchsten wirdi-
 kait gebrucht haben. jch rede aber von denen die da wandelnt
 in dem wege vnd in der gesatz des herren! Vnd die sich
 flyssend zetûn nit was sy mugent! sunder was sich zimm vnd
 5 jnen gebürre. den selben ist notdürftig, daz ain sölichs leben
 [235^b] (wo du anders die arbeit vnd diser dingen schwere
 ansehen wilt) ee eng angsthaftig vnd arme, dann selig sin
 gesechen werd. die selben aller hailigosten manne dine vor-
 faren denen wenig gemainsame mit der welt gewesen ist! So
 10 die enpfunden haben Iren achseln ain söliche schwere burde
 vfgeleget sin! hant sich genennet knecht vnd diener, der die-
 nern gottes. Vnd fürwâr! wenne die bäbst betrachtent nach
 sitte der poeten, sich vmb walen ainen schweren grossen
 staine! vnd sich selbs sin, statthalter vnsers lieben herren
 15 Jhesu cristi! vnd daz sy gesetzt sint jm nächzefolgen! so
 mugen sy warlich also knecht der knechten gottes genennet
 werden. Welich aber (hailigoster vatter) dine lob (die doch
 manigfaltig vnd fürpündig sint) mit jrer rede tûnt vmbfâhen
 vszlegen vnd erheben! Wie wol sy das mit wârheit vnd vsz
 20 dinem verdienen, gesechen werden tûn mugen. So sint doch
 die selben näch minem beduncken zeschetzen für liebkosere vnd
 vnfürsichtig schmaicher irer worten. dann du häst gelesen den
 spruch aristotilis in sinem andern bûch der rethorick! da er
 spricht! daz ainen menschen vnder ougen vnd gegenwürtigen
 25 loben, syge ain wercke der liebkoserye. So nu das ain haidi-
 scher maister schiltet so wirt nit gesechen! das ainches wegs
 von ain stathalter jhesu cristi sin zeloben. danne sich nit
 gebüret sich selbs oder ainen andern gegenwürtigen vnder
 ougen zeloben! es syge dann not vnd daz ain sach das tûg
 30 erfordern. eneas lobt sich selbs (als virgilius schribt in enea-
 dos) da er spricht. jch bin der milt vnd gütig eneas, der mit
 lobe vnd gûtem lûnden vber die höche der himeln erhept vnd
 bekant ist. Aber das tett er by vnd gegen denen die jnn nit
 bekanten vnd die vnwissend wâren siner groszmütikait vnd
 35 ritterlichen tugend vnd beschach ouch [236] sölichs in sinen
 vnd der sinen gröster sorgfeltikait vnd letster note vmb daz
 er abkarte den tode jm vnd den selben gegenwürtig anhan-
 gend. marcus tulius cicero, lobet ouch in ainer rede Julium

den kaiser gegenwürtigen! vmb daz er marcum marcellum
begnädende, von vnd usz dem ellende, darjnn er jn verschickt
hatt widerumb gen röme in sin haimant tett berüffen. ouch
vmb daz er legarium tet beschirmen vnd die vnschuld des
5 küniges diotheri behüten. aber die selb sin rede, waz ain rede
nit ains menschen sunder der sache vnd der zyten. danne diser
mane cicero in allen dingen der wysest! wart genötiget disen
julium siner gütikait zeloben! vmb daz an jm die berüffung
marcelli usz dem ellend waz erworben vnd daz noch jrer vil
10 mannen haile was zesüchen vnd besunder vmb daz er das
werke von jm also mit marco marcello getän kreftigote! Vnd
julius dadurch geraitzet vnd gewilliget wurde ander usz dem
ellend desgelyhen ouch zeberüffen vnd zebegnäden. danne vs-
serthhalb disen yetz gemelten reden! hät diser cicero an andern
15 enden kaiser julium nit allain nit gelobet! sunder sine werck
geschulden vnd jnn nit gütig! sunder ainen tyrannen genennet.
aber wo kain sölich vrsach yemant nötiget, so wirt gegen-
würtig lobe gesechen vnd geachtet vberflüssig vnd bas züge-
hörig sin ainem schmaicher vnd liebkosser danne ainem lober.
20 vnd ist ouch ain sölich lob sorgfelig! danne jr etlich schetzent
vnd mainent war sin daz, so von jnen also wirt gelobet! vnd
so sy hie durch gehochfertiget ainen wäne enpfächent jrer
aigen wysheit vnd tugend! so tünt sy dann sölicher jrer wys-
heit (daz jch nit sprech jrer torheit) nächfolgen! vnd so sy
25 hie durch ander menschen güt vnd wys rette verachtent! tünt
sy oft in grösse jrrung fallen vnd nit schüchen den namen ains
frefenlichen menschen. ye doch so ist ain vast alter spruche!
also lutend. daz tugend so die gelobt werd, wachse. dann wir
werden etwenne [236^b] durch vnser lobe geraitzet vnd ge-
30 williget! daz wir oft arbeit vnd flysse ankerent! daz wir
söliche menschen werdent! wie wir von dem lober gerümpft
worden sint. Aber alle ding wöllen haben masz zyt vnd statt
vnd gebürt sich etwenne zü zyten ainen gegenwürtigen men-
schen zeloben! doch also! daz er nit mercke den lober offen-
35 lichen liegen, da durch der gelopt verstee mer oder minder
in jm selbs sin! danne des lobers worte vsgelegt haben! vnd
daz nit söliche wort dem gelopten scham noch röte inschla-
gent! noch den zühörenden lachhen gebärent. es sint aber

etlich in liegen also verschempt! daz sy alles das! so ainem
 aller wysesten aller gelertisten vnd aller hailigosten menschen
 zû lobe geben werden möcht! zûsamen samelnt vnd vnder-
 wylen sölchs gebent zû lobe ainem menschen der billicher
 5 scheltung dann lobe hett verdient! vnd ist vsz notdurft, daz
 sölch zûsamen klubet lobe ainem aller frömsten vnd aller
 gelertisten mane vnder ougen vnd gegenwürtigen zû geredt!
 billich scham vnd röte insehlauchent. Dann ain fromer mane
 wil lieber gût sin! dann gût sin! gesagt werden vnd wil lie-
 10 ber! sölcher worten sin vertragen. was were aber zetûn möcht
 etlicher sprechen? waz materi verhengest du? darzû jch sag
 mich beduncken daz sölchen bābsten obersten bischoffen fürsten
 vnd herren fürzeheben syen Ermanungen gûtes vnd rechtes
 regimentes. Vnd des ersten sy zeziechen zû der gerechtikait,
 15 die da zûgefüget syg der barmhertzikait nach dem der pro-
 phete spricht misericors meserator et justus etc. In welchen
 worten er got nennet barmhertzigen erbärmer vnd gerecht vnd
 sich hier jnne zû der gerechtikait nit mer gebrucht dann ains
 ainigen wortes vnd zû der barmhertzikait zwayer worten. ouch
 20 sölch fürsten vnd herren zeermanen vnd zeziechen zû miltikait.
 [237] vnd gnāden den menschen zebewysen! welche zwo tugend
 aller annemest sint vnd sich grossen fürsten vnd herren wol
 ziment vnd gebürrent vnd sy zeermanen zû menschlichkait!
 darjnne ain grosser glast der tugend erschinet. danne die selb
 25 tugend ain sunder lobsame zierung vnd wolberaitung ist aller
 andern tugenden. Sy sint ouch an zemanen! daz sy gedenckent
 sich menschen sin! daz ist tödemlich vnd aines blöden lybes
 der mit siechtum bald bekrencket werden mag! wie wol sy
 aller hailigost vnd aller seligost genennet werden. Welche
 30 betrachtung wo die oft der fürsten gemüt ingeet, Inen weerert
 in hoffart sich ze erheben vber menschlich gebürlichkait. ale-
 xander macedo der da gebod sich als ainen gote anzebetten
 vnd ze eeren! vnd liegende saget! sich sin des geschlechtes got
 jupiters! wart durch schmerzen ainer ainigen wunden sines
 35 baines genötiget! das er sich bekant vnd verJach sin ainen
 menschen. also vnd sölcher namen vnd worten gebürt sich
 vor den fürsten zegebruchen, die nit vf jnen selbs tragent
 noch infürent hochfart vnd vngestüme gröszmütikait. zû dem

wirt ouch gesechen sich gebürren sölichen fürsten vnd herren
 anmanung zetûn! daz in grossem gelück grösse messikait des
 gemütes syg zehaben. dwyle es ain aller schwerest dinge ist
 in gelücklichen dingen zehalten rechte mäszt vnd sich recht
 5 gebruchen der gebotten des willens vnd ist ouch hart in vollem
 gewalt vnd in erlobung aller dingen zebelyben jnnerthalb den
 kraissen vnd schrancken der vernunft. danne dwyle grosser
 vnd langer gewalte vnd hoche eer vnd wirdigkait ouch der
 wysen gemüt arbaitent vnd die vmbziechent vnd oft pflegent
 10 die ze endern vnd zeuerkeren in hochfertige menschen vn-
 mechtigs gemütes! so wirt gesechen vast grosses lobes wert
 sin ze wandeln vnd zegeen den [237^b] schlechten vnd geraden
 wege der erberkait vnd sich nit zû dweder syten zebiegen
 lassen. danne so paulo der appostel (der lebendig in den himel
 15 verzuckt wart) vnd mit dem cristus redt, vnd der sin wonung
 ain zyt jm himel hat vnd ain doctor vnd lerer der fôlkern
 was. so dem (sprich jch) geben worden ist ain engel sathane
 jnn zeschlachen vnd zekestigen, vmb daz er sich nit in hoffart
 vberhübe, der grösse sölicher offnung jm in den himel getân!
 20 wie vil mer ist dann denen, so uf ertrich ir wonung hant ze-
 uerhüten! daz sy nit sich zeuil vnd vber die mäsze erheben
 vnd durch diser dingen schnöden pompe vnd herlichkait (die
 doch kurtz vnd wenig zyt werend ist) betrogen werden. für
 wâr mit stimmen sölicher worten zimpt sich der fürsten oren
 25 zesettigen vnd als vil jr wirdigkait grösser ist! so vil mer sint
 sy alwegen anzemanen! daz sy ir kranckhait vnd blödikait
 bedenckent. dann vast vil dinge sint! die zû zyten nôtigent
 die fürsten zelrren. gelychsner, liebkoser, schalkhaftig, runer,
 vnd mertrager, nidig, versager! usz dero worten ouch oft gût
 30 vnd from fürsten in aller gröste jrrung gefallen sint! vnd
 hât falscher lümde vnd etlicher sölicher menschen (die alle
 ding in das böste ziechent) verkerte vslegung vil fürsten ge-
 zwungen zetûn das! das sy darnâch rüwe empfangen hant.
 vnd werden söliche ding durch nyd vnd hasse, allenthalben
 35 her der fürsten oren zû getragen von denen die da wölten
 ir begird erfrowet werden usz ander menschen vngelück sor-
 gen vnd schâden. Vnd darumb so ist mit grössem flysse ze-
 fürsechen! daz die fürsten vnd herren durch sölicher lüten

falsch vnd trugenhait nit werden verführet vber das so main
 ich ouch ainen yeden fürsten sin zeziehen vnd zelaiten uff
 gütikait. Dann hart vnd schwer ist! grimikait vnd zorn zû
 zefügen grössem gelücke, vnd kain zûflucht der barmhertzikait
 5 erschynen noch [238] offen sin, den armen betrüpten vnd
 jämrigen menschen! vnd daz am fordersten sich gebürr! irer
 gedechnisz sin ingedruckt daz das so zûgehörig syg der tugend,
 in kain wege gegeben werd dem gelte. danne es ain aller
 böstes dinge ist vnd gar nâch verderplich der landen vnd des
 10 gemainen nutzes! gelt lieber haben vnd höher achten danne
 die tugend! vnd dem ding so an ains knechtz statt sin sol,
 zegeben den stand vnd sitze aines fürsten. aber für wâr (hai-
 liger vatter) so beduncket mich! daz mir ain schwerer sachhe
 fûrgeworffen vnd vfgelegt worden syg dar von zereden, danne
 15 andern rednern! angesehen daz die fûrpündig vnd sunder-
 liche tugend mir die ding! so andern rednern den follen ge-
 bent vnd verlychent zereden gantz hingenomen hât vnd enpfüret.
 Dann was ist? dar zû du ze raitzen vnd zelaiten ain notdurft
 sin mug? so doch din wyshait ander menschen, des bas wiste
 20 vnd künde ermanen vnd vnderwysen, dann sy dich. vnd was
 ist? deshalb du anderer lüten Worten oder reden bedörfdest!
 die wyle doch du selbs in der kunst wol redens, für ander vast
 bist geübet. dann was ist treffenlichers hailigers vnd wyszlichers
 geredt worden? (daz jch des andern geschwyg) dann die letscht
 25 rede nâch der begrepnisz babsts Eugeny! von dir! vor allen
 cardinâlen getân darjnne als ain wyssagung verstanden sin
 möcht! dich ainen künftigen babst werden! wie du do zemâl
 ainen babst sin sôllen sagtest vnd des wunschtest vnd beger-
 test. du bist mir zû fride (ainen aller besten dinge aller men-
 30 schen vnd des namen süsz vnd sin frucht hailbar ist zwüschen
 den römern vnd andern gelöbigen zemachen) von yemant an-
 zemanen! dann du selbs tûst das so mit grosser begirde vnd
 innerlichem brunste begeren! daz du hierjnne niemant aller
 menschen so vf erden sint tûst entwychen in erfolgung söli-
 35 ches begerten frides. Du [238^b] bist nit zû aincher mensch-
 licher gütikait noch zû andern tugenden zenötigen. dann dise
 ding alle haben wir gesechen dich vsz diner kunst usz diner
 leere vnd usz diner nature, so zû aller erberkait genaigt ist!

vor langem vberkomen han. du bist nit zetryben vnd die burde
 der arbeit vnd vnder die sorgen, so sölicher hohen wirdigkait
 anhangend sint. danne du von dir selbs willentklich vnd mit
 so grössem flysz vnd steter übung die uf dich nimpst! daz bil-
 5 licher dir dafür zömen inzelegen weren, danne sich der sporen
 gegen dir zegebruchen. dwyle dir doch kum, zû rüwe des
 schläfs ainch zyte wirt verlichen. du bedarft nit (aller haili-
 goster vatter) aines anmaners noch trybers. du häst gelesen
 die gebott vnd vnderwysung aller tugenden. so häst ouch ge-
 10 lernet die hailigen geschriften vnd der haiden. kainerlay kunst
 güter leren tût dich fliehen. du häst gelesen aller diner vor-
 faren der bábsten handel, vnd erkennet, welich usz jnen ze-
 loben sint, vnd dir jnen zefolgen ist! vnd welich für lycht
 zehalten vnd zeachten. wir wissen ir etlich gewesen sin! die
 15 dem güten gnüg tåten vnd etlich in denen man vil hett be-
 geret. Ich siche aber noch ain form redens mir vberbeliben
 vnd vorhanden sin! dero jch mich gebürlich åne verdriessung
 wol vnd recht mag gebruchen! daz ist das. daz jch dich er-
 man, dir selbs nâch zefolgen vnd dir selbs glich zefinden vnd
 20 daz du jngedenck syest mit waz künsten, mit welchen sitten
 vnd mit waz lebens du dise so hohen wyten vnd begerten
 wirdikait habest erfolget vnd vberkomen. dann von dir selbs
 ist dir zeentlechnen vnd zenemen alle satzung vnd leere ainem
 gemainen nutze wol zeregieren! vnd vernunfte recht zeleben.
 25 von dir selbs sint dir ze geben. die exempel vnd vorbildung
 aller tugenden vnd ist nützit dir vsserhalb din selbs zesûchen.
 dir wirt nit not sin uszwendiger hilfen ützit recht zehandeln.
 wenne du dich des follen diner aignen hilffe wilt gebruchen. du
 waist mit was küschhait gelept häst vnd mit waz messikait
 30 des lebens. du waist daz [239] du dich selbs allwegen in den
 aller besten künsten der geschrift häst geübet vnd güt vnd
 gelert manne geliebet vnd geeret vnd gebürret dir daz du din
 vorige menschlichkait vnd senftmütikait behaltest vnd dich der
 sitten für vs gebruchest! die dir dise hohen wirdikait hant
 35 geboren. du hast allwegen laster gehasset vnd den wege der
 tugend in allem dinem leben vmbfangen. vnd wir wissen dise
 schwer lestigt eere dir von got enpfolhen vnd vfgelegt sin!
 nit von vssern dingen her nit usz eer gytikait, nit durch bitte

noch vmb gelte! sunder vsz tugenden vnd hailigen gûten
 sitten. vnd wo du dise ding oft bedenckst! so ist nit zwyfels!
 dann daz der gemain nutz der cristenlichen kirchen! selig
 sin geschetzet werden mûsz. so aber du din gedencke dahin
 5 vnd vf die ding kerest, vnd du versteest sich dinen sitten vnd
 wirdikait gebûren! so tûn ich dich (aller hailigost vatter)
 des bitten! daz du dine vorigen alten frûnde (vnder denen ich
 mich ainen sin tûn achten) dir nit lasset enpfallen vsz diner
 gedechtnisz! als wir dann sechen manchen beschechen sin. du
 10 waist daz gelyche, gûter sitten begirden vnd willens zû samen
 fûgen vnd machent wære frûntschafft! vnd ob wol etwenne zû
 zyten, aller grôste macht gewalt vnd wirdikait gewon sint,
 sôlich frûntschafft von ainandern ze entrûcken vnd ze wytern!
 so gebürt sich doch hierjnne gûten gunst vnd willen zebehalten!
 15 vnd besunder dem! der frûntschafft misset vnd wigt nit usz
 nutze, danne allain usz schulden vnd gebûrlichkait der tugend.
 vnd haben oft vnd dick grôsz fürsten vnd herren wol bedôrft
 gûter frûnden! die ain yetklicher in vberkomen vnd machen
 mag usz gûtgetâten vnd erzaigung günstiges willens. Also
 20 bitt jch! daz du vnder andern dinen sorgen dise nit lassen
 wöllest! du nemest oft in din gemüte ain bedencken diner
 vorigen alten frûnden (in dero zale jch mich sag ainen sin)
 vnd daz du denen [239^b] hilfflich syest, vnd sy nit in armût
 mangel vnd gebruch haben lydest vnd daz du gunst gebest
 25 hoch sinnigen vernunfftigen lûten vnd liebest hochgelert manne!
 Vnd durch dinen flysse vil wöllest gelych sin dir selbs! da
 mit du in disem dinem fürstentûm, dich machest als ain sâte
 oder sâmen der tugenden! dadurch die fryen kûnst als zû
 den zyten saturni widerumb entspriessent grûnent vnd wach-
 30 sent! die yetz von schuld wegen der zyten gesechen werden
 abgefallen sin vnd garnâch gantz erloschen. dann gût kûns
 die da sint fürerin der tugend vnd von denen erkantnûsz wärer
 dingen vnd der erberkait genomen werden solt! ligent yetz
 verborgen in ainer finstre vnd gantz verlassen von denen so
 35 die üben solten vnd lernen! gelycher wyse! als ob sy in ain
 ainödige statt des ellends usgetriben vnd verschicket syen.
 dise sint dir an das liecht widerumb her für zebringen vnd in
 die scharen vnd übungen der menschen zegeben. danne wenn

oder welchen andern wöllen wir vmb diser dingen haile an-
 rüffen! wo du vns des enpfallest? Den sy doch so lange als
 Iren liebsten sune mit jren brüsten hant gefüret. Es sint
 (hailiger vatter) lernung güter künsten der geschriften, lang
 5 zyt her vngeübet gelegen vnd wolgelert fürpündig manne ver-
 achtet worden. Ja lenger verachtet! danne vernunft der gaist-
 lichkait oder der tugend billich lyden sölt. Dar von dann komen
 ist! daz der menschen begird zû lernung güter künsten gantz
 ist erkaltet. Dann wo der tugend nit eer vnd lön geben
 10 werden! so werdent wenig oder kaine menschen zû Irer übung
 geraitzet! Du sichst yetwedre philosophie, müter vnd gebärerin
 güter künsten vnd maisterin rechtz lebens vnd güter sitten
 yetz worden sin ain hinwurffe vnd gantze verachtung. Allain
 [240] gebrechen halb dero, so die solten lernen vnd daz dise
 15 philosophie liget in den finsternissen vnd nit als vor zyten
 pffigt wandel zehaben an das liechte vnd in angesichte der
 menschen! vnd daz man allain begert der künsten die da
 werden belönet vnd dienend vnd gehörig sint zû kriegischen
 dingen vnd zû gewine grosses geltes. aber kaine oder vast
 20 wenig menschen werden hier zû bewegt von tugend wegen an
 ir selbs! oder allain durch vrsache wissens oder könnends!
 danne vnder den selben die nit für lobsam noch edel geachtet
 wurden wo zytlich eer vnd güte merer grösser vnd höher
 danne tugend vnd fromkait wurden geschetzet aber von dir
 25 allain (hailiger vatter) werden dise ding erwartet! dar an vil
 diner voffaren gesechen worden sint gebruchh gehept haben.
 von andern ist ain anders zesûchen vnd zewarten. aber dir
 allain ist dise eer vnd dise ding zearbaiten zûgehörig! daz
 kunst der geschrift vnd gelert manne durch dine flysz vnd hilff
 30 wider ufgericht vnd in vorige wirde vnd achtbarkait gebrächt
 werden. Du waist was grössen nutzes rechts lebens die wysen
 zû gebrächt haben der gantzen welte durch dero räte flysz
 arbeit vnd wysheit die menschen vnderichtet sint gebürlicher
 händeln vnd irs lebens güter sitten vnd des regiments gemaines
 35 nutzes, güter satzungen der rechten. vnd ist von sölichen ge-
 lerten mannen vnser geloube vnd gaistlichkait oft wider vil
 ketzeryen beschirmt worden vnd gewytert. Vnd ist wär daz
 wir söliches nutzes vnd gemaches vnsers lebens vnd sölicher

beschirmen vnsers geloubens in vergangen zyten oft mangel
 gehept haben müsten, wo nit zû fromer vnd hailiger mannen
 leben komen vnd zûgefüget worden wer! kunst vnd leere manig-
 faltiger dingen dero sy sich als wäffen der were gebrucht haben
 5 zevsztryben die macht [240^b] vnd stercke der ketzerye vnd zû
 schirme vnd behütung vnsers geloubens. Also hailiger vatter,
 bitt jch aber daz vnder andern dinen sorgen! die am forder-
 sten sin wöll! daz du vfrichtest vnd erhebest gelert manne
 vnd wider erkickest vnd lebendig machest lernung vnd leere
 10 der aller besten künsten vnd daz du hie durch erzaigest in
 dir din wirdikait sin gemeret vnd dine sitten nit geendert noch
 verkeret. Dises ist din aigen übung. dises dines namens vnd
 werckes hoche eere dises wirt sin, dines babstüms aller nutz-
 liost frucht. dises wirt dir gebären gegen got ewigen lone vnd
 15 gegen den menschen vntödemlichs lobe. so aber du aller haili-
 goster vatter dir fürsetzest alle ding zehandeln, so die schwere
 diner burde erfordert vnd haischet! So tûn jch yetz din hai-
 ligkait des bitten! daz du Ingedenck syest dines pogy! der
 so vil jâr vnd so lange zyt mit so vil dienstbarkait gewesen
 20 ist diner tugend der aller ergebnist der dich allwegen hât
 geeret vnd für mengklichen geliebet. Ich bin yetz glych als
 ain alter disz hofs ritter! der sölichem hofe, ob vier vnd
 viertzig Jâren nächgefolget hab, für wâr mit minderm nutz
 lon vnd solde danne sich gebürret hât ainem sölichen der doch
 25 nit gantz fremd bin den tugenden vnd den künsten der mensch-
 lichkait vnd der yetz mit solde begaubet! näch sitt vnsere alt-
 fordern in rûwe des lybes vnd zû arbeit der vernunfte gesetzt
 werden sölt. vnd wo ich yetz nit usz diner gütwilligkait das
 erfolg! so waisz ich nit wes gunste vnd hilffe jch fûrohin mer
 30 bitten vnd anrûffen söll oder mug. DEO GRACIAS.

[241] **D**Em erbern vnd wysen hansen harscher burger vnd des rätes zû vlme minem besondern lieben vnd gûten fründe. Enbüt jch niclās von wyle min früntlich dienste zûuor. Du häst mir nechst geschriben wie zû zyten als du miner Jungern ainer zû esselingen mir verdingt gewesen syest, jch do zemäl dir vnd andern sölichen minen jungern vf üwer aller bitte etwas vnderwysung machte! wie man aim yeden in sinem stande ain gebürlich vberschrift setzen sölt! daz du do zemäl tettest Jung verachten vnd aber yetz zû Jären komen gern wöltest haben. vnd häst mich gebetten ob Ich daz noch hett! dir als dann das mitzetailen etc. Ich bin in gedenck mich do zemäl (wie du schribst) etwas hier von gesetzt han. es ist aber hingenomen vnd zertragen worden daz mir des kain abschrift beliben ist. Aber vmb daz ich dir zû willen wurd, hab Ich hier nāch.forsch gehabt! Vnd an aim ort des ain sexternlin funden, doch corrupt vnd vnrecht geschriben, das ich dir, als vil des ist! nit wolt verhalten! sunder corrigieret abgeschriben als minem besten fründe schicken! vnd ist das die form. Wie her nāch folgt nützit zû noch von getān! Dann allain daz ich yetz etwas von dem duplierten vnd zwifaltigen. n. des man zescriben vngebürlich pfligt! hin zû gesetzt hab. etc.

Minen lieben Jungern. A. B. C. D. E. F. Vnd . G. Sage jch niclās von wyle vil hails. Ir bitten mich lieben Junger ains dings! Daz Ich üch wöll setzen etwas grunds wie ainem yeden in gaistlichem vnd weltlichem wesen nāch vnderschaid der stenden emptern vnd [241^b] adels syg zescriben, mit zûgebung gebürlicher worten Ir yetklichem zûgehörig! vnd sint villicht hier us bewegt daz ir mainent die latinisch rethorick söll mir des sin ain fürerin vnd gewisse vnderwysung. Dar an Ir aber

Irrent. Dann wie wol die selb latinisch rethorick ain zaigerin
 sin mag alles rechten vnd lobsamen gedichts aller sprächen vnd
 gezüngen. noch dann so fället es nach minem beduncken aller
 maist an dem das ir an mich als obsteet begert hant. Des
 5 ersten darumb! daz das latine vil vnd mancherlay vnderschied-
 licher worten! die man also ainem yeden näch gelegenheit sins
 standes schriben vnd zügeben sol! fölliger ist! dann das
 tütsche! das hieran nit klainen gebruch hät. Zum andern ouch
 aller maist darvmb! daz das tütsche gedicht an zügebung sö-
 10 licher worten vnglych ist! vnd kain gewissz kunst noch regel
 habende, sich endert vnd verkeret nach wyte vnd gewonhait der
 landen vnd näch endrung der lüten der löffen vnd der zyte.
 Deshalb schwer Ist vnd nit wol muglich! Das ützit hier von
 gesetzt werden mug gewisses belyplichs vnd yederman gefelligs.
 15 Aber noch dann vsz trüw vnd liebe bewegt, wil Ich üch etwas
 mainung vnd grunds vsz dem latine setzen! nit dar vmb! das
 Ir üch des als fürgewissz halten vnd gebruchen sollen! sunder
 das Ir min beduncken vnd oppinion hier jnne merckent vnd
 dann des lands gewonhait nützit dester minder haltent. Als
 20 ferre die zehalten gebürlich ist! näch dem der gemain spruch
 lutet! daz kunst syg zelernen vnd gewonhait zehalten. Ich
 hab aber gesprochen als ferre die zehalten gebürlich ist.
 Danne vil gewonhaiten bisher entstanden sint vnd noch teg-
 lich entstend, die billicher misszbruhe dann gewonhait wer-
 25 den [242] genennet vnd billicher wurden vermitten dann ge-
 übet. Ir vil schrybent das wort flysz durch ain .v. als vlysz,
 daz näch vnderwysung der ortographie durch ain f. vnd nit
 durch ain .v. recht geschriben werden mag. danne daz .v. geet
 niemer in craft ains .f. jm folge dann ain vocal. sust so oft
 30 ain consonant hin näch geet so belyps es ain .v. vocalis. So
 schribent etlich das wort vnfer, durch ain beschlossen .s. jm
 mitten stende also vnser. darzü das .s. ouch nit funden vnd
 erdächt ist. Dann gelycherwyse wie der hebreysch hät ain
 offen vnd ain beschlossen mem vnd ain krumbe kaff vnd ain
 35 schlechte kaff des gelychen ain kriechischer ain zwifalt .o. als
 omicron vnd omega etc. die mit vnderscheid gebrucht werden.
 also haben ouch wir zwayerlay .f. s. vnd .v. u. dero sich mit ge-
 bürlicher vnderscheid ist zegebruchen also daz das beschlossen

.s. niemer jm mitten steen sol. Item so ist vnsers landes tütsche bisz her gewesen zereden zwüschen dir vnd mir zwüschen vch vnd vns. zwüschen jm vnd mir. Dar für wir yetz österrrychesch sprechen zwüschen din vnd min zwüschen üwer vnd vnsere
 5 zwüschen sin vnd min. Item vnd als die fürsten vnsere landen bisher pflegen haben ain andern zeschryben vnd noch des merentails tûnt, vwer lieb. heben yetz etlich schriber an flemisch dar für zeschriben üwer liebe vnd bequemlich für bekemlich vnd deInen für die selben. Vnd rinisch geet für
 10 gât vnd steet für stât, rachtung für richtig gescheen für geschechen. Vnd dero hunderterlay Item vnd das wunderbarer ist! so haben sich vnsere vätter vnd dero altfordern in schwäben yewelten her bis vf vns gebrucht in Irem reden vnd schriben des diptongons .ai. für .ei. burgermaister schribende
 15 nit burgermeistér. nain vnd nit nein. [242^b] flaisch vnd nit fleisch etc. Aber yetz garnäch in allen schwebischen cantzlien der herren vnd stetten schribent die schriber ei für ai. burgermeister sprechende vnd nit burgermaister wysheit vnd nit wysheit! daz ain grosse vnnütze endrung ist vnsere ge-
 20 züngs dar mit wir loblich gesündert wären von den gezüngen aller vmbgelegnen landen das vns yetz laidet vnd fremdes liebet. Ich bin bürtig von bremgarten usz dem ergöw! vnd hab mich anefangs als Ich herus in swäben kam grosses flysses gebruchet daz jch gewonte zeschriben ai für ei. Aber yetz were not
 25 mich des wider ze entwennen wo Ich anders mich andern schribern wölt verglychen. das ich aber nit tûn wil. Yetz ist aber ain nüwes gögelspiele entstanden daz man in vil cantzlien vnd schriberyen pfligt zeschriben zway .n. da des ainen gnüg wer vnd das ander vberflüssig ist! mer die verstentnusz
 30 Irrend dann fürdernd als! vnsere! Vnnd. früntlich. liebenn etc. Vnd des gelychen. Ain yetklicher consonant gezwifaltiget, vber schlecht vnd gibt siner stimme zû ain stercke! Vnd ist ain grosz vnderschaide wo er ainig steet vnd wo zwifaltig! sol ouch an ursach niemer beschechen als ir in disen
 35 exempeln mercken mugen. An dinen hof, hoff ich zekomen vnd wil din will syg ouch darby. Item disen briefe las ich lass vnd treg vs vnd vs! vss trurigem hertzen! aber für daz ain .s. pfligt man ouch ain z zemachen! also ssz. jtem ich

sach daz din sachh wolt güt werden! Item gedenck vnd sinn
 ob nit der sin dir nechst fürgehalten güt wer. Item min
 minn vnd liebe gegen got sollen fürtreffen etc. In disen schrif-
 ten ir mercken mügen den vnderschaid diser worten. hof. hoff.
 5 wil. will. las. lasz. vs. Vsz. sach sachh. sinn. sin. Minn. min.
 Des gelychen wirt [243] funden in den andern consonanten
 allen. Warumbe schriben dann dise maister zway .n. do nit
 mer dann ains notdürftig ist. Dwyle doch lasterlich ist ain
 ding zetün durch vil daz glych als wol durch minders mag
 10 beschechen. Sy sagen aber Es syge also hüpscher vnd stande
 bas! So gebent antwort (bitt jch) warumb sy dann nit drü
 .n. oder zway .m. ouch schriben so wurd die geschrift noch
 hüpscher vnd bas steen. Vnd mich wundert daz etlich Statt-
 schriber mir bekant! sölichs von jren substituten lyden tünt,
 15 so bald sy etwas nüwes sechen usz ains fürsten cantzlie vs-
 gegangen! ob es wol nit grundes hät vnd vnrecht ist! noch
 dann das bald vffassent vnd sich des gebruchent wie die affen.
 vnd ist nit anders, dann wie ir yetz sechent die jungen ge-
 sellen diser zyt beklaidet geen vnd geschücht nach dryer oder
 20 vierer landen sitten also findet man ouch selten me ainch ge-
 dichte Es syen dann dar vnder viererlay oder fünfer! spräche
 vermischet. das jch nit rüm! noch seer schilt. Aber doch
 grösserm lobe gib, sich in gedicht güter lands tütsch zierlich
 zegebruchen, danne fremder sprachen worte zesüchen, die vn-
 25 ser fordern gebürlicher haben vermitten. Aber sich zeflyssen
 hüpscher worten dero man sich ye zû zyten näch tütsche vn-
 sers lands gebruchet. als yetz sint die wort. dem näch. des-
 halben. angesechen. ainbaren! billichten! abnemen etc. Vnd
 der gelychen vil. Ouch vfzefassen schön hoflich transsumpcio-
 30 nes, da ain wort für ain anders gebrucht wirt etlicher gelych-
 nusz halben der dingen so sy betüttent Als nüws ist ange-
 zogen. zwytrecht sint Ingerisen. der hät sin fordrung abgestellt.
 Als mich die ding ansechent. Vnd Ich in die sachen blick.
 Das ist vor ouch uf der ban gewesen. Wir wöllen das in der
 35 federn belyben [243^b] lassen. die statt ist vber zuckt vnd das
 schlosz vber schnelt. vns ist hilf erschinnen! der züge ist vf
 den bainen vnd des gelychen tusenterlay. das lob ich vnd rät
 üch sölichs (wo ir das hörent oder lesent) vfzefassen vnd

üwer gedechtnüsz ze enpfelhen vnd besunder in disen dingen
 zetün näch aigenschaft vnd nature der binen, die nit vf alle
 blümen fliegend noch die selben gantz hinnement sunder so
 sy das haben genomen das bekomlich ist Irem wercke das
 5 übrig alles hinder jnen verlässent belyben. Also wöllen ouch
 lieben Junger das güte vffassen vnd das arge fürgeen Da mit
 Ir vsz wolgeschickter Jugend wachsent in loblich alter vnd
 daz von vch nit gesprochen werden mug üch gewesen sin güte
 ayer vnd worden bösz hennen. Dar zü üch laitt vnd schick
 10 der da ist ain schicker und regierer der himeln vnd erden.

ES SINT zwayerlay stende ainer gaistlich der ander welt-
 lich. In dem gaistlichen sint begriffen der babste all pa-
 triarchen Cardinel Bischof Prelaten Münch Pfaffen vnd ander
 bisz vf den mesner. In dem weltlichen. Der kaiser, all küng
 15 fürsten grauen herren ritter vnd knechte ouch burger vnd
 geburen bis vf den hirten. Die gelerten vnd graduwierten
 mag man ziechen In yetwedern stande näch dem vnd sy sint
 weltlich oder gaistlich. Item in beden stenden sint ämpter
 vnd namen Irer yedes wesens, die von aigen tugenden erfolget
 20 sint oder von gäben des gelückes gegeben. dann daz der kai-
 ser ist kaiser hät Im gebrächt sin aigen tugend vnd verdienen
 oder die gaube des gelückes. Ist aber yemant fürst graue
 [244] oder edel geborn das hät jm ouch gebracht vnd geben
 daz gelücke daz er ain sölicher geborn ist, des gelichen bin
 25 jch statschriber zü Esselingen daz hab jch erfolgt durch aigen
 tugend vnd verdienen oder fale des gelückes hät mir das zü
 gefüget. Also ist jm ouch ob ich bin doctor maister vogt
 schulthesz prelat pfarrer priester oder anders. Nu ainem
 yetklichen dem man schribt? dem sol vnd mag man schriben
 30 zü legen vnd geben den namen sins amptz stands vnd wesens
 wie er den erfolgt oder das gelücke jm den geben hät welich
 namen wir zü latin nennent merita. die selben namen vnd
 merita habent dann wort des lobs oder der eeren Inen näch
 wirdigkait der emptern vnd der stenden oder wesens vnder
 35 schaidenlich zugehörig. Die selben wort zü latin genennet
 werden determinaciones meritorum. Als dem kaiser ist zege-
 ben die determinatz aller vnüberwintlichoster oder aller grosz-

mechtigoster. Item dem merit küng! die determinatz grosz-
 mechtig. dem merit fürst! durlüchtig oder hochgeborn. Vnd
 des gelychen durch ab, ainem grauen wolgeborn. aim fryen
 edel aim ritter streng, aim edelman. Vest aim burger erber
 5 aim geburen beschaiden etc. wie sich dann das aim yeden
 gebüret. Nu steet die schwere üwer fräge vnd begerung,
 aller maist vf dem. Welche determinatz meritorum, das ist
 was wort der eeren vnd des lobs, ainem yetklichen merit. das
 ist ainem yetklichen namen ains amptz stands oder wesens
 10 zegeben syen. Vnd besunder wenne man aim Merit zway oder
 drü sölicher worten des lobs zegeben wöll Welche die sin
 sollen vnd welches vnder den selben vor geen oder nächfolgen
 soll vnd mug. An dem selben letsten wol etlich! rechter
 kunst näch! zü zyten Irren möchten [244^b] Nun dar von
 15 etwas zeschriben So wöllen wissen! daz jch in der kunst der
 latinischen rethorick find: daz in der ersten taillung der selben
 kunst, das gelide das genennet wirt composicio füro in drütaile
 oder gelider wirt getaillet! daz ist in ordnung, in züsam-
 fügung vnd in massz oder zale jtem vnd daz füro daz yetz
 20 genant gelide ordnung, nach der lere quintiliani in dem nün-
 den büch siner institucion, wyter aber wirt getaillet in drü
 andere glider namlich in künstlich ordnung! in natürlich ord-
 nung vnd in ordnung, die zü latin genennet wirt sui generis
 restrictiua. Von disen dryen gelidern jch ainw enig vnd so
 25 vil melden wil Als jch des main dienen vnd nütz sin in dem
 des ir begeren. DES ersten so ist die künstlich ordnung der
 aigenschaft vnd gibt die vnderwysung! daz jr oratz red oder
 schrifte allwegen wil wachsen vnnnd sich meren wytern oder
 zü nemen vnd niemer mindern Es syg in loben oder in schel-
 30 ten in billichten oder vnbillichten oder in anderm. Vnd dar-
 umb so ist sich in disem gelide zehüten! daz niemer die oratz
 abfall von aim höhern in ain nidrers oder von aim grössern
 in ain klainers! Sunder mer allwegen vfstyg in dem daz
 man dann fürheben vnd erkleren wil. Als zü exempel so jch
 35 schryb. Dwyle du wære fürdernüsz hilff vnnnd offenlichen
 nutzbaren bystande getän häst mir betrüpten! Der sust von
 mengklichem ist gewesen verlassen! So solt du dich hin wi-
 derumb füro zü mir ewengklich versehen sölicher trüw vnnnd

güthait, dir hinfür begirlich zebewysen! daz nit yemant die grösser für sinen fründ brüder vatter oder sich selbs getün möcht etc. Vnd aber. Wie [245] möcht jch denen gern bywonen die sich weder spils rouberye düpstal brands noch mordes schamend! Sunder sich des getörren rümen vnd vberheben. Item der gelychen ist! So Ich ainem fürsten oder ainer statt vmb min zûsprüch recht bütt vnd allwegen das fölliger gebott läsz nachfolgen bisz es zû lest kumpt vf des fürsten hofmaister vnd sine rete selbs. Doch so müsz man in sölichem recht bieten etwenne die natürlichen ordnung als hernach folget ansechen sich dero gebruchen vnd den wirdigern vor setzen etc. Da in den vorgeschriben exempeln die oraciones vnd rede wachsent vfstigent vnd sich merent! da Ich sprich wäre fürdernüsz, hilf vnd nutzlichen bystande. Item vnd aber da Ich red, nit yemant grössers möcht getün für sinen fründ brüder vatter vnd sich selbs. Vnd Ich hab mercklich gesprochen daz die oratz sich meren söll in dem daz man dann fürheben vnd erkleren wölle. Dann wölt Ich ainen menschen fürheben vnd erkleren demüttig sin! So möcht Ich reden, Wie wol hans gewesen ist ryche von güte vnd edel von geburte! So hät er sich doch des nie vberhept dann daz der mit üch wandelnde, zû aller zyt erschinnen ist als üwer mitgesell diener knecht vnd gehorsamer vndertän etc. Vnd möcht darumb nit gearguwietet werden daz die oratz nit wüchs Sunder mer abfiel von ain grössern in ain minders. Danne sy sich also wärlicher meret in demüt vnd darInne vfstyget von ainem mindern in ain grössers. Also ist es ouch zeuersteen in andern sachen. Dann was tett not so Ich in scheltung! ettlichen geschulten hett sin ainen morder vnd erst den dar näch Inn schelten wölt vnd nennen ainen spyler. Natürlich vernunft [245^b] versteet das vorig so die red vfstiget bas vnd zierlicher luten. Da von kumpt daz manche müter der rethorick vnwissend Ir kind angeredt hät vsz liebe sprechende. Du bist min fürst künig vnd kaiser vnd min als got sament. Sechend wie menschlich vernunft ain fürerin ist diser ordnung wie wol sy künstlich vnd nit natürlich genennet wirt, daz die fröwe also vfstygt vnd zû lest spricht min alz got sament als ob sy sprech. nützit ist so

liebs noch grosz das jch nennen möcht du syest mir noch
 lieber. doch so ist hierjnne aigenlich zemercken daz dise lere
 der obgemelten künstlichen ordnung zeuersteen ist wenn sö-
 lliche vfstigende wort allain vf ain persone geredt vnd gelaitet
 5 werden. Dann wurden sy mer dann vf ain person oder ding
 gereferyeret vnd gelaitet! So wer nit lasterlich dise ordnung
 zemyden. Als ob Ich hansen sagte sin ainen morder vnd
 Cüntzen ainen diebe oder spiler hierInne möcht jch nit sün-
 den. Vsز dem kumpt wenne man yemant geben wil zwo oder
 10 dryg determinaciones meritorum. Daz sint worte des lobs
 der personen zügehörig von wegen jrer geburt jrs wesens
 oder standes! daz dann das grösser vnd wirdiger nächfolgen
 sol damit die oratz (als jch vor gesagt hab) Vfstyg vnd wachse
 in ain höheres. Darumb vnser altfordern gar wol vnd recht!
 15 den grauen geschriben hant den edeln vnd wolgebornen vnd
 nit den wolgebornen vnd edeln. danne wyle sy dise zway
 wort der eeren vnd lobes ainem geben wolten! was billich
 das grösser vnd wirdiger nachfolgen zelassen Als ob sy
 sprechent dem edeln! Ja vnd nit allain dem edeln sunder
 20 ouch das grösser vnd höher ist dem wolgebornen. Darumb
 üwer kainer mich ye hät gesechen ainchen [246] fürsten schri-
 ben dem durlüchtigen vnd hochgebornen fürsten vnd herren
 als man dann usz den richs stetten yetz den weltlichen Chur-
 fürsten vnd den ertzhertzogen pfligt zeschriben! sunder hab
 25 ich nit me geschriben dann dem durlüchtigen fürsten vnd
 herren vnd daz wort hochgeborn vermitten Warumb das?
 darumb! daz die oratz nit ab fiele in ain minders. danne wenne
 jch yemant schryb durlüchtig so ist nit not daz wort hoch-
 geboren hin näch zsetzen dwyle das vorder wort sust daz
 30 in jm beschlisset. Aber gebürlich recht vnd wol wrude sö-
 llichen fürsten geschriben. dem hochgebornen vnd durchlüch-
 tigen fürsten etc. Als ob man sprech ja nit allain! dem
 hochgebornen! sunder ouch daz grösser vnd andern schlechten
 fürsten nit zeschriben ist! dem durchlüchtigen fürsten etc.
 35 Warumbe jch aber das selb nit gtän hab hät geursachet daz
 von andern nit wurd geschumpfiert! jn verkerung sölicher
 worten vnd geschuldiget das Ich mer dann ander wölte wis-
 sen. mir ist ouch begegnet! das ich gesträffet von etlichen

wart umb das Ich miner gnedigen fröwen von österrych uf
 das wort durlüchtig nit satzte ouch hochgeborn wie ander
 schriber in den richstetten. Des Ich mich aber usz obgemel-
 ten vrsachen tett verantworten gegen Iren fürstlichen gnäden
 5 die bald verstünd wären grund disz dinges! sagende! daz
 Ich füro schrib wie bisz her! des wölt sy steen benüigig.

ITEM ZVM andern so ist die natürlich ordnung der ai-
 genschaft vnnd gibt die vnder wysung das Ir Oratz red vnnd
 geschrift allain haben wil, Ain vfsehen vnnd mercken vf die
 10 natur oder vf wirdigkait des dings dar von man schribt oder
 redet. Vnd also ist der tag vor zû setzen der nacht. vf gang
 [246^b] der sunnen dem vndergand. Der mane der fröwen.
 Vnd der babst dem küng der küng dem hertzogen daz küng-
 rych dem fürstentûm, daz fürstentûm der gräfschaft vnd glück
 15 dem vngelück vnd erbers schnödem vnd gütz bösem vnd des
 gelychen in vil andern dingen. Also daz zû loblichem gedichte
 ouch zehaben ist etlich rechnung wirdigkait der nature. Doch
 so ist das zemercken wenn söliche wort glych vf ainandern
 folgent, dann wo die mer dann in ainer oracion wyt von ain-
 20 andern stunden oder in ainer oracion vf ander vnd ander
 zyte vnd vf ordnung begangner geschichten gesetzt wurden!
 So Irt nit ob das minder wirdig dem wirdigern vor gestellet
 wirt. Als so ich sprich. Do ain grosse schar des ersten der
 fröwen vnd dar näch der mannen vor dem küng erschinnent!
 25 Wart des gnäd zû barmhertzikait bewegt vnd sin zorn in gü-
 tikait verkeret Item lichtenklicher mag man das versteen in
 gesünderten oracion wyt von ain andern stende deshalb nit
 not tût wyter exempel gelegen etc.

Zum dritten so ist ain ordnung die Im latine genennet
 30 wirt Sui generis restrictiua, die da beschicht vnder wylen,
 So ainem wort ainer wytern betütnüsz näch folget ain wort
 ainer minder wyter betütnüsz also daz das vorgend worte alles
 das betütet, das daz nächgend vnd dar zû mer vnd wyter vnd
 doch das minder nächfolgend worte durch sinen anhang das
 35 vorig grösser wort zwingt zesteen nit wyter danne für das so
 dasselb nächfolgend worte betütet. Vnd ist diser [247] ord-
 nung gröste aigenschaft daz kain wort in der oracion müssig
 stee vnnütz vberflüssig oder vmb sust vnd nützit schaffende

gelegt werd. Darumb wer sölich laster vermyden wöll, der sol niemer ainem wort ainer mindern betütnüsz glych näch setzen ain wort daz da betütet alles das so das vorig vnd dar zû mer. Item er sol sich ouch hüten daz er sich niemer
5 gebrauch ainchem dinge zegeben wort die da mer oder minder oder gantz anders betütent Danne der zyt oder der dingen eigenschaft vnd nature zû gehör vnd gebürlich syg Vnd dar umb so haben die nit wolgeschriben die da von Castore vnd pollutzen gebrüder zwylingen schribende! das wort zwyling,
10 daz da ist ainer mindern wyten betütnüsz, fürsatzten dem wort gebrüder, daz da ist ainer wytern betütnüsz, Also sprechende Castor vnd Pollux zwyling gebrüder haben krieg gefürt mit den nachgeburen Irer anstossenden landen etc. Dann dwyle all zwyling mannes namen gebrüder sint! do was
15 nit not da sy zwyling gesprochen hatten hin zû zetûn gebrüder. Hetten sy aber vorgesetzt gebrüder vnd dar näch zwyling Wyle nit all gebrüder zwyling sint, So weren sy nit sträf- wurdig vermerckt worden vnd zwyling sint menschen ainer gebürt sament geborn etc. Darumb lieben Junger So mugen ir
20 ouch wol vsz dem grunde diser ordnung bewegt schryben burgermaister vnd räte der stat costentz Item disz ist beschechen jm küngrych hungern Item vnd vf dem ersten tage des manotz Aberellen [247^b] Item vnd vor dem hochzyt ostern etc. Vnd ir tûnt ouch sölichs, gebürlicher! dann das ir schri-
25 bent. Der stat zû costentz jm küngrych zû hungern des manotz jm aberellen vnd vor dem hochzyt zû ostern etc. Aber sträflich karten jr dise wort vmb sprechende Im meyen dem manot oder vf ostern dem hochzyt vrsachen halb vorge- sagt. WIE ABER vnd wenne die wort dero wir vns gebruchen
30 nit zû gehört näch gebürlicher eigenschaft jrer betütnüsz der dingen dar von wir schribent oder redent dar vmb das sy mer minder oder anders betütent als obgemelt ist. Wyle dise laster wol lichtenklich von aim yeden sint zemercken! so leg jch des nit exempel. Es ist aber ain notdurft zebe-
35 trachten eigenschaft der betütnüsz etlicher worten vnd die zusetzen vnd zegeben den dingen näch jrer natur oder ouch näch gelegenheit jrer würdigkait oder stenden vnd vnwürdig- kait vnd ouch näch wirde der oracion dar jnn sy gelegt wer-

den. Dann wer möcht nit mercken sträfbar sin der münch
bettet ritterlich so strydet der ritter andechnklich oder das
jch aim geburen zû geb Ersam ainem burger edel ainem edeln
knecht wolgeborn Ainem abt streng vnd vest. Oder wer wölt
5 nit versteen vngebürlich sin das Ich ainenn fürsten loben wölt
durch gytikait oder wüteryen da durch er billicher wer ze-
schelten oder hin wider vmb ainen sölichen wölt schelten
durch miltikait güte vnd tugend dadurch billicher sölt werden
gelobet. oder das jch ains dorfs schulthessen schriben wölt
10 vmb ainen karchen holtzes [248] vnd mich gebruchen hierInne
schöner klügen Worten vnd transupcionen daz Er mir erschy-
nen liesse günstigen willen vnd nützit inrysen hier an Irrende
das tett mich schuldigen zû sinen diensten noch schuldiger
binden zû grosser danckbarkait Im künftenklich zebewysen etc.
15 Welcher Worten dise sach vnd matery nit begert noch haben
wil vnd Ich hort ains mals an dem kaiserlichen hofe aines
fürsten botschaft den kaiser anreden vnd sprechen üwer er-
würdiggkait etc. dar von vber den selben ain grosz gespött ward
geschlagen. des gelychen hab jch an dem selben ende, ainer
20 mechtigen statt ratzbotschaft! hören reden mit aim edeln man-
der nit ain herre was! vnd sich gegen den selben stetz ge-
bruchen! des wortz üwer gnäd etc. welche ding lasterlich sint
vnd usz obgemelter lere sollen werden vermiten. Vsz dem
so ob steet Ir wol nu me mercken mugen daz gebürlicher
25 geschriben wurd dem vesten vnd strengen. Danne dem stren-
gen vnd vesten vnd gebürlicher dem vesten vnd edeln Danne
dem edeln vnd vesten. Vnd aber gebürlicher der ist des für-
sten diener vnd räte dann rät vnd diener. Item vnd das ge-
bürlicher geredt wurd Ich wil das tûn, vnd sölt es mich ge-
30 steen güt lyb eere vnd sel! Dann sölt es mich gesteen sel-
eer lyb vnd güt. Item grosser vnd treffenlicher ist so ain
fürst schribt daz ist vnser ernstlich mainung dann so er
schribt daz ist vnser güt gefallen! Wenne man aber die bede-
sament setzen wölt so bedüchte mich gebürlicher gesetzet
35 werden, daz ist vnser güt gefallen vnd ernstliche [248^b] mai-
nung! dann daz man schrib daz ist vnser ernstlich mainung
vnd güt gefallen etc. Vnd ist. daz alles usz obgemeltem
grunde daz die red vnd oratze vf stygen vnd sich meren sol

vnd niemer von ain grössern in ain minders fallen. dann
grösser ist rät dann diener grösser die sel dann die eer!
grösser der lyb dann daz güte es haben aber etliche edle ge-
schlecht durnierer fürgenomen wie wol sy nit herren syen
5 daz noch dann sy ain andern schriben sollen vnd wöllen dem
edeln vnd vesten! Vnd soll daz wort vest angehenckt wer-
den dem vorigen also daz es gesechen werd dem selben etwas
abziehen vnd dar by werd erkent daz die denen also geschri-
ben wirt nit herren syen. Vnd doch verstanden daz sy ander
10 gemain edel lüt vbertreffent! Aber nit lang ward es gehalten
man schribe andern schlechten edeln lüten ouch edel vnd vest
dann gewonlich ain yeder lieber zevil dann zelützel eren zû
gibt dem des er ist bedörfend vnd dem er deshalb schriben
sol! dar mit die recht form wirt geschwechert vnd nit ge-
15 halten darumb Ich am anfang geredt han! daz nit wol ye-
mant hier von ützt gewisses setzen mug vnd daz wir darumb
kunst lernen vnd doch die gewonhait halten sollen Aber noch
dann wil Ich dir hierInne enwenig etwas wyter entecken!
daz Ich nit gesechen werd darumb gantz wöllen schwygen
20 Des ersten so ist ze mercken in yeder vberschrift wem man
schriben wöll vnd von wem. Danne von mir anders ze
schriben ist ainem von Rechberg danne von ain edeln mane
Im gelych geborn oder genosz Dann der selb dutzet Inn! So
ich Inn Irtzen Item ain babste schribt ain fürsten edel! So
25 ain edel man dem selben schribt hochgeborn oder durlüchtig
Item ain edel man [249] schribt ain andern edelman minem
güten fründe so jch Im schrib minem lieben Junckherren.
Item die von costentz schribent den von zürich vnsern güten
fründen da die von bremgarten Inen schrybent vnsern lieben
30 herren. Des gelychen ist zwüschent andern daz lycht ist ze-
mercken.. Zum andern ist ouch zemercken was ain yeder
jm selbs vsz demüte nidrung oder von vndertenikait wegen
zû gibt! daz darumb sölichs dem selben widerumb zescriben
nit not ist noch sich gebürret. Als ob ain statt vnd commune
35 ain pfaltzgrauen by ryne kurfürsten sich vnderschribet üwer
fürstlichen gnäden willigen oder vndertänen burgermaister vnd
räte zû. N. Darumb sol noch müsz er jnen nit hin wider-
umb schriben vnsern willigen oder vndertenigen! Vnd daz

ain pfaltzgraue sich ainer statt vberschribt. N. von gottes
 gnäden pfaltzgraue by ryne etc. Darumb müsz noch sol Im
 die selb statt nit hin widerumb schriben. Daz wort von got-
 tes gnäden! dwyle der fürst daz getän hät usz demüt! Vnd
 5 daz ain babst sich gegen mengklichem schribt ain diener oder
 knecht der knechten gottes etc. Darumb sol man jm nit hin
 widerumb schriben aim knecht oder diener der dienern gottes
 vsz vor gesaitem grunde! Als des vil funden wirt in der
 epistel die ich getütschet hab! an den durlüchtigen fürsten
 10 hertzog sigmunden von österrich lutende Im von Enea siluio
 dem poeten gesant! darumbe Ich yetz hie in disem dinge des-
 ter kürtzer bin. Zum dritten so ist ze mercken als Ich vor
 obgemelt hab. Was vnd welich determinaciones meritorum!
 daz ist was Worten des lobs vnd der eeren ainem yetklichen
 15 in sinem stande syen zegeben. Dar zû Ich das sagen müs.
 Daz [249^b] in tütscher übung vnser landen vil sint der mai-
 nung vnd oppinion! sprechende daz dise wort aller durlüch-
 tigoster aller groszmechtigoster vnüberwintlichoster gnedigoster
 etc. In superlatiuo das ist in dem höchsten vbertreffe allain
 20 ainem römschen kaiser oder römschen künge zû gelägt vnd
 geben werden sollen. Danne der selb allain der aller oberst
 syg in weltlichem stande die andern künge kurfürsten fürsten
 vnd herren vbertreffend an wurden eeren vnd machte vnd das
 andern kungen die obgeschribnen wort zegeben syen in posi-
 25 tiuo daz ist äne vbertreffung als durlüchtig groszmechtig vn-
 überwintlich etc. des ich aber den selben nit gestee! sunder
 mit andern ainer andern mainung vnd oppinion bin daz ist!
 das dise wort yetz gemelt nit also an disem end bedächt wer-
 den sollen näch eigenschaft oder betütnisz des vbertrefs su-
 30 perlatiui also daz Ich sprechen vnd arguwieren wölt! ist der
 kaiser der aller groszmechtigost so müsz sin daz niemand me
 als groszmechtig syg als er. nain nit also sunder so werden
 dise wort superlatiui vermercket als wort des lobs vnd der
 eren groszküngklicher wurde billich vnd sust nit andern sten-
 35 den zûgehörig danne man ouch des gelychen schribt ainem
 cardinale reuerendissimo etc. daz ist dem erwirdigosten oder
 hochwirdigosten nit darumb daz Er als wirdig syg daz der
 andern kainer sich jm an wirdigkait mug verglychen! sunder

darumb daz ain söllich lobsam wort sinem stand vnd ampte zugehörig ist! danne jch vsz latinischen cantzlien groszmechtiger kungen vnd fürsten ouch vsser dem consily zû basel von hochverrûmpten maistern der rethorick, geschriben worden
 5 sin dem kûng von franckrych vnd des gelychen dem kûng von arrigon etc. vnd andern cristianissimo Serenissimo Inuictissimo oder jllustrissimo ac potentissimo vel metuendissimo [250] daz ist dem aller cristenlichosten durlüchtigosten aller vnüberwintlichosten aller groszmechtigosten vnd aller forchtbarsten
 10 welches letste etlich tûtschent aller forchtsamesten! aber nâch minem beduncken vbel dann ain kind ist forchtsam daz jm gern fürchtet vnd ain man forchtbar den man pflicht zefürchten. vnd ich find an dem ende söllicher worten halb des lobs zwûschen ainem römschen kaiser vnd söllichen groszmechtigen
 15 kungen nit vil vnderschaid in dem latin gehalten werden danne daz ich gesehen han aim römschen kaiser vsz dem consilio zû basel geschriben sin sacratissimo! daz ist dem aller höchst gesalbten daz Ich andern kungen nie hab gesehen sin geschriben worden! so pflicht man ouch vsz gewonhait tûtscher landen allain aim kûng von franckrych zescriben dem allercristenlichosten doch so mag das aim römschen kaiser ouch geschriben werden als ich ouch han gesehen also geschriben sin kaiser fridrichen vnd vor Im kaiser sigmunden doch vsz dem consili obgemelt Es mainen aber etlich gebürlich ain vnderschaid zwûschen aim kaiser. vnd groszmechtigen
 25 kungen vnd nidern kungen zehaben sin nâch gelegenhait vnd grösse irer macht wirde vnd herkommenhait also daz aim kûnge von behem von tenmarchk vnd dero gelychen geschryben wurd den durlüchtigen groszmechtigen fürsten vnd herren In
 30 positiuo! vnd aim kûng von franckrich vnd Arregon vnd andern Ir gelychen den durlüchtigosten groszmechtigosten vnüberwintlichosten etc. In superlatiuo vnd daz aim römschen kaiser ain zû satze geben wurd des wortes aller. Daz man schrib dem aller groszmechtigosten etc. Als wir dann ouch
 35 pflegen zetûn Im latin zescriben Prepotentissimo für potentissimo vnd perdoctissimo für doctissimo. Aber in söllichen worten die also ainem yetklichen nâch siner gebür zegeben weren wirt die [250^b] recht mäszt vnd ordnung nit gehalten!

sunder mer durch vf stygen daz man zû vil lobs gibt, danne
durch abfallen daz man zelützel geb geschwechert! danne wir
allwegen genaigter sint zeschriben vnd zereden das, daz dem
so geschriben wirt oder des man dann zemäl bedarf gern hört.
5 darvon dann entsteet daz man dem so zeschriben wer erber
oder ersam schribt vest vnd dem zeschriben wer vest schribt
edel vnd des gelichen für wolgeborn hochgeborn für hochge-
born durlüchtig für durlüchtig aller durlüchtigost! also be-
schicht ouch vnder burgern vnd geburen darumbe ich anefangs
10 vnd jm mittel gemelt hab nit wol von yemant in tütscher
zungen in disen dingen ützt gesetzt werden mugen aim yeden
gefellig vnd daz darumb vch näch zefolgen syg der maister
vnd besten gewonhait. lieber hans. So vil vnd obsteet vnd
nit mer hab ich diser schriften so vormäls von mir gesetzt
15 worden sint vnd dero du begert häst! funden vnd die jch dir
nit wolt verhalten danne ich do zemäl erwand vnd wyter hier-
june nit wolt volfaren vsz nechst vorgemelten vrsachen! Ich
hab ouch sidher erlernet! daz in der fürsten vnd herren
cantzlien ouch vnformlich titel gesetzt sint! denen näch!
20 dann aim yeden wirt geschriben Aber lycht ist zeversteen
ainen grössen vnderschaid sin der eeren vnd wiriden zwüschen
ainem kurfürsten vnd schlechten fürsten vnd zwüschen ainem
Ertzhertzen vnd schlechten hertzen! Wie wol vns nu
in tütscher zungen nit gebruchh ist! dann daz wir determi-
25 naciones meritorum daz ist die wort des lobs sölichen ständen
vnd wirdikaiten zügehörig an dem end wol haben! ouch in
etlichen cantzlien man sich dero gebruchet vnd aim kurfürsten
vnd ertzhertzen oder sust ouch ainem groszmechtigen [251]
hertzen als ainem hertzen von burgund schribet den dur-
30 lüchtigen vnd andern fürsten vnd hertzen den hochgebornen!
noch dann. so pfligt man in etlichen cantzlien den fürsten
allen vnd ainem wie dem andern nit höher zeschriben dann
dem hochgebornen fürsten vnd Ir kainem dem durlüchtigen!
darInne doch billich vnderschaid zehalten wurd! vnd das nit
35 anders verantwort wirt danne daz es also in der cantzlie
herkomen vnd yewelten also gehalten worden syg vnd Ich
waisz ainen bischiff klainer geburt vnd standes der aim grosz-
mechtigen herren verachtenklicher schribet danne des selben

bischofs ertzbischof oder die kurfürsten oder bischof so von
 geburt fürsten sint tügen dem selben herren schriben! daz
 ouch nit anders dann durch herkomenhait vnd gewonhait der
 selben Cantzlie wirt verantwort. Aber dem spruch năch Se-
 5 nece so solt ain gůte gewonhait vszschlachen was ain böse
 hette vnderrichtet vnd mag ain böse gewonhait (Als jch vor
 ouch gesagt han) niemer wol vnd recht genennet werden ain
 gewonhait sunder billicher ain miszbruhe vnd ob die cantzler
 sōlichs wol verstend vnd etwenne dar Inn gern gebürlich
 10 endrung tetten! so wil es von andern nit gelitten werden
 deshalb lieber hans Ich still steen vnd wyter dir zů diser zyt
 hierjnne nit vnderrichtung geben wil bisz hie năch! danne Ich
 die colores rethoricales! daz ist die farwen vnd zierung hof-
 liches dichtens von marco tulio cicerone gesetzt, alle zů
 15 tůtsche transferyeret vnd gebrăcht hab! vnd dar zů mer etwas
 nutzlichs vnd gůtes daz notariăte antreffend! setzen wil vnd
 daz alles lăssen trucken vnd vsgeen! vmb daz mine transla-
 ciones die ich gemachet [251^b] han vnd die man yetz trucket
 dester bas verstanden vnd die zierlichkait, vnd farwen darInne
 20 begriffen aigenlich gemercket werden mugen Ich wil ouch dar by
 yetz trucken lăssen das latine aller miner translacionen vnd
 tůtschungen so vor gemachet sint vnd daz tůn von gmaines
 nutzes wegen! vmb daz wol geschickt Jüngling vnd schůler
 vsz disem minem getůtschten ding sōlich costlich schwer vnd
 25 wol geziert latine lernent versteen sich darInne ũbent vnd dar-
 von wachsent vnd in wolgelert latinisch manne gerătent des
 villicht ouch etlich elterer Jăren bedōrffen mōchten etc. Vnd
 sōlichen trucke des latines findet man by mir ob got wil bis
 michahelis nechst daz wōllest andern sagen so du dar after
 30 wandelst vnd mich fůro hin achten vnd halten als andern
 dinen vatter in aller gůthait vnd trůwe dir zebewysen Geben
 zů Stůtgarten vf dem achtzechenden tage des hornungs Anno
 domini Millesimo quadringentesimo septuagesimo octauo Indic-
 cione vndecima.

ANMERKUNGEN DES HERAUSGEBERS.

Über Nicolaus von Wyle verweise ich auf die schrift: Niclasens von Wyle zehnte translation, mit einleitenden bemerkungen über dessen leben und schriften herausgegeben von Dr Heinrich Kurz. Aarau, bei Sauerländer, 1853.

Die schrift Eduard Niemeyers in Crefeld über unsern verfaßer habe ich nicht zu gesicht bekommen. Vgl. Zarnckes centralblatt 1852, 662.

Außerdem ist zu vergleichen :

Wilcken, Heidelberger büchersammlung s. 342 f.

Bronner, Kanton Aargau 2, 30.

Pischons denkmähler 2, 229.

Gervinus, geschichte der deutschen dichtung b 2, 238. 241. 258 f. 262. 383. d 2, 207 f. 222. 262. 345. 3, 78.

Wackernagels deutsches lesebuch 4, 360 f.


Gödekes grundriß s. 139.

W. Menzel, deutsche dichtung 2, 111.

H. Kurz, geschichte der deutschen litteratur 1, 747 ff. 3, 824.

Die translationen enthalten über den verfaßer mancherlei biographische andeutungen: z. b. 7, 3 nennt er sich Niclaus von Wyle, untersten kanzler des grafen Ulrich zu Wirtemberg und Mümpelgarte. 9, 6 wird erwähnt, daß er rathschreiber zu Nürnberg gewesen und bekannt mit Gregor Haimburg, doctor beider rechte. Nach 9, 14 hielt er früher einen kosttisch von jungen leuten, die bei ihm in die lehre giengen. 11, 3 wird der name seiner frau Christina genannt; beide sind bürger zu Nürnberg. 12, 20 er war zu Stuttgart am 5 April 1478. u. s. w.

Nachforschungen um notizen über Niclaus, welche Herr Director von Kausler im k. geheimen haus- und staatsarchive in Stuttgart auf meine bitte anzustellen die güte hatte, sind ohne bedeutenden erfolg geblieben. In dem sogenannten dienerbuche wird beim jahre 1476 aufgeführt «herr Nicolaus von Wyle Ulrici deß wohlgeliebten Cantzler.



boen ein beschloßen helm, 2 büffelhörner vnd auch ein stern.» 1460 bis 1477 wird ebendasselbst Johann Fünffer und 1476 Augustin von Hammerstein als kanzler aufgeführt. Johannes Fünfer wird in der einleitung der 5ten translation oben s. 113, 2 erwähnt.

Über Niclas als maler s. H. Kurz a. a. o. Zarnckes Centralblatt 1853, 723.

Die sprache Niclasens behandelt eine abhandlung von J. Kehr- ein in Herrigs Archiv für das studium der neueren sprachen 7, 378. Über den vocalismus verweise ich noch auf die eben erschienene abhandlung K. Weinholds über den beilaut. Wien, 1860. Hinsicht- lich des dort s. 11 als beilautes angeführten wortes bäm aus der nachlese der fastnachtspiele s. 123 bemerke ich jedoch, daß im schwäbischen zwar der sing. bôm, plur. bêm lautet, jenes bâme aber = bâme d. h. baume zu faßen scheint, wofür kurz zuvor bame ge- schriben ist. Auf der selben seite steht hât = hât d. h. haut = hât. Das misverständnis beruht auf der ungenauigkeit in der diphthonge- bezeichnung der handschriften und auf der unzulänglichkeit unserer druckereien, diese zeichen der hss. widerzugeben. In gleicher weise werden sich noch manche von Weinhold s. 10 f. aufgeführte fälle des beilauts ä bei genauerer betrachtung als diphthonge herausstellen. So ohne zweifel das beispiel aus meinen altdeutschen erzählungen s. 667, 37. In der originalausgabe des Niclas ist der diphthong ou gewöhnlich mit ö bezeichnet, wofür ich hier, um misverständnisse zu beseitigen, ø habe setzen lassen. Davon ist dann im original, wie in meinem abdrucke, der reine umlaut des o in ö genau unterschieden. Der alte druck bezeichnet diesen letztern durch ein deutliches über das o gesetztes e. So 204, 2 bömen, schwäb. plural von baum. Ebenso ist au mit einem über a gedruckten v bezeichnet, welches letztere in der mitte meist abgebrochen ist, so daß die form oft den schein von ä annimmt. Doch wäre es ganz dem geiste des süddeut- schen lautsystems zuwider, alle dise wären, stälent, käment, näch u. s. w. wie wären, stälent, käment, näch u. s. w. zu faßen. So möchte ich auch erschüf in der nachlese zu den fastnachtsp. 122 und die von Weinhold s. 13 weiter angeführten beispiele für ungenaue gra- phische bezeichnung des bekannten diphthongs uo, ue, uø ansehen. Das mit einem drüber gesetzten e versehene o mag zuweilen den

umlaut öu bezeichnen z. b. 187, 1 löff = löuf. 191, 6 erzöget = erzöuget. In andern fällen, z. b. 187, 2 höche, vertritt es œ.

An der interpunction des originals habe ich aus dem grunde nichts geändert, weil Niclas nach seinem eigenen ausspruche 15, 17 ff. dabei mit absichtlichkeit und vorbedacht zu werke geht. Wenn er auch seine ansichten keineswegs consequent durchgeführt hat, wenn auch in der alten druckerei von seiner vorzeichnung manchfach abgewichen worden sein mag, so schien mir doch geboten, an dem gegebenen nichts zu verrücken, und eine vollständige durchführung des alten systems ebenso unstatthaft, als ein verlaßen desselben und eine moderne satscheidung.

Dieser neuen ausgabe ligt zu grunde A der älteste druck, wahrscheinlich zu Eßlingen von K. Fyner 1478 ausgeführt, von welchem ich exemplare aus den universitätsbibliotheken zu Göttingen und Heidelberg benützt habe. Ein anderes findet sich in Mainz. Vgl. Herrigs Archiv 7, 378.

Über spätere, für die textkritik unbrauchbare ausgaben geben die bibliographischen handbücher aufschluß.

Die ausgabe von Straßburg 1510, welche ich noch vielfach verglichen habe, bezeichne ich im nachfolgenden mit B.

Die dritte ausgabe C ist Augsburg 1536 erschienen.

Ich gebe hiernach noch einige bemerkungen zu einzelnen stellen.

1 Dieser titel fehlt in der ältesten ausgabe. Ich ergänze ihn hier aus B.

4, 14 ? selben. 23 Der umlaut ü wird bald mit 2 strichen, bald mit 2 puncten über u oder v, bald mit einem übergedruckten e, bald mit einem übergedruckten häkchen bezeichnet. Damit ist nicht immer der unterschied von üe, lang ü und ü gegeben. Daher ich denn auch beim abdrucke überall ü oder v̄ setze. Ähnlich verhält es sich bei ä und ö.

5, 6 lies selbs und.

7, 23 Construction des accusativs mit dem infinitiv, wie häufig bei Niclas. Vgl. 10, 15 f. 17, 10. 19, 12. 23, 30. 25, 23. 28, 16. 30, 20. 31, 25. 44, 4 u. s. w.

8, 1 ? aber. Vgl. z. 3.

12, 2 yemer schad. Noch bei Grimmelshausen oft immer schade, jetzt entstellt jammerschade. 8 ? nit habe. 30 ? muster.

11, 6 ? liebhaberin. 24 ? gegen.

12, 21 Blatt 7 ist leer.

13, 2 ? Mechtilden.

14, 10 ? rüwen. 35 ? durch schickung.

15, 6 ? trägkeit. 10 Nach unnütze wäre fragezeichen zu erwarten. 15 Die absatzzeichen des originals gebe ich durch gedankenstriche wieder.

17, 1 Von der ersten translation ligt mir eine Augsburgur handschrift vor, welche ich in meinen altdeutschen handschriften unter n. 54 beschrieben habe. Über die erzählung von Euryalus und Lucretia verweise ich auf meine recension von E. v. Bülow novellenbuch in den Heidelberger jahrbüchern der litteratur 1837, 664 ff. Zu dem, was s. 666 über französische bearbeitungen der erzählung beigebracht ist, füge ich bei das auf der Tübinger universitätsbibliothek befindliche buch *Les amans de Siene, ou les femmes font mieux l'amour que les veuves ou les filles*, par Franc. de Louvencourt. Leyde, 1706. 8. Auch Achim von Arnim in seinem Wintergarten (sämmtl. werke 11, 1 ff.) hat die «liebesgeschichte des kanzlers Schlick und der schönen Sienerin. Nach einer alten erzählung» wieder erzählt. Ich bezweifle, daß Arnims quelle in S. F. Hahns *collectio monumentorum veterum et recentiorum* 1, 406 zu suchen ist, glaube vielmehr, daß er nach unserem Niclas von Wile erzählt habe. 5 Es gibt 2 Marianus Socinus oder de Socinis in jener zeit. Der ältere geboren zu Siena 4 Sept. 1401, war kirchenrechtslehrer zu Padua, dann zu Siena, durch Pabst Pius II zum advocaten des consistoriums ernannt, starb 30 Sept. 1462, nach andern 1463 oder 1467 zu Siena. Sein gleichnamiger enkel ist zu Siena 25 Merz 1482 geboren, ward doctor und professor der rechte in Pisa, Padua und Bologna. Beide werden als besonders dem umgang mit frauen ergeben bezeichnet; dem letztern soll seine frau 13 kinder geboren haben. Er starb 1556. Vgl. Jöchers gelehrtenlexikon 4, 656. Hier ist wohl der ältere Socinus gemeint. 15 gesprech deutet wohl auf die dialektik und rhetorik. 21 Ambrosius Aurelius Theodosius Macrobius lebte zu ende des 4 jh. am hofe des jüngern Theodosius, verfaßer der *saturnalia convivia* in 7 büchern, sodann einer nicht vollständig erhaltenen schrift *de differentiis stellarum et de magnitudine solis u. s. w.* 29 Petrus Papinius Statius aus Sella in Epirus, nach andern aus Neapel, geb. 61 lebte in Rom unter Kaiser Domitianus, starb in Neapel 96.

18, 6 anderer wie 17, 24. 39, 13. 14 Ist Paglarensis = Joh. Bapt. Pagliarini oder Pajarini aus Vicenza, verfaßer einer geschichte seiner vaterstadt? 17 Über ähnliche schwänke über schwangere männer vgl. H. v. d. Hagen, *Gesamtabenteuer* 2, ix f. Die altdeutsche erzählung von dem schwangern mönch, von dem Zwingäre oder Zwingäuer, findet sich auch in den handschr. 2, 158 d. 42, 125. Abge-

druckt, nach andern quellen, in Laßbergs Liedersaal 2, 393 und in Hagens Gesamtabenteuer 2, 49. Eine ähnliche erzählung ist die von dem müller mit dem kinde, erwähnt von J. Grimm in der deutschen mythologie b 437, herausgegeben in meinen altdeutschen erzählungen s. 463. 19 Ähnlich ist das motiv in Boccaccios Decameron 9, 3: Come Calandrino udì questo, dolorosamente cominciò a gridare e a dire: «Oimè, Tessa, questo m' hai fatto tu, che non vuogli stare altro che di sopra.»

19, 11 das wort hane ebenso s. H. Kurz, Niclasens 10 translation s. 15. 22 ? Socino.

21, 28 ? größer. Die zeichen ö und õ werden nicht selten verwechselt.

27, 8 ? Mäenas. 19 B vffrichtigen.

28, 2 B Synen. 29 ? Boreæ.

31, 22 ? getroffen.

32, 1 Über dieses sagenhafte liebesabenteuer Virgils s. Liebrechts Dunlop s. 187. 483. Liebrechts auswahl aus des Gervasius von Tilbury otia imperialia s. 262. Hagens Gesamtabenteuer 2, 513. Fastnachtspiele aus dem 15ten jahrhundert s. 263. 6 Auch Aristoteles wird oft im mittelalter als beweis der schwachheit der männer erwähnt. Vgl. das spil von meister Aristoteles in der nachlese zu den fastnachtspielen s. 216. 332. 338. Vgl. weiter altd. hs. 1, 21. 2, 82. Hagens Gesamtabenteuer 1, 21.

37, 7 ? gauben mir iez. B gouben mir zügesant.

38, 8 Augsb. hs. meinem finger.

42, 9 f. fehlt zum theil in der ausg. 1510.

44, 2 ? stiefsune, der des bald. B stieff sun, der do bald eu-riolo bracht die trurigen b. 21 Ausg. von 1510 weret.

45, 21 B wartende.

46, 23 nie] Hs. nie, der druck hat me. Die hierdurch unverständlich gewordene stelle hat B ganz ausgelassen.

47, 20 Hs. forcht. 22 B richtig: schätzt. Die folgenden worte sind dann wieder ausgelassen.

49, 12 Da die endungen en und em oft und so auch hier mit der gleichen abkürzung angedeutet sind, könnte zweifelhaft sein, ob ainem oder ainen zu lesen ist. B einen glücklichen wind. 25 ver-kaltent] B verbehaltent. 30 wære daß = für denn fall daß, wenn. So mhd. oft ist daz. Vgl. s. 66, 30. 37. Wackernagels deutsches lesebuch 1^d, 1076, 12. 16. 1077, 32. 38. 1135, 19 f. 37 B brieff in kleinen schrynen truchen noch küsten nit funden wurden.

50, 5 B narren. 20 fabel] Vgl. s. 53, 18. Petrarca im ersten
N. v. Wyle.

sonnett: Ma ben veggi' or si come al popol tutto favola fui gran tempo, onde sovente di me medesimo meco mi vergogno.

53, 6 Amnon ward der Thamar gram, nachdem er bei ihr geschlafen hatte. 2 Sam. 13, 15.

55, 5 Die geschichte von Kandaules erzählt Herodot 1, 8 ff. 34 B vff iungfrawen perment.

56, 6 B viol. 26 B Baccarus.

57, 7 B hochzyt. 20 B wo dz glück geholffen hett. 38 B sperren.

58, 2 B Menelaus wolt ryten. 4 ? saturnâlen. Der man. 5 B cleidern. 33 B kramatfogel.

59, 24 B tet yn mitten.

60, 1 B liebhabest. 8 B kürzt die stelle ab. ? nottürftig. 18 B keller.

61, 36 B selben.

62, 3 B schnell. 24 B wider.

66, 6 ? fröw. 18 B schmerz: dyser grossen stat. ? In diser.

67, 3 B behüt. 10 B welcher.

68, 26 B dartzû ein zeichen.

69, 4 B blieb. 37 B blyben.

70, 34 B bißher.

72, 24 B bald die roß in.

73, 4 B einen weg. 26 B mich mit dir. Ich wil dir glychen.

74, 9 B wenn wir.

75, 2 ? Penelope. 8 B dyser loub betrübt.

79, 24 Boccaccios Decameron 4, 1.

81, 15 ? zuo zir.

85, 19 B wyplich gebirlichkeit: als vil dyn liederliheit. ? dîn sûmseli. 32 B wollüst: die ich zû zyten. 34 B brantent.

86, 19 B wir. 35 B gemeinen.

98, 29 ? geloubst du, daß. 30 B Tragedius.

99, 23 B mit gewalt bringen.

101, 25 B enpfahest.

104, 4 ? begâbet.

111, 1 B verümpstisten.

113, 2 Über Johannes Fünfer vgl. die bemerkung aus dem dienerbuch des Stuttgarter staatsarchivs, welche ich oben s. 366 angeführt habe.

114, 23 Pabst Nicolaus V bestieg den thron 1447, nicht 1444, wie Förster im handbuch für reisende in Italien. München, 1846. s. 103 angibt. Vgl. Jöchers gelehrtenlexikon 3, 914. 24 Fabien ist Fabriano, stadt in der delegazion Macerata, südwestlich von Ancona.

Die reise des pabstes nach Fabriano geschah 1449. 27 Karl von Arezzo ist Carlo Marsupini aus Arezzo, gestorben 1453. Vgl. Jöcher 3, 214.

127, 26 ? dir ein.

130, 18 ? an dem namen.

131, 10 ? leben.

141, 23 Auf derselben vergleichung beruht der ausdruck bettfüter fastnachtspiele s. 320. nachthunger ebendasselbst s. 109. 160. 641. 725. 732. 748. 750. 755. 792.

147, 13 verjöcket] B verietücht.

159, 36 Psalm 109, 19.

163, 27 B Eleuterius.

165, 29 B hat hier die überschrift Hemmerlin.

176, 5 B marck (Notat de cele.

181, 12 B Lolhart redt. Wirt u. s. w.

198, 1 Niclasens von Wyle zehnte translation, mit einleitenden bemerkungen über dessen leben und schriften herausgegeben von Dr Heinrich Kurz. Aarau, 1853. Vgl. dazu Heidelberger jahrbücher 1854, n. 20. Blätter für litterarische unterhaltung 1854, 590. Kurz folgt in diesem abdrucke B.

208, 1 gebürren ist gewöhnlich mit rr geschrieben. Niclaus will dadurch die kürze des stammvocalen retten. Vgl. 223, 18.

210, 32 ? lesest.

212, 17 ? ain. 34 ? die.

224, 20 ? licht.

226, 16 ? from.

236, 26 ? zederböm.

237, 29 ? dem.

239, 13 ? mittel.

242, 30 B und. 34 B täglichs.

246, 1 B Capua. 2 B Syracuse.

249, 22 B büch. 27 B macht.

250, 17 B Augustins.

254, 28 B ernst.

255, 5 B umb.

258, 20 ? ainen.

259, 18 B schluffent.

262, 34 B weder. 37 die — was] fehlt B.

265, 17 B flüchtiger.

277, 21 ? sîn.

278, 17 ? hübscher. 19 ? tâten.

- 279, 27 ? ainen.
302, 24 ? schandlichen.
303, 27 ? libe.
306, 31 ? erkantnus.
312, 37 B etlich. ? eelich.
315, 1 tobes] B todßhalben. ? todes.
323, 22 ? die da.
357, 11 ? untergang.

INHALTSÜBERSICHT.

	seite
Translationen	1
Register	3
Vorrede	7
I.	13
II.	29
III.	91
IV.	103
V.	113
VI.	123
VII.	145
VIII.	152
IX.	157
X.	195
XI.	221
XII.	231
XIII.	248
XIV.	283
XV.	314
XVI.	325
XVII.	336
XVIII.	349
Anmerkungen	365

8

T

